

Lettres de rémission de la chancellerie de Bretagne 1521, 1522 (n. s.)

Archives départementales de Loire-Atlantique, B 26 et B 27

Transcription par Mathieu DUBOIS, *Culture et société en Bretagne d'après les lettres de rémission, 1520-1522*, maîtrise, université de Nantes, 2000.

Correction par Lucy Guerreiro, assistante ingénieure de recherche :

B 26 : 40, 43, 52, 56, 59, 60, 62, 63, 64.

B 27 : 69, 70, 72, 76, 80, 88, 89.

Annotation par Michel Nassiet

B 26, 1521.

N° 1. (27¹)

[2r] Remission de meurtre pour Jehan Monbeche,
dont la teneur ensuult cy apres.

LE FOURBEUR

[2v] François etc, savoir faisons a touz presents et avenir, nous avoir receue l'humble supplicacion des femme, parens et amys consanguins de nostre povvre subgett Jehan Moubeche le jeune, natiff et originaire de la parroisse de Montour en nostre barrognye et seigneury de Foulgeres, contenant que la nuyct devers le matin d'entre le samadi, premier jour delcembre derroin et le dimanche ensuyvant, se rendyt a l'huy de la maison ou estoit demourant ledit Moubeche, ou bourgc de Lomer en la parroisse du (?) soulz nostre juridicion de Foulgeres, ung nommé Guillaume Duval de la parroisse de Montour, lequel appella audit huys demandant iceluy luy estre oupvert. Et pour ce que ledit Moubeche cougnut celuy Duval a la parolle, luy fist oupvrir ledit huys et entra ledit Duval en icelle maison et monta en une chambre haulte ou estoit couchez ledit Jehan Moubeche et sa femme et illec arivé dist ledit Moubeche, que lors qu'il estoit party de sa maison ou il estoit demourant ou villaige du Rehoiet en ladite parroisse de Montour a distance de ladite maison dudit Moubeche d'un quart de lieue ou envyron. Quel cuydit qu'il feust jour et qu'il estoit la venu pour devoir ouyr messe a une chappelle estante pres ledit lieu de Valaines a laquelle l'on a acoustume de dire messe au matin par chacun dismanche. Et sur ce, se leva et habilla ledit Moubeche et voyant qu'il

¹ Numérotation dans le mémoire de Dubois.

n'estoit encore jour, se coucha sur son lict et assez tost apres ariva audit huys de ladite maison, ung nommé Colas Lesaige autrement dyt Dumoulin, filz de Michel Lesaige dit Dumoulin demourant en lieu de Valaines a distance de ladite meson d'un gect de pierre ou envyron, lequel Colas appella audit huys disant telles ou semblables parolles : " Moubeche ! baillez moy la cleff des estables de la Babiniere pour mettre le cheval du greffier de Fougères, quel est venu en ce bourgc ! " auquel ledit Moubeche demanda pourquoy estoit ledit greffier oudit pays a icelle heure, auquel ledit Colas Lesaige respondit que ledit greffier et Jullien Moeunot l'un des sr de la court dudit Foulgeres estoit la venuz pour prendre Guillaume Bessart. Et assez tost apres se rendirent a ladite maison ou estoit ledit Moubeche, (/) Jullien Levayn exerczant d'office de ladite court de Foulgeres, ledit Jullien Meugnot sergent et ung nommé Jehan Goupil. Eulx ainsi arivez en ladite maison, ledit Meugnot sergent fist somacion audit Moubeche que il feust aller avecqs eulx de par la justice dudit Foulgeres prendre ledit Guillaume Bessart quel demouroit audit lieu de Valaines, disant que la prinse estoit commandé sur iceluy Bessart et que ilz avoient comission s'adressante aux sergens, hommes et subgetz d'icelle, de iceluy prendre et le rendre a justice. En obbeissant a laquelle somacion et commission, ledit Moubeche alla avecques lesdits gens de justice chacun d'eulx garniz d'une espee ou rapiere a leurs costez, et ledit Goupil d'un baston ferré en maniere d'une demye picque et ledit Moubeche garny d'une espee quelle il print en sadite maison et en leur compaignye ledit Guillaume Duval quel fut pareillement sommé de faire estant celuy Duval garny d'une espee a son costé, quelle espee il avoyt lorsqu'il ariva en ladite noise dudit Moubeche ainsi que dyt est. Et comme ilz furent arivez au devant de maison dudit Bessart, ilz se departirent et allerent aucuns d'eulx au derriere de ladite maison dudit Bessart et autre partie a ung huys estant ou costé d'icelle maison et les autres demeurèrent audit huys de devant d'icelle maison affin de garder ledit Bessart ne feust sorti hors ladite meson, quel ne feust eschappé et qu'ilz l'eussent prins. Et eulx ainsi departy, ledit Meugnot quel estoit l'un de ceulx qui estoit demouré audit huys de davant de ladite maison appella ledit Bessart, quel estoit marchal, dist celuy Meugnot audit Bessart qu'il eust oupvert son huys et que eust feré le cheval dudit Meugnot quel il disoit estre defferé. A quoy ledit Bessart respondit qu'il n'avoyt point de fer et ledit Meugnot de rechieff luy dist par telles ou semblables parolles : " mon amy leve toy et luy estimans soy faire quel ne le perde ". Et sur ce ledit Bessart respondit par telles parolles ou semblables: " Il y a la-bas (/) ung gros faulx tesmoign qui me menace ! " Et voiant ledit Meugnot que ledit Bessart ne vouloit oupvrir ledit huys, luy dist celuy Meugnot par telles ou semblables parolles : " Guillaume, oupvre et viens a justice ! " A quoy ledit Bessart respondit qu'il n'ouvriroit point son huys, jurant par le sangc-Dieu, par la chair Dieu, que le

premier qui y entreroit, y demeuroyt, criant a l'ayde sur ses larrons. Et voyant lesdits gens de justice, ledit Moubeche et autres estans en ladite compaignye, que ledit Bessart ne vouloit oupvrir sondit huys, rompirent l'huys de ladite meson o une hache a couper boys quelle ledit Colas Lesaige querir ches ledit Michel Lesaige son pere, et entrerent en icelle maison touz assemblemens. En laquelle maison, ne fut prins aucuns biens a la cougnoissance dudit Moubeche et n'y trouverent ledit Bessart, obstant qu'il s'en estoit fuy. Et voyans, ceulx Lebayer et Moeugnot, que ilz n'avoient peu prendre ledit Bessart en sadite maison, firent cerché en terres des envyrons d'icelle esperans le y trouver, ce que ne firent. Et apres icelle cherche pour ce que n'estoyt (?), ilz prinsdrent conseil ensemble de se retirez et mettre en la maison dudit Michel Lesaige pere dudit Colas, disans que celuy Guillaume Bessart se pourroit retirez et retournez a sadite maison et qu'il cuyderoyt que lesdits dessusdits s'en seroient retournez hors des envyrons dudit Vallaines. Et deffaict allerent a ladite maison dudit Michel Lesaige en actandant que le soir feust venu, ce que ne tarda gueres apres que ilz y furent arivez et eulx estans en aguect actendans savoir et ouyr si ledit Bessart seroit retourné a sadite maison, se rendyt pres de ladite maison dudit Lesaige, ledit Guillaume Bessart estant garny d'un baston et ferement appellé ung picrays autrement appellé ung broc de fer. Et assez pres de luy estoint ung nommé (/) Jacques Lesaige dyt Dumoullin, quel est proche parent desdits Michel et Colas Lesaige dit Dumoulin et ung nommé Robin Martin menuisier de ladite parroisse d'Iffré demourant ou villaige de la Houssaye. Lequel Bessart a son arivee dist telles ou semblables parolles : " le sange Dieu, ce gars Colas Dumoulin, ceste nuyct m'a faict desrobez par brigans qu'il a amenez a ma maison ! " Et sur ce lesdits Meugnot sergent, Le Bayer greffier, Jehan Goupil, ledit Moubeche, Guillaume Duval, Colas Lesaige dit Dumoulin et autres assemblement saillirent de ladite meson dudit Michel Lesaige enbastonnez ainsi que dyt est, esperans prendre et aprehendez de corps ledit Guillaume Bessart quel alors estoit assez pres de ladite maison pour iceluy conduyre et menez es prinsons dudit Foulgeres disans : « prenez, prenez ce paillart ». Quoy voyant, ledit Bessart se mist a la fuilte par devant le moulin de Vallaines et a travers des terres du villaige de la Bourreliere pres ledit lieu de Vallaines tirant allez vers le villaige de la Poterye estant es parroisses de Saint-Jehan de Ogles et d'Ispre, a distance dudit lieu de Vallaines de demy quart de lieue ou envyron. Et apres luy couroit ledit Moubeche et autres d'avant nommez crians sur ledit Bessart prenez prenez et ayant lors en leur compaignye deux chiens que lesdits greffier, Moeugnot et Goupil avoient amené avecque eulx dudit Foulgeres, queulx chiens courroient apres ledit Bessart a raison que le voyant courir et aussi que les dessusdits couroit apres. Et voyant ledit Colas Lesaige dyt Dumoulin lorsqu'il fut en une piecze de terre pres ledit villaige de la Bourreliere

que celuy Bessart couroit beaucoup plus fort que ne faesoient lesdits Colas Lesaige et Moubeche, queulx estoient les premiers apres ledit Bessart, se despoilla ledit Colas Lesaige (/) en chemise et pareillement se deschauza ses solliers. Et ce faict courut de grande force et diligence apres ledit Bessart et apres luy couroit pareillement ledit Moubeche et les autres devant nommez disant souvent en courant prenez, prenez, prenez, parlans dudit Bessart. Et comme ledit Moubeche fut arivé en une piecze de terre assez pres dudit villaige de la poterie icelle nommee les poteryes, en partie de laquelle piecze y avoit des genetz (?) et en autre partye de l'herbe et aucunes que landes de genetz qui lors nagueres avoint esté coupez, trouva en l'oree d'icelle piecze decouverte de genetz, ledit Colas Lesaige et ledit Guillaume Besart estans lors chez contre terre sur costé viz-a-viz l'un de l'autre et tenoient assemblement avecques mains l'espee que ledit Colas avoit porter avecques luy, quelle estoit nue et s'efforczoit chacun de sa part icelle espee, aparoissoit lors celuy Bessart estre bleczé en la teste de laquelle yssoit grant habondance de sangc. Et craignant ledit Jehan Moubeche que celuy Bessart, quel estoit fort et puissant homme jeune et renommé dangereux ou (?) qu'il eust osté audit Colas Lesaige sadite espee et luy feust demourer entre ses mains et que d'icelle il eust excédé lesdits Colas Lesaige et Moubeche, affin que plus facilement ledit Bessart eust esté contraint et mys en subgection pour luy faire laisser ladite espee et a ce que la justice eust esté la plus forte, frappa ledit Moubeche de sadite espee ung coup de taille au bas d'une jambe dudit Bessart, a l'occasion duquel coup yssu de ladite jambe effuzion de sangc et outre donna du plat de ladite espee, deux ou troys coups sur le corps et membres dudit Bessart. Et en l'instant ceulx Bessart et Lesaige s'entre lascherent et lesserent choirs ladite espee, quelle estoit lors rompue par la lemelle a ung pié et demy ou envyron de la poignye et croexde d'icelle et la ploumee d'icelle espee sortie et cheue. Et se leva ledit Colas Lesaige (/) et demeura ledit Bessart a terre, et alors aperceut ledit Moubeche que celuy Bessart estoit fort bleczé en la teste et aussi qu'il estoit bleczé en ladite jambe. Et tout incontinant, illec ariverent lesdits Guillaume Duval et Jehan Goupil et pareillement apres eulx et en l'instant ariva ledit Moeugnot. Et apres que celuy Moeugnot et autres eurent regardé ledit Bessart, celuy Moubeche ne doubtant que celuy Bessart feust par raison desdites playes et exceix cy-dessus constitué en danger de mort et qu'il n'eust playes qui ne feussent facilement curables, affin d'avoir honneur et louange d'avoir aydé a justice, dist et profera par pluseurs et reiterés foiz que celuy Bessart avoit voulu se rebeller lorsque ledit Moubeche estoit arivé a luy et que ledit Moubeche du premier coup qu'il avoit frappé avoit couppé l'espee dudit Colas Lesaige, laquelle ledit Bessart avoit ostee audit Lesaige, combien que ce ne feust veritable. Et mesmes dist et profera ledit Moubeche par telles ou semblables parolles pour avoir louenge comme

dyt est, savoir: " par le sangc Dieu ! je l'ay bien boucdé je luy ay donné bien estoit ! " en parlant dudit Bessart. Et apres avoir esté ainsi bleczé, ledit Bessart se departit d'illec ledit Moubeche et s'en alla vers ledit lieu de Vallaines. Et bientost apres retourna en ladite piecze et lieu ou estoit ledit Bessart en la compaignye dudit Moeugnot et porta celuy Moubeche ung ban pour raporter iceluy Bessart a sa maison audit lieu de Vallaines, ce qu'ilz firent. Et eulx y arivez, sur ce que l'on disoit que celuy Bessart se mouroit, ledit Moeugnot sergent dist audit Moubeche que il l'avoit trouver luy et ledit Colas Lesaige dyt Dumoulin avecques ledit Bessart et que lorsqu'il les y avoit trouvez que ledit Bessart estoit ainsi bleczé. Et sur ce ledit Meugnot saesit ledit Moubeche au colet luy disant qu'il le faisoit prinsonnier de nous et qu'il l'ameneroit (/) en prinson audit lieu de Foulgeres en actendant voirs si ledit Bessart gariroit ou si il mourroit. Et deffaict le mena ledit Moeugnot, audit lieu de Foulgeres sans ce que ledit Moubeche feist aucune resistance contre ledit Moeugnot, disant voulloir bien aller a justice pour ce qu'il ne se craignoit ne doubtoit dudit faict cy-dessus, par raison qu'il n'avoit commis ne faict chose si non en obbeissant a justice a comme luy sembloyt. A l'occasion desquelz coups, ledit jour de dimanche par deffault de bon pensement, traictement ou autrement, ledit Bessart alla de vie a trepas. Nous remonstrans lesdits parens et amys supplians que ledit Jehan Moubeche est jeune homme de l'eage de vinct cinq ans ou envyron, maryé aiant charge de femme et de petiz enffens et que auparavant ledit cas advenu, il estoit bien famé et renommé sans jamais avoir esté actaint ny convaincu d'aucun mauveix ne villain cas, blasme ne reproche et que ilz doubtent que a raison dudit cas, qui fut par cas inopiné ne peurpené de la part dudit Moubeche l'on veille vers luy proceder a toute rigueur de justice, nous suppliant qu'il nous playse a tout ce que dessus avoir esgard et d'icelluy cas, impartir audit de Moubeche noz lettres de grace, remission et pardon tres humblement le nous requerant. Pourquoy, etc, pourveu qu'il en personne presentera esdites noz presentes lettres de grace, remission et pardon aux prochains ou seconds generaulx plectz de nostre court et barre de ()

N° 2. (28) 31 janvier 1521 (n. st)

[34v] Remission de meurtre pour Jehan

Jullienne et Pierre Merand son gendre

dont la teneur ensuist :

MANDART

Françoys etc, savoir faisons a touz presens et advenir nous avoir receu l'humble supplicacion et requeste des parens et amys consanguins de Jehan Jullienne et Pierres Mérand son gendre de l'evesché de Rennes, contenant que puix la feste de Toussaincts derreine, a ung jour de dismanche ou moys de novembre derroin, comme ledit Jullienne s'en alloit a sa maison de ches ung nommé Jehan Corneze, qui tenoit taverne de vin breton aupres de la lende de brin en la parrouesse de la Chapelle Calaudronz oudit evesché de Rennes, en laquelle maison ledit Jullienne avoit celuy jour beu et prins sa refection et estoit assé eschauffé de vin et qu'il passoit par la court de feu Perrequin Lamoureux demourant pres ladicte lande de brin, pour ledit Jullienne s'en aller par le jardrin dudit deffunct qui estoit le droit chemyn et rote anxienne a tirer a la maison dudit Jullienne. Et que iceluy Jullienne passoit par devant la maison dudit Lamoureux, aperceut Jehan Lamoureux estant acoudé sur le contre huys de l'entree de sadite maison auquel ledit Jullienne dit telles parolles ou denotentes tel effect : " tu n'amandras point le chemyn en l'endroit de ton jardin ! ". A quoy ledit Lamoureux, quel estoit comme ja dit, aussi eschauffé de vin, dist et respondit audit Jullienne quelzques parolles que il n'entendit, mais luy sembla quelles estoient rigoreuses. Et sur ce ledit Jullienne dist (/) audit Lamoureux telles parolles : " tu as menty comme ung villain houllier ! tu es houllier de ta femme, se tu ne le veulx amander, je te aiourne d'office aux prouchains plectz a respondre au procureur de Saint-Aulbin ! ". Et assez tost apres sortit ledit Lamoureux hors sadite maison, garny d'un baston de boys, gros comme le manche d'un fleau et courut apres ledit Jullienne et le ataignyt ainsi que il avoit ja passé l'eschallier du jardrin d'iceluy Lamoureux et dudit baston frappa une collee sur ledit Jullienne. Lequel incontinant saisit ledit Lamoureux au corps et s'entre prindrent au poil, et en bohardant l'un contre l'autre s'entre abatirent contre terre et estoit ledit Jullienne dessus ledit Lamoureux et y furent quelque espace de temps et puix s'entre lascherent et se releverent. Et eulx relevez, ledit Lamoureux de rechieff ayant ledit baston, feist contenance et s'efforça d'en voulloir frapper ledit Jullienne, a raison de quoy eulx estans eschauffez, de rechef s'entre prindrent au poil et s'entre abatirent contre terre. Et lors se trouva ledit Jullienne, dessoubz ledit Lamoureux lequel outrageoit iceluy Jullienne, l'esgraignoit et tenoit a la corge, il qui estoit beaucoup plus fort que ledit Jullienne. Lequel se sentant ainsi oultragé, se escrya a haulte voiz : « A l'ayde ! A la force ! » En l'endroit duquel cry, ledit Pierre Merand qui estoit illec pres en une autre taverne de vin breton que tient ung nommé Jehan Ribaud, oyant ledit Jullienne qui estoit son beau-pere faire ledit cry alla hastivement celle part et trouva encores (/) lesdits Jullienne et Lamoureux choays a terre, s'entretenans et estoit ledit Lamoureux dessus ledit Jullienne et d'un baston de boys que avoit ledit Merand, qui est jeune et puissant homme, en frappa une collee de grant reteur sur les rains et au

travers du corps dudict Lamoureux qui estoit adans sur ledit Jullienne. Et pour ce que, iceluy Lamoureux ne lascha ledit Jullienne pour ledit coupt de baston, ledit Merand frappa iceluy Lamoureux ung grant coup de pied ou ventre et tira ledit Lamoureux de dessus ledit Jullienne qui saignoit du visaige. Et s'en retourna ledit Merand en la taverne dudict Ribaud et laissa ledit Jullienne debout et ledit Lamoureux encores couché a terre qui se plaignoit desdites collees. Ches lequel Ribaud, ledit Merand dist telles parolles : " Je viens de battre ung villain ! Je luy aye donné ung beau coup de baston et ung grant coup de pied ! " Oultre nous ont lesdits supplians remonstré que ledit Lamoureux se trouva a raison desdits exceix si grandement bleczé et grevé que dedans deux ou troys jours apres iceulx exceix, il alla de vie a deceix. A raison duquel cas lesdits Jullienne et Merand sont en proceix et accusacion, a instance du procureur de nostre court et barre de Saint-Aulbin-Du-Cormier par laquelle ilz ont esté aiournez par plusieurs termes et contumaxez la prinse de leurs personnes commandee et leurs biens prins et inventorisez (/) et n'osent y comparoir doubtans que s'ilz estoient prins que l'on voulsist vers eulx proceder a toute rigueur de justice, combien qu'ilz soient gens de bon rest et gouvernement sans jamais avoir esté reprins ne accusez d'aucun autre mauvais ne villain cas. Et que ce que ledit Merand en a fait se a esté en chaleur pour secourir sondit beau-pere qu'il trouva ainsi choaist soubz ledit Lamoureux, contre lequel ilz n'avoient auparavant conceu hayne ne inimitié, nous supplians lesdictz exposans, qu'il nous plaise sur ce que dessus avoir regart et dudict cas impartir ausdits Jullienne et Merand grace, remission et pardon tres humblement le nous requerans. Pourquoi etc, pourveu touffoiz qu'ilz en personne presenteroit cestes noz presentes lettres de grace, remission et pardon aux prouchains ou seconds generaulx plectz de nostre court et barre de Saint-Aulbin-Du-Cormier par devant nostre senneschal dudict lieu.

N° 3. (29) 16 février 1521

[45v] Remission pour Pierres Pegastine, sergend
forestier de la forest de Touffiou et
Collecte Raffin sa femme de que
par cy davant avoit esté seellé et
registree ou reste faire mectre des sellés
de laquelle la teneur ensuyst de celle
de ce jour sellé.

DUVAL

[46r] François par la grace de Dieu etc, savoir faisons a touz presens et a venir nous avoir receu l'humble supplication des parens et amys consanguyns de noz pouvres subjectz Pierres Pegastince nostre sergend et forestier en nostre jurisdiction et forest de Touffou et de Collecte Raphin sa femme, chargez d'enffans, demourans ou villaige de Gastines pres nostre chateau dudit Touffou en la parroisse du Bignon en ceste nostre comté de Nantes, detenez es prisons de nostre Bouffay de Nantes par ladite court de Touffou, contenant que ou moys d'octobre derroin aultrement ne savent limitez le temps, ledict Pegastince comme il alloit pour l'exercice de sondit office de forestier visiter ladite forest pour la garder et preserver, ainsi qu'il avoit a coustume, apres y avoir esté par longtems se trouva las a travailler, s'en alla ledit de Pegastince prendre sa refection en notredit chateau dudit Touffou ou lors y avoit vin exposé en vante et illecques a raison de la paine et travail qu'il avoit souffert et enduré, mengea et but a grand ardeur et de la s'en alla a sa maison esperant y trouver sa femme, ce qu'il ne fist a raison que celluy jour, elle estoit venue en ceste notredite ville de Nantes ainsi que lors luy disdrent les voysins. A ceste cause, ledit de Pegastince print son chemyn a s'en retourner audit chateau, ouquel chemyn et environ my voye d'icelluy, rencontra sadite femme quelle luy dist qu'elle estoit fort lasser et a ceste cause avoit beu sa part d'une pinte de vin audit chateau sans manger a raison qu'il n'y avoit lors pain et qu'elle avoit fain. Et lesdits Pegastince et sa femme retournez a leur dite maison, ladite femme se mist hastement a faire du feu et y mectre le pot pour aprester le souper et comme ladite femme yssut hors ladite maison pour sercher du boays, aperceut ung jeune garson nommé Jehan Landoy asgé de xiii ans ou environ, filz de feu Pierres Landoy et Ysabeau Guillou a present femme de Martin Pegastince parent dudit Pierres detenu es proches voysins demourans audit villaige de Gastines, qui tenoit en sa main une petite gaulle ou rameau de boays duquel il batoit la truye desdits detenez. Et ce voyant, ladite femme dudit Pierre, esmeue et couroucee de avoir veu battre sadite truye quelle estoit plaine, dist audit garson qu'il estoit mauveix paillardeau et laronneau d'avoir frapé sa povre beste qui ne luy faisoit mal quelconque et sur luy donna de sa main sur sa joue, et surtant ledit garson donna a icelle femme dudit Pegastince de sadite gaulle ou rameau sur la teste. A raison de quoy, elle s'escria a haulte voueiz disant : " mon amy, aydez moy ! aydez moy mon amy, je suis morte ! ", auquel cry ledit de Pegastince (/) detenu, ayant une dague de long de pié et demy ou environ a son costé ainsi qu'il avoit a coustume et ung baston ferré d'un bout en sa main cougneut la voueiz de sadite femme et incontynant tout esmeu sortit hors de sadite maison et alla vers sadite femme qu'il trouva entre les mains de troys ou quatre autres femmes et cuydant roser lesdites femmes et autres y assistans et ayder a sadite femme fut ledict Pegastince prins, posé et oultraigé et sadite dague et baston ferré osté par ledit Jehan Landoy

quequesoyt ledit baston et luy ainsi oultraigé ne ayant toutesvoyes aucune intention de blecer lesdits assistans ains les femmes, roser et reculler et secourir sadite femme, icelluy detenu evagina ung bastardeau et d'icelluy frappa et en rua ainsi qu'il luy semble ung coup ou deux n'est membre contre ne contre lesquelz, pour ce qu'il estoit bien et fort tart et a tant se departirent lesdits assistans. Et apres eulx, s'en alla la femme dudit detenu en la maison dudit detenu ou elle trouva en la chemynee pres le feu Guillemecte femme Guillaume Pegastince que l'on pensoit estre grosse d'enffant. Et incontinent sortit de ladite maison l'un des enffens dudit Pierres Pegastince detenu, qui luy dist : " mon pere, allez vous en ! Guillemecte a esté blecer ! ". A ceste cause, ledit Pierres Pegastince secretement s'en alla et entra en la petite chappelle de notredit chateau de Touffou ou il coucha celle nuyt et de la, le landemain au bien matin avoit ouy dire que s'estoit ladite Guillemecte qu'il avoit blecé le soir d'avant et qu'elle estoit en dangier de mort dont il en fut fort desplaisant, a raison qu'elle estoit mariee avecque son parant. Et iceulx Pierre et Collecte detenez, prinsdrent leur chemyn par (?) forest droict a Remoullé. Auquel lieu ilz ouy vent dire que ladite Guillemecte estoit decedee et a la verité le landemain dudit debat deceda ladite Guillemecte et luy fut trouvé deux coups, l'un au dessus du nombril et l'autre ou flanc. Et pour ce furent muez et cachez en ladite forest par troys jours et troys nuictz sans boire ne menger et dudit Remoullé par crainct de fain, traverserent chemyn de peur d'estre rencontrez et allerent a Cliczon (/), a Partenay et ailleurs a grant froict, fain et nectessité pui retournerent a leurdite maison le tiers jour de janvier present moys. En laquelle maison, ils furent le landemain prins par et de l'auctorité de notredite cour de Touffou et conduictz en notredit chateau de Touffou et apres dudit chateau au bourg de Pont-Roux ou tenoient les plez de notredite jurisdiction par nostre senneschal dudit lieu. Et vers eulx procedé par inquisition par notredit senneschal et d'illecques par luy envoyez prinsonniers en noz prinsons dudit Bouffay de Nantes ou ilz sont detenez et enferrez a grant destresse et misere de leurs personnes. Si nous remonstrent lesdits supplians que ledit Pierre Pegastince detenu, est veil homme de l'asge de LX ans et plus et que jamais n'avoit eu debat, question ne querelle avecque ladite decedee et ne penczoit l'avoir frapee mays seulement entendoit oster ledit debat, aussi qu'il a demouré et usé la pluspart de son temps au servince defence princesse de bon memoire, la duchesse Anne que Dieu absolue laquelle pendant sa vuyduysté se tenoit en notredit chateau de Touffou avecques laquelle ledit detenu estoit et fut jucq a son deceix son serviteur et lacays, bien amé d'elle et de ses gens de sa maison et avoir esté et estoit bien vivant sans jamais avoir esté reproché d'aucun autre vil cas jucques a celluy de present. Et dempui le deceix de ladite duchesse, a esté et est ordinairement jour et nuyt, a nostre service sergend de notredite court de Touffou et forestier en notredite forest. Et combien qu'il et

aultres sergeans et forestiers, a raison de leurs offices qui sont haigneusses ne soint amez de toutes gens (?) des delinquans en notredite forest, raportez par eulx en notredite justice ou il sont reprins ainsi qu'ilz ont de coustume faire, neantmoins lesdits supplians et (?) ledit detenu est bien voullu et aymé de toutes gens, tenu et réputé notoirement et publicquement homme de bien honneste vie et convesacion regiecté de populaire tant en sondit bailliaige que aultres bailliaiges et par apres se neantmoins lesdits supplians craignent estre en rigueur par noz officiers procedé vers lesdits detenuz. A raison de quoy, (/) ilz seront en dangier de mort, nous supliens actandu ce que dessus, il nous plaise remectre, quicter et pardonner ausdits detenuz le fait et meurtre dessusdit et sur ce leur impartir et octroier, noz lettres de grace, remission, quictance et pardon tres humblement le requerant icelluy. Pourquoi etc, l'adresse aux juges de (). Donné a Nantes ou moys de febvrier l'an de grace mil cinq cens xx et de nostre regne le vii^{eme}, ainsi signé sur le replot par le roy, duc a la rellacion du conseil Duval, visa et sellé en cire verd.

N° 4. (30)

Remission pour Jehan Bienassis dict Petit, de la paroesse de St-Pierre de Cropsnuz, dont la teneur ensuyst :

Françoys, par la grace de Dieu roy de France et duc de Bretagne, a touz presens et a venir, savoir faisons nous avoyr receu l'humble supplication des parans et amys de Jehan Bienassis dit Petit, de la parrouesse de Saint-Pierre de Cropsuiz ou diocese de Rennes, contenant que le jour et feste de Noel derroin passé, ledit Jehan Bicassuis estant au cymetiere de l'eglise parochial dudit Cropsuiz, ung nommé Loys Basille se rendit vers ledit Bicuassis et le tira a part, puis luy dit qu'il luy estoit advenu une fortune et que l'on luy avoyt apporté ung enffent et qu'il convenoit audit Bicuassis luy ayder a le rapporter a la maison de Thebaude Myrand, veuffve de Geffroy Bonnier, en ladite paroesse, quel enffant ledit Bassille estimoit, ainsi qu'il disoit, que ce avoyt esté une fille dudit Geffroy Bonnier qui le luy avoyt porté ou fait porter pour ce que ladite fille disoit ledit enffant estre audit Basille. Sur debat de quoy, lesdits fille et Basille avoynt longc temps playdoyé par la court de l'official de Rennes, et pour faire consentir ledit Bicuassix a luy ayder a reporter ledit enffant, ledit Basille luy dict par telles ou semblables parolles : « Vous et votre pere me devez votre fouaige ! Je vous attendry encores si vous me voulez me ayder a reporter ledit enffant ! », ce que luy promist faire ledit Bicuassix, (/) et ce fait, se despartirent ledit Basille et ledit Bicuassix d'ensemble. Et peu de temps apres et ledit mesmes jour, ledit Bicuassix se transporta en une taverne que une nommee Perrine Tourtelier tenoyt lors oudit bourgc, en laquelle taverne ledit Bicuassix trouve

Jehan de La Montaigne dit Berangier, Thomas Veulier et ledit Loys Basille qui buvoient en une chambre, et se assist aussi ledit Bicuassix a boyre avecque eulx, ausqueulx ledit Basille dit qu'il failloit qu'ilz luy aydassent a reporter ledit enffent que luy avoyt esté ainsi apporté, ce que les dessusdits promisdrent assemblement faire la nuyt prochaine ensuyvant. Et apres ce qu'ilz eurent beu et compté ce que avoyt esté par eulx despencé, ne set ledit Bicuassis combien ledit Basille paya le tout d'icelle despence, et de la s'en allerent, ledit Berangier, Veulier, Basille, Bicuassix et ung nommé Olivier Durel en une aultre chambre de ladite taverne, nommee la chambre neufve, en laquelle ilz beurent de recheff assemblement et y despencerent somme de monnoye dont ne set ledit Bicuassix ne faire declaration, quelle somme ledit Bassille semblablement paya. Et ce fait, ce partirent a requeste dudit Loys Bassille touz assemblement pour aller en la maison dudit Bassille, a laquelle ilz soupperent, et estoit lors envyron une heure de nuyt. Et apres qu'ilz eurent souppé, ledit Loys Basille prya les dessusdy de aller chez ung nommé Marcoux, ce qu'ilz accorderent, et firent et firent (sic). Auquel lieu trouverent ledit Marcoux et sa femme et ung pbreste nommé dom Guillaume Roulleaux, et en icelle maison beurent encores et mengerent, et illec se vestit ledit dom Guillaume Roulleaux d'un (biault) de toile et print ung couvrechef dont il se coueffa pour se desguiser, et ceulx de la compaignie qui ainsi le voyoint coueffé, le nommoient Guillemecte, et puy print ledit enffent que ledit Basille disoit luy avoyr esté apporté. Et de la, assemblement lesdits Bicuassix, Berangier, Veulier, Durel et Loys Basille et aussi ledit dom Guillaume qui portoit ledit enffent allerent en la maison de ladite Thebaude, veuffve dudit Bonnier dessus nommer, estante en ladite parrouesse de Cropsuiz pres laquelle ilz arriverent envyron l'heure de dix ou unze (/) heures de nuyt. Et eulx ainsi arrivez se despartirent et s'en allerent, partie d'eulx a l'huy de derriere d'icelle maison, et ledit Bicuassis a l'huy de devant pour garder qu'il n'en yssut personne. Et ce fait par ledit Berangier fait appellé audit huys de derriere et demandé a ladite veufve qu'elle eust ouvert ledit huys, a quoy fut par ladite veufve respondu et dict qu'elle ne l'ouvriroit point. Et sur ce l'un des dessus nommez, que ne set declairer ledit Bicuassis, dict a ladite veufve par telles parolles : « Par le sangc-Dieu ! vieille, vous ouvrirez ou nous gectrons l'huy en la maison ! vieille sorciere ! vieille houlliere ! le sangc Dieu ou aultre blaspheme, vieille putain ouvre l'huy ! » Et en ce disant, butoint et frappoint les dessusdits de grans coups contre ledit huys. Et voyant ladite veufve qu'ilz voulloint entrer par force, se print a haulte voix a cryer a l'ayde, a la force de nous. Et lors ung nommé Yvon Bernard, lequel estoit en ladite maison, se print a parler et dire audit Berangier telles ou semblables parolles : « Hee Berangier ! Que nous as-tu, nous ne te fismes jamais desplaisir ! » Neantmoins lequel, tousiours frappoint ceulx qui estoient audit huys et hurtoient contre ledit

huys de grans coups, tellement que ledit Bicuassix ouyt grant bruyt audit huys de derriere comme si ledit huys fut choist et rompu, lequel Bicuassix alla veoyrs que c'estoit et trouva que dessudit ledit huys estoit choist et partie de la muraille de ladite huisserie. Par laquelle huisserie et rompture, y avoyt auchuns des dessusdits, dont ne set ledit Bicuassix fayre declaracion du nom, qui gectoint des pierres en ladite maison, et ne set s'ilz en actaignerent aucune personne, et cependant ouyt tousiours ladite veuffve cryer a l'ayde, a la force de nous. Et au regard de ceulx qui estoient dedans ladite maison, ilz ataignerent d'une pierre ledit Berangier. Et lors et lors (sic) lesdits Bassille et Durel le prindrent entre leurs braz et luy banderent o ung linge la teste en laquelle il avoyt une playe et en saignoit bien fort, ainsi que fut dict audit Bicuassis, juroit et blasphemoit ledit Berangier le nom de Dieu, disant a celuy que ainsi l'avoyt blecé qu'il le tueroit. Et en hayne de ce, ledit Berangier, avecque son espee, couppa ung (auton) quel estoit pres ledit huys de derriere de ladite maison, (/) et celuy seoir, les dessusdits coupperent une branche de vigne estante en vollyer et deux ou troys prunyers qui estoit pres ladite maison, ainsi que ledit Bicuassis oyt dire. Et ce faict, ledit Thomas Veulier, voyant ledit Berangier blecé, dist par telles ou semblables parolles a ladite veufve : « Berangier est fort blecé ! », jurant par Dieu ou aultre serment du nom de Dieu. « Il fault que vous baillez de l'argent pour le faire pencer ! », luy respondit ladite veufve qu'elle n'en avoit point et qu'ilz prinssent de ses biens et qu'ilz en eussent trouvé dessus. A quoy fut de recheff par ledit Veulier dict qu'ilz n'avoynt que faire de gaigne et qu'il ne leur failloyt que de l'argent pour faire pencer ledit Berangier et pour boyre. A quoy ladite veufve respondit que si de seureté elle osoit aller dehors, qu'elle yroit chez ung de ses voisins veoyrs si elle en pourroit trouver sur gaigne. Et sur ce luy fut dict que yssut hardiment et qu'elle ne auroit nul mal, et ainsi qu'ilz parloint ensemble, dist ledit Berangier a ladite veufve par telles ou semblables parolles : « Prenez sest enffant, vieille ! » Et pour ce que ladite veuffve ne osoit aprocher, luy fut, par ledit Bicuassis et aultres de ladite compaignie, dit qu'elle aprochast hardiment. A donc se aprocha ladite veuffve et print ledit enffant, lequel ledit dom Guillaume luy bailla et l'emporta ladite veuffve en ladite maison. Et ce faict, fut par ledit Veulier persisté que ladite veufve baillast de l'argent ainsi que devant, sur quoy ladite veufve yssut hors ladite maison ayant une poasle d'arain en sa main, disante aller chez l'un de ses voysins veoirs si elle pourroit trouver argent dessus pour bailler audit Berangier. Et tout incontinant peu apres retourna ladite veufve, laquelle dist qu'elle n'avoyt peu trouver argent sur ladite poasle. Quoy voyant, ledit Veulier dict a ladite veufve que portast ou envoyast le dimanche prouchain ensuyvant ou bourg dudit Corpsuiz, par ledit Yvon Bernard ou aultre, la somme de vingt soulz et si ledit Berangier n'estoit audit bourg baillant ladite somme pour bailler audit Berangier. Et

finablement entr'eulx fut convenu que ledit dimanche ensuyvant (/) ladite veufve porteroit ou enverroient ladite somme de vinct soulz et si ledit Berangier n'estoit audit bourg baillant ladite somme audit Thomas Veulier, ladite veufve en demoureroit quicte. Et ce faict se departirent les dessusdits et dit ledit Berangier a ladite veufve que s'il y avoyt faulte, il retourneroit et brulleroit sa maison. Et au regard dudit Bicuassis il s'en alla et retira en la maison de ses pere et mere sans aultre chose faire. A l'occasion desqueulx cas et exceix, icelluy Bicuassis a par les officiers de la court de Chasteloger, appartenant au sr de Chasteaubriand, dont est ledit Bicuassis subject, de son personnel esté prins et constitué prisonnier es prisons dudit lieu, et y est encores a present detenu, ferré et en basse fosse, a pain et eaue. Et craignent et doubtent lesdits supplians que lesdits officiers veullent proceder contre ledit prisonnier a rigueur de justice si par nous ne luy estoit sur ce imparty nostre grace, nous supplians que ledit Bicuassis est povre jeune homme, chargé de femme et grant nombre de petitz enffans, et qu'il a par cy-devant tousiours esté de bon rest et gouvernement, bien et honnestement vescu et bien amé des gens du pays, sans jamays avoyr esté convaincu ne actaint de aucun aultre mauvays cas, blame ou reprouche, et que la compagnie qu'il fist audit Basille avecque les aultres dessusdits, de reporter ledit enffant, estoit soubz coulleur que ledit Basille luy disoit que luy et ladite fille qui avoyt apporté ou faict apporter ledit enffant en sa maison, avoint eu proces ensemble et que ce luy eust esté une fortune si ledit enffant fut demouré en sadite maison, sans avoyr ledit Bicuassis frappé ne faict aucune violence ne exceix, il nous plaise remiser, quicter et pardonner ledit cas audit Bicuassis et sur ce luy impartir nosdites grace, remission, quittance et pardon, tres humblement le nous requerant. Pourquoi etc, la veriffication (/) adressee aux juges de Rennes, pourveu etc. Donné a Nantes ou moys de mars l'an de grace mil cinq centz vinct et de nostre regne le septiesme, signé sur le replot par le roy et duc a la relacion du conseil, Duval, visa, et scellé en laz de soye et cire vert.

N° 5. (31)

Françoys, par la grace de Dieu roy de France et duc de Bretagne, savoir faisons a touz presens et advenir nous avoir receu l'umple supplicacion et requeste des parens et amys consanguins de nostre povre subject Guillaume Maczon, jeune compaignon menuisier de la parouesse dudit Chastelier en la juridiscion de Foulgeres, contenant que comme le lundi sixiesme jour de novembre derruner, ledit Guillaume Maczon ayant une espee a son costé avec un baston a se appuyer et Guillaume Lores, quelz Maczon et Lores estoient voysins et demourans l'un pres de l'autre ou villaige du Perroux en ladite parouesse dudit Chastelier,

feussent partiz dudit villaige assemblement, environ troys heures de souleil levant d'icelluy jour, pour aller en la maison d'un nommé Moubeche en la parrouesse de Lendean tendant celluy Lores achapter dudit Moubeche ung mortier de terre a faire buee pour Jehan Marquier, maistre dudit Lores, et ledit Maczon pour achapter en iceluy villaige, du boays de planches et carreaux pour besougner de menuiserie, qui est le mestier d'icelluy Maczon. Et eulx arrivez en ladite maison dudit Moubeche, celuy Lores achapta et feist marché avecques celuy Moubeche d'ung mortier pour faire buee et au regart dudit Maczon ne feist achapt d'aulcunes planches et carreaux obstant que il n'en trouva. Et ce faict, prindrent lesdits Maczon et Lores chemyn a eulx en retourner oudit villaige du Perroux et ainsi eulx retournans, trouverent en leur chemyn en une garenne appartenant au sr de La Vieulxville, syse en ladite parouesse du Chastellier, ung nommé Jacquet Lomygne enbastonné d'un vouge de haye et en sa compaignie une nommee Jehanne Labbé, femme de Guillemyn Lores demourant audit lieu de la Vieulxville et ante dudit Guillaume Lores, quelz Lomigne et ladite Jehanne Labbé parlerent et densoint ensamble. Et adce que ledit Guillaume Maczon fut en l'endroit ou estoinct lesdits Lomigne et (/) ladite Jehanne Labbé, pourtant qu'il estoit bruyt que iceulx Lomigne et ladite Jehanne conversoient charnellement ensamble, celuy Maczon leur demanda et dist par telles parolles : " que festes vous la ! ". A quoy luy respondit ledit Lomigne en fieres parolles : " qu'en as tu a faire ! " et sur ce, ledit Maczon luy dist : " il te vaulsist mieulx estre a ta maison ! ". Sur lesquelles parolles, ledict Lomigne gecta une pierre qu'il tenoit en sa main audit Maczon, laquelle luy ataignit a la teste, tellement que a l'occacion du coupt de ladite pierre, le bonnet que avoit celuy Maczon sur sa teste tomba a terre. Et ce voyant, ledit Maczon desplaisant de l'oultraige que luy avoit faict ledict Lomigne et craignant que plus grandement l'eust faict, en chaulde colle, tira et evagina sadite espee de laquelle, en disant audit Lomigne telles parolles : " tu n'as pas bien faict de m'avoir ainsi frappé ! ", donna ung coup d'estoc au ventre dudit Lomigne. Et sur ce, ledict Lomigne dudit vouge qu'il avoit frappé ledit Maczon et oudit conflict, ledit Maczon frappa de sadite espee ung aultre coup en l'un des braz dudit Lomigne et eulx ainsi se baptans et oultraigeans l'un contre l'autre desdites espee et voulge, ledit Maczon de sadite espee gecta ung aultre coup audit Lomigne lequel coup tomba sur le menche dudit voulge et rencontra l'une des mains dudit Lomigne. A l'occacion duquel coup furent troys doiz de sadite main coupez, et oultre en iceluy conflict fut celuy Lomigne bleczé en une jambe et incontinant apres (/) se retira ledit Maczon et illec laissa lesdits Guillaume Lores et Lomigne, quel Lores conduysit et mena ledit Lomigne a sa maison. A l'occacion desqueulx coups, par deffault de bon pensement, gouvernement ou aultrement, ledit Lomigne alla desdits troys jours apres ensuyvans de vie a deceix. A raison duquel cas, ledit Guillaume

Maczon craignant rigueur de justice, s'est absenté de cedit pays ouquel il n'oseroit se repatrier sans tout (?) avoir obtenu dudit cas noz lettres de grace et remission, nous remonstrant oultre lesdits parens et amys supplians que ledit Lomigne estoit homme scandaleux, debatif, rumoureulx et noysif quel avoit faict ung enffent a sa germaine a l'occacion de quoy avoit esté par l'official de Rennes, comdempné estre eschallé ce que fut faict, et ledit Guillaume Maczon avoir esté auparavant ledit cas advenu, bien famé et renommé de bon rest et gouvernement sans jamays avoir esté ataint ne convaincu d'aucun aultre mauveix ne villain cas, blasme ne reprouche. Aussi que ledit Maczon est povre jeune homme de mestier, ne possedent aulcun bien et vivant seulement a la paine et labeur de son corps et que lesdits Maczon et Lomigne n'avoient auparavant eu hayne, question, debat ne differant ensamble et ledit cas estre advenu par cas inoppiné et non prepensé, de malle fortune et en chaulde colle, nous suppliant qu'il nous plaise (/) a tout ce que dessus avoir esgart et dudit cas impartir et octroyer audict Guillaume Maczon noz lettres de grace, remission et pardon tres humblement nous requerant iceulx. Pourquoi etc, la verifficacion adreseé au juges de Foulgeres pourveu etc. Donné a Nantes ou moys de mars l'an de grace mil cinq cens vingt et de nostre regne le septiesme, signé sur le replot par le roy et duc a la relacion du conseil Le Forbeur, visa et scellee en layz de soye et cire vert.

N° 6. (32)

François, par la grace de Dieu roy de France duc de Bretagne, a touz presens et a venir, savoir faisons nous avoir receu l'umble supplicacion et requeste nous faicte des parens et amys consanguins de Olivier Ganel, de la paroesse de Plougueneuc ou diocese de Dol, contenant que puis quatre ans derroins, ledit Ganel achata d'un nommé Guillaume Frete une beste porchine pour certaine somme de monnaie convenue entreulx, laquelle beste par apres, celuy Ganel fist mettre en prez ou es brou de la Chesnaye en la paroesse de Pleder appartenant au sr de Beaufort². Quelle beste dempuis s'en retourna ches ledit Frete qui la print et recueillit et icelle tua, salla et retint en sa maison, quoy venu a la cougnoissance dudit suppliant se plaignit au sr de Gleaquin, filz dudit sr de Beaufort, lequel commanda a ung nommé Lefeu et ung aultre nommé Guenart, ses serviteurs qu'ilz feussent allez ches ledit Frete et qu'ilz eussent fait serche pour trouver le lart de ladite beste. Et deffaiet y allerent et avecques eulx, Guillaume Marie, Olivier Prioul et ledit Ganel quel n'entra en la maison dudit Frete et ne aprocha d'icelle pres pres (sic) de demy lieue. Et lesdits nommez, arrivez ches ledit Frete y

² Chateaubriand.

trouverent et prindrent deux costez de lart cachez soubz de la paille, quelz disoient estre les costez de ladite beste. Et pour ce que ledit Frete fut trouvé saesy desdites deux costez, lesdits Marie, Priou, Lefeu et Guenart s'avancerent de prandre de leur auctorité en ladite maison dudit Frete deux moyennes poelles et deux bacines darain, deux pinctes d'estain, une selle a cheval de harnoys, une touaille, ung couvrecheff et une couz a faulx, disans qu'ilz auroint leur commyssion avant rendre lesdits biens et les porterent et aussi lesdites coustez de lart audit lieu de la Chesuaye, et demoura le tout entre les mains desdits Marie et Priou sans que lesdites costez de lart aient esté restituez audit Ganel. Lequel n'a tousjours (/) eu a debatre que lesdits biens eussent esté renduz et qu'il feust vallablement recompancé de sadite beste, et a dempuis ouy dire que lesdits nommez auroint converty lesdites costez de lart en despance. Et a quelque temps apres, a ung jour sur sepmaine se trouverent et assemblerent ensemble ou bourg de Plougueneuc, ledit Guillaume Frete et lesdits Marie et Prioul, ledit Ganel et Estienne Cohan et allerens ensemble boyre ches Pierres Morel. Et apres qu'ilz eurent beu et mangé, demanda ledit Frete aux dessurdits qu'ilz luy rendissent sesdits biens ou luy dire la cause et raison pourquoy ilz les avoient et detenoient. A quoy respondirent, lesdits Prioul, Marie et Ganel, qu'ilz les avoient prins par commandement du sr de Beaufort et que ce qu'ilz en avoient faict estoit par commyssion dudit sr de Beaufort et qu'ilz estoient ses serviteurs, ce que n'estoit ains fut par le commandement dudit sr de Gleaquin, filz dudit sr de Beaufort, duquel ilz estoient serviteurs comme dessus est dit. Mais neantmoins disdrent audit Frete que s'il leur vouloit rendre ladite beste porchine, qu'ilz luy rendroient sesdits biens ou feroient rendre fors ladite selle de hernoys, qu'ilz disant ne pouoir rendre et que elle avoit esté portee a une des metaeries dudit sr de Beaufort et qu'ilz ne la pourroient recouvrer de ce que n'estoit semblablement vroy ains fut trouvee ladite selle en la maison dudit Guillaume Marie. Et fut lors appointé entreulx pour recouvrer, ledit Frete sesdits biens, qu'il poyeroit la somme de vinct soulz quelle il leur donneroit ne confessant celuy Frete avoir prins ladite beste porchine et outre fut dit que ledit Frete poyeroit la despance que avoient celuy jour faicte (/) ches ledit Morel qui se montoit environ huict soulz monnaie, quel escot poia celuy Frete. Et ce fait, ceulx Marie, Prioul et Ganel, disdrent audit Frete qu'il ne se actendist point a recouvrer sesdits biens et qu'ilz ne les rendroient ny ne feroient rendre et eulx estans ainsi a boyre ches ledit Morel disoient par aucuneffoiz qu'ilz n'avoient lesdits biens entre leurs mains et qu'ilz estoient entre les mains d'un moyne et autres serviteurs dudit sr de Beaufort, ce que n'estoit pareillement vroy ains estoit entre les mains desdits Marie et Prioul disans audit Frete qu'ilz trouverroient faczon de les luy faire rendre, lesquelz biens lesdits Prioul et Marie ont dempuis party. Et d'iceulx baillerent audit Ganel pour reconpance de party de sadite beste, l'une desdites poesles et ung baczin

darain, quelz sont de la valleur d'environ quinze ou vinct soulz qu'eulx ledit Ganel n'a eu tousiours a debatre d'iceulx rendre audit Frete, le recompanzant de sadite beste qui bien valloit cinquante ou soixante soulz ou environ. Remonstrant lesdits supplians que dempuis ce, lesdits Marie et Prioul ont esté par la court de Chasteau-neuff par le procureur d'icelle, accusez desdits cas cy-dessus et proceié vers eulx, decreté audit Prioul, quelz Marie et Prioul ont nyé et desdit avoir prins lesdits biens cy dessus. Et au moien de quoy furent constituez prinsonniers es prisons de ladite court de Chasteau-neuff et ce venu a notice dudit Ganel suppliant, craignant pareillement aprehendé de justice s'est absenté dudit Plouguemeuc, remonstrant outre lequel est chargé de femme et quatre petiz (/) effans ne ayant ne possedant aucuns biens fors par son labeur et jamais n'avoir esté accusé d'aucun mauvais cas digne de reprouche ancois s'estoit tousjours bien porté estoit de bon rest et gouvernement et lorsqu'il alla ches ledit Frete, n'y alloit fors sur espoir que ledit Frete luy eust fait reconpance de sadite beste porchine, sans avoir autre intencion, nous suppliant qu'il nous plaise abollir, quicter et pardonner ou remectre audit Ganel ledit cas tres humblement le nous requerant. Ainsi signé par le roy et duc a la relacion du conseil P. Texier et sellé en laz de soye et cyre vert.

N° 7. (33)

Françoys etc, a touz presentz et a venir savoir faisons nous avoir receu l'umblé suplication et requeste des parens, amys consanguyns de noz pouvres subgectz Jullien Gaultier, Denys Bessac et Jehan Guedos, exposans comme puix l'an, ledit Gaultier, quel est ouvrier en noz monnayes de Nantes, ait dict audit Bessac quel est (?) en icelle monnayes, eulx y besoignans ensemble, que les ouvriers de ladite monnaye du service de l'Empire luy avoit faict perdre certaine somme de deniers et que s'il vouloit, il en seroict bien rescompancé luy disant outre que a celle fin il convenoit que ledit Bessac eust lessé la place desdites monnayes grasse, ce que luy acorda celuy Bessac. Et trouva le landemain ensuyvant, celuy Denis Bessac en ladite placze ouict pieces d'argent non blanchies ne merchés, quelles il bailla audit Gaultier quelles ouict pieces d'argent, qui baillees avoint esté aux ouvriers desdites monnayes pour ouvrer et faire, ledit Gaultier porta ches luy pour blanchir avecques aultres pieces qu'il print esdites monnayes jucques a qarante-neuf et les blanchict et les bailla audit Jehan Guedas, monnoyer esdites monnayes du service de France, lequel les mercha en ladite monnaye et dempux en bailla audit Denys Bessac jucques au nombre de trante et deux pour porter audit Jullien Gaultier, ce qu'il fist et en bailla celluy Jullien audit Bessac ouict pieczes. Lesquelles choses, venues a la cougnoissance des officiers desdites monnayes, ont (/) esté lesdits Gaultier,

Bessac et Guedas de l'auctorité du genneral d'icelle, prins et a raison dudit cas constituez prisonniers en noz prisons a Bouffay de Nantes. Et craignent estre vers eulx rigoreusement proceddé, tant par le genneral que noz juges de Nantes. Nous remonstrans oultre lesdits supplians que lesdits tenuz sont jeunes gens soubz l'asge de vignt-cinq ans, chargez de femmes et petiz enffans et les aucuns d'eulx receuz esdites monnayes puix deux moys et quequesoyt puix la Toussains derroine, ne ayans cougnoessance de l'effect et consequence dudit cas par eulx commis et perpetré et auparavant ledit cas, vivans honnestement sellon leur estat et sans aucun reproche, nous supplians qu'il nous plaise leur remectre, quicter et pardonner ledit cas et sur leur impartir de noz graces, remission et pardon tres humblement le nous requerant. Pourquoi nous, lesdites choses considerés, voullans misericorde preferer a rigueur de justice a nous aujourd'huy de nostre auctorité et grace especial plainiere puissance et auctorité souveraine remis, quicté et pardonné, remectons, quictons et pardonnons par sesz presentes (/) ausdits Jullien Gaultier, Denys Bessac et Jehan Guedas et a chacun d'eulx le cas et crime dessusdit avecques toutes et chacunes les paines tant pugnicions et amendes tant corporelles et criminelles que civiles. En quoy a celle ocasion, ilz et chacun d'eulx pouront estre chez et encouruz envers nous a justice en les redresant et restituant et par ces presentes et chacun a leur vie, femme, estat, bonne renommee, biens et possessions quelzconques tout ainsi que ilz estoient auparavant ledit cas advenu et comme si oncquesunes ne l'eussent commis ne perpetré. Pourveu touteffoiz que ilz en personne presanteront cestes noz presentes en nostre court de Nantes davant nostre senneschal dudit lieu, le peuple y assemblé et parties complaignantes sancunes soit presentes ou appeles pour faire verifficacion dudit cas, laquelle faicte, voullons oultre qu'ilz soient detenuz de leurs personnes jucques a avoir faict satisfaction a parties ynteressés (?) tant seullement si faicte ne l'ont esté, donnons en mandement par ces memes presentes a noz presidans, senneschaulx, allouez, prevostz, procureurs, leurs lieutenants et aultres qu'il apartiendra de ces noz presentes (/) grace, remission et pardon et de tout le contenu en cesdites presentes faire souffrir et laisser lesdits Jullien Gaultier, Denys Bessac et Jehan Guedas et chacun plainement et paisiblement joyr et user cessans touz impeschemens au contraire et dudit cas imposons sillence perpetuel a nostre procureur dudit Nantes present et advenir, sauff en aultres choses nostre droict et l'autruy en toutes. En tesmoign de quoy, et affin que ce soit chose ferme et estable a durer a tousiousmays, nous avons faict mectre et apposer nostre scel a cesdites presentes en laz de soye et cire verd. Par ainsi le voullons et nous plaise il estre faict. Donné a Nantes ou moys de mars l'an de grace mil cinq cens vignt et de nostre regne le septiesme.

N° 8. (34)

Françoys, par la grace de Dieu roy de France duc de Bretagne, savoir faisons a touz presens et advenir nous avoir receu l'umblé supplicacion des femmes, parans et amys consanguyns de nostre povvre subject Jacques Thebaud manovrier et gaignant sa vie a la paine de ses bras, a present et ung an et demy a ou environ estant en franchise en l'eglise des Jacobins de ceste nostre ville de Nantes, contenant que comme ou moys d'aougst l'an mil cinq cens dix-neuff, ledit Jacques Thebault et feu Guillaume Donecte, René Robert et Jehan Ausserel eussent prins assemblement marché de mener et conduyre certain nombre de sablon et aultres actroictz pour les ediffices encommancees tant en l'eglise de Sainte-Cleve que en la maison de maistre Jacques Giron en ceste notredite ville de Nantes. Et comme a ung jour dudit moys, ainsi qu'ilz estoit pour ce faire besougnans au port Briant-Maillart, hors notredite ville et pres de la ripviere de Loyre, lesdits Donecte, Robert et Ausserel prindrent chemyn a eulx en aller en notredite ville, disans audit Jacques qu'ilz alloint querir de l'argent d'un nommé Feuillet. Et illecq laisserent ledict Jacques chargeant ung tombereau dudit sablon, ouquel lieu ledict Jacques en ce faisant et par quelque espace de temps, voyant le retardement de sesdits compaignons et qu'ilz ne retournoit a leur besougne, print chemyn a les aller chercher et les trouva en la compaignie dudit Feuillet en une maison appelée la maison de Ransay ou lors y avoict taverne. Et a son arrivee leur dist par telles parolles ou semblables que s'estoit trop demouré et s'ilz n'avoient point de honte d'avoir tant arresté. En l'endroit de quoy, ledit Feuillet presenta audit Jacques Thebaud a boyre en ung verre et beust celuy Jacques et apres avoir ainsi beu, iceluy Donecte dist audit Jacques telles parolles ou semblables : " tu as bon temps de boyre qu'il ne te couste riens (/) et a moy il me couste ! ". Et ce faict en allant touz ensemble a leur besougne, apres avoir mené audit Feuillet en ladite maison dudit Giron deux timbelerees de sablon, rencontrerent ung pasticier que l'on appelle Mannourry quel leur dist qu'il tenoit vin en vente en la maison de Bryort et que s'ilz y voulloint aller boyre qu'il leur en bailleroit de bien bon, sur quoy ledict Jacques et sesdits compaignons prindrent chemyn a y aller fors ledict Donecte quel dist qu'il n'y entreroit point. Et apres avoir ledict Jacques, Robert et Ausserel raissionné en ladicte maison de Bryort et qu'ilz feussent yssuz hors d'icelle maison tirans leur chemyn vers ledict port Briant-Maillart rencontrerent ledict feu Donecte au devant du pillory de notredite ville de Nantes, lequel dist et demanda audit René Robert si luy voullait donner sa part de pinte ce que ledict Robert liberallement luy octoya et allerent touz deux en ladite maison de Bryort boyre et lesdits Jacques et Ausserel allerent les actandre audit port Briant-Maillart ou estoit ledict timbureau et sable. Et comme ledict Donecte et René

Robert eurent beu en ladite maison de Bryort et eussent prins chemyn a aller audit port Briant-Maillart, ledit feu Donecte trouva en son chemyn ung chyen noir quel il print et le porta sur son col jucques audit port Braint-Maillart ou ilz trouverent lesdits Jacques et Robert qui les actandoient. Et a leur aripvee, iceluy Jacques Thebaud dist audit feu Donecte telles parolles ou semblables (/) en sustance: " laisse ce chyen a terre et achevons nostre besougne ! " et en ce disant, eulx estans assez pres de ladite ripviere ledict Jacques print ledict chien et le gecta dedans ladite ripviere. Quoy voyant, ledict feu Donecte, de ce mary et despit, et semblant a sa contenance qu'il feust yvre et enboyté de vin, hurta et poulsa ledit Jacques Thebaud de telle force qu'il cheut en l'eau bien avant tellement qu'il fut en dangier de noyer, lequel Jacques Thebaud, sortant de ladite ripviere rencontra ledict Donecte au devant de luy et tout esmeu et effroyé et de ce desplaisant et courroucé, evagina et tira ung cousteau qu'il avoit a sa sainture pour se servir a couper son pain et d'icelluy cousteau, en chaulde colle par cas de malle fortune, donna ung seul coup audit feu Donecte en l'endroit de l'estoumac, a l'occacion duquel coup bien tost apres il alla de vie a deceix. A raison de quoy, craignant et doubtant rigueur de justice iceluy Jacques se randit fuitiff par aulcun temps et dempuix s'est mis a ladite franchise en laquelle il est encore a present. Nous remonstrans lesdits parens et amys supplians que auparavant ledict cas commis, iceluy Jacques s'est gouverné et traicté honestement sellon son estat et mis paine de entretenir sa femme et son mesnaige et a vescu sans reprouche ne sans estre accusé ne actaint d'aulcun mauvais et villain cas et ledict Donecte estre en son vivant, notté et renommé homme rummoreux, debatiff, blaphamateur du non de Dieu, yvroigne asidu et continuel et homme de mauvaix gouvernement. Aussi celuy Jacques estre pouvre, (/) carent et indigent de touz biens sans posseder nulz heritaiges ny meubles fors ce qu'il peult gagner par journees a la paine et travail de ses braz et corps pour alymenter, nourrir et entretenir luy et sadite femme et que dudit cas, ilz ont appoincté avecques les femmes et enffens dudit feu Donecte, nous suppliant qu'il nous plaise a tout ce que dessus avoir esgart et du cas impartir audit Jacques Thebault notz lettres de grace, remyssion et pardon tres humblement le nous requerant. Pourquoi etc, pourveu touteffoiz qu'il en personne presentera cestes notz dicte presentes lettres de grasse (sic), remission et pardon aux prouchains ou seconds generaulx plectz de nostre court et barre de () devant nostre senneschal dudit lieu. Donné a Nantes ou moys de mars l'an de grace mil cinq cens vingt et de nostre regne le septiesme, visa et scellee en layz de soye et cire vert.

N° 9. (35)

François, par la grace de Dieu roy de France et duc de Bretagne, savoir faisons a touz presens et a venir nous avoir receu l'umble supplicacion et requeste de nostre subiect Jehan Le Senneschal povre gentilhomme de nostre juridiscion de Morlaix, contenant que environ seix ans a ung sabmadi qui estoit jour de marché en notredite ville de Morleix, ledict Le Senneschal suppliant se trouva audit lieu ainsi qu'il avoit souventeffoiz a coustume de faire et environ nuyt clouante d'iceluy jour, comme ledict Le Senneschal estoit prest a s'en aller a sa maison, iceluy Le Senneschal qui avoit auparavant mis et baillé une sienne espee a fourbir et a biller a ung ouvrier nommé Guillaume Geffroy demourant en la ruelle qui conduit de la maison de feu Lucas Talic droit a pont en crol, se delibera de aller querir sadite espee. Et en y allant comme il passoit par la rue tirant droit a la porte de la ripve dudit Morlaix, il rencontra ung homme estrangier dudit cartier de Morlaix qui se disoit et portoit medecin, quel dempui ledict Le Senneschal a ouy nommer maistre Robert Larchier ou aultrement maistre Jehan Larchier ayant une espee au cousté et sur aulcunes parolles qui s'ourdirent entreulx, ledict Senneschal evagina ung bracquemart qu'il avoit au cousté et d'iceluy chargeait sur ledit Larchier, lequel aussi sur l'heure evagina sadite espee et s'entre donnerent de leursdits bastons plusieurs coups l'un a l'autre dont fut et se trouva ledict Le Senneschal (a l'endroit ?) (/) dudit Larchier frappé et bleczé. En l'endroit de quoy, sourvint et ariva ung nommé Menon Porebouen qui aussi evagina son espee qu'il portoit et se mist ayder audit Le Senneschal suppliant et chargerent touz deux sur ledict Larchier. Lequel, se voyant s'en fouyt et retira en la maison d'un barbier estant illecques pres, a laquelle maison ledit Le Senneschal estant encores tout esmeu dudit debat et voyant qu'il estoit ainsi bleczé, poursuyvit ledit Larchier et luy bailla ung coupt de sondit baston au corps. A l'occacion duquel coupt, ledit Larchier alla de vie a trespas et a raison de ce, ledict Le Senneschal se retira en franchise en l'eglise de Notre-Damne Du Neur en notredite ville de Morlaix ou il fut par aulcun temps puis apres se retira et absentia de ce dit pais et alla de la les mons pour nous servir en armes en noz ordonnances. A l'occacion duquel cas, est ledit Senneschal en proceix pendant, a instance de nostre procureur dudit Morlaix lequel a obtenu par icelle court sur ledit Senneschal aulcunes deffailles. Remonstrant outre ledit Senneschal suppliant comme dempui il feust prisonnier et detenu es prinsons dudit Morlaix sur ledit cas, a nostre joyeuse et nouvelle entree que feismes en notredite ville de Morlaix ou mois de septembre l'an mil cinq cens dix ouict, il nous pleut dudit cas impartir et octroyer grace et remission audit Le Senneschal pourveu que dedans troys mois lors prouchains ensuyvans, il eust retiré lettres d'icelle grace et remission

(/) de nous. Et pour ce faire, ledict Le Senneschal bailla charge a ung sien amy de retiré pour luy lesdites lettres de grace, quel part negligence ou aultrement ne feist impetracion d'icelles lettres de grace dedans ledict temps de troys moys. A raison de quoy, ledit suppliant est privé et frustré d'icelle, nous suppliant qu'il nous plaise dudit cas, impartir noz grace, remission et pardon tres humblement le nous requerant. Pourquoy nous etc, pourveu touteffoiz qu'il en personne presentera cestes noz presentes lettres de grace, remission et pardon, aux prouchains ou seconds generaulx plectz de notredite court et barre dudit Morlaix, par devant nostre senneschal ou aultres qui les expedira nostre procureur dudit lieu, ainsi signé par le roy et duc a la relacion du conseil Beaucouche et sellé en laz de soye et cire vert.

N° 10. (36)

Françoys, par la grace de Dieu roy de France duc de Bretagne, savoir faisons a touz presens et advenir nous avoir receu l'umble supplicacion de nostre povre subject Pierres Avenel de la parrouesse de Guel du villaige de Kermee, homme de bas estat, exposant que comme le jeudi second jour de novembre derroin, comme myeulx luy semble, queque soit a ung jour de jeudi oudit moys, ledit suppliant s'en feust allé au bourgc de Guel, distant de sa maison et demourance d'environ ung quart de lieue, esperant y acheter de l'avoine dont il y a de coustume soy marchander. Comme il estoit audit bourgc, il rencontra ung sien voysin et amy nommé Robert Fletto quel luy avoit dit des le matin dudit jour qu'il devoit estre compere et nommer ung enfant, savoir une fille d'un aultre sien voysin et parent et compaignon en marchandise, qui s'appelloit Guillaume Bachier et avoit prié ledit suppliant de l'accompaignier audit comperage et ayder a festoyer ses converes. En ensuyvant quoy, apres le baptesment faict d'iceluy enfant, ledit suppliant se trouva avec ledit Fletto et ses comperes et converes en une taverne ches Pierres Olnault oudit bourgc. Ouquel lieu, il et les aultres de sa compaignie beurent d'autant et firent grant chere, tellement que ledit suppliant se trouva fort (haîté) et enboyté de vin. Et en fin, les converes qui estoinct partie de son villaige et les aultres des environs le cuyderent en emmener (/) pour aller ensamble a leurs maisons, et touteffoiz pourtant que son beau-frere, ayant esté marié a une sienne seur, avoit ce jour la pledoyrie en la court dudit Guel, ledit suppliant desirant savoir comme il en estoit allé d'icelle pledoyrie demoura encores apres eulx audit lieu de Guel. Et pour ce qu'il ne trouva sondit beau-frere, il s'en partist dudit lieu de Guel environ troys ou quatre heures apres medi et print chemyn pour s'en aller droit a sadite maison. Et comme il fut ou chemyn d'entre le boays de Lenerst et les landes de Rotaille, assez pres d'une croix que l'on appelle la croix neuffve, au devant d'une

piecze de terre nommee le clos des Brouczes, il trouva une femme nommee Vincente Pihan et une sienne fille qui feroint (?) en l'endroit et en leur compaignie et pres d'icelle estoit ung compaignon nommé Jehan Gorre que avoit une trenche de fer empiectee de boays sur son espaulle, devisant avecques icelles femmes. Et comme ledit suppliant fut arrivé pres d'icelles et qui le saluerent, il tendit la main a ladicte Vincente, luy disant qu'elle eust tocqué avecques luy, ce qu'elle feist. Et apres, ledict suppliant qui estoit fort emboyté et avoit par trop beu comme dit est, desplacza pour s'en debvoir aller en sadite maison, et sans aller gueres loign, s'en retourna encores droict a icelle Vincente et tocquerent encores ensamble. Et (/) en l'endroit laissa ledit suppliant ladicte Vincente, et marcha vers ledict Gorre qu'il aperceut pres d'illecq, estant arresté avecques lesdites femmes, auquel celuy suppliant demanda pourquoy il pourtoit icelle tranche, luy disant qu'il ne la portroit pas. Et ledict Gorre luy respondi qu'il ne la portoit pour nul mal et qu'il la pourtoit pour hotter en son gueret. Et surtant ledict suppliant qui ne savoit qu'il faisoit, print ladicte tranche dudit Gorre qui n'y mist pas grande resistance et si tost que ledict suppliant la tenist, n'ayant cougnissance de raison, d'icelle en frappa ledict Gorre ung coup sur le derriere de la teste tellement qu'il en tomba a terre. Et lors ledict suppliant de ce desplaisant en son vin, laissa cheoir ladite tranche a terre et voullut prandre chemyn droict a ladicte lande roialle tirant a sadite maison. Et quant il fut esloigné comme d'un gect de pallet, comme celuy qui ne sauroit qu'il faisoit, voulut s'endormir au chemyn et tout incontinant s'en retourna encores vers ledict Le Gorre pour savoir quel faisoit et le boutta o le pied et trouva qu'il bougeoit et se demenoit, et cuydoit qu'il n'avoit aulcun mal et qu'il se feignist et fist le semblant d'estre bleczé. Et ce fait ledit suppliant s'en alla le plus hastivement (/) qu'il peult a sadite maison et ladite Vicente s'en alla querir ung prebtre illec pres demourant nommé dom Guillaume Perrin, lequel comme ledit suppliant a dempux ouyt dire, confessa ledit Gorre et pareillement ouyt dire que bientost apres, a l'occacion dudit coup celuy Gorre alla de vie a deceix. Pour raison duquel cas, ledit suppliant se rendist des lors et s'est desoncpux tenu fuitif et en franchise estant tres desplaisant de ladite fortune advenue. Vous remonstrant ledict suppliant outre avoir semblablement ouy dire que les officiers de la court dudit Guel l'ont fait aiourner et plusieursfoiz defaillir sur ledit cas tendans le mettre a forban, mesmes que ledict suppliant n'avoit jamais auparavant eu querelle, debat, parole ne question audit Gorre ains toute amytié et que dempux il a satisfait aux parties interessees et qu'il a tousiours cy-devant bien et honnestement vaisqu comme bon laboureur et marchand, homme paisible et de bonne conversacion sans jamais avoir esté actainct ne convaincu d'avoir commis aulcun aultre mauvais ne villain cas, blasme ne reprouche, qu'il nous plaise dudict cas luy impartir nostre

grace, remission et pardon tres humblement le nous requerant. Pourquoy etc, pourveu touteffoiz qu'il en personne presentera cestes (/) notz presentes lettres de grace, remission et pardon aux prouchains ou seconds generaulx plectz de nostre court et barre de Ploermel devant nostre senneschal dudit lieu, ainsi signé par le roy et duc a la relacion du conseil Beaucouche et sellé en laz de soye et cire vert.

N° 11. (37)

Françoys, par la grace de Dieu roy de France et duc de Bretagne, a touz presentz et a venir savoir faisons nous avoir receu l'umble suplicacion des parens et amys consanguyns de nostre povvre subgect Pierres Legobihan, detenu prinsonnier es prinsons de la Roche-Morice, de l'auctorité de la court de Laniheu, court basse et inferieure de nostre court et barre de Leseneven, contenant comme ledit Pierres est d'environ l'aige de quarante-cinq ans, aiant enffans, savoir une fille mariee, et ung filz d'environ l'asge de vingt ans qu'il entretient, se trouva environ le moys de decembre derroin en povvrecté et indigence, et sachant que Jehan Lecarue marchant de la ville dudit Lanerneau estoit lors fuytiff pour raison de la peste qui avoit esté es prouchaines maisons de la demourance dudit Lecarue, s'avisa ledit Legobihan de aller a ladite maison dudit Lecarue pour desrober quelque bien de ce qu'il en eust trouvé, et y alla ung dymanche au soir a environ vingt heures de nuyt et en sa compagnie Jehan Le Sperurt, esperans entrer (/) en ladite maison par l'huys de derriere devers le jardrin d'icelle maison, ce qu'ilz ne peurent faire. Sur quoy s'avisèrent de monter sur la goutiere d'entre icelle maison et la maison Jehan Le Guyrieuc le jeune, et illecques descouvrirent et firent ung (partuys) sur ladite maison dudit Lecarue par lequel ledit Le Sperurt denude en ung gallatas au dessus d'une chambre, l'huys de laquelle ouvroit sur ledit jardin et d'un tisson de feu qu'ilz avoint, Ledit Sperurt aluma ung bout de chandelle que ledit Pierres Legobihan luy bailla et descendict ledit Sperurt en ladite chambre et ouvrit audit Legobihan l'huys devers ledit jardrin et entra celluy Legobihan en ladite chambre. Et eulx y estans, ouvrirent ung coffre estant en icelle, non fermé de cleff, ouquel trouverent du fourment en ung sac et des pois blancs en ung aultre sac et aussi du seigle, quel fourment ilz prindrent avecques une tante de lict et ses courtines et une sacoché de vert qu'estoit sur ledit lict. Et ce faict, prindrent chemyn a venir devers la maison dudit Sperurt audit Lanhieu, ledit Legobihan portant ledit fourment et ledit Sperurt lesdites tante, courtures et sacoché et comme ilz furent pres ladite maison dudit Le Sperurt, pourtant dist avoir craincte de sa femme qu'elle ne veist lesdits biens desrobez,

aviserent que le tout eust esté porté a la maison dudit Gobihan. Et sur ce furent lesdites tante, courtures et sacoge lessés en la rue en actandant que ledit Gobihan les fust venu querir, apres avoir porté ledit fourment en sadite maison. Et apres avoir celluy Gobihan ainsi porté ledit fourment retourna querir lesdites tente, courtures et sacoeche et les emporta pareillement en sadite maison. Et le landemain au matin, ledit Sperurt print chemyn a aller en la maison Allain Briend et en y allant rencontra ledit Gobihan et assemblement allerent en ladite maison a (/) laquelle ilz trouverent Anna Lejar, femme dudit Briend, quelle nectoyoit du fourment, a laquelle demande ledit Sperurt combien luy avoit cousté ledit fourment, laquelle femme luy respondict que la garcee luy avoit cousté vint cinq soulz et lors ledit Sperurt luy demanda si elle en eust voullu achapter de luy, laquelle luy respondict que ouy. Et sur ce allerent boire en icelle maison dudit Briend, en laquelle y avoit lors taverne et illecq lesdits Sperurt et femme dudit Briend firent marché d'une garcee de fourment que icelluy Sperurt luy promectoit payer et l'avoir pour le pris de xxv soulz cinq deniers, dont ladite femme paya une partie et aultre partie retint pour quelque argent que luy devoit ledit Sperurt et dudit argent ledit Sperurt bailla audit Gobihan neuf soulz deux deniers et retint le parsur, et dempux eut ladite femme dudit Briend ledit fourment de la maison dudit Gobihan. Et dempux le mardy ensuyvant ledit Gobihan seul, environ vint heures de nuyt, se transporta a la maison dudit Lecarue et y entra par ledit huis devers le jardrin, de laquelle maison il print et emporta a l'estimacion d'une garcee seigle estante oudit coffre, quel seigle il vendict le landemain a Goulven Le Dourferu pour vint ung soulz ouict deniers, quelz il recepvit dudit Goulven. Et le jedy ensuyvant, environ mesme heure de nuyt, de rechieff se transporta a ladite maison dudit Lecarue et illecq print environ une aultre gacee de seigle estante oudit coffre avecques les poys blancs qui y estoit et une couecte et deux traversiers de plume, quelz il porta (/) a sadite maison, quel saigle il vendict le samady ensuyvant a Jehan Kerneau pour vint et ung soulz ouict deniers, queulx il recepvit. Et le dymanche ensuyvant de nuyt, alla ledit Pierres Legobihan en la maison Mahé maczon en ladite ville de Landerneau et fist tirer pinte de vin esperant conforter la femme Lorans Gestin illec estante, qui se plaignoit d'estre mal troictee de son mary et ainsi qu'ilz estoit a boire Katherine Legar, femme dudit Mahé, demanda audit Pierres Legobihan si elle eust eu de luy ses poys blancs, a quoy il luy respondict que ouy si elle eust voullu. En l'endroit de quoy, se trouva Eurice Batezcate, femme dudit Lecarue, laquelle s'adrecza audit Pierres Gobihan luy disant que s'estoit luy qui avoit desrobé sa maison et le fist illecques detenir et alla a la maison d'icelluy Legobihan ou elle trouva lesdits poys blancs. Et a son retour, aporta lesdits poys blancs et dist audit Pierres qu'il failloit qu'il luy eust randu les aultres biens qui avoint esté desrobez en sadite maison, sur quoy ledit Gobihan differa de

cougnoistre la verité mais par apres dist a sondit filz qu'il s'en fust allé a sa maison avecques ladite Eurice pour luy mocstrer ce qu'il y avoit ce que il fist, et n'y trouva ladite Eurice lesdits couecte, traversiers, sacoge, tante et partie des courtures et pour ce que ledit Gobihan avoit despecé partie desdites courtures a faire des chemyses pour luy et qu'il n'avoit lesdits fourment et seigle pour randre a ladite Eurice. Aussi que ladite Eurice disoit avoir perdu plus grant nombre de blé fut apoincté entreulx que ledit Gobihan luy poiroit la somme de neuf livres sept soulz six deniers. Et pour lesdits cas fut ledit Gobihan (/) print et constituez prinsonnier es prinsons de ladite Roche-Morice et vers luy tellement procedé, que la question luy a esté adiugee, en laquelle il a cougneut et confessé lesdits cas. (Et oultre que au deceix de feu Olivier de La Pallue, en son temps sr de Lanros, advenu environ deux ans et demy a, celluy Legobihan estant a besougnier et couldre partie des robes et aultres acoustremens pour le duel³ dudit deffunct, il desroba une piece de drap noir contenant environ troys cars d'aulne qu'il vendict a Jehan Brordin pour la somme de XX livres , quelz il receipt. Nous remonstrans lesdits parens et amys suplians que auparavant lesdits cas avenuz, celluy Legobihan qui est chargé de femme et enffans a esté bon et paisible pouvre homme sans jamais avoir esté actainct ne convaincu d'aucun aultre mauveix cas, blasme ne reprouche, nous supplians qu'il nous plaise adce avoir esgard et pour l'honneur du sauveur et redempteur Jehus-Crist auquel par sa sainte grace a pleu souffrir mort et passion pour nous a tel jour qu'il est aujourduy et en usant de pitié et misericorde, impartir audit suppliant noz grace, remission et pardon dudit cas tres humblement le nous requerant. Pourquoi nous lesdites choses considerés mesmes en comtemplacion du benoist vendredy saint comme est huy que nostre sauveur et redempteur Jehus-Crist voullut souffrir mort et passion en l'abre de la croueix pour la redemption de l'humain lignaige et voullans misericorde preferé rigueur de justice etc, pourveu etc, donné (/) a Nantes ou moys de mars l'an de grace mil cinq cens vint et de nostre regne le septiesme, ainsi signé sur le replot, visa par le roy et duc a la relacion du conseil Le Fourbeur et saellé en laz de soye et cire verd.

N° 12. (38)

Françoys, par la grace de Dieu roy de France et duc de Bretagne, a touz presentz et advenir savoir faisons nous avoir receu l'umblé suplicacion des parens, amys et consanguins de nostre pouvre subject Hervé Le Sperurt de l'asge de trante troys ans ayant charge de femme et petiz

³ Deuil.

enffans, contenant comme ou moys de decembre derroin, ledit Sperurt se fust trouvé en la ville de Landerneau en la compaignie d'un nommé Pierres Legobihan a ung jour de dymanche, environ vingt heures de nuyt, lesquelz d'un commun acord et consentement allerent a la maison de Jehan Lecarue en la ville de Landerneau, saichans que alors ledit Lecarue n'estoit en sadite maison mays s'estoit randu fuictiff a raison de la peste qui avoit eu cours es prouchaines maisons de la maison dudit Lecarue et qu'ilz n'eussent trouvé auchunes gens en ladite maison pour desrobez aucuns biens de ce qu'ilz y eussent trouvé et se rendirent a l'uys derriere devers (sic) le jardin a debvoir y entrer et ne peurent. Et le parssurs est tout (/) semblable a la precedente remission et de pareilz motz. Donné a Nantes ou moys de mars l'an v^{ctz} et de nostre regne le vii^e, ainsi signé par le roy et duc a la rellacion du conseil Le Fourbeur, visa et saellé en laz de soye et cire verd.

N° 13. (39)

François, etc, savoir faisons a touz presentz et a venir avoir receu l'umble suplicacion des parens et amys consanguins de noz pouvres subgetz Guillaume Ripuere et Raoul Ripuere de la paroesse d'Allair en l'evesché de Vennes soubz la juriscion de Ploermel, contenant que comme en l'an derroin Guillaume Ripuere fut demourant en une maison ou bourg de Begaune et y tenant taverne et vin en vante, ung nommé François Bihan dict Gaudin, environ le temps de la my-aougst derroin, se rendict pres et au davant de la maison ou demouroit ledit Guillaume Ripuere et donna audit Ripuere qui estoit lors en l'huy de sadite maison, ung coup de pierre par le visaige tellement qu'il luy rompiet les dens en la bouche et blecza fort sans que ledit Guillaume Ripuere feust pour quelle cause. Et dempui et environ xv jours ou troys sepmaines avant noel derroin, celluy Bihan en perseverant en son mauveix propos et voulloir, se trouva au davant de ladite maison dudit Guillaume Ripuere luy donnant pluseurs menaces, gectant et ruant pluseurs coups de pierres contre les huys (/) et fenestres de la maison dudit Guillaume Ripuere. A raison desquelz coups et exceix faiz, iceluy Guillaume Ripuere obtint monitoire genneral de l'auctorité de l'official de Vennes, quel il feist bannirer et publier par troys jours de dymanche en l'eglise dudit lieu de Begaune. Et ainsi que autres a derroin jour de dymanche de la publicacion dudit monitoire et auquel jour il passoit son cours, ledit Guillaume Ripuere se trouva oudit bourg de Begaune pour composer o ceulx qui dudit monitoire feussent venuz a cougnoessance et en sa compaignie estoit ledit Raoul Ripuere sondit frere. Auquel jour de dymanche, ceulx Ripueres estans oudit bourg en la maison d'un nommé Jehan Veuffves tavernier, ou bas et a la table de la cuisine d'icelle maison ledit

Guillaume estant assis devers le feu sur ung banc et ledit Raoul acouldé sur le bout de la table devers la place en compaignie de pluseurs personnes, illecques environ demye heure apres souleil recouce ou ung peu plus tart, ariva ledit Bihan lequel se acouda sur l'autre bout de ladite table et comme ledit Guillaume Ripuere le veyd, dist aux gens qui la estoit par telles ou semblables parolles : " voiez la ung homme qui sera excommunié mynuyt passé s'il ne faict aultre chose ! ". A quoy respondict ledit Bihan: " Ripuere, tu auras tort ", et lors ledit Guillaume Ripuere luy dist : " Bihan, tu m'as faict mauveix tour ches moy ! mais si tu te frostes ceans a moy, je t'en feray ung autre, va t'en ! ". (/) Et en l'endroit, ledit Guillaume Ripuere dist aux gens dudit Venues qui la estoit : " alumez de la chandelle cy ! car voyez la ung homme qui a tousiours le cousteau en la manche ! je me crains de luy ! ", disant oultre celluy Guillaume audit Raoul Ripuere son frere: " Raoul, donne toy garde de luy, il te blecera ! ". Et sur ce, ledit Raoul Ripuere craignant ledit Bihan se remua de lieu ou il estoit et regarda derriere et trouva pres de luy derriere ung huis de ladite maison, une fourche de fer quelle il print en sa main et du pié de ladite fourche donna audit Bihan du bout environ l'estommac luy disant : " reculle toy ! ", duquel coup ledit Bihan tomba a terre. Et lors ledit Guillaume Ripuere qui estoit devers le feu, craignant que ledit Bihan eust blecé ou tué ledit Raoul Ripuere son frere, se leva et alla pour secourir son frere et illecques en l'instant, d'un petit coustau que ledit Guillaume Ripuere avoit en son poign, en chaulde colle et de malle fortune, donna audit Bihan troys coups environ le dos et le coul et celluy Raoul donna audit Bihan pluseurs coups de travers de ladite fourche sans savoir aultrement les declarer. A l'ocasion desquelz coups, ledit Bihan dedans huict jours apres alla de vie a trespas. Nous remonstrans lesdits supplians que ledit homme estoit homme debatif, rumoreux et noysiff, costumier de faire pluseurs (/) oultraiges et frapper et blecer du cousteau avecques lesquelz il prenoit debat et lesdits Les Ripueres estre gens bien famez et renommez, de bon rest et gouvernement sans james auparavant ledit cas advenu avoir esté actaintz ne convaincz d'aucun aultre mauveix cas, blasme ne reproche. Lesquelz sont pouvres gens, vivans de la paine a travail de leurs corps et ledit Raoul Ripuere est chargé de jeune femme et pluseurs petiz enffans soubz l'asge de sept ou ouict ans, quelz ne sauroint vivre ne estre entretenuz et a luctez sans le labour dudit Raoul leur pere, nous supplians qu'il nous plaise adce avoir esgard et pour l'honneur du sauveur et redempteur Jesus-Crist auquel par sa sainte grace a pleu souffrir mort et passion pour nous, a tel jour quel est aujourduy et en usant de pitié et misericorde, impartir ausdits supplians noz grace, remission et pardon dudit cas tres humblement le nous requerant. Pourquoi nous etc, mesmes en contemplacion du benoist vendredy saint comme est huy que nostre sauveur et redempteur Jhesus-Crist voulut souffrir

mort et passion en l'abre de la croeix pour la redemption de l'humain ligaigne et voullans miséricorde etc. Donné a Nantes ou moys de mars l'an de grace mil cinq cens vint et de nostre regne le vii^e, ainsi signé par le roy duc a la relacion du conseil Le Fourbeur et saellé de cire verd et laz de soye.

N° 14 (40). 10 avril 1521

[90r] Remission de faict de mutre pour Jehan Lotin demourant ou bourg de Pillemy, dont la teneur ensuyst.

BEAUCONCHE

Françoys, par la grace de Dieu roy de France et duc de Bretagne, savoir faisons, a touz presens et advenir, nous avoir receu l'humble supplicacion des parens et amys consanguins de Jehan Lotin boullangier, demourant ou bourgc de Piremil, contenant que le dimanche vingt septiesme jour de janvier derroin, celui Lotin ala pres disgner d'iceluy jour, apres avoir joué a la paulme au bourg de Piremil avecques ung nommé Jehan Avril, allerent assemblement boire en la maison Laurens Legay, cousturier, tenant lors taverne, de laquelle maison, apres avoir beu, sortirent et s'en alla ledict Lotin en sa maison qui est vis a vis celle dudict Legay. Et environ troys ou quatre heures apres, se rendit en la maison dudict Lotin André Moreau dudict Piremil, quel pria et dist audict Lotin qu'ilz feussent allez boire chés ledit Legay et qu'il y avoit de bon vin nantoys. Qu'eulx ensamble, environ l'heure de quatre heures apres le medi d'iceluy jour, [90v] allerent chés ledit Legay en une haulte chambre, sur le devant d'icelle se misdrent a boire seulz de leur escot a une table

qui est pres la descense de l'eschalle
de ladicte maison a monter et descendre. Et en
la chambre haulte du derriere, estoinct a boire
Jehan Gourniraye, Guillaume Gourniraye et
Vallentin Gourniraye, filz iceulx Guillaume,
et Vallentin dudict Jehan Gourniraye, Jehan
Bureau et ung nommé Jehan Moulmier,
evagine entre lesquelles chambres y a
clostures et ung huys en icelle chambre
du derriere. Et bien une heure apres ou
environ avoir ceulx Lotin et Moreau beu du vin
de ladicte teverne et estans encores a leur
table et escot, sortirent de ladicte chambre
du derriere et descendirent par ladicte
eschalle ou bas de ladicte maison lesdictz
Guillaume et Jehan Le Gournirayes, Bureau
et Moulmier et apres eulx, ledict
Vallentin Gournirayes voullut descendre.
Et pourtant que ledict Lotin estant a ladicte
table eut souvenance que ledict Vallentin
avoit esté tesmoign produit par la court
de l'officiaulté de Nantes de la part des prevostz
de la frarie de Nostre Damme de Piremil,
contre le secretain dudict lieu, a trouver
certains faictz a impescher que ledict
Lotin ne demourast tesmoign pour
ledict secretain, celuy Lotin, esmeu
de vin tant au moyen du vin qu'il avoit beu
[91r] precedentement en la compaignie dudict Avril
que avecques ledict Moreau qui estoit
enboicté comme povoit estre ledict Lotin, dist
ledict Lotin a haulte voix en parlant audict
Vallentin : « Voyez la ung de mes tesmoigns
qui est allé dire que j'amoys faulx

tesmoignaiges contre les provostz ~~de Piremil~~
de Nostre Damme de Piremil ! » Ausquelles
parolles celuy Vallentin qui estoit uncores
au bout du hault de ladicte eschalle respondi
et dist : « Le voulez vous dire pour moy Lotin ? »
A quoy derechieff, celuy Lotin dist : « Par Saint
Jehan, ouy ! Par Saint Jehan je le vieulx dire
tu n'es que ung larron ! » Respondict ledict
Vallentin qu'il avoit menty et qu'il estoit
aussi homme de bien que luy. Et tout
incontinent sur icelles parolles, se leva de la table
ledict Lotin ou il estoit il et ledict Moreau
et print ledict Vallentin au collet de son pourpoint
le tirant a luy jucques a ladicte table et au poil
print celuy Lotin ledict Vallentin et le trayna
du bout de l'eschalle ou dedans de la chambre
de devant jucques au bout de la table ou lesdictz
Lotin et Moreau avoint beu. Auquel
bruyt et tumulte survint Guillaume Gournirayes,
frere dudict Vallentin et trouva lesdictz Lotin
et Moreau qui tenoient ledict Vallentin au poil,
disant celuy Gourniraye audict Lotin : « Vous
bastez les gens Lotin ! Vous vous en repentirez ! »
Quelles parolles proferees, celuy Lotin ainsi
[9/v] esmeu de vin lascha ledict Vallentin
qu'il tenoit et saesit au poil ledict
Guillaume Gourniraye. Et sur ce conflit,
ung nommé Symon Bureau survint
au bruyt qui fist audict Lotin lascher
le poil dudict Guillaume Gourniraye,
disant celuy Symon audict Lotin qu'il s'en
~~rapportoit~~ repentiroit. Pendant quoy,
celuy Moreau et Vallentin s'entretenoient
au corps et secouans l'un l'aultre, au moyen

desdictes parolles et questions sourvenues,
auquel instant ledict Vallentin
s'escria : « Je suys mort ! » Monstrant sa
poitrine, disant ausdictz Lotin et Moreau :
« Voycy que m'avez faict ! » Sans autres parolles
s'adenta celuy Vallentin sur ladicte
table ou ilz avoient beu, il et ledict
Moreau, et rendant effusion de sang
d'une ploaye qui aparoissoit estre d'un
coup d'estre comme d'un cousteau [picaçays](#)
du costé dextre environ la memelle,
quel coup ne fut donné par ledict
Lotin. Et peu apres ledict debat,
trespassa ledict Vallentin, mais
au moyen que ledict Lotin avoit excedé et prins
au poil ledict Vallentin par chaudes
parolles entrevenues par cas inopiné et
non propos deliberé et le deceix avenu
dudict Vallentin, c'est ledict Lotin abscenté
doubtant en estre aprehendé de justice.

[92r] Nous remonstrans lesdictz supplians que ledict
Lotin est homme de bien, famé vivant de son
mestier de boulangerie, sans jamais avoir
esté reprints d'avoir commis ne perpetré aucun
cas de malefice, ayant femme et grant
nombre d'enffens, lesqueulx iceluy Lotin
nourrist de son labeur et a la sueur de son
corps. Ausqueulx conviendroit mendicquer
et aller a l'aulmosne s'il estoit procedé contre
ledict Lotin a rigueur de justice, nous suppliant
actendu ce que dessus qu'il nous plaise luy
remectre, quicter et pardonner le cas et crime
dessurdict et sur ce luy impartir noz lettres
de grace, remission et pardon, tres humblement

nous requerant iceulx. Pour quoy, etc.,
Pourveu touteffoiz que ledict Lotin presente en sa personne
cestez noz presens grace, remission et pardon aux
generaulx plectz de nostre court et barre de
Nantes. Donn  a Nantes ou moys de [blanc]
l'an de grace mil cinq cens vingt ung et de
nostre regne le septiesme. Ainsi sign  sur
le replot : *Visa*,
et sell  en layz de soye et cire vert.

N^o 15. (41)

Remission de meurtre pour Pierres Loysel et Franois Loysel freres dont la teneur ensuist :

Franois, par la grace de Dieu roy de France et duc de Bretagne, savoir faisons a touz presentz et a venir nous avoir receu l'umble supplicacion de noz pouvres subgetz les pere et mere consanguins et amys de Pierres Loaysel, Franois Loaysel freres, enfans de Jehan Loaysel du bourg de Moucan en l'evesch  de Saint-Malo, contenant que des le temps de environ quatre ans a, celluy Pierres qui estoit jeune homme de de (sic) l'asge de environ vingt ans avoit avecques son dit pere, qui avoit et a pluseurs filz, encommanc  de aprendre le moytier de mareschal, voullut celluy Pierres aller aux lieux et bonnes villes esquelles il peust mieulx veoir et aprendre ledit moytier, ce qu'il desiroict et qu'il estime avoir faict. Et a celle cause, dempuix celluy temps, a est  celluy Pierres ainsi qu'il dict et que on dict notoirement, avecques pluseurs bons maistres oupvriers dudit moytier es villes de Rennes, Nantes, La Rochelle et Montpellier, Lyon et pluseurs aultres lieux ou il a besougn  a eupvr  de son dit moytier et soy y est bien traict  sans y avoir eu blasme ne reprouche. Et environ la my-caresme derrenere, ledit Pierres se randict au pays et a la maison de ses pere et mere, bien abill  et acoustr  de vestemens. Et le jedy de la my-caresme derrenere, alla celluy Pierres a la ville de Malestroict ou celluy jour y avoit march  et grande congregacion de peuple, auquel lieu icelluy Pierres trouva ledit Franois son pere quel est paroillement mareschal estant demourant ou bourg de Saint-Grauc. Et pourtant que long temps auparavant ne s'entre estoient veuz, s'en allerent en la compaignie dudit Jehan Loaysel leur pere et de leur mere et aussi d'un nomm  Guillaume Sourgert mareschal et demourant a Ruffiac, avecques lequel celluy Pierres avoit precedemment (/) en son jeune easge demour  aprantif dudit moytier, s'en allerent en la

maison d'un nommé Jehan Jehan dict Desbaule en la ville de Malestroict, boire et manger et prendre leur refection. Et apres y avoir ainsi beu et mengé et faict bonne chere a la venue d'icelluy Pierres et soy estre celluy Pierres estouy et eschauffé en vin, ouyd celluy Pierres quelzques gens a luy incougneuz estant a boire pres luy ou bas de ladite maison qu'eulx avoient par entreulx question et differend. Et ce voyant, ledit Pierres se mist entreulx et les voullut departir, et en cuydant faire ledit departement, partie de ceulx que ne sauroint nommer, prindrent ledit Pierres au corps luy donnerent pluseurs coups. Et si tost qu'il peult evader de leurs mains, yssut celluy Pierres hors ladite maison tendant s'en aller et a celle yssue, trouva pluseurs personnes a luy incougneuz queulx luy gecterent pluseurs coups tant de pierres que aultrement, entre lesqueulx estoint Gillet Morin et Gilles Riallen sergens de la court de Malestroict, ce que ne cougnoissoit ne savoit ledit Pierres. Et sur ce y eut grant bruiet et scandal sur le pavé devant ladite maison sur la resistance que faisoit celluy Pierres a ceulx qui voullont mectre mains en luy, ayant ledit Pierres evaginé une espee qu'il avoit a son costé avecques ung poignart, desqueulx il print a s'en escarmoucher disant que s'il y avoit homme qu'il y eust aprouché ne touché qu'il leur en eust donné. Et en ce faisant, actaignit et frappa pluseurs desdites personnes illecques estans a luy incougneuz, queulx voullont mectre mains en luy. Et lors soy chargerent grande multitude de gens sur ledit Pierres et luy osterent sadite espee, et ce voyant ledit François Loaysel frere dudit Pierres doubtant sondit frere estre oultragé, se print a le voulloir secourir et a gecter des pierres a ceulx qui aprochoint de sondit frere en prenant aucuns de ceulx aux cheveulx sans touteffoiz en avoir blezé aucun. Et en celluy instant et conflict, se trouva ung nommé Yvon Jarur incougneu audit Pierres, quel Jarur donna pluseurs coups et collees audit Pierres et le print aux cheveulx et au corps et voyant celluy Pierres estre ainsi debastonné et detenu, (/) estant fort eschauffé, d'un poignart qu'il avoit frappa ung coup seul ledit Jarur en une espaulle et apres tout ce firent lesdits Pierres et François par ceulx incougneuz menez en prinson. Et dempuix a esté celluy Jarur, quel ledit Pierres avoit ainsi frappé, gisant, mallade par environ l'espace de doze ou quinze jours et par faulte de pancement ou aultrement, est allé de vie a deceix. Et doubtent lesdits supplians que les officiers dudit Malestroict, queulx detiennent lesdits Pierres et François esdites prinsons, veillent contre eulx procder a rigueur de justice, remonstrant lesdits supplians que lesdits Pierres et François sont de l'asge, savoir ledit Pierres d'environ xxv ans et ledit François de trante ans, lequel Pierres est industrieulx et tres bon oupvrier dudit moytier de mareschal et de ferrures, de malladies de chevaulx et pareillement celluy François est bon mareschal, homme de bien doulx et paisible de bon rest et gouvernement ayant charge de femme et petiz enffans,

lesquelz Pierres et François auparavant ledit cas n'avoit james veu ne cougneu ledit Jarur ne esté reprouchez ne actainct d'aucun autre mauveix cas villain.

N° 16. (42)

François, etc, a touz presentz et a venir savoir faisons nous avoir receu l'umblé supplicacion des parens et amys consanguins de André Labbé, pouvre homme de labour de la paroesse de Saint-Eloy de Montauban, a present detenu prinsonnier es prinsons et chateau de Montauban, contenant que ledit Labbé a esté en l'an mil cinq cens XVII commis sergend en ladite seigneurie de Montauban ou baillaige de la Berge noble, qui est servitude de grant payne ,travaill et grant payne et coustaige a faire servitude, a raison que ledit sergend est subject a garder ordinairement la court, conduire le juge en jugement, faire bannies, cuillir devers tant en jurisdiction que tans deuz oudit baillaige, ouquel ne y a rolle ne garant vallable. Quel office ledit Labbé fut contrainct prandre et faire, jaczoit qu'il soit vieill homme, asgé d'environ soixante quinze ans de vie, d'entendement et a l'ouye sourde. Or est il qu'il c'est durant son temps veu proceix par nostre court de Rennes entre Eustache de Pelineuc, Allain Callouel et chacun vers Roullin Jehan et Guillemecte Lonbat sa femme et pour inferer certains octroiz faitcz dudit Roullin Jehan esdits de Pelmeuc et sa femme, dirent et alleguerent que au temps desdits octroiz, ledit Raoullin Jehan estoit en curatelle de sadite femme et qu'il failloit avoir la bannie de ladite curatelle en l'an mil cinq cens dix neuf. Lesdits Raoullin Jehan et sadite femme l'un apres l'autre et mesmes eulx deux ensembles par pluseurffoiz ont dict audit Labbé qu'il avoit fait ladite bannie luy demandant qu'il leur en eust baillé acte. A quoy respondoit touriours ledit Labbé qu'il ne luy en souvenoit poinct et qu'ilz eussent a luy amener des tesmoigns qui eussent ouy faire ladite bannie et qu'il recorderoict ce qu'il devoict. Par aultre foiz la femme dudit Raoullin, de nuyt se transporta a la maison dudit Labbé luy disant que l'alloué de Montauban l'avoit envoyee devers luy et qu'il luy mandoit recorder ladite bannie. Et que le landemain il failloit qu'il allast a Rennes ou estoit la cause pendente entre ladite femme (/) et son mary et lesdits Pelmeuc et Callouel pour refferer sa rellacion. A quoy respondict ledit alloué que le lendemain au matin, il yroict ches elle et aviseroict et de fait par avant jour d'icelle nuyt, ledit Labbé s'en alla maison dudit Raoullin Jehan ou il trouva lesdits Raoullin et sa femme et pluseurs aultres qui s'aprestoint pour eulx en aller a Rennes et furent a ung de y aller emsembles, disans iceulx Raoullin et sa femme audit Labbé: " vous recorderer la bannie et gaignerons nostre cause " et se transporterent audit lieu de Rennes. Et

eulx arivez, alla ledit Labbé ches l'alloué dudit Rennes, ou il recorda avoir faict ladite bannie esperant quelle ainsi feust. Toutefois a la court de Montauban, dempux ledit de Pelmeuc fist denoncy et dolliance que ladite bannie estoit mal relatee et assigna la court dudit denoncy, supliant le senneschal dudit lieu de Montauban lors tenant les plectz dudit lieu de appeler a luy ledit Labbé pour l'interroger de ladite bannye, savoir ou elle fut et si ce fut en papier ou en parchemin quel acte fut faict et quel jour et heure et qui estoit present disant avoir tesmoigns pour avoirer ladite bannie avoir esté faulcement recordere. Et apres avoir ledit senneschal de Montauban appellé se prendre a luy a la chairre lesdits Labbé et de Pelmeuc et enquis plusieurs tesmoigns et qu'il eut trouvé entreulx variacions et contrarietez, fist jurer l'arrest audit Labbé et ordonna qu'il eust esté interrogé a l'yssue de la court plus amplement et a ladite yssue, ledit senneschal procedant a ladite interrogacion, ledit Labbé afferma ladite bannye avoir esté faicte. Et voyant ledit senneschal icelluy Labé en aucuns endroitz contraire en ses responses parce que mesmes il dist ladite bannie avoir relatee par la persuasion et acertion desdits Raoulin Jehan et sa femme, et finalement par apres il estant confronté (/) audit Raoulin Jehan ainsi le recorda. Si est il que depuix les variacions touchant ladite bannie, ledit Labbé detenu s'est remembré et a la vérité du faict il dict n'estre aucunement (?) d'avoir james faict icelle bannye et avoir faict lesdites variacions d'adveu et desaveu par lesdites persuasions et acertions par simplissité et ygnorance et non par malice. Et craignans lesdits suplians que a cause de ce que dessus, ledit senneschal et aultres officiers dudit Montauban veillent vers luy procedé a rigueur de justice, il qui est veil homme de feible et debille entendement ne sachant lire ne escrire, bon laboureur ayant bien et honnestement vesqu en honneur et estime, homme de bien sellon son estat sans james avoir esté querelleur, rebelle ou desboyssant a justice, faict ne commis aucun autre cas disgne de reprouche, nous suplians sur ce luy impartir grace et remission. Pourquoi etc, pourveu etc, l'adrece aux juges de Ploermel. Donné aRennes ou moys d'avril l'an de grace mil cinq cens vignt et ung et de nostre regne le septiesme, ainsi signé sur le replot visa par le roy et duc a la relacion du conseil M. de Kergueon et saellé en laz de soye et cire verd.

N° 17 (43). 8 mai 1521

[106v] Remission pour Jacques Georges de la paroesse de Bruc, touchant la mort et omicide de Olivier Haguét, de laquelle la teneur ensuyt.

[107v] Ensuint la teneur de la remission scellé cy devant
le VIII^e jour de ce mois :

Françoys, etc., receue avons l'umble suplicacion et requeste
nous faicte de la part de nostre povvre subiect
Jacques Georges de la paroesse de Bruc, soubz nostre
juridicion de Ploermel, contenant que ou mois de mars
derenier, a ung jour de dismanche qu'estoit le dix sept^{me}
jour dudict mois, ledict suppliant alla au bourg de Pipriac
pour ouyr la messe et divin service, ce qu'il fist. Et par
apres, s'en alla ledict suppliant en la maison d'un nommé
Marc de Lourme⁴, demourant oudict bourg de Pripriac, quel
y tient taverne et hostellerie, en la compaignie d'un nommé
Jehan Denys Pourchessaye et pluseurs aultres, pour
prendre leur refection. En laquelle maison, il et
ledict Denys et aultres disgnerent en la chambre
desur le porche de ladicte maison. Et apres qu'ilz
eurent disgné, descendyt ledict suppliant de ladicte chambre
en la place de ladicte maison ou l'on habille a manger
et s'assist sur ung petit coffre ou huge y estant
et se y couscha aulcune espace de temps comme une
demye heure ou plus. Et quant il fut temps de
[108r] soupper, ~~ledict suppliant~~ souppa ledict suppliant en la
grant chambre derriere de ladicte maison, en la
compaignie dudict Marc de Lourme, de Michel Estan
et sa femme, Olivier Haguét, Eonnet Chevriez, Jullien
Janvier, clerck, et Vincente Collobel, femme dudict
de Lourme. Et apres qu'ilz eurent souppé, lesdictz
nommez et suppliant descendirent de ladicte chambre,
s'en allerent ensamble boyre ung pot de vin
en une aultre chambre estante sur la cave de ladicte
maison et puis apres issirent hors ladicte

⁴ En 1480, Louis de Lourme tenait 50 livres de revenu noble en Pipriac (Nassiet, « Dictionnaire... », n° 606).

chambre fors ledict Olivier Hacquet, quel y demeura endormy, la teste sur la table d'icelle, et entrèrent en ladite place basse d'icelle maison en laquelle ilz trouverent beuvans pluseurs gens a la table pres le feu, et eulx arivez a ladicte table dist ledict Marc de Lourme audict Eonnet Chevriez devant nommé, que luy donnast pinte de vin. A quoy ledict Chevriez dist qu'il le vouloit et se assisdrent lesdictz Marc, Chevriez et supliant a ladicte table, savoir ledict Marc devers la cheminee et lesdictz Chevriez et supliant du costé devers les armoires d'icelle place, et tout incontinent ariva ledict Olivier Haguet avecques lesdictz nommez, quel dist audict Marc par telles parolles : « Marc, je vous donneray pinte de vin car l'otesse m'a donné a soupper ». Et ainsi que l'on estoit a tirez ledict vin, demanda ledict Olivier Haguet estant du costé devers le feu a ladicte Vincente, femme dudict de Lourme : « Madame, donnez moy congé d'aller baptre Jacques Georges que voyla qui me rechigne ! » A quoy ladicte femme respondyt que non feroit et que s'il y avoit personne qui se voulseist baptre ceans, qu'elle les meptroit hors sa maison. Et tout incontinent apres ce, se remua ledict Jacques du lieu ou il estoit devers la chemynee et s'en alla de l'autre costé de ladicte table et print ledict supliant au poill et au collet de sa robbe, et ledict supliant semblablement le print au poill et ~~tellement pressa et courba par force celui Haguet ledict supliant que ne luy pouvoit resister~~ collet de sa robbe et sur ce qu'ilz s'entreboutoint et tenoient l'un l'autre, le chien dudict de Lourme voullut mordre lesdictz Haguet et supliant aux jambes. Et sur ce, [108v] s'entre lascherent et ruserent l'un de l'autre, disant ledict supliant audict Hacquet : « Ne me serche plus meshuy ou tu t'en repentiras ! » Et neantmoins tout incontinent, ledict

Olivier Hacquet derechieff print ledict Jacques Georges au collet et au poil et ledict suppliant semblablement le print au poil et tellement pressa et courba par force ledict Haguet celluy suppliant, quel ne luy pouvoit resister. Et ce voyant, ledict suppliant, quel estoit fort eschaufé de vin, tira ung petit couteau qu'il avoit pendu a sa sainture et en frapa ung coup seul ledict Haguet en la gorge, lequel alors s'escria en disant : « Je suys bleczé ! » Au moyen duquel coup ledict Haguet apres avoir chemyné d'un bout de la table a l'autre, tomba a terre, et environ troys ou quatre heures apres ledict coup frappé, celluy Hacquet alla de vie a deceix. Et sur l'eure fut ledict suppliant prins et aprehendé du corps par ledict de Lourme et Eonnet et Jullien les Chevriers et aultres mesme et constitué prinsonnier en la mayson et mannoir du Chastel appartenant au sieur de Uzel, en laquelle maison il a esté detenu enferré par l'espace de XIII ou XIIIII jours et jucques au samedy vigille Pasques derroinement passee que ledict suppliant se deferra des fers dont il estoit ferré avec l'ayde de Guillaume Georges son frere, quel a sa priere et requeste luy porta une lyme de fer et ung hachereau ou cougrec pour ce faire. Et apres ouvrit aysemment l'huys et sans fraction, s'en ysit d'icelle maison et prinson et s'en alla au bourg de Loheac ou il se mist en franchise, et dempui, craignant rigueur de justice, s'est la pluspart du temps rendu fuictif dudict cartier de Pipriac et Bruc. Nous remonstrant ledict suppliant qu'il est jeune homme de bon rest et gouvernement, sans james auparavant avoir commis aucun aultre mauveix cas et que ledict Haguet estoit homme mal condicionné, entrepreneurs de debatz et par son mauveix gouvernement avoit esté cassé de l'office de notaire de la court de l'official de Saint Malo de Beignon⁵, aussi avoit pui l'an emblé une robe appartenant audict suppliant et pour raison [109r] dudict larecin avoit composé et s'estoit obligé audict suppliant en la somme de seix livres monnaie et dont il avoit faict amonester

⁵ Cette seigneurie appartenait à l'évêque de Saint-Malo.

le jour mesme que ledict Hacguet deceda et est a inferez que en
haigne de ce il estoit venu invader ledict suppliant comme dict est.
Nous suppliant qu'il nous plaise luy impartir noz grace et remission
dudict cas, humblement le nous requerant. Pour quoy , etc.,
Pourveu etc. Et l'adrece a Ploermel. Donné a Rennes
ou moys de may l'an de grace mil cinq cens vignt et ung
et de nostre regne le septiesme. Ainsi signé sur
le replict : *Visa*, et pour secretaire, Par le roy et duc,
a la relacion du conseil, M. DE KERGUEON, et saellé en laz de
soye et cire verd.

N° 18. (44)

Françoys, par la grace de Dieu roy de France et duc de Bretaigne, a touz presens et advenir
savoir faisons nous avoir receu l'humble suplicacion et requeste nous faicte de noz pouvres
subjectz Jehanne Barbin veuffve de Pierres Georges et Guillaume Georges son filz suix les
gens du villaige dudit de la parrouesse de Pipriac en l'evesché de Saint-Malo, contenant que
ou moys de mars derroin passé, Jacques Georges filz de ladite supliante et frere germain dudit
Guillaume suppliant, fut constitué prinsonnier en la maison et manoir du chastel en ladite
parouesse de Pripriac appartenant au sr d'Uzel, sur le cas et accusation que luy faisoit le
procureur du chastel d'avoir iceluy Jacques tué et mys a mort ung nommé Olivier Hacguet de
ladite parouesse. Pendant le temps de laquelle detemption, lesdits suplians alloint
ordinairement audit lieu du chastel visiter ledit Jacques Georges et luy porter a boyre et a
manger. Et ainsi qu'ilz estoient avecques ledit Jacques en ladite maison ung des jours dudit
moys de mars quelz ne scavent aultrement specififiez ne declerez, s'advisa ledit Jacques
Georges quel estoit feré d'une payre de fers par les piez, de dire audit suppliant qu'il luy estoit
requis trouver faczon de s'en yssur de ladite detemption et misere ou il estoit, priant audit
Guillaume suppliant sondit frere en apresance de leursdite mere qu'ilz luy eust, serché et
apporté une lyme pour lymmer les chevilles ou granpilles desdits fers, disant qu'il trouveroit
bien amprés sur moyen de s'en yssur et qu'il savoit la faczon d'oupvrir l'huys de la chambre ou
il estoit en prinson. Ce que lesdits suplians meuz de pitié et amour naturelle luy accorderent et
dempuix, savoir le sabmady penultieme jour dudit moys de mars qu'estoit la veille (/) de
Pasques derreine, lesdits suplianz qui avoint recouvert une lyme, ymaginans que la pluspart
des demourans a ladite maison et manoir du chastel et aultres ayant la garde dudit Jacques,

estoint allez ouyer la messe et service divyn a l'eglise dudit Pripriac, se transporterent lesdits mere et filz suplians audit lieu et manoir du chastel a la porte duquel lieu demoura ladite mere et ledit Guillaume s'en alla a ladite maison et entra facilement et sans impeschement en la chambre ou estoit sondit frere ayant avecque luy ladite lyme et ung hachereau en maniere de cougnee et les bailla a sondit frere, o laquelle hache lesdits Jacques et Guillaume rompirent lesdits grupilles de fer et lors se deffera ledit Jacques et s'en yssut hors ladite maison et manoir du chastel environ l'heure de onze heures du matin dudit jour et s'en alla au bourg de Loheac et se mist en l'eglise dudit lieu en franchise. Et dempux par foyz s'est iceluy Jacques randu, couché et levé a la maison desdits suplians. Quoy venu a la cougnoissance des officiers de ladite court du chastel et de rigueur ont procedé a rigueur d'office et decreté aiournement personnel sur lesdits suplians aiourné duquel ilz n'ont osé comparoires a vous et ont deffailly. Et dempux sur ladite defaillie ont esté de rechieff aiournez personnellement a certain jour auquel ilz se sont parrillement lessez defaillir. Et doubtent lesdits suplians que lesdits officiers veillent a celle cause vers eulx proceder a forban de cedit pays et les troicter par rigueur de justice qui seroit cauce de leur totale destruction et pouvrecté, nous suplians qu'ilz nous plaise avoir pitié et compassion d'eulx en ayant esgard et conscideracion a leur suplisse et ignorance. Aussi que iceulx suplians sont mere et frere dudit Jacques, pourquoy naturellement ilz estoint enclins a subvenir a leur sang et sur ce leur impartir noz grace et remision dudit cas tres humblement le nous requerant. Pourquoy nous etc, () l'adresse a Ploermel pourveu etc. Donné aRennes ou moys de mays l'an de grace mil cinq cens vint ung et de nostre regne le septiesme, ainsi signé sur le replot visa et pour secretaire Kergueon et scellé en laz de soye et cire verd.

N° 19. (45)

Remission pour Estienne Lemaczon du meurtre par luy commis en la personne de Symon Menguy l'adrece a Nantes pour veriffiez :

Françoys, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble suplicacion et requeste des parens consanguins et amys de Estienne Lemaczon povre laboureur de la parouesse de Saint-Estienne de Montluz en nostre diocese de Nantes, exposant que le jour des Innocens vingtuictiesme jour de decembre mil cinq cens dix sept, ledit Lemaczon, (/) a present detenu prinsonnier en noz prinsons et Bouffay dudit Nantes, alla au bourg de Coairon acompagné d'un nommé Jannet

Ertand de ladite parouesse de Saint-Estienne pour faire appointment de la somme de sept soulz seix deniers monnaie qu'il debvoit a ung nommé Gilles Solumen par appoincte entreulx faict, touchant certaines vaiches vendues par avant celles heures par ung nommé Jehan Gicqueau du pris de la haye audit Solumen. Ouquel bourg de Coairon, ilz disgerent ensamble lesdits Maczon, Hertand, Guillaume et Gilles Les Solumens et Nycollas Pamet et partirent lesdits Lemaczon et Hertand d'avecques lesdits Solumens environ l'heure de soulaille couchant, fort enboictez et prins de vin et passerent par les moullins de la Brize a aller (?) en Coairon et en s'en allans trouverent Guillaume Menguy de ladite parouesse de Coairon environ la quintayne de Bougon pres la maison de Jehan Symon fondeur estant ou villaige de la Grurretiere et quant lesdits Lemaczon et Hertand furent davant la maison dudit Symon, ledit Hertand dist audit Lemaczon: " ce poeslier bruslera toute sa maison ! " parlant dudit Symon pourtant qu'ilz voyoint grant clarté tant y avoit grant feu en icelle maison, ausquelles parolles respondict ledit Manguy audit Hertand: " de quoy te soucyes tu ! il ne bruslera pas la tienne ! " auquel respondy ledit Hertand: " et toy de quoy te soucyes tu ! " s'escria dru. Et surtant alla vers ledit Manguy et luy bailla ung coup de poign et le tomba par terre et apres ledit Manguy soy releva et lors s'entre prindrent au poil et cuyda ledit Hertand tomber a terre et dist audit Lemaczon cryant a haulte voix: " ayde moi ribault ! il me gaigne ! ". Et alors ledit Lemaczon auparavant qu'il fust arrivé a eulx en les allant departir dist audit Hertand qu'il avoit foullé ledit Manguy o les piez et genouz apres qu'il estoit tombé par terre en disant : " lesse cela ! tu ne fays pas bien ! ". Et alors ledit Hertand s'en alla et lessa ledit Manguy et au lever que fist icelluy Manguy vint prandre ledit Lemaczon au collet et le tomba par terre combien que ledit Lemaczon de tout son pouoir avoit porté ledit Manguy contre ledit Hertand. Ledit Lemaczon se voyant ainsi oultragé sans cause et tomber par terre, tout eschauffé et prins de vin, tira son couteau et en donna ung coup par le corps audit Manguy, ne sceyt en quel endroit ce fut mays dyt ledit Lemaczon avoir bien cougneu et dempuix entendu que dudit coup seul ledit Manguy fut actaint au viff du cuyr et d'icelluy couteau frappa (/) par troys foyz mais les autres n'entrentent ou cuyr comme le precedant coup. Et quant ledit Manguy se sentyt frappé dudit couteau crya a la force et surtant ledit Lemaczon et Hertand s'en allerent ches ung nommé Jehan Morice de ladite vimandiere en ladite parouesse de Coairon, auquel lieu ilz beurent et mangerent et estoit lors de ce que dessus, heure de nuyct jour couchant. Et a l'entree qu'ilz fisdrent ches ledit Morice, ledit Lemaczon mist deux fagotz ou feu et quant ledit Morice veyt ce dist audit Lemaczon: " otez ca de ce boays ! vous en meptez trop ou feu ! vous pourriez bien brusler la maison, il n'y a pas point de cheminee ! ", laquelle femme dudit Morice demanda ausdits Hertand et Maczon: " d'ou venez vous ? " a quoy respondyt : " nous

venons de Coairon pour debvoir appointé Lemaczon et Gilles Solumen et avon trouvé en nous en venant ung nommé Guillaume Manguy qui a eu debat a nous deux pour ce que j'ay dyt ce poeslier bruslera sa maison et que alors ledit Manguy respondyt qui es tu pour le dire et lesdits Maczon et Manguy s'estoit prins ensamble et que ledit Manguy avoit trebuché ledit Lemaczon et qu'il avoit baillé ung soufflet audit Manguy ". Apres quoy dist ledit Hertand audit Lemaczon: " tu as tyré le couteau j'aymasse myeux avoir perdu une pippe de vin voyre un escu voyre deux que tu eusse faict ce que tu as faict ! " et lors respondyt ledit Lemaczon : " je n'ay faict que decoustre sa robbe " et dist ledit Hertand " vous luy avez touché a la chair car il a cryé a la force du couteau ". Au moyen desqueulx coups, en icelle mesme nuyt, alla ledit Manguy a trespas par deffault de penczement ou aultrement et en icelle nuyt et bientost apres vint en la maison dudit Lemaczon Jehan Desbourgeaulx l'un des officiers de la juridiscion de Bougon et pluseurs aultres en sa compaignie et prindrent prisonnier ledit Lemaczon et le menerent et constituerent prinsonnier en la maison dudit sr de Bougon ou il fut longuement detenu. Et apres trouva moyen ledit Lemaczon de s'en yssur de ladite maison de Bougon et se randyt fuitiff hors ce pays et duché ou il a esté longtemps et jucques a peu de temps quel s'en estoit retourné vers son pere et incontinent luy arivé, a esté ledit Lemaczon prins et constitué prinsonnier es prinsons du Bouffay de Nantes esquelles il est a present grieffvement detenu. Et doubte que a raison dudit cas et homicide, les officiers dudit Nantes veillent vers luy rigoureusement proceder s'il n'avoit pas sur ce noz lettres de grace, remission et pardon tres humblement les nous requerant. Pourquoy nous etc, pourveu etc, la verificacion adrecé aux juges de Nantes. Donné aRennes ou moys de may l'an de grace mil v^{ctz} vingt ung et de nostre regne le septiesme, ainsi signé sur le replict visa et pour secretaire Beaucouché et scellé en laz de soye et cyre verd.

N° 20. (46)

François, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble suplication et requeste des parens amys consanguyns de Henry Bourigan povvre jeune homme chargé de femme et enffans, natiff et originaire de la paroesse de Cliden ou diocese de Cornouaille, contenant que en ceste presente annee, ledit Bourigan estant a besoigner de son moistier de mynusier et ymagier en la maison de Nycollas Meur demeurant a Lannyon, il veyd quelque jours entre aultres ledit Le Meur, en la chambre derriere du second estaige d'icelle maison, compter de l'or et de l'argent et les meptre en une bourcze de cuir en ung dressouer de chesne, quel se fermoit a cleff, que ledit

Meur avoit en sadite chambre. Ledit Bourigan pour debvoir prolonger la vie de sesdits femme et enffans qui estoient et sont si tres pouvres qu'ilz ne tiennent que manger ne que vestir, proposa et ymagina en soy mesmes d'aller desrober l'or et l'argent du dressoner dudit Nycollas Meur. Et deffaict, en meptant sesdits propos et ymaginacion a execution, trouva moyen de lever o ses mains le tableau qui couvroit ledit dreczouer, par dessus lequel estoit cousu contre ledit dressoner avecques des chevilles de boays de chesne, et de ladite bource qui illecques estoit, enbla a troys foyz les especes d'or et monnaie d'argent qui ensuyvent : savoir la premiere foyz trante escuz soulail, la seconde foyz, qui fut environ ung moys apres, quinze fleurins et la tierce foyz qui fut environ six sepmaines apres deux ducatz, deux mouttons d'or, troys phelipus, deux francs a cheval et vingt soulz par monnaie. Quelle somme d'or et (/) d'argent, ledit Bourrigan mist et employa, savoir partie pour nourrir, alymenter et vestir sesdits femme et enffans et la pars sur pour acheter du boys de chesne et d'ifre pour besoigner en sondit moistier de mynuserie et ymagerie. Sur lesquelz cas et chancun fut ledit Bourigan a l'instance de nostre procureur de Lannyon mist et constitué prinsonnier en noz prinsons dudit Lannyon ou il est a present rigoureusement detenu. Si nous remonstrant, lesdits suplians que ledit Bourigan est povre jeune homme chargé comme dyt est de femme et petiz enffans et l'un des meilleurs oupvriers et l'un des plus experts en son moistier de mynusier et ymagier qui soit es evesché de Triguier et Cornouaille que desdits cas a satisfait convenablement ledit Le Meur et auparavant iceulx cas estoit ledit Bourigan homme de bien, de bonne vie et honneste conversacion tel tenu et réputé notoirement et publicquement sans james avoir esté actaint d'aultre villain cas blasme ou reprouche et que ce qu'il a fait a plus esté par soffreté, pouvreté et indigence qu'il veoyt souffrir a sesdits povre femme et enffans qui mourroint de faym a raison de la grant chereté qui a eu depuis ledit temps et a encores de present cours en cestz nosdits pays et duché, nous supliant tres humblement qu'il nous plaise remectre et pardonner (/) audit Bourigan les faictz et cas dessusdits. Pourquoi nous lesdits choses considerees, voullons etc, l'adrecze a Lannyon pour veriffiez etc. Donné aRennes ou moys de may l'an de grace mil v^{ctz} vingt ung et de nostre regne le septiesme, ainsi signé sur le replot visa et pour secretaire Beaucouché et scellé en laz de soye et cire verd.

N° 21. (47)

Françoys, par la grace de Dieu roy de France et duc de Bretagne, savoir faisons a touz presens et a venir nous avoir receu l'umblé suplication des pouvres parens et amys consanguins de Phelypes de Kerineuc et Morice Soric pouvres compagnons mariners

demourans au Croesic, a present detenez prisonniers en nostre chateau de Brest, contenant que eulx estans ou havre du Conquest en Basse-Bretaigne, actandans le vent propice pour mener en Anglecterre une pinace de sel, de laquelle Raoul Quelas est maistre apres Dieu, qu'ilz avoint amené dudit Croesic charger de sel, apres avoir disgné, en ladite pinasse ung () d'avril (). Lesdits prisonniers et plusieurs aultres descendirent de ladite pinasse a terre et eulx illec descenduy, lesdits prisonniers trouverent ung nommé Jehan Mousset, fuitiff dudit Croesic pour plusieurs cas qu'il y avoit commis se murent ensemblement ches une nommee Marie Lasaigueul taverniere dudit lieu. Et ainsi qu'ilz estoit ensemble a boire, apres ledit Phelipes avoir cougneu ledit Jehan Mousset, iceluy Phelipes dist audit Mousset qu'il s'en allast de leur compaignie et qu'il estoit sorcier et surtant s'esmurent rudes parolles entreulx. Et voyant ledit Phelipes, ledit Mousset le voulloir oultraiger et le menassoit de le gectez dehors par les fenestres, ledit Phelipe se leva de la table ou ilz estoit ayant ung cousteau nu en sa main, non pour en faire mal mais pour se deffandre dudit Mousset, et surtant ladite Espaigueul qui ouyt le bruics qu'ilz faisoit en sadite maison, les separa et fist aller hors d'icelle. Et ainsi que ledit Phelipes alloit devant et ledit Mousset apres, ledit Mousset frappa de sa main en (?) ledit Phelipes sur le visaige tellement qu'il luy fist le visaige tout ensanglanté et sur ce s'entre prindrent lesdits Phelipes et Mousset anthreueulx. Et ce voyant, (/) ledit Morice Soric qui est marié a la seur dudict Phelipes, doubtent qu'ilz ne se fussent entretuez et esperant les faire separer et lascher l'un l'autre, ledit Morice donna ung seul coup de poignart par derriere en l'espaule dudit Mousset. A raison duquel coup, ledit Mousset alla incontinant apres de vie a deceix, et ce venu a la cougnoissance des officiers dudit () constituerent prisonniers ledit Phelipes de Kermeur et Morice Soric et les enmuyrent en notredit chateau de Brest ou ilz sont detenez en grant calamité et misere et doubtent lesdits suppliants que nosdits officiers veullent a ceste cause proceder vers eulx a rigueur de justice, si par nous ne leur est sur ce () de nostre grace et misericorde (). Remonstrent lesdits suppliants que lesdits Phelipes de Kermeur et Morice Soric ont esté tousiours esté gens de bien de leur estat () a honestement vescu sans jamais avoir esté actains ne convaincu d'aulcun autre villain cas blasme ne reproche et ledit feu Mousset avoir esté homme de mauvaise vie et pour ses desmerites fuitiff ung temps dudit Croesic et estoit encorres au temps que ledit cas advint. Et que lors que ledit Phelipe Du Kermeur luy dist qu'il s'en allast d'avec luy et luy reprocha qu'il estoit sorcier () pour que l'en eust dict quant il eust esté retourné audit Croesic quel avoit convaincu avec () Mousset et que puis celle cause il en eust peu avoir domaige. Et que dempuix ledit cas avenu, aulcuns des parens desdits supplians ont appoincté et transigé avecque la femme et les parens dudit feu Mousset pour leur interetz dudit () et mort dudit Mousset, par lequel appoincte, lesdits

femme et parent dudit Mousset nous ont supplié et requis remectre, quicter et pardonner ledit cas ausdits Phelipes et Morice, nous suppliant a ceste cause lesdits supplians actendu ce que dist est il nous plaise nous () ausdits Phelipes Du Kermeur et Morice Soric () de graisse (sic), remission et pardon.

N° 22. (48)

Françoys, par la grace de Dieu roy de France et duc de Bretagne, a touz presens et a venir sçavoir faisons nous avoir receu l'humble suplicacion et requeste nous faicte de la part des parans et amis consanguins de nostre povvre subject Jehan Morice, labeureur, de l'asge d'envyron vingt cinq ans, demeurant en la parouesse de Bleign soubz nostre juridicion de Nantes, contenant que le dimanche jour de () derroin, ledict Morice apres avoir ouy celuy jour la grant messe oudit bourgc de Bleign se trouva en la maison de (?) Jebin en laquelle demeure Jehan Roze en la compaignie de Michel Lesur, Colline femme de Jullien Allain, Jehanne Chevalier femme de Jehan Chevreul et aultres a boyre a la relevaille de la femme d'iceluy Morice, quelle celuy dismanche estoit aller a messe. Et ainsi que les dessusdits beuoint en icelle maison, furent et se trouva avecques eulx Jullien Gendron quel beut en leur compaignie. Et d'illecques allerent encorre boyre en la maison de Helaine tenant taverne de vin pres le chasteau dudict Bleign et avecques eulx Jullien Allain et sa femme, ladicte femme dudit Chevreul et aultres, avecques laquelle Helaine ledit Morice et Michel Lesur firent marché d'avoir par charoy de Nantes audit lieu de Bleign a ladite Helaine une pipe de vin pour certaine somme d'argent entreulx convenue et une pinte de vin que donnoit ladite Helaine en faveur dudit marché. de laquelle pinte de vin, ledit Jullien Gendron beut avecques lesdits Morice et Lesur sans aulcune chose en poyer et tost apres dist ledit Jullien Gendron audict Morice que eulx eulx (sic) s'en fussent allez en la maison de Mathurin Gendron et que Guillaume Bohcas y estant, luy debvoit baillé ung beuff et que en icelle maison il eust poyé chopine de vin, ce que ledit Morice liberallement luy octroa et y allerent et beurent ladite chopine de vin quelle celuy Jullien Gendron poya puis apres se departirent, ledit Morice et Jullien queulx estoit fort enboitez de vin, de ladite maison dudit Mathurin Gendron pour s'en aller au pont Locquel tirans a leurs maisons et tirans ledit chemyn. Et apres qu'ilz furent passez la chaussee de l'estangc appellee l'estangc neuff au dessoubz de la chappelle Saint-Roch sans que lesdits Morice et Jullien Gendron eussent auparavant eu aulcune dircusion (/) ne parolle de injure, commença celuy Jullien a dire audit Morice en jurant : « Beau Dieu ! Tu

me doiz de l'argent, tu le me poyras ! » A quoy ledit Morice luy respondit et dist que s'il devoit aulcune chose audit Jullien qui le luy poyroit bien et sur ce ledit Jullien appella ledict Morice larron, quel Morice luy dist qu'il n'estoit point larron ne sa lignee au record du peuple, ledict Jullien disant audict Morice qu'il avoit menty et que celuy Morice avoit esté en la grange d'icelluy d'iceluy (sic) Jullien et avoit emporté du foign d'icelle tellement que d'iceluy foign ledict Morice avoit fait ung voyaige audit Nantes avecques ses beuffz et charrette. A quoy ledict Morice dist que jamais n'avoit entré en ladite grange et de recheff dist celuy Jullien audit Morice qu'il avoit menty et qu'il avoit convenu au pere d'iceluy Jullien faire faire (sic) des barres a l'huys du lieu ou estoit ledit foign. Et ce voyant ledict Morice ce mist a genoulz disant et priant Dieu que s'il avoit jamays desrobé foign audit pere d'icelluy Jullien, que l'Enemy le prist emportez devant tout le monde et s'il avoit jamais esté en ladite grange pour le (?). Et ce fait, voullant celuy Morice s'en aller et eviter a la noyse et question dudit Jullien, se avança de chemyner tirant a sadite demeure aux environs dudit pont Locquel, et ce voyant ledict Jullien, tout effrené et esmeu, dist en jurant Dieu que les larrons faisoient de la maniere que faisoit celuy Morice et qu'ilz fuyssoint devant les gens de bien ! Sur ce, ledit Morice se arresta et dist audit Jullien qu'il ne fuyssoint point et n'estoit point larron. Et surtant ledit Jullien Gendron et Morice s'entre prindrent et saisirent au corps et s'entre tenans, ledit Morice voyant que ledit Jullien Gendron estoit plus dangereux et puissant que luy, aussi comme celuy Jullien luy disoit qu'il ne se fust point espargné d'un petit cousteau pragoys que celuy Morice et Michel Lesur avoint trouver en leur chemyn dempuix qu'ilz estoient partiz dudit bourg de Bleign, quel demoura audict Morice faizant recompanche d'un () Lesur pour sa part de la trouvaille dudit cousteau. Et (/) d'iceluy donna celluy Morice ung seul coup audict Jullien envyron l'estomac et tout incontinant print a s'en fuyr de long des boays du Breill estans illecques pres et demeura celuy Jullien qui estoit enboué de vin comme dict est, blecé quel tant a l'ocasion dudit coup que mesme quel noise fist pincer aussi qu'il demeura et couscha dehors par les chemyns toute la nuytee et apres ledict coup donné durant laquelle nuytee il pleut fort et fist mauveix temps, alla le landemain dudit coup donné, de vie a trespas. A l'ocasion duquel cas fut ledit Morice oudit mesme jour dudit coup donné, prins et constitué prisonnier es prinsons du chasteau de Bleign ou il est encore a present detenu a grant detresse de sa personne. Remonstrans lesdits parans et amis que ledit Morice est doulx et de paisible vie, non rumoreux ne debatiff, bon labeureur et bien aymé de ceulx qui de luy ont cougnoissance, lequel auparavant ledict cas n'avoit eu debat ne haygne preconceue avecque ledit Jullien quel estoit rumoreux et debatiff, jureur et grant blaphamateur du nom de Dieu, nous suppliant.

N° 23. (49)

Franczoys, par la grace de Dieu roy de France duc de Bretagne, a touz presens et a venir, sçavoir faisons nous avoir receu l'humble supplicacion de pouvres parens et amis consanguyns de Thieunot Coutins, de la parouesse de Helie, prinsonnier es prinsons de Chasteaubrient, contenant que le dimanche quatorzieme jour d'octobre, ung peu apres la feste de toussainctz dereniere, apres avoir soupé au chateau de Chasteaubrient, ledict Thieunot, acompaigné de ung nommé Jehan Floury et ung aultre nommé Pierres, faulconnier du sr de Chasteaubrient, firent entreprinse et monopolle d'aller au bourg de Beré pour ledit lieu de Chasteaubrient veoirs une fille qu'ilz avoint ouy dire y estre de nouveau veuve, et en fut premier motiff ledit Jehan Floury. Et quand ilz furent audit bourgc, ilz entrerent ches ung nommé Hardouyn ou ilz trouverent ung religieulx dudit Beré qui mengeoit des chastaignes, lequel donna a boyre au Thieunot, puis s'en yssurent de ceans sans y faire aultre chose et de la entrerent en la maison d'un nommé Harel ou paroillement ilz beurent, et leurs furent les huiffes desdites maisons oupvers sans aulcun bruiet ne scandal. Apres ce, s'en retournerent vers la ville dudit Chasteaubrient et comme ilz passoient par devant la maison d'un nommé Robin Le Lecorq, ouyrent gens en icelle maison qui parloient ensemble. Et a donc ledit Pierres, faulconnier, demanda audit Thieunot s'il oupviroit l'huiffe d'icelle maison, ledit Thieunot luy respondi que en fist comme il vouldroit. Sur quoy s'aproucha celuy Pierres d'iceluy huys de maison et le poussa en icelle et y entra, et demeura audit huys celuy Jehan Floury et ledit Tieuot se mit pres d'un puiz a quelque pies de distance d'icelle maison. Et en l'instant s'en sortit hors ledit Lecorq en sa chemise, ne sceit ledit Tieuot pour quelle cause fors qu'il estimoit qu'il allast querir du feu et passa empres dudit Tieuot fuyant a grant course et disant a iceluy Tieuot ne me affolez point. Et ledit Pierres estant en icelle maison envyron ung demy quart de heure apres que ledit Pierres y fut entré, celuy Tieuot ouyt la femme dudit Lecorq qui appelloit assez haultement son ante mais actendit qu'il y eust aultres parolles (). Et tost empres s'en yssut celuy Pierres hors d'icelle maison en laquelle incontinant y entra ledit Floury sans que ledit Tieuot y entrast aulchunement ne s'efforsast y entrer (/) tousiours anczoys, estoit au devant et hors icelle maison et durant que ledit Floury estoit en icelle qui gueres n'y arresta celuy Tieuot demanda audit Pierres par telles parolles : " qu'avez vous faict a ce pouvre homme qui ainsi s'en fuit a grant force ? ", celuy Pierres luy respondi : " je ne luy ay rien faict fors que je l'ay poussé de dessus son lict puis me suys gecté sur iceluy et aultrement ne luy en parla, ne tint autre propos ! ". En l'endroit de quoy s'en sortit celuy

Floury d'icelle maison et rentra celuy Pierres, et voyans lesdits Floury et Tieunot que ledit Pierres estoit ainsi rentré, prindrent chemyn a s'en aller vers la maison d'un nommé Jacquet Jambeu ou y ouyrent bruict de gens a l'huys de laquelle maison ledit Tieunot gecta une pierre chemynans pas a pas contre actandans celuy Pierres qui incontinant va ariver a eulx et eulx trois assemblement sans autre propos tenir se mindrent a chantez prenans chemyn a venir vers ladite ville de Chasteaubrient et allerent boyre ches ung nommé Le Cordier et ce faict se departirent et allerent chacun d'eulx a sa chambre. Et au lendemain matin, se trouverent quelques gens qui diserent audit Tieunot qu'il estoit bruyt de ce qu'ilz avoient faict ches ledit Lecorq et que iceluy Lecorq s'en estoit plaint a justice. Adonc celuy Tieunot alla vers ledit Pierres pour l'avertir de ce, lequel Pierres n'eu grant cas et dist seulement audit Tieunot qu'il avoit lessé son poignart en la maison dudit Lecorq ou ailleurs, ne scavoit ou. Et furent encorres lesdits Pierres et Tieunot tout celuy jour de lendemain au chasteau et ville dudit Chasteaubrient et le mardi ensuyvant ouyrent le bruyt que l'on faisoit dudit cas et s'en allerent en franchise a Saint-Saulveur de Vitré ou ilz furent envyron deux ou troys jours et la furent advisez que ledit sr de Chasteaubrient avoit commandé lors qu'ilz seroient prins que l'on en fist justice. Quoy voyans sortirent de ladite franchise ou lors ilz estoient et prindrent chemyn a aller a Ancenis, et ung peu par de la eurent debat lesdits Jehan et Pierres ensemble touschant ledit cas et en ce qu'ilz s'entre repproucherrent l'un a l'autre s'est () cause de ceste facherye et sur (/) evaginerent leurs espees pour voulloir l'un l'autre frapper, de quoy furent empeschez par ledit Tieunot qui entre eulx deulx se mist. Et apres chemynerent encores quelque peu ensemble jucques a la Disier apres laquelle celuy Tieunot se departit d'ovecques eulx et s'en alla seul a son aventure sans ce que dempuix ayt veu lesdits Pierres ne Floury. A raison duquel cas, lesdits supplians doubans que l'on veille allencontre dudit Tieunot rigoreusement proceder, lequel par avant ledit cas s'est tousiours bien et honnestement conduict et gouverné ou service de plusieurs bons personnaiges de cestz nosdits pays et duché et ailleurs sans james avoir esté actaint ne convaincu d'aucun aultre mauveix cas, nous supplians et requerans tres humblement qu'il nous plaise () audit Tieunot sur ce notz lettres de grace et remission. Pourquoi.

N° 24. (50)

Franczoys, par la grace de Dieu roy de France duc de Bretagne, a touz presens et a venir sçavoir faizons nous avoir receu l'humble supplicacion des parens et amis consanguins de Rolland Couste, filz de Janet Couste, exposant que le vignt ung^{me} jour d'apvril derroin et

quequesoit puix six semaines, ledit Couste lors estant a lever du teray en une sienne piece de terre en la parouesse de Plenest⁶ soubz la jurdiscion de Jugon, il ouyt grant bruyt, scandal de cry de force assez pres du lieu ou estoit ledict Couste et ou il pouoit facilement veoir, ouquel debat (/) estoit ung nommé Franczoys Picault et sa femme. Quel Picault, tenoit Perrine Couste, ante paternelle dudict Rolland, aux cheveux et cryoit icelle Perrine a l'ayde parlante audit Rolland et disante: " Rolland ! me lesseras tu tuer ! ". Quoy voyant ledict Rolland, courroucé et desplaisant de ce que ledict Picault tenoit sadite ante au poill, s'en couroit audit conflict et debat ayant une beche en sa main et lors qu'il y fut arivé gecta celuy Rolland sadite beche a terre et s'en vint audict Picault luy disant par telles ou semblables parolles : " Ha gars ! Vous avez iniurié mon ante ! » Et print ledit Picault es cheveux et le gecta en ung fossé et quant ledit Picault fut choist a terre, lequel paroillement tenoit ledict Rolland aux cheveux, iceluy Rolland donna plusseurs coups des piez et genoulz en divers endroits du corps dudit Picault. Laquelle se prant a cryer « Force ! Au meutre ! » Et lors s'entre lesserent iceulx Rolland et Picault en l'instant. Ledit Rolland estant tousiours eschauffé et courroucé de exceix faictz a sadite ante, dist par une foiz ou deux que ledict Picault ne mourroit james que de ses mains. Et deulx ou quatre jours apres ledit conflict, a ce qu'il est venu a notice et a cougnoissance audict Rolland que ledict Picault estoit malade et gisant au lict et que l'on disoit Jullien Picault se plaindre dudit Rolland et qu'il estoit cause de sadite maladie, ledit Rolland a esté veoirs ledit Picault et luy requist pardon et donna de l'argent a la femme dudit Picault, touteffoiz dempui ce et es quinze jours dudict debat est allé ledit Picault de vie a deceix. Et a raison de ce, le procureur de la court de Jugon a faict ajournez ledit Rolland, quel et craignant la rigueur de la justice s'est rendu fuytiff, nous suppliant.

N° 25. (51)

Franczoys, par la grace de Dieu roy de France et duc de Bretagne, a touz presens et a venir salut, faisons nous avoir receu l'humble supplicacion des parens et amis consanguyns de Lucas Legoff, a present detenu prinsonnier es prinsons du regaire de votre ville de Vennes, contenant que comme long temps a, ledit Lucas Legoff et feu Yvon Legoff son frere, feussent associez ensamble (/) a moictié de pourfild pour pescher et prandre poisson en la mer et havres de notredite ville de Vennes et que le lundy vingt sept^{me} jour de may derroin, ilz eussent deliberé ensemble de aller pescher ainsi qu'ilz avoint a coustume faire iceulx Lucas et Yvon Legoff freres, Yvon Paille et Jehan de Kerueur en leur compaignies adviserent par entreulx

⁶ Plenée-Jugon.

d'aller boyre par avant aller pescher. Et deffaiect allerent en la maison de Robert Broecet demeurant a Calmont es foursbours dudit Vennes, ou ilz beurent tellement qu'ilz s'enyvrent et eulx estans ainsi yvres, envyron l'heure de deux heures apres medi d'iceluy jour, lesdits Lucas Legoff, Yvon, Paulle et Kerveur s'en allerent du port et havre dudit Vennes ensemblement l'escasse de (?) et icelle escasse conduissirent en ladite mer jucques en l'endroit de Kervir. Ouquel lieu, ledit feu Yvon Legoff frere dudit Lucas, qui alloit a pyé par terre, se adrecza a eulx et le prindrent lesdits Lucas Legoff, Paulle et Kerveur et luy ayderent a entrer en ladite escasse. Et il y entré, conduissirent ensemblement ladite escasse o les environs dudit lieu de Kervir jucques a ung petit estier de mer appelé bec meil estant pres le lieu de Kerbourbon. Et eulx illec arrivez, misdrent ladite escasse a flot et abaptirent la velle de ladite escasse qui estoit mise et levee au vant et lessa ledit Yvon Legoff qui gouvernoit la praultre et gouvernail de ladite escasse, icelle frapper en la vase. Quoy voyant celuy Lucas Legoff dist audit Yvon sondit frere que il n'estoit que ung yvraign de les avoir ainsi conduictz sur ladite vase, a quoy ledit Yvon respondit que si ledit Lucas eust esté en son lieu que il n'eust sceu faire autre chose et surtant lesdits Lucas Legoff et Kerveur sortirent hors ladite escasse et se mirent en ladite mer a bouter ladite escasse de sur et icelle ouster de dessus ladite vase, ce qu'ilz firent. Et ce faict se remmidrent lesdits Lucas et Kerveur en ladite escasse et eulx y estans fut encores ladic voelle de ladite escasse levee et mise au vent, en l'endroit de quoy se trouva entre lesdits Lucas et Yvon Legoff freres, parolles iniurieusses sur lesquelles ledit Lucas bouta ledit Yvon Legoff de telle (/) sorte qu'il tomba a dus contre le mast de ladite escasse. Et se voyant ledit Yvon ainsi tombé deist audit Lucas sondict frere par telles parolles ou semblables: " pourquoi me frappes tu ! tu m'as moillé mon pain encorres ne m'en plaignoys je pas ! " et en se dissant, se avanza ledit Yvon pour debvoir frapper ledit Lucas sondict frere, ce qu'il ne peut faire pour ce que ledit Paulle feist audit Kerveur se meptre entreulx deux de peur qu'ilz ne s'entre feussent blecez. Et neantmointz, lesdits Lucas et Yvon Legoff s'efforcerent de s'entre voulloir frapper, par sur les espaulles dudit Kerveur, et comme ilz estoient ainsi s'efforcans s'entre frapper, ledit Lucas actegnyt de sa main ledit Yvon par quelque endroit de son corps par telle sorte et maniere que ledit Yvon Legoff tomba de ladite escasse en ladite mer ou bientost apres il noya et alla de vie a deceix. A raison de quoy fut ledit Lucas part la justice dudit regaire prins et aprehandé au corps et constitué prinsonnier es prinsons dudit lieu et ses biens meubles prins, mis et saesiz en la main de ladite justice. Si vous remonstrent lesdits supplians que lors et auparavant ledit conflict, lesdits Lucas et Yvon Legoff avoient esté et estoient compaignons pescheurs et que lors qu'ilz partirent dudit Vennes pour aller pescher en ensuyvant ladite () yvres et emboyté de vin comme dict est, tellement

que a grant paine ilz se pouoint soutenir. Et que auparavant iceluy conflict et deceix advenu, ilz n'avoient eu james ensemble aucun debapt, hayne ne inimitié presconceue, amis avoient eu amour et amytié ensemble comme freres et qu'ilz debvoient par raison. Aussi vous remonstrent lesdits supplians que ledit Lucas est povre jeune homme d'envyron l'asge de trante ans, marié et chargé de femme et enffens, n'ayant ledit Lucas aucuns biens pour les substanter, nourrir ne alymenter fors seullement de son povre labour et mestier de peschaige et que tousiours dempui le temps de son jeune asge il s'est toujours bien troicté, regy et gouverné, sans james avoir esté reprins ne actaint d'aucun cas digne de reprehantion. Ains en a esté et est tenu (/) censé et réputé notoirement et communement entre les gens qui de luy ont cougnoissance, homme de bien, de bonne vie et gouvernement. Et doubtent que sans avoir esgard a ce, les officiers de la jurdiscion dudit regaire veullent proceder contre luy a rigueur de justice, qui seroit au grant detrimet et dommaige dudit Lucas et de sesdits parens, si par nous ne luy estoit sur ce impetre nos grace, remission, quictance et pardon, nous suppliant actendu ce que dessus il nous plaise sur ce luy conceder noz lettres a ce convenables tres humblement () icelles () pour.

N° 26. (52) 12 juin 1521

Même affaire que B 28, n° 8

[134r] Franczoys, par la grace de Dieu roy de France et duc de Bretagne, a touz presens et avenir, sçavoir faizons, nous avoir receu l'humble supplicacion des parens et amis consanguyns de noz povres subgectz Jehan Closier et Katherine du Brehatz sa femme, a present detenuz es prinsons de nostre court de Moncontour presens aux officiers du seigneur du Bessoï en sa juridicion de Trebrit, court subgecte de celle de Moncontour, contenant que comme ainsi soit que le neuffiesme jour de decembre derroin, qu'estoit jour de dimanche, envyron nuict fermante d'iceluy jour, ariverent au bourgc de Trebit en la maison ou pour lors demeuroint et tenoient taverne lesdictz Closier et sa femme, deulx personaiges a eulx incongneuz, qu'eulx ont dempui ouy nommer, sçavoir l'un Jehan Tibour, et l'autre

dom Jehan Cordier, pretre, dissans estre frarieurs et
pardonneurs et vouldoir tirer en Basse Bretagne
pour certains pardons dont disoint avoir charge,
[134v] quelz demanderent a estre logez, ce que leur fut
acordé par lesdictz Closier et sa femme. Et sur tant,
ledict Tibour qui estoit monté sur ung beau et grant
cheval descendit et entrerent luy et ledict
Cordier en ladicte maison, ou bas de laquelle estoit
lors, bevans et faizans bonne chere, Jacques
Hyno, dom Jehan Noel, Jehan Tardinel, ledict Jehan Closier,
hoste, et plusseurs aultres. Et bien tost apres qu'ilz
furent entrez ou bas de ladicte maison, furent par
icelle Katherine menez et conduitz en une chambre
haulte sur le celier, et eulx estans en la
chambre, ledict Tibour demanda a ladicte femme s'il y avoit
point de faisans ou quartier disant qu'il en serchoit
pour faire ung presant, laquelle luy respondit
que ouy, et deffaict y avoit es envyrons dudict
Trebis des gens qui en prenoient et pour en debvoir
recouvrer quequesoit soubz vendre de ce, ledict Tibour bailla
ung ducat a icelle femme que en fist serché, mais n'en
trouva aucun pour lors. Et ce pendant, sur le propos que
eurent lesdictz Closier et ladicte femme de trouver des [?]
pour le soupper d'iceulx frarieurs dont ilz estoient
en soucy, ladicte femme dist a son mary qui estoit
enboitté de vin : « Ne vous en souciez ! Ilz en ont ! Il
fault en avoir d'eulx il n'y aura point de mal
car ce sont porteurs de rogations ! » Et deffaict
envoya ladicte Katherine querir ung cartier de mouton
chiés ung nommé Guillaume Regnier demeurant
pres ledict bourg, et en ladicte chambre leur fut
apresté et mis au feu pour leur soupper ung gigot
dudict mouton et se misdrent a souper, et appellerent
avecques eulx ladicte Katherine, leur hostesse, durant

lequel soupper ledict Closier paroillement les fut
veoirs et visiter par une foy, mais n'y tarda
guere qu'il ne s'en retourna au bas de ladicte maison
de vers lesdictz Tardinel et dom Jehan Noel, lesquelz
touteffoy bien tost apres, se partirent et s'en allerent
hors icelle maison fors iceluy Tardinel qui y coucha
pour celle nuyt. Et apres que lesdictz frarieurs
[135r] et pardonneurs eurent souppé, ledict Closier mary
de ladicte Katherine, estoit encore fort enboyté de vin,
les alla encore veoirs et apres se couscha,
estante encorres lors ladicte Katherine avecque lesdictz
frarieurs, devisans de plusieurs propos. Et bien tost
apres, celuy desdictz frarieurs qui ce nommoit maistre
Jehan Cordier s'en alla se couschez en ung lict estant
en ladicte chambre, et apres qu'il fut couché, l'autre
nommé Tiboul estaignit la chandelle et se approcha
de ladicte Katherine luy disant en conseil qu'il failloit
qu'elle eust en sa compaignee, dont ladicte Katherine
de ce desplaisante se couroucza grandement avecques
luy pour ce que pansoyt de prime face et veu
qu'ilz se disoient frarieurs, qu'ilz feussent plus gens
de bien que ledict Tiboul ne se monstrois. Et en
l'instant, elle estante pres le feu en ladicte chambre,
cuydant s'en yssir hors icelle, fut prinse par ledict
Tiboul, quel incontinant assaya de toute sa puissance
a debvoir abatre et meptre a la reverse ladicte Katherine,
se efforcant avoir sa compaignee par forcze,
a quoy elle resista a son povoir, et au bruyt et
cry que fesoit icelle Katherine en soy deffandant
dudict Tiboul, survint et ariva a ladicte chambre
Julianne Noblet, chambriere de ladicte Katherine, qu'elle
voyant la chandelle ainsi estainte et oyante le
bruyt et noaysse d'entre lesdictz Tiboul et sadicte
mestresse, elle entra soudainement en une aultre

chambre estante jouxte celle ou estoit lesdictz Tiboul
et sa mestresse et pryra ledict Jehan Tardinel qu'estoit
couché de se lever et venir ayder a sadicte mestraisse
contre ledict Tiboul que la vouloit forcez, disant
qu'il s'estoit prins et croché avecques elle et qu'il avoit
estaint sa chandelle. Sur quoy ledict Tardinel se leva
et alla en ladicte chambre et trouva ladicte Katherine pres
l'huys de ladicte chambre, se faisant contenance d'estre courouczee,
et lors, elle et lesdictz Tardinel et chambrierent
descendirent au bas d'icelle maison ou ilz trouverent
ledict Jehan Closier son mary endormy, aussi descendit
[135v] quant et quant [*sic*] ledict Tiboul et alla a l'estable
d'icelle maison, faignant aller veoir son cheval,
et le suyvirent ladicte Katherine et sadicte chambriere
pour sçavoir que il vouloit faire, et lors ladicte Katherine,
estante encorre courouczee et desplaisante
dudict exceix luy faict par ledict Tibour, esveilla sondict
mary et de luy remonstra, disant qu'il falloit qu'il
en fut pugny. Quoy voyant, ledict Closier qui estoit
encorre emboité comme dict est, se leva et s'en alla
se plaindre a ses voysins et amena avecques luy en
sadicte maison, sçavoir lesdictz Jacques Hyno, sergent,
et Allain Hyno, son frere, Jehan Paillenet leur serviteur,
et Jehan Rouauld, Rouaud ayans des bastons, reservé
ledict Rouaud, sçavoir ledict Jacques Hyno une espee
et arbalastre non bende, ledict Allain une espee
et ledict Paillenet une javeline. Et quant ilz furent
arivez a la maison dudict Closier, ladicte Katherine leur
fist recit dudict exceix et force que luy avoit faict
voullu faire ledict Tibour. Au moyen de quoy, iceulx
Hinoz, Closiez et aultres, estans courouchez, proposerent
par entreulx de leur faire reparer, et deffaict en
l'instant allerent a l'huys de la chambre ou estoit
lesdictz Tibour et Cordier et pousserent l'huys qui estoit

fermé et appuyé par dedens de bancqs et tables
et entrèrent en icelle chambre. Et eulx entrez, l'un
desdictz Hynoz estant pres du lict ou estoit cousez
lesdictz frarieurs, et jurant Dieu dist telles parolles
ou equivallantes : « Vous vous levez, maistres fouteurs ! »
Et en l'endroit se leva en sa chemise ledict
Tibour, et comme il se vouloit vestir d'un sien
dostade, luy sortit au collet ladicte Katherine, disante :
« Ha mes voisins ! Voycy le paillart qui m'a parlé
et sollicitié de mon deshonneur et m'a cuydé forcer
et diffamer ! Il fault que j'en aye justice et vengeance ! »
Sur quoy ledict Jacques Hyno, sergent, jurant le sang
Dieu, dist audict Tibour qu'il failloit qu'il reparast
ladicte injure par luy faite a ladicte Katherine, ou que il
le bateroit bien et qu'il eust a contenter et bailler
de l'or a ladicte Katherine, et avecques ce, qu'il failloit
avoir a boyre. Et deffaict fut par la chambriere
[136r] desdictz Closiez et sa femme apporté du vin en ladicte chambre
et beurent d'autant et firent boyre cinq ou seix draguees
ledict Tibour qui differoit de boire. Et apres, luy dist
ledict Hyno, en absence dudict Closiez, qu'il failloit bailler
a ladicte Katherine ung escu pour la appayser et
contenter, et lors celuy Tibour demanda et eut de son
compaignon ung escu et le bailla audict Hyno. Et en l'endroit,
ladicte Katherine dist audict Hyno qu'il luy devoit envyron
quarante ou cinquante soulz de despance, ce que il confessa
devoir a ladicte Katherine, disant ledict Hyno audict Tibour
qu'il failloit encore qu'il eust acquité de ce que ladicte
Katherine luy demandoit ou au moins qu'il eust encorre
baillé ung escu ou aultrement qu'il l'eust tué, et deffaict
bailla ledict Tibour ledict escu. Et outre, poya luy et
son compaignon vingt soulz monnaie que les dessusdictz avoient
despanceé, present pour lors ledict Closier qui en jurant le
nom de Dieu menaczoit de tuer lesdictz frarieurs, disant

qu'ilz avoint voullu forcer sa femme sans touteffoiz qu'il leur fist aucun autre desplaisir. Et par apres, en presence de ladicte Katherine, ledict Allain Hyno donna ung coup du plact de l'espee audict dom Jehan Cordiez en luy presentant l'estoc d'icelle contre la poitrine, disant qu'il failloit pareillement qu'il eust eu ung escu, auxi dit ladicte Katherine audict Cordier : « Baillez ledict escu a ce gentilhomme ! » Et deffaict en l'endroit luy fut baillé par ledict Cordiez ung demy angelot et neuff soulz, et outre de la bource dudict Cordier il print encorre quelque argent en presence de ladicte Katherine, qu'elle dist lors que elle auroit aussi le vin comme les autres, a laquelle fut baillé dudict Cordier par contraincte vingt soulz qu'elle print et ausdictz Rouaud [*blanc*] et a Pailletet cinq onzains et ladicte Jullienne Noblet eut vingt deniers monnaie, sans ce que ladicte Katherine eust confessé avoir eu ne rendu audict Tibour le ducat qu'il avoit baillé pour debvoir trouver lesdictz faizans. Et tout incontinant, les dessurdictz Hino et aultres se partirent d'icelle chambre et s'en allerent reservé lesdictz Tibour et Cordier, quelz s'en partirent le matin et s'en allerent disans a leurs departemens qu'ilz avoint perdu en icelle maison ung sien de demyt hostade doublé de fustaine, une [136v] espee, une barbute, une cornette de my satin, quelz biens disoient lesdictz Closier et sadicte femme n'avoir, et deffaict n'avoint euz ne veuz. Ains depuis celuy jour, ladicte Katherine les trouva cachez soubz le lict de ladicte chambre ou lesdictz Tibour et Cordier avoint couché et apres les bailla ladicte Katherine a ung nommé Mathurin Le Ratiff, leur parent, le priant qu'il eust rendu lesdictz biens esdictz pardonneurs, quelz ladicte Katherine avoit ouy dire estre lors a Moncontour et qu'elle les avoit ainsi trouvez, ce que luy promist faire ledict Ratiff. Nous remonstrant

oultre lesdictz supplians que sur ce que ilz estans prinsonniers, ont par la justice juré dire vroy par serment et interogez du cas cy dessus dont ilz ont esté de fuyeur et d'autre partie dict ne sçavoir riens. Et par apres, en ont partie confessé et se sont trouvez en plusieurs endroictz, varians et distrepans en leurs records et ce ont faict par crainte de justice qui les a mal troictez et gehnez, et aussi de peur d'avoir deshonneur entre autres poinctz, neantmoinz que lesdictz exceis par ledict Tibour faictz sont vroiz de la maniere que dessus, fut par une foiz ladite Katherine interogee par justice si ledict Tibour luy avoit faict lesdictz exceis, elle respondi que non, quelle chose elle faisoit par crainte de justice et mesmement a la requeste et persusasion luy faicte d'aucuns ses parens luy disans que si elle disoit que ledict Tibour luy eust faict ne voullu faire lesdictz exceis, elle seroit diffammer et que on croyoit que veritablement il eust eu sa compaignee charnelle. Nous remonstrant oultre lesdictz supplians qu'ilz sont pouvres jeunes gens de l'asge d'environ trante cinq ans, ne ayant ledict Closiez aucuns biens par heritaige ne que bien peu de meuble et sont chargez de troys petiz enffens, quelz a present convyent aux parens et amis desdictz supplians nourrir, pour ce que lesdictz supplians n'avoient autre moyen de vivre fors que au moyen et profilt de leur taverne et estoient de touz temps par avent de bon rest et gouvernement, bien renommez, [137r] famez et estimez autant que gens du cartier dont sont natiffs de leur estat, sans que james ladicte femme dudict Closiez ayt eu aucun mauveix bruyt ne d'estre de mauvais gouvernement de son corps, ains tenue et reputée femme de bien et de honneur, sans estre elle ne sondict mary repprouchez d'aucun mauveix

cas, fors que autrefois puis vingt ans derroins, ledict
Closiez fut repprouché par les officiers de la court de Moncontour
d'avoir mis ung homme ou six de ladicte court de Trebit
en faizant chartre privee de luy et avoir subrogé
en lieu d'une robe, un boteau de foign dont il obtint
de nous des lors lettres de grace, mais depuis
a touteffoiz bien vescu et a esté bien renommé jucques
a present. Nous suppliant qu'il nous plaise a tout ce que
dessus avoir esgard et pardonner a iceulx supplians
le cas dessusdict et sur ce, leur impartir de noz grace
et liberalité, tres humblement le nous requerant.

N° 27. (53)

Franczoys, par la grace de Dieu roy de France et duc de Bretagne, sçavoir faisons a touz
presens et a venir nous avoir receu l'humble supplicacion de noz pouvres subgetz les parens
et amis consanguyns de Gillet Guyot detenu prisonnier en noz prisons de Vennes,
contenant que le jour de la Penthecouste derroine, ledict Gillet et sa femme allerent veoir leur
enffent qui estoit a nourir, en la parouesse de Plumergat distante de nostre ville dudit Vennes
d'envyron quatre ou cinq lieues, et furent en la maison du nouricier de leurdit enffent faizant
bonne chere de joye que leurdit enffent estoit bien noury jucques envyron troys ou quatre
heures apres medi d'iceluy jour. Et apres, ceulx Gillet et sa femme (/) avoir bien beu, mengé et
faict bonne chere, s'en revindrent ensemble jucques en notredite ville de Vennes es forbours
de laquelle ilz faisoient leur demeure sans avoir aucun distord ne distention. Et eulx illec
ainsi arivez, voyantz quil estoit presque nuict et qu'ilz estoient lassez et fatiguez d'avoir
chemyné s'en allerent en la maison de Olivier Guyot dict belhomme frere dudit Gillet
prisonnier, pour debvoir souper et soy delasser en laquelle maison pourtant que ledit
prisonnier et sadite femme avoient grant soiff a raison dudit travail et chaleur qui avoit esté
celuy jour. Celuy prisonnier alla, pendant que l'on aprestoit a souper ches sondit frere, en la
maison de Franczoys de Kerambrun situee es lices dudit Vennes querir une quarte de vin,
laquelle il apporta avecques luy et pria ledit Franczois, de venir souper avecques luy en la
maison de sondit frere. Queulx assemblement souperent en ladite maison, beurent d'autant et
firent bonne chere tellement que celuy prisonnier estoit presque enboicté de vin et apres
avoir les dessus nommez souppé, ledit Franczois yssut hors ladite maison disant qu'il s'en
alloit coucher, pourtant qu'il disoit qu'il estoit envyron dix heures de nuyt. Et ce voyant, ledit

prisonnier voullut aller conduyre ledit Franczois et deffaict alla avecques luy juc a sa maison et eulx arivez en ladite maison dudit Franczois, celuy Franczois retint ledit prisonnier disant qu'il le vouloit festoyer et pria celuy Le Franczois ung nommé Legadic de aller querir la femme dudit prisonnier et ledit Olivier Guyot et sa femme pour venir boire et faire bonne chere avecques eulx, ce qu'ilz (*firent*). Et y vindrent deffaict, ladite femme dudit prisonnier ayant l'un de ses enffens entre ses braz et lesdits Olivier et sa femme en la maison dudit Franczois, en laquelle maison ilz beurent et mengerent et firent bonne chere sans avoir eu entreulx aucune noise ne parolles de noise en aucune maniere. Apres quoy, ledit prisonnier et sadite femme et mesmes ledit Olivier Guyot et sadite femme retournerent en la maison dudit Olivier ou ilz avoint souppé et vint les conduyre ledit Yvon Legadic, et eulx arivez en la maison dudit Olivier Guyot, ledit prisonnier pria ledit Yvon Legadic de allez (/) ches ledit Franczois ou ailleurs querir une quarte de vin, a quoy fut reffuzant disant que son maistre estoit couché, sur ce y eut entreulx parolles de nouaise et rumeur. Et apres ce, ledit prisonnier et sadite femme et mesme ledit Yvon Legadic, qui tenoit l'un des enffens dudit prisonnier et de sadite femme, yssurent hors pour debvoir ceulx en aller coucher a leur maison situee esdits forbours Saint-Pater et eulx yssuz hors ladite maison sur le pavé assiz pres de la maison Jehan Chotart, ledit prisonnier estoit enboicté de vin, tellement qu'il estoit hors de toute bonne raison, eust depict et desplaisir que celuy Yvon portoit entre ses braz sondit enffent et donna deux ou troys coups de son poign clos sur le fronc ou teste dudit Yvon. Surtant ledit Yvon print chemyn a retourner et courir en la maison dudit Olivier Guyot frere dudit prisonnier, apres lequel ledit prisonnier tiroit ung cousteau qu'il avoit commanzé a courir. Sur quoy la femme duquel prisonnier s'efforça de garder sondit mary de oultraiger, et voyant ledit prisonnier sadite femme qui le vouloit garder de courir apres ledit Yvon, donna ung coup dudit cousteau de revers sur la cuisse de sadite femme, apres ce courut en la maison de sondit frere tendant celuy prisonnier oultraiger ledit Yvon. Et bientost apres, ladite femme dudit prisonnier cria a l'ayde, disante qu'elle estoit blecee, laquelle a ceste cause fut menee en une maison que ne sceyt nommer ledit prisonnier, pourtant qu'il estoit yvre comme dict est. Et bientost apres, ainsi que a oy dire ledit prisonnier, sadite femme par deffault de pensement ou aultrement alla de vie a deceix et surtant fut prins ledit prisonnier et mist en estroicte prison ou il y a esté et est encorres a present en grant misere et calamité. Si nous remonstre lesdits supplians que celuy prisonnier est jeune homme de l'aisge d'envyron trante a cinq ans ayans deux petiz jeunes enffens, l'un d'envyron quatre ans et l'autre d'envyron neuff moys, bien famé et renommé sans jamais avoir actaint ne convaincu d'aucun autre villain cas blasme ne reprouche () et jamais n'eust commis ledit cas si n'eust

esté ainsi enboité de vin pourtant qu'il et sadite femme s'entre aymoint autant que personne pouroit faire et auparavant et durant qu'ilz ont esté en mariaige qui a esté par le temps d'environ six ans james n'ont eu distention ne () faict oultraige a sadite femme. Et que apres ladite femme oudit prinsonnier avoir esté ainsi blecee dist que ledit prinsonnier (/) ne pansoyt la frapper et le luy pardonnoit, priant la justice ne luy en faire aucun mal et que ce, néantmoinz lesdits supplians doubtent que nosdits officiers de Venues veullent rigoreusement proceder contre luy a pugnicion dudit cas, nous supplians actandu ce que dessus il nous plaise sur ce luy impetrer noz lettres de grace, quictance, remission et pardon dudit cas et sur ce luy () de nostre remede convenable tres humblement (*le nous requerant*). Pourquoi.

N° 28. (54)

Remission pour Pierres Soulayne, des parties de Kerantrier, de laquelle la teneur ensuyt :
Françoys, par la grace de Dieu roy de France duc de Bretagne, savoir faisons a touz presens et a venir, nous avoir receu l'umblé supplicacion et requeste nous faicte de la part de noz pouvres subjectz les parens et amys consanguins de Pierres Soulayne, des parties de Kerantrier en nostre juridion de Ploermel, contenant que en l'an mil cinq cens saize, le dymanche jour et feste de Pasques fleuris, ledit Soullaine fut celuy jour a la grant messe de ladite paroesse de Kerantrier, ainsi que bon chacun paroessien doibt et a acoustumé estre celuy jour au service divin de sa parroisse. Et ladite messe finie, ledit Soullaine s'en alla disner et prendre sa refection ou bourg de Kerantrier ches ung nommé Guillaume Gicquel. Apres lequel disgner, s'en alla ledit Soullaine a vespres en ladite eglise, et amprés icelle ouyes, s'en alla ches ung hostelier demourant oudit bourg nommé Jehan Leroy, en compaignie de Guillaume Bodart et sa femme et aussi pluseurs, ouquel lieu sans plus gueres tarder audit bourg. Et apres avoir prins congé desdits nommez, print chemin a s'en aller par la rue de Bourienne a sa maison, situee ou village de la Moraye, en laquelle il estoit lors demourant, en laquelle rue de Bourienne ledit Soullaine trouva Jehan Du Berbrassa sr de la Touche-au-Roux, quel donna en passant audit Soullaine une foiz a boyre du vin qu'il avoit o plusieurs assistans. Et incontinant s'en alla ledit Soullaine, tirant sondit chemin a sadite maison, et en l'endroit de la croix du chesne eumyer quelle estoit en son chemin a s'en aller audit villaige de la Moraye, se trouva au devant de luy ung nommé dom Guillaume Rouaud quel estoit lors demourant (/) ou village de l'ostel Portier en ladite paroesse de Kerantrier. Quel dom Guillaume, il estant en une piece de terre joignante ledit chemin qui estoit close, dist audit Soullaine par telles ou semblables parolles : " vieulx-tu avoir ma cousine ? " A quoy ledit Soullaine, regardant aux environs de luy qui c'estoit qui parloit a luy, respondit : " Qu'est cela ! " En l'endroit, ledit

Rouaud sortit dudit clos oudit chemin et dist audit Soulaine par telles ou semblables parolles : " Est a la fille Michel Bohuron que je veulx te marier ! " Ausquelles parolles respondi ledit Soulaine qu'il estoit content de l'avoir par mariaige pourveu que la fille l'eust voullu. Et sur telles parolles, ledit dom Guillaume Rouaud dist audit Soulaine par telles ou semblables parolles : " Tu n'en auras point ! Pourtant que tu n'en ays pas disgne, et n'as nul bien de quoy la nourrir, et qui plus est tu es filz d'un povre homme et meschant ! Pourquoi elle ne sera point mise en la lignee des Soulains ! " A quoy luy respondi ledit Soulaine en telle ou semblable maniere : " Je ne suys oncq si povre que moinne et moy ne ayons encore de la terre a votre huys ! " Et en l'instant et en ung moment, ledit dom Guillaume, esmeu et irrité desdites parolles, dist et profera en jurant le sang-Dieu telles ou semblables parolles : " Villain ladre, tu dit ! Par le corps Dieu je la te feroys perdre et le garderoy d'estre heritier dudit clos car par Dieu je te tueroy ! " Et ce oyant, ledit Soulaine reprint sondit chemin a s'en aller droit a sadite maison et ledit dom Guillaume, qui estoit eschauffé et enbeu de vin et s'estoit desvoyé de sondit chemin dudit village de l'Ostel Portier de plus d'un quart de lieue pour devoir et concevoir ledit Soulaine. Et deffait le suyvit et arivent et bien environ ung troict d'arc de la ou les premieres parolles avoint esté proferees, ayant ung coulteau nu en sa main et il estoit aryvé pres dudit Soulaine, luy en donna en sa robbe troys ou quatre coups, cuydant a chacun d'iceulx tuer et occire ledit Soulaine, ce qu'il eust faict si n'eust esté que ledit Soulaine trouva façzon de prandre ledit prebtre (/) au bras duquel il tenoit ledit coulteau, luy estraignoit ledit braz et le luy cuydant oster. Et lors ilz estoient ainsi crochez ensemble, ne peut ledit Soulaine luy oster ledit coulteau en luy disant par telles ou semblables parolles : " dom Guillaume, je ne vous demande riens ! » Ce neantmoinz, ledit dom Guillaume, non content de ce, perseverant en son mauvais propos, s'efforçoit tousiours tuer ledit Soulaine, quoy voiant ledit Soulaine, et en son corps defendant, tenant tousiours le braz dudit Guillaume ouquel estoit ledit coulteau, luy repoussa contre la poytrine ledit coulteau qui estoit poinctu, et d'iceluy en donna ung seul coup audit prebtre, a raison duquel ledit prebtre tomba a terre. Et il ainsi tombé le laissa en l'endroit ledit Soulaine, et s'en alla de la en sadite maison en laquelle il ouyt a deux ou a troys (*jours*) dire que ledit dom Guillaume Rouaud estoit mort et decebdé et que le commun peuple disoit que ce avoit esté ledit Soulaine qu'il avoit tué le jour de Pasques fleuris apres vespres. A raison de quoy ledit Soulaine, qui estoit jeune homme de mestier non marié, craignant estre prins et aprehendé de la justice, se rendit fugitiff. Nous remonstrant lesdits supplians que ledit dom Guillaume estoit rumoureux et debatiff renommé en la paroesse de Kerantrier et ledit Soulaine n'avoit jamais esté reprins de cas de crime jucques a celui de present, nous supplians qu'il nous plaise a tout ce que dessus avoir esgard et sur ce

luy impartir noz lettres de grace, remission et pardon tres humblement le nous requerant. Pourquoy etc, () la verifficacion de laquelle grace est adrecee aux juges de Ploermel, ainsi signé par le roy et duc a la relacion du conseil N. Duval et scellé en laz de soye et cyre verd.

N° 29. (55)

Aultre remission pour Julien Petel povvre homme texier de draps de layne dont la teneur ensuyst :

Françzoys, par la grace de Dieu roy de France et duc de Bretagne, savoir faisons a touz presens et a venir nous avoir receu l'umble suplicacion et requeste nous faicte de la part des parans et amis consanguyns de Jullien Pestel povvre homme texier de dras es laine demourant en cestuy notredit pays et duché de Bretagne, contenant que piecza ledit Paistel et feu Symon Bauchet clerc, ont eu proces ensemble par devant l'archediacie de Dinan et ailleurs pour raison de quelque somme de deniers dont ledit Pestel faisoit demande audict feu Bauchet et par devant lequel archediacre et aultres juges lesdits Petel et Bauchet s'estoint donnez seurté et juré entreulx et depuis s'estoint condescenduz a appointement et arbitrages de leurs differans. Pendant lequel temps dudict arbitrage, lesdits Petel, feu Bauchet, sa femme et non aultres se trouverent a l'une des portes de notredite ville de Dinan nommee le guichet ou moys d'octobre derrenier passé, ne sceit quel jour, envyron l'heure de troys ou quatre heures apres medi sans se dire l'un et l'autre aulcune chose et s'en allerent l'un apres l'autre paisiblement jucques au pres de leurs maisons estantes en la parouesse de Caloriet distante dudit lieu de Dinan de demye lieue ou ilz ariverent de nuyt. Et ainsi que ledit feu Bauchet vouloit passer par une piece appallee la vallee du grassel appartenant a la femme dudit Petel et a ses coheritiers, ledit Petel luy dist qu'il eust a s'en retourner hors de ladite piece de terre et qu'il ne passeroit point par icelle. A quoy ledict feu Bauchet alla assez légèrement allecontre dudict Petel et sans luy dire mot le print par le bas des jambes et le fist cheoir a terre a la reverse. Quoy voyant ledit Pestel estre ainsi oultraigé s'esmuent et fist tant qu'il se leva de desoubz ledit feu Bauchet et apres ce qu'il fut levé craignant que a l'ocasion d'iceulx proces qu'ilz avoint ensemblement et ainsi esmeu et eschauffé qu'il estoit au moyen d'icelle cheute, print ung baston qu'il avoit porté avecque luy pour soy apuyer et d'iceluy en donna aucuns coups et collees par la teste et aultres endroitz du corps dudit feu Bauchet et tellement que au moyen d'iceulx coups ledit Bauchet tomba par terre et bientost apres avoir (/) esté porté en la maison ou il estoit demourant, en laquelle ung jour apres ou envyron, par faulte de bon secours,

gouvernement ou aultrement, il seroit allé de vie a trespas. A l'ocasion de quoy, ledit Petel doubtant rigueur de justice s'est absenté de ce pays et duché de Bretagne ou quel ne ailleurs en nostre reaulme il n'ouserait bonnement converser ne repaier si noz grace et misericorde ne luy estoit sur ce impartiz, nous humblement requérant actendu ce que dict est. Aussi que en touz aultres cas, il a toujours esté de bonne vie renommee et honneste conversation sans james avoir esté actaint ne convaincu d'aucun autre villain cas, blasme ne reprouche digne de reprehention, il nous plaise sur ce audit Petel impartir nosdites grace, pardon et misericorde. Pourquoi etc, () la verificacion de laquelle grace est adrecee aux senneschal ou alloué de Dinan, ainsi signé par le roy et duc a la relacion du conseil A. Mandart et sellé en laz de soye et cire verd.

N° 30. (56) 1^{er} juillet 1521

Même affaire que la lettre n° 62.

[148r] Remission pour Morice Craffuer,
boullangier demourant a Vennes,
de certain meurtre commis,
dont la teneur ensuyst.

DUVAL

Françoys, par la grace de Dieu roy de France, duc de Bretagne, savoir faisons, a touz presens et advenir, nous avoir receu l'humble suplicacion des femme, parans et amys consanguins de nostre pouvre subject Morice Craffuer, boulangier, originaire et demourant en nostre ville de Vennes, contenant que le premier jour de may derenier, environ l'heure de vespres, ainsi que ledict Craffuer estoit en la maison du Four dudict Vennes sur les lices dudict Vennes a nous appartenant, dont il est fermier et y demeure, se randirent a luy ung nommé Jehan Baron, Michel Legay⁷ et Guillaume Licot, menuysiers, quel Licot n'avoit auparavant congneu, quelz avecques allerent avecques ledict Morice

⁷ C'est le suppliant n° 62.

[148v] allerent ensemble boyre en la maison de ~~Guillaume~~
Claude Delaporte, demeurant en nostre ville de
Vennes. En laquelle maison fut faict marché
entre lesdictz Morice et Baron d'une et aultre part, par
lequel ledict Baron promist faire audict ~~Baron~~ Morice ung
grant charlyt et ung petyt charlyt au desoubz de la
fourme de deux charlitz estans ou bas de ladicte maison
dudict Delaporte pour le pris de deux ~~esch~~ escuz d'or
soullail, a valloir sur laquelle somme eut lors
presentement ledict Baron ung demy escu d'or au soullail.
Durant et pendant lequel marché, quequesoit comme ilz
estoint encore a boyre ensamble en ladicte maison dudict
Delaporte, s'en yssyt et saillyt hors d'icelle maison
ledict Licot, sans que james y eust eu entre ledict Morice et
ledict Lycot aulcune parolle de debat. Et lesdictz Legay,
Baron et Crasfuer demurerent quelque peu apres
en icelle maison, beuvans et faisans grant chere.
Et apres que lesdictz Baron, Crasfuer et Legay
eurent beu en ladicte maison, s'en partirent d'icelle
et s'en alla ledict Crasfuer en sadicte maison, et lesdictz
Legay et Baron demurerent pres la maison dudict Delaporte.
Et comme ledict Crasfuer et sa femme voulloint
aller soupper, ariverent en ladicte maison du Four, lesdictz
Legay et Baron, quelz firent apporter avecques eulx
ung estamau et une quarte de vin, disans ausdictz
Crasfuer qu'ilz voulloint soupper avecques luy et deffaict
soupperent ensamble. Et apres avoir ainsi souppé,
iceulx estans ainsi ensemble, environ l'heure de dix
heures du soir, furent gectees du costé de vers lesdictes
lices pluseurs pierres contre les huys et fenestres
de ladicte maison dudict Crasfuer tellement que l'une des fenestres
de ladicte maison fut rompue d'un coup de pierre.
Quoy voyant, ledict Crasfuer et quel n'avoit nié ne ne [*sic*]
esperoit avoir pour lors aulcune inimitié a personne,

monta au hault de sadicte maison et par une fenestre
respondante sur lesdictes lices crya a la force « A nous ! » Et disant :
« Qui sont ses paillars, robeurs, larrons qui sont a rompre
ma maison ! » Auquel cry ne luy fut aulcune chose respondu
par ceulx qui ainsi ruoint lesdictes pierres contre sadicte maison.
A ceste cause, icelluy Crasfuer et lesdictz Legay et Baron
sortirent de ladicte maison pour savoir ceulx qui gectoint
lesdictes pierres et eulx ainsi yssuz, suivyrent ceulx qui
ainsi avoint rué lesdictes pierres droict a la basse court
du chasteau de Bermyne assez pres de ladicte maison dudict
Crasfuer, et illec trouverent ung nommé Lycot, quel ledict
[149r] Morice pour lors ne congnoissoit et le print au poil
et abaptit a terre, et ce faict ledict Crasfuer et lesdictz
Legay et Baron estans en sa compaignie le baptirent
et excederent et luy donnerent pluseurs coups
d'estoc es jambes et cuisses et ung coup ou flanc
dudict Lycot, sans savoir qui donnoit lesdictz coups d'estoc
ne lequel desdictz Baron et Legay le baptyt. A raison que
ledict Crasfuer n'avoit lors aulcun glayve ne couteau
et n'estoit coustumier d'en porter, aussi que lors il estoit
nuyt et faisoit fort obscur. A l'occasion desquelz coups,
ainsi que depuis est venu a la congnoissance et notice
desdictz suplians, celuy Lycot dedans vingt quatre heures
apres lesdictz exceix, alla de vie a deceix. Et doubtant
la rigueur de justice, s'est ledict Morice Crasfuer randu
fugitif et mys en franchise ou couvant des Cordeliers
Monseigneur Saint François de nostredicte ville de Vennes, ou il est
uncore a present. Si nous remonstrent lesdictz suplians que lesdictz
Crasfuer et Lycot n'avoient jamais eu question ne debat
ensemble et que ledict cas ne vint jamais par malice
prepancée dudict Crasfuer, mais ce que en a esté faict a esté
par vin dont il et les aultres estoit enboytez et par
l'assault que l'on faisoit lors a ladicte maison dudict
Crasfuer, et que lors dudict assault ledict Crasfuer n'avoyt

aucun glayve ne cousteau ne a acoustume d'en
porter ainsi que dyt est. Aussi que icelluy Crasfuer,
a charge de femme et d'une jeune fille soubz bas asge
et est povre, n'ayant de quoy les nourrir si non par
l'industrie de sondict moistier de boullangerie, et oultre
qu'il a esté et est de bonne vie et conversacion
ayant bonne renommee aultant que homme de son moistier
en ladicte ville de Vennes, sans que james il eust esté
rumoreux ne debaptiff, au moyen de quoy ne aultrement
il eust esté james accusé ne actaynt d'aucun cas
disgne de reprehencion, et que ce neantmoins
ilz doubtent que noz officiers dudict Vennes veullent
proceder contre ledict Crasfuer a rigueur de justice ainsi
qu'ilz veullent et s'efforczent le faire qui feroit meptre
[149v] lesdictes femme et fille dudict Crasfuer du tout a
mendier, si par nous ne luy estoit noz grace
et misericorde imparties. Nous supliant, actendu
ce que dessus, remectre, quicter et pardonner audict
Crasfuer le faict et cas dessusdict et sur ce, luy
conceder noz lettres de grace, remission, quittance
et pardon a ce convenables, tres humblement
requerant icelluy. Pour quoy, etc. Pourveu, etc.
La verifficacion adreczee aux juges de Vennes,
ainsi signé sur le replyt : *Visa* et pour
secretaire N. DUVAL, et scellé en laz de soye
et cire verd. Donné a Rennes ou moys de juillet
l'an de grace mil cinq cens vingt et ung et de
nostre regne le septiesme. Par le roy et duc,
a la relacion du conseil, N.DUVAL.

N° 31. (57)

[159r] François par etc, savoir faisons a touz presens et a venir nous avoir receu l'umble
suplicacion des parens et amis consanguins de Jehan Le Mouenne detenu prinsonnier es

prinsons de Kimper en la forest de Brecluen appartenant a nostre es cher et amé cousin le comte de Laval, contenant que le derrenier jour de janvier derroin et quequesoit environ celluy temps, celluy Le Mouenne se trouva, au matin d'un jour de jedy, pour aucunes ses affaires en ung villaige nommé la Feillaye, situé en ladite forest de Brecilluen, ouquel villaige en la maison d'un nommé Pierre Monnel y vandant et exposant vin par mynu et detail, se trouverent en sa compaignie Jehan Baffer et Guillaume Bernard, quelz et ledit Le Mouenne assemblement beurent en ladite maison et avecque eulx ledit Pierre Monnel par quelque espace de temps en faczon que chancun d'eulx despenza jucques au nombre de xi deniers monnaie ou environ, et bientost apres se rendirent ches ledit Monnel, Guillaume Godet et Guillaume Demay forestiers dudit Brecilluen, quelz paroillement en presence des dessusdits beurent en celle maison et deppencerent chancun cinq deniers. Et ce faict sur le soir dudit jour, comme environ demye heure de nuyt, prindrent chemyn pour se debvoir retirer chancun d'eulx en leurs maisons et ayans encommencé leurdit chemyn, estans encores bien pres dudit lieu, trouverent ung nommé Raoullet serviteur du sr de Trebellan, quel fist retourner ches ledit Monel, lesdits nommez. Auquel lieu leur donna celluy Raoullet deux potz de vin breton et en beuvant lesdits deux potz de vin, dist celluy Monnel en parolles arogantes audit Le Moenne qu'il luy eust bien faict payer lesdits cinq deniers quelz encores n'avoit paieez, ce que fist incontinant ledit Le Mouenne et luy bailla ung onzain et luy demanda six deniers de retour. Sur quoy ledit Monnel dist qu'il les alloit querir en une huge estante au bas de ladite maison et pendant que ledit Monnel fut a ladite (/) huge, print celluy Le Mouenne ung voirre quel luy sembloit estre quelque peu fendu et froissé sur ladite table et le gecta et cassa contre la muraille affin que nulle n'y beust. Et sur ce, dist ledit Monnel audit Le Moenne que d'iceulx six deniers, il en retiendroict deux deniers pour ledit voirre et qu'il ne devoit plus audit Le Moenne que quatre deniers. Ce que ledit Le Mouenne voullut empescher disant que ledit voire n'estoit entier et sur ce ledit Monnel appella ledit Lemoenne: " gars, laron, brigant et yvroign ! " et luy dist pluseurs aultres injures ausquelles ledit Le Moenne respondict audit Monnel qu'il estoit luy mesme tel. Et sur ce ledit Le Moenne s'efforça aprouchez dudit Le Moenne (sic) pour le outragez et ce voyant ledit Le Moenne qu'estoit assis a table voullant a se obvier et craignant ledit Monnel qui estoit homme oultragiff, noisiff et debatiff, se leva de la table ou il estoit a boire pour s'en yssur hors de ladite maison et en se levant fut la chandelle qui estoit allumee, estaincte du vent de sa robbe ou de sa manche. Et surtant ledit Monnel crya sur ledit Le Moenne qu'il ne s'en yroict pas ainsi sans le payer de son escot et se efforça de tout son pouoir arrester ledit Monnel et le prandre au corps et excéder ce que ledit Le Moenne evada et de son couteau qu'il tenoit, dont il tranchoit son pain et sa viande, donna audit Monnel qu'il

rencontra ung petit coup ne pensant poinct l'actaindre fors en ses draps. Et lors ledit Monnel dist : « il m'a frappé d'un couteau en l'estomac ! » Et fist apres ralumer ladite chandelle, et icelle alumee, ledit Le Mouenne aperceut que ledit coup avoit esté par luy donné audit Monnel en l'estomac devers le costé gauche. Et surtant fut ledit cousteau osté audit Le Moenne par la femme dudit Monnel et une sienne fille qui la estoit et le laisserent sans riens luy demander et sortit hors d'icelle maison dudit Monnel et troys jours apres ala, ledit Monnel a raison dudit deceix (sic) et qu'il ne se fist lors penser ne prendre garde de ladite playe, (/) de vie a deceix. Et craignant ledit Le Mouenne de ce estre aprehandé par justice a esté par aucun temps en franchise et par aultre temps fuictiff et dempuix a esté prins et constitué prisonnier oudit Quimper esuelles il a esté longuement detenu et y est encores a present etc. Pourquoi etc, l'adrece aux juges de Ploermel etc, pourveu etc. Donné aRennes ou moys de juillet l'an de grace mil cinq cens vingt ung et de nostre regne le vii^e, ainsi signé sur le replict visa etc, et pour secretere, par le roy et duc a la relacion du conseil N.Duval et saellé en laz de soye et cire verd.

N° 32. (58)

Françoys, par la grace de Dieu roy de (sic) et duc de Bretagne, a touz presens et advenir, savoir faisons nous avoir receu l'humble supplicacion et requeste nous faicte de la part des parens et amys consanguyns de nostre pouvre subject Yvon Le Buanec, homme de labour, de la parroisse de Plusquellec, contenant que ung nommé Yvon Geffrelot, qui est jeune garson, de l'eage d'environ dix-sept ans, puis deux moys ans (sic) encza, se transporta de nuyt en la maison de Yvon Olivier en ladite parroisse ou pour lors Guillaume Olivier, filz dudit Yvon Olivier, tenoyt taverne, et illecques print furtivement de la bource dudit Guillaume la somme de dix soulz monnaie, lequel le poursuyvit, et luy randit quatre targes soullail. Et par une aultre foyz, environ ung an a, ledit Geffrelot et Jehan Guezenec en sa compagnie, entrerent de nuyt en la maison de Jehan Foll Guervilly, en ladite parroisse, et prindrent et emporterent avecques eulx, d'une huge estante en celle maison, furtivement la somme de soixante soulz monnaie. Item que en karesme derroin, lesdits Yvon Geffrelot et Guezenec entrerent de nuyt en la maison Jehan Casailart et d'illecques prindrent et emporterent furtivement deux tourtes de pain de seille, du fil, ung sac et certaine quantité de farine. Mesmes que durant la foaire de my-karesme derroine a Kerahes, ledit Yvon Geffrelot amprès amprès (sic) avoir esté en ladite foaire, se transporta a la maison d'un homme en la parroisse

de (blanc) entre jour et nuyt pres Kerahes et illecques cacha en la fenerie d'icelle maison, et y fut trouvé et prins par ledit homme et aultres gens a luy incougneuz, quelz le menerent au manoir de Ker-an-puil devant maistre Yves Kergouet, nostre lieutenant de Kerahes, quel le interroqua et commanda qu'il est eust (sic) esté constitué prisonnier, et deffaict le constitua prisonnier et le fist lyer pour le mener aux prinsons de ladite court. Et pour ce qu'il estoyt tard et environ mynuyt, fut en actendant le jour pour le devoir mener ausdites prinsons par les serviteurs de ladite maison, mys en une estable d'icelle maison, et a l'unz de ses piez ataché et fermé une potaille de fers ataché a une chaesne de fer qui tenoyt a une piece de boays estante en ladite estable, et fut illecques lessé. Et quant il aperceut que les gens de ladite maison estoient endormyz, il trouva moyen (/) de destaicher ladite cheisne de ladite piece de boays estante en ladite estable, et s'enfouyt, ayant ladite chaisne et potaille atachees a son pié, et se transporta a la maison ou demourroit ledit Guezennec et illecques, avec l'ayde de Anne Hingant, femme dudit Guezennec, rompit ladite potaille. Aussi que environ Pasques derroines, ledit Yvon se transporta a la ville de Morlaix ou entre autres trouva Jehan Leblonch, bourgeois et marchand dudit Morlaix, qui avec autres en sa compaignie jouerent au pallet, et print la gybeciere dudit Blonch en laquelle y avoit certaine quantité de monnaie, et en ce faisant fut aperceuz et ledit Yvon, adverty que ledit Blonch en faisoit pourchatz, celuy Yvon s'enfouyt en franchise en l'église de Saint-Mahé dudit Morlaix, et illecques randit audit Leblonch la gibeciere et argent. Aussi dempuez la feste de Pasques derroines, il se transporta de nuyt a la maison de dom Allain Baulost, prebtre, en la parroisse de Duault, ou pour lors y avoit ung surgien nommé Jehan Morice qui panczoit ledit prebtre, et de nuyt print furtivement de la gibeciere dudit surgien, soixante targes soullail et ung escu soullail, quelz emporta avecques luy, et dempuez ledit surgien l'en archesonna et poursuyvit, et sur ce et en la maison Olivier Cainhart, quel tient taverne ou villaige de Guernason en ladite parroisse de Plusquellec, ilz apoincterent ensemble, en forme que ledit Yvon Geffrelot restitua audit Jehan Morice lesdites monnaie et escu. Aussi estoyt coustumier entrer de nuyt es maisons des voysins et en prendre a leur non sceu des vivres. A l'occasion desquelz cas et exceix, ledit Yvon Geffrelot estoyt notoirement sourdalix et diffamé, et dont il avoit esté souvant blasmé et baptu et corigé par Morice Geffrelot son pere, cuydant le chastier. Et voyant ledit Morice Geffrelot, sondit pere, que pour tout ce, il ne se vouloyt chastier, mesmes que il s'estoit rendu vacquabont, hantant les tavernes et mauveises compaignies, craignant que sondit filz n'eust esté (/), a celles causes, aprehendé de justice et pugny en scandalle et deshonneur de sondit pere et de ses parans, fut constitué en grant desplaisir et par pluseurs foiz avoit pourchassé a trouver sondit filz pour le chastier, ce que ne pouvois, pour ce que ledit Yvon

fuoyt la compaignie de sondit pere et de ses parens et se cachoyt de luy, et aussi dudit Yvon Buanec, son oncle, qui souvant l'avoit blasmé desdits cas et o menace, cuydant qu'il se feust corrigé et chastyé. Pour lesquelles choses, le mercredi prochain amprés la feste de la Penthecouste derroine, ledit Morice Geffrelot, pere dudit Yvon, se complaignit audit Yvon Buanec de sondit filz, disant que ne se vouloit coriger et que en fin ilz seroient deshonzorez par luy. Sur quoy adviserent de le prandre pour le chastier, et pour ce que il hantoit souvant de nuyt en la taverne dudit Caignart, acorderent ensemble que le vendredy ensuyvant ilz se trouveroient audit lieu de Guernasouill en ladite taverne pour espier et trouver ledit Yvon. Et deffaict, ledit Morice Geffrelot pria ledit Olivier Caignart et Yvon Caignart de luy estre moyen de le surprandre, et deffaict se trouverent en ladite taverne, et aussi ledit Yvon Geffrelot y ariva devers le soir et aporta avec luy des euffs que il fist frire. Et se mist en une chambre en ladite taverne, et en sa compaignie lesdits Olivier et Yvon Caignart, pour boire et manger lesdits euffs, et comme ilz estoit ainsi en ladite chambre, lesdits Morice Geffrelot et ledit Yvon Buanec entrerent en ladite chambre, et se mist ledit Morice pres de sondit filz et luy osta sa sainture et ung couteau que il avoit pendant a sadite sainture, et firent tirez une quarte de vin. Et amprés qu'ilz eurent beu ledit vin, ledit Morice Geffrelot print sondit filz par le collet, luy disant par telles parolles : " il y a longc temps que vous serchoys, mais maintenant vous viendrez avec moy ! " Et les nommez, y assistans, luy dirent que c'estoyt raison que il feust allé avecque sondit pere. Et sur ce, ledit Morice Geffrelot tenant sondit filz et ledit Yvon Buanec en leur compaignie, prindrent leur chemyn pour s'en aller droit au village (/) du Bally ou demourroyt ledit Buanec et estoit nuyt. Et comme ilz estoit soubz le boays du manoir de la Roche-Dronnou, craignans que ne leur feust eschappé, parce que il faisoyt contenance de se vouloir retirer, et aussi doubtans que aucuns ne l'eussent rescoux, lesdits Morice Geffrelot et Yvon Buanec, desirans garder ledit Yvon Geffrelot de non plus exercer lesdits lareucins et pour cuyder le preserver que plus en l'advenir n'eust offancé Dieu et justice ne persecuté le peuple de la forme, et aussi diffamé l'honneur de luy et de son lignage, lierent ledit Yvon Geffrelot les mains derriere et l'abatirent a terre et luy creverent les deux yeulx. Et sur ce, ledit Morice Geffrelot le mena a sa maison ou village de Kermenguy en ladite parroisse, et illecques le faysoit troicter et bailler a manger jucques a ce que le mercredi ensuyvant, au matin dudit jour, les officiers de la court de Callac, inferieure de nostre court de Kerahes, advertyz dudit fait, vindrent audit lieu de Kermenguy ou ilz trouverent ledit Yvon Geffrelot, quel estoyt aveugle comme dit est, et le menerent avecques eulx et fut baillé en garde a Rolland Cottin, sergent et chartrenyer de ladite court de Callac, ou il est desoncques puy detenu prinsonnier a cause desdits larreuczins. Aussi ont procedé a

decret de prinse de corps sur les personnes desdits Morice Geffrelot et ledit Yvon Buanec, quel Buanec ilz ont fait prendre et constituer prisonnier esdites prisons de ladite court de Callac et vers luy decreté proceix et fait plusieurs expedicions, et au moyen de quoy desoncque puis, ledit Morice Geffrelot est fuytiff a cause dudit cas, et n'ozeroit se repatrier, doubtant la rigueur de justice et craignans lesdits supplians que a cause desdits cas on veille vers ledit Yvon Buanec proceder a rigueur de justice. Remonstrans lesdits supplians que ledit Yvon Buanec, quel est aagé de cinquante ans et plus, ayant charge de femme et enffans et lequel auparavant ledit (/) cas estoit homme de bien, de bonne vie, renommee et conversacion, sans jamais avoir esté reproché d'aucun villain cas, blasme ne reproche etc. Pourquoi etc, l'adrecze aux juges de Plo (rayé) Kerhaes, pourveu etc. Donné a la Pierre Anne lez Nantes ou moys d'octobre l'an de grace mil cinq cens vint ung et de nostre regne le septiesme, ainsi signé sur le replot visa, et pour secretaire par le roy et duc a la relation du conseil, Beaucouché, et saellé en laz de soye et cyre verd. Beaucouché

N° 33. (59) 12 octobre 1521

Même affaire que les lettres n° 70, 88 et 89.

[180r] François, par la grace de Dieu roy de France et duc de Bretagne, a touz presens et advenir, savoir faisons, nous avoir receu l'humble supplicacion et requeste nous faicte de la part des parens et amys consanguyns de nostre povre subject Vincent Laurens⁸, de nostre ville de Vennes, contenant que le vint septiesme jour de juillet derrenier, ainsi que ledict suppliant, Jehan de Tohan⁹, sieur dudict lieu, avec deux siens serviteurs et ung nommé Allain de Kerdaniel, et chacun alloint assemblement pour devoir aller convoyer et prier plusieurs gentilzhommes des parens et amys dudict de Tohan estans aux champs environ nostredicte ville de Vennes, pour assister au service du feu pere dudict sieur de Tohan, quel devoit estre le juedi ensuyvant, et pour ce faire

⁸ Même suppliant que le n° 70.

⁹ Suppliant n° 88.

[180v] baillerent ung cheval audict suppliant. A quoy se
condescendit ledict suppliant, et assez tost apres,
monterent a cheval, lesdictz Lohan, Kerdaniel et ledict
suppliant dessus nommez et ung nommé François
Guillemot et apres eulx venoint a pié lesdictz deux
serviteur dudict Lohan. Et eulx arivez devant
la maison de Jehanne Salmon en laquelle
y avoit taverne, se y arresterent pour y devoir
boire, lors descendit ledict Guillemot de dessus
sondict cheval a pié et commanza a faire quelque
bruyt et noyse, et illecques frapa ledict Guillemot ung
nommé Le Saulx, labourreur demourant es forbourgz dudict
Vennes, troys ou quatre coups de l'un de ses soulliers,
a quoy se assemblerent quelques gens, touteffoiz n'y eut
aultre mal pour celle foiz. Et assez tost apres,
ariva illec ung autre nommé ~~Yvon de Bino~~ maistre Yves
de Bino ayant une espee soubz ung petit manteau
qu'il portoit et ung grant bouclier qu'il tenoit en l'une
de ses mains, s'efforcant a toutes fins avoir debat
ausdictz deux serviteurs dudict Lohan et audict François
Guillemot dont il fut en garde et n'y eut aucuns coups
donnez pour celle foiz. Et de la s'en allerent les
dessurdictz pour parachever leurdict voyage, et
ainsi qu'ilz passoint au devant de la maison d'un
nommé Yvon Bertic dit Poulze, barbier, sortit ledict
Bino comme forcenné tout en pourpoint, tenant sadicte
espee toute evaginee et boucler en ses mains et se
gecta ou chemyn par ou devoit passer lesdictz
nommez, s'efforcant et vouloit a toutes forczes avoir
noise ausdictz Guillemot et serviteurs dudict Lohan, quelz
eurent seulement parolles ensemble et sans se
arrester avec ledict de Bino, vindrent avec lesdictz
Lohan et Laurens sans aucun debat a personne devant
la maison feu Guillaume Ruault ou y avoit pareillement

taverne en laquelle ilz firent tirer a boire, et avant que le vin leur feust apporté, ledict Lohan bailla a bander une arbalaistre qu'il portoit a cheval a ung [181r] de sesdictz serviteurs nommé Michel de Remulgo¹⁰, quel ne la peult bander, lors descendit ledict Lohan de cheval et la banda, puis remonta sur sondict cheval et essaya une vire de bute qu'il avoit avec luy si elle estoit bonne et bien atinptee pour ladicte arbalaistre. Quelle vire, celuy Lorans fist audict Lohan oster, luy disant qu'il n'estoyt pas licite ce faire, et lors ledict François Guillemot quel estoyt a pié, print ladicte arbalaistre puis se aprocha de l'huys de la maison dudict Ruault et demanda a boire. Et ce pendant ariva illecques ledict Bino tenant touzjours sadicte espee evaginee et sondict bouclier et courut sus audict Guillemot et comme tout forcenné luy rua ung grant coup d'espee sur ladicte arbalaistre, tellement que d'iceluy coup elle desbanda et cheut a terre. Et incontinant, s'entre commancerent lesdictz Guillemot et Bino a ruer et jecter pluseurs ~~coups~~ grans coups de leursdictes espees, tant d'estoc que de taille l'un sur l'autre, lors ledict Lorans pensant les departir courut sur sondict cheval en la presse des gens qui illec estoient et esperant les departir et doubtant qu'ilz s'entre feussent tuez, rua deux coups d'espee entre les ~~combatans~~ coups desdictz combatans, et voyant que ledict Bino ne se vouloit reculer de sa part, ains frapoit incessamment a grans et desmesurez coups, bailla ledict Lorans audict Bino ung coup de plat sur la tepte et ung coup d'estoc sur l'espaule gauche sans touteffoiz le blesser. Et lors, se retourna ledict Bino sur ledict Laurens et luy rua ung coup sur la main et la blecza, quel Lorans se sentant bleczé se

¹⁰ Suppliant n° 89.

retira de ladicte presse sur sondict cheval et laissa lesdictz
Bino et Guillemot derecheff s'entre ruer et gecter
pluseurs coups d'estoc et de taille tant en leurs corps,
braz que sur leurs ~~espaules~~ espees et bouclier. A
occasion desquelz coups que ledict Guillemot donna audict
Bino, ainsi que dit est, ledict Bino comme l'on dit, decebda
demye heure apres iceulx coups donnez. Quel meurdre
et homicide, ledict Guillemot confessa devant pluseursz
[181v] gens lors illec estans, avoir fait, disant par telles ou
semblables parolles : « Se a esté moy qui le ay tué ! Deffaict,
pour quoy me venoit il assaillir ? » Et ce neantmoins,
noz officiers dudict Vennes ont sans avoir eu a ce esgard
faict prandre lesdictz Laurens et serviteurs dudict
Lohan, constituez prinsonniers en basses fosses obscures,
enferrez en grant misere. Et au regard dudict
Lohan doubtant estre prins, s'en est fouy en franchise
ou il s'est dempuis tenu, et ont esté les levees de son
heritage arrestees. Si nous, etc.

N° 34. (60) 17 octobre 1521

Même affaire que la lettre n° 63.

[183r] Remission pour Pierres Blanchet
de la parroesse de Nozay, dont la
teneur ensuyt cy ampres.

BEAUCOUCHE

[183v] François, par la grace de Dieu roy de France
et duc de Bretagne, a touz presens et advenir, savoir faisons,
nous avoir receu l'humble supplicacion et requeste
des parens et amys consanguyns de nostre pouvre
subject Pierres Bouscherel, de la parroisse de
Nozay en la comté de Nantes, exposantz
comme ledict Bouscherel, qui est fretier et coustumié

de conduire et faire mener et conduire les vins
des marchans conduysans vins venans d'Ancenis
dempuix Joué juc au port de Belle Estil, que ou
moys de juillet derrenier, prins charge de faire
mener et conduire dempuix ledict Joué jucq audict
Belle certain nombre de pippes de vin blanc,
et eust baillé charge a ung nommé Gillet Le
Bouchier, chartier, demourant en la methairie
de la Ribaudaye, qui est des appartenences du lieu
et domaine de Villeneuve, en la parroisse d'Abaretz,
de conduire et cherroyer une desdictes pippes de vin
dempuix ledict lieu de Joué jucq a Belle. Et eust
ledict Bouchier conduict et mené ladicte pipe de vin
dudict Joué jucq audict lieu de la Ribaudaye ou il
estoyt demourant qui est sur le chemyn de la
Liraye ou bourgc d'Abaretz. Ainsi que ledict
Boucherel alloit apres lesdictz vins, quelz ledict
Bouchier et autres chertiers conduysoint dudict Joué
juc audict port de Belle pour les garder et y faire
rendre ainsi qu'il estoyt tenu par raison, en l'endroit
dudict village de la Liraye, il trouva ung nommé
Geffroy de Luen¹¹, quel recevoit un devoir de coustume
deu a la seigneurie de Nozay sur les vins passans par ledict
lieu de la Liraye, et assemblement allerent a cheval
dempuix iceluy lieu de la Liraye, tirans leur chemyn
pour aller au bourgc dudict lieu d'Abaretz pour
repaistre eulx et leurs chevaulx. Sur lequel chemyn est
ledict lieu de la Ribaudaye ou demouroit ledict Bouchier, et
ainsi qu'ilz passoint en l'endroit d'iceluy lieu de la Ribaudaye,
virrent en la rue d'icelle maison ladicte pippe de vin,
quelle ledict Bouchier avoit prins charge de conduire
soubz et de par ledict Boucherel, en doubtant celuy Boucherel
que celuy Bouchier eust tiré dudict vin pour ce qu'il estoyt

¹¹ Suppliant n° 63.

[184r] des celuy temps, et de par avant, notté d'estre coustumier de desrober et tirer le vin qu'il cherroyt, furent il et ledict de Luen meuz de descendre, et deffaict descendirent de sur leursdictz chevaulx pour visiter ladicte pippe et savoir si on avoit tiré dudict vin, et atacherent leurs chevaulx a la closture d'icelle rue. Et en visitant ladicte pippe de vin, pour ce que elle sonnoit creux, la sonderent et trouverent qu'il en failloit grant quantité comme ung dour ou environ. Quoy voyant, ledict Boucherel entra il et ledict de Luen en ladicte maison, ou ilz trouverent ledict Bouchier, aussi par la serche qu'ilz firent en ladicte maison y trouverent dudict vin en grande quantité, et lors commencerent a blasmer ledict Boucher, luy disant que ce n'estoyt bien faict a luy d'avoir ainsi tiré et robé ledict vin. Et sur ce, sourdirent entreulx grosses et rigoureusses parolles, et en l'instant sortit celuy Boucherel hors ladicte maison, monta sur sondict cheval et alla audict bourgc d'Abaretz estant assez pres d'icelle maison, pour aller querir des tesmoings pour venir veoirs celuy faict, et lessa ledict de Luen et le pria ledict Boscherel de demourer audict lieu pour garder ledict vin pour monstrier ausdictz tesmoings. Et a ce qu'il ne fust absenté et amena avec luy dudict bourg François Christien et Jehan Dauffey cleric, et eulx arivez et entrez en ladicte maison, ad ce que ledict Bouscherel faisoit reproche audict Bouchier dudict vin ainsi tiré et desrobé de ladicte pippe, et le voullait monstrier ausdictz Christien et Dauffey qui illec il avoit faict venir afin de en porter record, iceluy Boucher print et saesit au corps ledict Boucherel, disant qu'il yroit noayser hors sa maison et l'en expulsa et mist dehors, et yssit lors ledict Bouchier de ladicte maison, tout esmeu et courroucé comme aparroissoit

a sa contenance et soy saesit d'une courbe de cherrecte
de laquelle il frapa de grant puissance le cheval
dudict de Luen qui estoyt ataché comme dit est
a la closture de ladicte rue. Et sur ce que ledict de
Luen luy demanda pourquoy il frapoit son cheval,
[184v] iceluy Bouchier frapa d'icelle courbe ledict de Luen en
la teste d'ung grant coup, et luy fist une playe
en la teste dont yssit grant effussion de sangc.
Et lors ledict Boucherel, desplaisant du robement
dudict vin et aussi de l'oultraige et exceix que avoit
faict celuy Boucher audict de Leuen, et craignant
celuy Bouchier qui estoyt homme puissant le voulseist
pareillement fraper de ladicte courbe, print, aracha
lymer de boays duquel ladicte pippe de vin estoyt
liee et d'iceluy frapa ung seul coup ledict Boucher
par la teste tellement qu'il tomba a terre, ne
pensant touteffoiz ne pensoit [*sic*] lors le tuer.
Après lequel coup ainsi donné, pour ce que la femme
dudict Boucher, Mathurine Valdié et Jehanne Daufey,
femme de Robert Pavé, illec estantes, se prindrent
avecques ledict Boscherel et le voulloint detenir
oultre son voulloir, iceluy Bouscherel, doubtant
estre prins et detenu de sa personne, voullant
evader, print celle femme Boucher au poill, luy
disant que si elle estoyt homme aussi bien
comme elle estoyt femme, qu'il la tueroit. Et
pour ce que celle femme Boucher ne le voullait
lascher, tira ung couteau qu'il avoit a sa sainture
et afin de constituer en crainte icelles femmes et
trouver moyen que elles le lachassent a ladicte fin de
pouvoir s'en aller et fuyr, print ung couteau qu'il avoit
a sa sainture duquel il fist contenance de les voulloir
fraper, ce que touteffoiz il ne fist. A l'occasion
duquel coup ~~que ont d~~, ainsi que on dit et pensé ledict

suppliant, plus que autrement ou par deffault de
pensement, alla celuy Boucher la nuyt dudict jour,
de vie a trespas. Et craignant celuy Boucher rigueur
de justice s'est rendu fugitif. Pour quoy, etc.
L'adrecze aux juges de Nantes, etc. Pourveu, etc. Donn e
a Nantes ou moys d'octobre l'an de grace mil V^c XXI
et de nostre regne le septiesme, ainsi sign e sur
le replict : *Visa*, etc, et pour secretaire : Par le roy
et duc, a la relacion du conseil, BEAUCOUCHE et saell e
en laz de soye et cire vert.

N^o 35. (61) 20 novembre 1521

[198r] Remission pour Robert Furgot
de laquelle la teneur ensuyt.

Fran ois, etc, a touz presens et advenir savoir faisons nous avoir receu l'humble supplicacion
et requeste nous faicte de la part des parens consanguins et amys de Robert Furgot, natiff de la
parroisse de Mauron en nostre juridiscion de Ploermel, exposans que le jour et feste de
Monseigneur Saint-Berthelemer au moys d'aougst derroin, celuy Robert Furgot estoit all e en
procession a une chapelle dudit Saint-Berthelemer situee en la forest de Brexelien pres (/)
l'abbaye de Painpont, et a celluy jour avoit assemblee a une chapelle dudit Saint
Berthelemer, s'en alla ledit Furgot prandre sa refection a ladite assemblee et la fut jucques
environ une heure ou deux environ soullaill couchant qu'il s'en voullut retourner ches lieu
(sic) ou bourg de Mauron et pour ce faire monta sur son cheval qu'il avoit mis a ladite
assemblee desplaasa dudit lieu de Saint-Berthelemer tirant chemyn a aller audit lieu de
Mauron. Et comme fut en l'entree du boays estant pres les clostures de la methairie de
pourprins dudit Saint-Berthelemer trouva ledit Furgot, ung nomm e Geffroy Robin quel pour
lors il ne cougnoissoit estant a pi e pres lequel il passa, et apres avoir ledit Furgot laiss e ledit
Geffroy Robin derriere luy, celuy Robin jecta ou boulla par terre une pierre ampr es les jambes
du cheval dudit Furgot. Et ce voyant, craignant iceluy Furgot que encore en vouldseist gecter
d'autres et qu'il l'eust frap e ou sondit cheval, se destourna vers ledit Robin tout de cheval
ayant la main sur l'espee qu'il avoit a son cost e, luy demandoit pourquoy il avoit ainsi ject e
ladite pierre quel Robin se print a injurier ledit (/) Furgot. Quoy voyant ledit Furgot s'en alla
vers ledit Geffroy Robin en faisant courir sondit cheval vers ledit Geffroy Robin, luy disant

qu'il n'avoit pas bien fait et qu'il luy apprendroit bien a jecter ainsi pierres et desgaisna sadite espee, lequel Geffroy Robin en disant qu'il ne demandoit riens audit Furgot print a s'en fourir et passa par sur ung baesle et closture estant pres ledit chemyn et entra esdites clostures de ladite mestairie de Saint-Berthelemer et lors qu'il y fut entré se print a assembler pierres et en jecta vers ledit Furgot et de l'une d'icelles frapa ung homme passant par ledit chemyn du dos et cryoit celuy Geffroy Geffroy (sic) Robin a l'ayde. Et tout incontinent ledit Furgot aperceut Jehan Sebillot, filz de Vincent Sebillot, retournant audit lieu de Saint-Berthelemer quel estoit en pourpoint et chausses ayant des pierres en ses mains disant audit Geffroy Robin qu'il l'eust tenu bon et qu'il ne s'en feust fouy. Auquel Furgot demanda ou il l'etarnoyt et qui le faisoit recouvrer et eurent parolles d'injures et menaces l'un a l'autre, sur (/) lesquelles ledit Furgot frapa deux ou troys coups de plat de sadite espee sur ledit Jehan Sebillot. Et apres ce, ledit Furgot se print a chemyner tenant sondit chemyn a s'en aller audit lieu de Mauron tirant vers la lande a l'evesque, ledit Jehan Sebillot chemynant (a) costé dudit Furgot ayant touzjours parolles rigoureuses et de menaces, allerent ainsi jucques environ my-chemyn d'iceluy lieu de Saint-Berthelemer et ladite lande a l'evesque et jucques a ce que il (sic) trouverent oudit chemyn ledit Vincent Sebillot pere dudit Jehan et autres, quel Vincent estoit sur ung cheval oudit chemyn a chominé et avoyt la robe de sondit filz devant luy demanda ledit Vincent Sebillot audit Furgot qu'il vouloyt faire et qu'il ne feroit pas ce qu'il cuydoit faire. Et illecques y eut encores pluseurs parolles rigoureuses et de menaces l'un a l'autre et s'entre injurians entre lesquelles lesdits Sebillot apellerent ledit Furgot " grant ventriez gars, filz de putain ! " et aussi ledit Furgot les appelloit " faulczonniers " et autres injures et menasses et apres displacerent (/) dudit lieu tenans assemblement ledit chemyn et ayant touzjours parolles de rumeur et debatiffves ensemble, estans lesdits Furgot et Vincent Sebillot a cheval chevauchans coste a coste jucques bien pres de l'issue dudit boays vers ladite lande a l'evesque. Aussi y estoit ledit Jehan Sebillot, filz dudit Vincent, quel avoit et tenoyt une pierre ou deux en ses mains et ainsi que ledit Furgot les luy aperceut, de crainte qu'il eut que ledit Sebillot ne l'eust frapé, dist audit Jehan Sebillot que eust mis lesdites pierres a bas. A quoy ledit Jehan Sebillot respondit que non eust et a lors ledit Furgot evagina encores son espee et jecta son manteau qu'il avoyt sur luy et print a courir son cheval vers ledit Jehan Sebillot, quel Jehan print a s'enfouyr par a travers ledit boays comme environ demy get d'arc puis apres se tourna vers ledit Furgot luy disant que ne l'eust plus suyvi ou qu'il le turroyt et jecta ledit Jehan desdites pierres vers ledit Furgot dont il le frapa de l'une d'icelles en l'un de ses bratz et le blecza dont ledit Furgot se print a doulloir et en se displacant et chemynant rencontra ledit Vincent Sebillot qui s'en retournoit vers lesdits Jehan Sebillot et Furgot, luy demanda ledit

Vincent qu'il vouloyt faire disant qu'il n'eust pas faict ce qu'il cuydoit faire. Et sur celles parolles de rumeur qu'ilz avoient ensemble l'un a l'autre en chevauchant coste a coste par ledit chemyn, s'entre prindrent (/) au corps et cheurent et dessendirent a bas dessus leurs chevaulx tout en chominans. Et estans ainsi tombez, ledit Vincent Sebillot avec ses deux mains leva une grosse pierre, quelle estoit oudit chemyn et la aprocha du visaige dudit Furgot quel avoit sadite espee nue et sur ce de rechef s'entre prindrent et abatirent par terre, l'une foiz ledit Furgot dessus l'autre foiz dessoubz et comme ilz s'entre tournoient ou a la choaiste qu'ilz firent l'un sur l'autre ledit Vincent Sebillot fut blecé de ladite espee que ledit Furgot avoit nue estante entre eulx deulx ou braz destre pres de la main dont il yssut grant efussion de sang. Et par ce fut ladite espee tiree d'entreulx par l'un des assistans et par eulx, lesdits Vincent et Furgot levez et departiz, et sur ce que ledit Furgot aperceut ledit Vincent Sebillot blecé oudit braz et aussi se voyant sanglant sur le visaige monta sur son cheval ayant recouvert sadite espee quelle luy avoit esté ostee et s'en alla tirant par ladite lande a levesque son chemyn a aller a Mauron laissant arriere son dit manteau et fut suyvy par ledit Jehan Sebillot et autres le menassans de le prandre. A l'ocasion de laquelle playe et bleceure, environ ouict jours apres, ledit Sebilo est allé de vie a decbeix par deffault de troictement ou autrement et craignant rigueur de justice s'est ledit Furgot randu fugitif tenant franchise en l'eglise et cymetiere de Mauron. Remonstrans lesdits supplians que ledit Furgot est jeune homme de l'eage d'environ trante ans, chargé de femme et enffans, marchant honnestement vivanz sans jamays avoir commis aucun aultre mauveix cas jucques a celui de present, nous suppliant qu'il nous plaise a tout ce que dessus avoir esgard et sur luy impartir noz lettres de grace, remission et pardon. Pourquoi etc, l'adrece aux juges de Ploermel, ainsi signé par le roy et duc a la relacion du conseil M. de Kergueon et sellé en laz de soye et cire vert.

N° 36. (62) 20 novembre 1521

[198r] Aultre remission Michel

Legay, menuisier, dont la teneur ensuyt:

DUVAL

[201r] François, etc, savoir faisons, a touz presens et advenir, nous avoir receu l'humble supplicacion des parens et amys consanguins de nostre pouvre subject Michel Leiguay, menuisier, contenant que le premier jour du moys de may derroin, ainsi que

ledict Michel Leguay, ung nommé Jehan Le Barron, aussi menuisier, et Guillaume Ligot, son serviteur, et Morice Craffier¹², boullangier et fermier de noz fours de Vennes, estoit entrez chés Claude Delaporte, pres les lices dudict Vennes ~~estoit entrez chés Claude Delaporte~~ tenant taverne, lors pour boyre, une foiz ledict Leguay qui estoit sur bout fut apellé par feu maistre Jehan Guillart, Jacques Locquemer, Jehan Chotart et Yvonnet Texier, estans en ladicte taverne pres des dessus nommez, et ledict Leguay illec arivé, ledict Guillart et les dessusdictz se prindrent a s'esbatre et railler dudict Leguay et a luy dire qu'il avoit perdu sa part d'une fille d'Araidon et qu'elle estoit mariee avec François Percillet. Et ce oyant, ledict Leguay s'en retourna a ses compaignons qui avoint faict tirer pinte de vin d'Anjou, et si tost qu'il y fut arivé, ledict Leguay print ung voirre et la quarte et demanda si le vin estoit tout beu, a quoy luy respondirent qu'ilz n'avoient eu que une pinte de vin, et lors dist ledict Leguay dist [*sic*] qu'il en failloit avoir une autre pinte et frapa sur la quarte ainsi que l'on faict aux tavernes pour avoir du vin et en eurent une autre pinte qu'ilz beurent. Et ce pendant, ledict Craffer demanda audict Legay s'il eust voullu luy faire ung charlict de la sorte quil de ung qu'il advisa en la place de la maison dudict Claude Delaporte pour la somme de deux escuz d'or soullaill. A quoy respondit ledict Leguay qu'il estoit content, mais que pour l'heure, il estoit occupé avec le sieur de Kermerch a luy faire de l'ouvraige pour partie du batissement de sa maison de Keramerch, et lors ledict Barron qui la estoit dist qu'il estoit content de le luy faire veu le reffus dudict Leguay pour le pris offert audict Leguay, ce que ledict Craffier accepta, et pour ce faire, bailla audict Barron le denier a Dieu, quel il receut en presence de Guillaume Le Guenedal, Bertran

¹² Suppliant n° 56.

de Courcelles et ung nommé Geffroy, lors serviteur de Pierres Pineau. Et devant ledict Guenedal, se obligea ledict Barron audict Craffier de luy faire ledict charlict dedans certain temps a gré convenu entreulx. Et sur tant, ledict Morice Craffier fist venir une quarte de vin, et ainsi qu'ilz estoient ensemble a boayre ladicte quarte de vin, ledict Barron marchanda avec ledict Craffier touchant une maison situé au marcheix dudict Vennes, audict Craffier appartenant, pour le pris et somme de six livres monnaie de rente, quel marché fut entreulx conclut [101v] et fait de gré et consentement d'eulx prins par Guillaume de Redoret et Loys de Redoret son frere, qui lors en passerent lettres. Et ledict gré ainsi prins, ledict Barron poya encores quarte de vin qu'ilz beurent. Et cependant s'en alla ledict Licot hors ladicte maison, ne sceyt ledict Leguay quelle part il tira. Et apres que les autres eurent ainsi bien beu et faict bonne chere et qu'il estoit fort tart, ledict Morice Craffier s'en alla droict a son hostel, et apres que ledict Morice s'en fut allé, lesdictz Barron et Leguay firent charger deux quartes de vin d'Anjou en ung estamau que Barron poya et ledict Leguay fist charger une quarte qu'il poya semblablement, et s'en allerent lesdictz Leguay, Barron et la femme dudict Barron soupper chés ledict Craffier et illec firent abiller une douzaine de oeuffz. Et apres qu'ilz eurent mangé lesdictz oeuffz et beu une des quartes de vin qu'ilz avoient aportees et commanzoint a boire les deux autres et avoient ja souppé, environ dix heures de nuyt, ledict Guillaume Lecot acompagné d'un nommé L'Hostellier, Jehan Pezigo et ung autre nommé Jehan, ne sceyt son sournom, arriverent pres l'huys de la maison dudict Craffier et se assidrent pres l'hostel de ladicte maison sur des boays, quelz estoient esdictes lices pres ladicte maison. Et quant ilz furent ung peu asys, apellerent par la fenestre ledict Michel Leguay et demanderent : « Michel Leguay

est il ceans ? » A quoy leur respondi ledict Craffier que non, et disdrent audict Craffier par telles parolles de tel effect : « Vous avez menty ! Nous le voyon bien ! » Et sur ce, leur respondi ledict Craffier et leur dist : « Il n'yra pas encores hors d'ycy ! » Et sur tant, commencerent lesdictz Licot et Jehan L'Ostellier, Pynigo et autre a gecter des pierres contre les huys et fenestres de la maison dudict Craffier, de telle sorte qu'ilz rompirent une fenestre, et par icelle entra une pierre dedans la chambre basse d'icelle maison. Quoy voyant, ledict Craffier leur dist que s'il se feust levé, qu'il les eust bien envoyez et ce neantmoins ne lesserent pas lesdictz nommez a gecter lesdictes pierres comme devant. Et ce voyant, lesdictz Craffier, Barron et Leguay se leverent de table et ledict Craffier monta au hault de ladicte maison et par ung petit huys estant audict hault de ladicte maison de vers la rue commanza a crier force : « A nous sur sesdictz larrons et robleurs ! » Ou autres parolles demonstrantes tel effect, neantmoins lequel cry ne laisserent lesdictz Licot et autres dessusdictz a gecter pierres contre les huys et fenestres d'icelle maison, de telle sorte qu'ilz firent audict Craffier habandonner ledict petit huys et s'en venir et descendre au bas de ladicte maison ou estoit lesdictz Leguay et Barron et sa femme et la femme dudict Craffier. Et voyans lesdictz [202r] Craffier et Leguay qu'ilz ne povoint riens faire et ne venoint aucuns a leur ayde audict cry de force, craignans que lesdictz Licot et autres dessusdictz feussent entrez par force sur eulx en ladicte maison, sortirent hors cryans force : « A nous ! » Et comme ilz furent ainsi hors ladicte maison, leur fut encores rué des pierres. Quoy voyant, ceulx Leguay et Craffier prindrent pareillement des pierres et s'entruerent pluseurs coups les ungs contre les autres, et recullans

lesdictz Licot et autres de soy party droit a la basse court droit a la basse court [*sic*] de nostre chateau de Lermyne assez pres de ladicte maison. Et eulx ainsi recullez, lesdictz Licot et Craffier se prindrent l'un a l'autre bien rudement aux cheveux et au collet et eulx ainsi s'entre tenans cheurent a terre et s'entre tindrent illec assez longc temps. Et sur tant, ledict Leguay retourna ausdictes lices et crya derechef force : « A nous ! » Disant par telles parolles : « Barron a l'ayde ! On tue Morice ! » Et ainsi crya par pluseursfoiz. A quoy ledict Barron ne vint, et pour ce que ledict Barron ne venoit, ledict Leguay s'en retourna par de vers le four par le bout de l'escurie dudict chateau et illec aperceut que lesdictz Craffier et Licot estoient tombez a terre et s'entretenoient encores aux cheveux comme dit est, et senble audict Leguay que ledict Morice estoit le sousain. Et voullant ledict Leguay les departir et gardez que ledict Licot n'eust affollé outre ledict Morice Craffier, se aprocha d'eulx et d'un petit cousteau dont il merchoit le boays qu'il tira de sa baguecte frapa ledict Licot aux jambes et es environs des cuysses cinq ou seix coups ne sçet autrement quel nombre ne en quelz autres endroictz, pour raison qu'il estoit nuyt et faisoit obscur, mesmes que ledict Leguay estoit ainsi enboicté de vin. Et cependant ariva audict cry quelque gens dudict chateau de Lermyne avec une chandelle qui les departirent quant ilz furent venuz. Et vingt quatre heures apres, a l'occasion desdictz coups ou par deffault de bon pancement ou autrement, alla ledict Guillaume Licot de vie a trespas. Et craignant rigueur de justice c'est ledict Leguay absenté et dempuix tenu en franchise tant en l'eglise Saint Salomon que au couvent du Bodon pres dudict Vennes et ailleurs en fuyte. Si nous remonstrent lesdictz supplians

que ledict cas cy dessus navré est advenu par cas de fortune inopiné, ne precogité et sans avoir esté de guet a pans, et que lors ledict Leguay estoyt fort [202v] enboicté de vin qu'il avoyt beu celuy jour, mesmes que lesdictz Licot et autres de son parti vindrent asaillir ledict Leguay et autres de sa compaignie en la maison dudict Craffier et par ce moyen estoient promoteurs dudict debat comme dit est. Aussi que ledict Leguay est jeune homme, bon menuisier bon menuisier [*sic*] et qui peult subvenir a la chose publicque, homme pacifficque, non querelleur vivant de bonne vie, hantant et frequentant gens de bien sans jamais avoir esté actaint ne acusé d'aucun mauveix cas digne de reprehencion juc a celuy de present. Ce neantmoins, lesdictz supplians doubtent que noz officiers dudict Vennes veullent proceder vers ledict Leguay a rigueur de justice ainsi qu'ilz veullent et s'efforczent faire, si par nous n'est audict Leguay sur ce pourveu de nostre grace et remede convenable. Nous suppliant qu'il nous plaise a tout ce que dessus avoir esgard et remectre, quicter et pardonner audict Leguay le faict et cas dessusdict et sur ce luy impartir beganement noz lettres de grace, remission, quittance et pardon, tres humblement requerantz icelles. Pour quoy, etc. L'adrecze aux juges de Vennes. Donné a Nantes ou moys de novembre l'an de grace mil cinq cens vint ung et de nostre regne le septiesme. Ainsi signé : Par le roy et duc, a la relacion du conseil, et scellé en laz de soye et cire vert, *Visa*.

N° 37. (63) 4 décembre 1521

Même affaire que lalettre n° 60

[209r] Remission pour Geffroy

Luen de cas de meurtre, dont

la teneur ensuyt:

BEAUCOUCHE

François, par la grace de Dieu roy de France, duc de Bretagne, a touz presens et advenir, savoir faisons, nous avoir receu l'humble supplicacion et requestes des parens et amys consanguins de nostre humble subgett Geffroy de Luen, demourant en la ville de ~~Nantes en l'e~~ Nozay en l'evesché de Nantes, contenant comme ledict de Luen, qui est fermier de la coustume et trespas de la terre et seigneurie de Nozay, pour icelle coustume receveur, feust au moys de juillet derrenier, allé au village de la Liraye en la parroisse d'Abaretz, distant dudict Nozay de deux lieues ou environ, ouquel [209v] lieu de la Liraye se poye et recepoit ladicte coustume de vins par illec passans, venans d'aucuns et tirans au port de Belle, se trouva audict lieu de la Liraye ung nommé Pierres Bouscherel¹³, fretier et costumier de conduire et faire mener les vins des marchans venans dudict lieu d'Ancenis dempuix Joué juc audict port de Belle, lequel s'en alloit a sa maison. Et assemblement eulx estans a cheval en compaignie l'un de l'autre, s'en allerent dempuix iceluy lieu de la Liraye tirans leur chemyn pour aller audict bourgc d'Abaretz distant dudict lieu de la Liraye d'une lieue ou environ, pour repaistre eulx et leurs chevaulx. Et en chevauchant par iceluy chemyn, ainsi qu'ilz passoint par devant la maison et methairie de la Ribaudaye qui est des appartenences du lieu et domaine de Villeneuve en ladicte

¹³ Suppliant n° 60.

parroisse d'Abaretz, ou estoit demourant ung
nommé Gillet Le Boucher, aperceurent en la rue d'icelle
maison une pippe de vin estante en une cherrecte,
laquelle ledict Boscherel dist audict de Luen avoir
baillee audict Gillet Le Boucher pour la cherroyer
et conduire dudict Joué juc audict port de Belle.
Et pour ce que celuy Bouscherel dist audit de Luen
qu'il se doubtoit que celuy Bouscher eust tiré
dudict vin, et qu'il estoit des celuy temps et de
par avant noté d'estre coustumier de desrober
et tirer le vin qu'il cherroyt, pria celuy
Bouscherel ledict de Luen qu'ilz se feussent
descenduz dessus leurs chevaulx pour
visiter ladicte pippe de vin et savoir s'il auroit
esté tiré du vin y estant. A quoy se
acorda ledict de Luen et lors descendirent
et atacherent leurs chevaulx a la haye et closture
d'icelle rue, et en visitant ladicte pippe de
vin, pour ce que elle sonnoit creux, la sonderent
et trouverent qu'il en failloit grant quantité
comme ung dour ou environ. Quoy voyans,
lesdictz Bouscherel et de Luen entrerent en
la maison dudict Le Bouscher en laquelle
il estoit, et par la serche qu'ilz firent en
[210r] ladicte maison y trouverent dudict vin en grant
quantité et lors commancerent a blasmer ledict
Boucher luy disans que ce n'estoit bien fait
a luy d'avoir ainsi tiré ou souffert tirer
et rober ledict vin. Et sur ce, sourdirent
entreulx grosses et rigoureuses parolles, et
en l'instant sortit ledict Boscherel hors
ladicte maison et monta a cheval disant
aller audict bourgc d'Abaretz estant assez
pres d'icelle maison, pour aller querir

des tesmoins pour venir veoirs celuy faict,
et laissa ledict de Luen audict lieu de la
Ribaudaye pour garder ledict vin, affin de
le monstrier ausdictz tesmoins a ce que il n'eust esté
pendant l'allee et le retour dudict Bouscherel
absenté, et y demoura celuy de Luen jus a ce que
ledict Boscherel fut de retour. Et pendant celuy
temps avoient lesdictz ~~Boscherel~~ Boucher et ledict
de Luen grosses et rudes parolles et y eut l'un
d'eulx qui cria a la force, combien que ledict de Luen
ne les frapast aucunement, bien est vroy qu'il
craignant que lesdictz Boucher et sa femme luy
eussent voullu faire quelque outrage, se
saesit d'un marteau de charrecte que il tenoit
en sa main, duquel toutesfoiz il ne frapa aucun
coup. Et par apres, ledict Boscherel ariva en
ladicte maison et semblablement François Christien
et Jehan Dauffey, clerck, quelz ledict Boscherel amena
avec luy dudict bourgc et eulx y arivez a ce que
ledict Bouscherel fist reproche audict Boucher
dudict vin qui avoit esté ainsi tiré et desrobé
de ladicte pippe et le vouloit monstrier ausdictz
Christien et Dauffey afin d'en porter record en
[210v] justice, iceluy Le Boucher print et saesit au corps
ledict de Luen disant qu'il yroyt hors sa maison.
Et lors, lesdictz de Luen, Boscherel et Le Boucher
s'entreprendrent au corps, yssirent hors ladicte
maison en la rue d'icelle, et apres iceluy
Le Boucher estre yssu, tout esmeu et couroucé comme
aparroissoit a sa contenance, soy saesit d'une
courbe de cherrecte de laquelle il frapa de
grande puissance le cheval dudict de Luen
qui estoit comme dit est ataché a la haye
et closture de ladicte rue. Et sur ce que

ledict de Luen luy demanda pourquoy il
frapoit sondict cheval de la maniere, iceluy Le
Bouchier en l'endroit frapa d'icelle courbe
ledict de Luen en la teste de si grande puissance
qu'il le gecta et tomba a terre et luy fist une
playe dont yssit grant efussion de sangc. Et
peu apres, a ce que iceluy de Luen ouy dire
ausdictz Christien, Dauffey et autres illec estans,
que ledict Boscherel avoit avec un levyer de
boays frapé ung seul coup ledict Le Boucher par
la teste, tellement qu'il en estoit tombé et cheut
a terre, toutesfoiz n'estoit mort. Et d'illec fut ledict
de Luen, qui ne se pavoit bonnement soustenir, mené et
conduit sur son cheval audict bourgc d'Abaretz pour
estre pancé de ladicte playe par le barbier estant et
demourant audict bourg d'Abaretz. Et le landemain dudict
conflict et debat, ouyt ledict de Luen dire que a l'ocasion dudict
coup, ledict Le Boucher estoit la nuyt du jour dudict conflict,
allé de vie a trespas. Duquel cas ledict de Luen n'est
en rien cause, auteur, participant ne aydant autrement que cy
dessus est recité. Toutesfoiz pour ce que il estoit allé ainsi
qu'est supposé audict lieu avec ledict Boscherel, doubte que
la justice vouldroit vers luy proceder a le detenir,
luy faire quelque reproche et tenir rigueur, et a celle cause
s'est rendu fugitif. Nous ~~qu'il nous~~ suppliantz qu'il nous,
etc. Pour quoy, etc. L'adrecze au juges de Nantes.
Donné a Nantes le ou mois de novembre l'an
de grace mil V^c XXI, et de nostre regne le sept^{me}, et sellé
en laz de soy et cire verd. Ainsi signé : Par le roy
et duc, a la relacion du conseil, BEAUCOUCHE, *Visa*.

N° 38. (64) 7 décembre 1521

[212v] Remission pour Estienne Le

Bot de la parroisse de Peaulle

ou diocese de Vennes:

DUVAL

Françoys, par la grace de Dieu roy de France,
duc de Bretagne, savoir faisons, a touz presens et advenir,
nous avoir receu l'humble supplicacion de nostre pouvre
subgett Estienne Le Bot, originaire de la parroisse de
Peaulle en l'evesché de Vennes, contenant que le derrenier
jour de ce present moys de novembre, quequessoyt
puis ung moys a jour de dimanche, comme ledict
Estienne Le Bot suppliant et Jehanne Guyot sa
femme espouze, feussent allez ensemble en
la maison de Jehan Colleguerf, tavernier, demourant
en ladicte parroisse, loing l'un de l'autre de deux ou
[213r] troys trectz d'arc ou environ pour apointer certain
differant qui estoit entre ledict suppliant et Jehan
Le Bot le jeune, son nepveu, ce qu'ilz firent.
Et apres avoir fait ledict apointe, ledict Estienne
Le Bot suppliant et sadicte femme souperent en ladicte
taverne en la compaignie dudict Colleguerf et de
pluseurs autres. Et ainsi que ledict suppliant et
les autres de la compaignie, fors ledict Colleguerf
qui se absentia de ladicte compaignie, dansoient
ensemble apres soupper, ladicte femme dudict Le Bot
se absentia pareillement de ladicte compaignie
secretement sans le seu et congé dudict suppliant
sondict mary, et s'en alla ou bon luy sembla ne
sçeyt a quelle heure. Et apres avoir ainsi
ledict Le Bot suppliant et les autres assistans
souppé, demanda ledict suppliant a la femme dudict
Colleguerf par une foiz, deux ou troys, ou estoit
allé sadicte femme, a quoy celle femme respondit
qu'elle ne savoit, et sur tant ledict suppliant la sercha

en ladicte maison. Et pour ce qu'il n'y trouva sadicte femme et pareillement ledict Colleguerf, ledict suppliant s'en yssit environ l'heure de deux ou troys heures de nuyt de ladicte taverne et s'en alla tout couroucé en sadicte maison pour savoir si sadicte femme y estoit. Et a son arivee demanda a son varlet et autres ses gens y estans si sadicte femme estoit point encores venue dempuis le soupper, quelz luy respondirent que non. Et ce voyant, ledict Le Bot suppliant et que sadicte femme l'avoit ainsi laissé et habandonné ladicte compaignie sans son sçeu et congé, considerant qu'il estoit nuyt et heure suspecte, laissa sa robe en sadicte maison pour aller sercher sadicte femme et savoir ou elle estoit. Et tout seul, sans compaignie, n'ayant baston ne espee environ luy, fors ung petit cousteau a couper son pain, prist son chemyn a retourner en ladicte taverne pour savoir si sadicte femme y estoit point retourné, sans ce qu'il eust aucune intencion ne voulloir de luy mal faire. Et comme il passoit en l'endroit et par devant ung clos de terre appartenant a Anthoine Le Boterif, estant sur le droit chemyn d'entre ledict Le Bot et ladicte taverne, il entendit y avoir gens dedans ledict clos parlans [213v] en basse voix ensemble. Et pour savoir qu'ilz estoient, trouva faczon de entrer dedans ledict clos de terre et illec entrevyt ung homme et une femme estans couchez sur la terre s'entretiensans [blanc] comme homme et femme ont a coustume faire en commectant le vice charnelle, et quelz lors il ne sçeut congnoistre a raison de la nuyt qui estoit fort obscure. Et sur tant, s'aprocha d'icelles personnes pour savoir qui c'estoit et ainsi qu'il s'aprochoit d'eulx, ledict homme se leva

sur piedz et s'en fouyt et courut le plus
roudement qu'il peult hors dudict clos
et laissa illec ladicte femme dudict suppliant
toute seulle a terre. Et apres que ledict suppliant
fut pres d'icelle femme, ainsi estante a terre,
et qu'il vid que s'estoyt la sienne, il comme
furieux et perturbé de son bon sens
et entendement et ayant grant doulleur et
desplaisir de ainsi avoir trouvé sadicte femme,
luy demanda qui estoyt ledict homme qui s'en
fuyoit et si s'estoyt son paillard. A quoy
ladicte femme congnoissant la voix de son marry,
ne luy respondit molt. Et lors, ledict Le
Bot print sadicte femme comme ung homme ebeté
et perturbé de sondict bon sens et entendement,
et avec ses mains et piez luy donna
pluseurs coups et collees, ne sçeyt ledict Le
Bot quel nombre pour la chaleur en quoy
il estoyt. Aussi luy donna ung seul coup
en la cuyse d'un petit couteau qu'il avoit
a sa sainture, et sur tant survindrent
quelque gens, quelz emporterent ladicte femme dudict
suppliant en sadicte maison, fort mallade et la
firent confesser et a ce que il fut demandé
qui l'avoit ainsi batue et si elle le pardonnoit,
elle dist et declera que ce avoit esté ledict
suppliant sondict mary et qu'elle luy pardonnoit,
et bien tost apres, et en icelle mesme nuyt,
alla sadicte femme de vie a decebeis. A raison
de quoy, ledict suppliant, craignant rigueur de
justice s'est rendu fugitif et se absent
[114r] et est encores absent et fugitiff. Si nous
remonstre ledict Le Bot suppliant qu'il y a dix ouict
ans ou environ qu'il fut conjoint par mariaige

a sadicte feue femme, des le quel temps et quequessoit
puis quinze ans derroins, elle estoit renommee,
tant entre les gens de bien que autres, meschante,
paillarde et pustain ainsi que dempuix son
decebeix a ouy dire et n'en estoit auparavant
a certaine, combien qu'il en eust suspeczon et
pour ce l'eust admonestee pluseurs foiz de
ne donner ocasion que l'on parlast d'elle
en mauveise maniere et l'eust quelque foiz chastiee
et reprinse de sa contenance dissolue, ainsi
que doit faire bon et loyal mary a son
espouse. Aussi nous a ledict suppliant
remonstré qu'il est pouvre homme de
labeur, eagé de quarante ans ou environ
et chargez de pluseurs petiz enffans non
puissans de se gaingnez, quelz sadicte femme
luy a delaissé, jaczoit que dempuix sondict
decebeix il a ouy dire et que l'on dit notoirement
que partie desdictz enffans sont a autres que
audict suppliant et que auparavant ledict
cas advenu, il a tousjours esté de bonne vie
et honneste conversacion et aussi ses pere
et mere, ayeul et ayeulle, vescu de son labeur
et collectivement comme ung bon laboureur
doit faire, sans jamais avoir esté actainct
ne convaincu d'aultre villain cas, blasme ou
reproche et craignant rigueur de justice
s'est comme dit est, absenté de sadicte maison
et n'y osseroit plus retourner ne
converser ne en ladicte parroisse de Peaulle
et es environs, si par nous ne luy estoit
sur ce impartly nostre grace et misericorde,
tres humblement le nous requerant.
Pour quoy, etc. Pourveu qu'il presentera

en personne au prochains ou secondz
[114v] ou secondz [*sic*] genneraulx plez de nostre court et barre
de Vennes, etc. Donné a Nantes ou
ou [*sic*] moys de novembre l'an de grace
mil cinq cens vint ung, et de nostre
regne le septiesme. Ainsi signé : *Visa*,
Par le roy et duc, a la relacion du conseil,
N.DUVAL, et sellé en laz de doye et cire
vert.

B 27, 1522

N° 1. (65)

[13r] François, par la grace de Dieu roi de France et duc de Bretagne, savoir faisons a touz presens et advenir nous avoir receu l'humble supplicacion et requeste nous faite de la part de femme, parens et amys de Jehan Jouhier, povre homme de labour demourant en la parroisse de Meneac soubz nostre juridiscion de Plöermel, contenant que ou moys de decembre derroin a certain jour d'iceluy moys qu'il ne sauroit autrement declerer dans le soir, heures d'environ despuis troys heures de nuyt comme (?) jour estoit en la maison de ung nommé Denys Crousil tavernier et tenant vin en vante ouudit bourgc de Meneac. Celuy Jehan Jouhier, estant assis a une table pres le feu au bas d'icelle maison en la compaignie de dom Pierre Ysel, dom Pierre Bernard, Laurent Launay et Jehan Daboudet, bevans et faisans bonne chere ensemble survint et se trouva a l'huys d'icelle maison ung nommé Jehan Briend dudit bourgc de Meneac, lequel Briend frapa et hurta audit huys demandant oupverture et entree en ladite maison. Et lors ledit Jouhier voyant que aultre personne ne se aprochoit ne s'avanczoit pour oupvrir ledit huys, s'en alla et le oupvrit. Apres laquelle oupverture, ledit Jehan Briend entra en ladite maison et ledit Jehan Jouhier s'en retourna vers avec lesdits dessus nommez estans a ladite table et aussi aprocha et se rendit ledit Jehan Briend, lequel a son arrivee dist a la compaignie par telles ou semblables parolles qu'ilz menoint grant bruyt et qu'il cuydoit qu'ilz eussent debat ensemble. Sur quoy se esmeurent, parolles et noaise entre lesdits Jouhier et ledit Briend s'entre menaczans, entre autre choses dist et demanda en l'endroit ledit Briend audit Jouhier rudement en fieres parolles qu'il vouloit qu'il luy eust donné ung soufflet et auquel (/)

Briend, ledit Jouhier dist et respondi denotant et faisant entendre qu'il ne l'auroyt agréable, par telles ou semblables parolles : " donné, donné et si vous donnez l'on vous voyra ! ". Et sur icelles parolles, estant lesdits Briend et Jouhier et ung nommé dom Pierre Bernard les ungs pres les autres, celuy Briend en l'instant frapa de l'une de ses mains en l'autre au plus pres du visage dudit Jouhier. Quoy voyant ledit Jouhier craignant qu'il ne l'eust frapé sur la joe cougnoissant mesmes que ledit Briend, estoit homme débatiff et rumoureux et coustumier de battre et oultraiger gens et il estre pouvre et simplet homme, en défendant estre oultraigé de celuy Briend, soudainement en chaude colle frapa de crainte audit Brien d'un petit cousteau qu'il avoit de coustume de porter a sa sainture pour couper son pain, ung coup en la poinctrine tellement qu'il en yssut grant effusion de sangc et sur ce s'escrya ledit Briend: " a nostre forcze ! " disant oultre qu'il estoit blezé a mort et s'aprocha devers l'huys d'icelle maison monstrant audit Crousil et sa femme et autres y estans sadite playe en la poinctrine saignant comme dit est et bientost apres avoir esté ledit Briend confessé, par ledit dom Pierre Ysel, il tomba a terre et ont lesdits supplians entendu que a l'occasion dudit coup, il alla de vie a decebeir. Et se voyant ledit Crousil fist fermer les huys d'icelle maison sur les personnes dessus nommez y estans, fors sur ledit dom Pierre Bernard qui desja s'en estoit allé. Et en icelle nuyt fut ledit Jouhier a celle cause constitué prinsonnier et le lendemain conduit et mené es prinsons de Joielin en la juridiscion de Perhouer inférieure de notredite court de Ploermel. (/) Remonstrans lesdits supplians oultre que ledit Jouhier est pouvre homme laboureur comme dit est, de le asge d'environ vint cinq a trante ans, paisible bien famé et renommé lequel auparavant ledit cas advenu n'avoit jamais esté aculé, actainct ne convaincu d'aucun maulveix ne villain cas et ledit feu Briend estre en son vivant rymoureux, querelleur, débatiff et entrepreneur de nouaise yvroingne ete sauver () effoiz qui avoit beu le vin, oultre mesure coustumier de jecter pierres contre les huys et apres les gens hantans ledit bourgc, nous suppliant qu'il nous plaise impartir audit Jouhier, noz lettres de grace, rémission et pardon tres humblement le nous requerans. Pourquoi etc, l'adreix aux juges de Ploermel. Donné a Nantes ou moys de janvier l'an de grace mil cinq cens vint ung et de nostre regne l'huictiesme. Ainsi signé par le roy et duc a la relacion du conseil M. de Kergueon, visa et scellé en laz de soye et cire verd.

N° 2. (66)

[14v] François, par la grace de Dieu roy de France et duc de Bretaigne, savoir faisons a touz presens et advenir, nous avoir receu l'humble supplicacion et requeste nous fait de la part des femme, parens et amys consanguins de Morice Lebriz, estagier de juridiscion de Helgoat,

contenante que en decembre derroin et ung an a ung jour de jeudi, qu'estoyt jour du marché en la ville dudit Helgoat, ledit Morice Lebriz, Yvon Le Diault se trouverent le soir dudit jour a boire ensemble en la maison Guillaume Riout en ladite ville ou pour lors y avoit taverne. Et apres y avoir beu en une chambre basse et qu'ilz se furent trouver et ariver au bas de la place et entree d'icelle maison, soy y trouva et survint ung nommé Loys Le Ledan qui avoit proceix avec ledit Morice, acompaigné celuy Le Ledan de Henry Banazer, Noel Dermou, Jehan Le Moyer et autres jusques au nombre de cinq ou seix, ayant ledit Loys Le Ledan son espee et ung desdits autres de sa compaignie une arbalaistre. Lequel Le Ledan, ainsi qu'il aperceut et veyt ledit Morice, en hayne comme est vroysemblable, evaginer sadite espee s'adrecza audit Morice s'avanzant le voulloir oultraiger comme apparroissoit a ses gestes et contenances s'efforcant de ce faire. Et voyant celuy Morice, ledit Le Ledan s'adreczer a luy l'espee au poign, se retira pres la chemynee d'iceluy bas de la maison et illec aperceut une buche de boays qu'il print pour soy garentir d'estre oultraigé, de laquelle, se voyant ainsi pressé d'iceluy Le Ledan et cougnoissant son mauveix voulloir, s'efforça de le repulser et s'adrecza pareillement a luy, en l'endroit de quoy se mist ledit Jehan Le (/) Moyer, l'un de ceulx de la compaignie dudit Le Ledan, entre eulx deulx. Sans savoir pour celle heure ledit Morice, l'intencion d'iceluy Jehan Le Moyer, fors qu'il estimoit luy voulloir cruoir sur combien que ledit Morice ayt depuis ouy dire que c'estoyt pour debvoir frappé, casser ledit debat. Et en celuy instant, ledit Morice, tout troublé et de son esprit esmeu, se voyant ainsi pressé et prest d'estre oultrager, de ladite busche bailla ung seul coup sur la teste dudit Moyer, duquel coup celuy Moier tomba a terre, et apres fut fait relever et aller en une chambre d'icelle maison ou il entra. Et luy y entré, incontinant se retira pres la chemynee d'icelle chambre, y voymyt et jecta dessus le cueur pour ce que entre autres choses, excessivement il avoit beu vin, et peu de temps apres sortit ou fut envoyé la nuyt bien tard hors d'icelle maison ledit Moier, alors faisoit ung gros froyt et gellee. A raison duquel exceix de vin et dudit froyt que endura celle nuyt, ledit Moier fut trouvé le landemain mort en une vielle maison froste et caduque, non habitee estante pres ladite maison dudit Guillaume Riou, ayant sa bource coupee. Remonstrans lesdits parens et amys que ledit Morice est povre homme, chargé de femme et enffans, bien vivant de tout son temps sans avoir esté reproché d'aucun mauveix ne villain cas, blasme ou reproche, ne eu hayne presconceue avec ledit Le Moyer, quel estoyt réputé yvroingn, de meulveix rest et gouvernement et sousteneur de gens notez de paillardie, nous supplians qu'il nous plaise dudit cas impartir audit Morice Lebriz, noz grace, remission et (/) et (sic) pardon tres humblement le nous requerant. Pourquoi etc, l'adrecze aux juges de Helgoat. Donné a Nantes ou moys de janvier l'an de grace mil cinq cens vingt ung et de nostre

regne l'huictiesme. Ainsi signé par le roy et duc a la relacion du conseil P. Texier, visa et scellé en laz de soye et cire verd.

N° 3. (67)

[16r] François, par la grace de Dieu roy de France et duc de Bretagne, a touz presens et advenir savoir faisons nous avoir receu l'humble supplicacion et requeste des parens et amys consanguins de Jehan Cornet, filz Guillaume Cornet demourant ou bourgc de Chateauthaubaud, contenant que le juedi treisieme jour de septembre derroin, comme ledit Jehan Cornet et Mathurin Cornet, son frere, feussent allez du bourgc de Chateauthaubaud au village et domaine des Herbilletz, en ladite parroisse de Chateauthaubaud, pour mectre de l'eau es et tounneaulx que leurdit pere avoit en une chambre de maison oudit village et iceulx nectoyer pour mectre et recepvoir ses vendanges des vign, et que ledit Guillaume Cornet, leur pere (?) pres ce (?) dudit villaige. Et illecques survaint ung nommé Gabriel Guilbaud, demourant au molnier en ladite parroisse de Chateauthaubaud, quel pareillement a quelques vignes oudit villaige de Herbilletz, et avoit lors celuy Guilbaud, ou gens de par luy, faict une rutte ou passage pour aller vendanger sesdites vignes. En quoy faisant, passoint par dessus lesdites vignes dudit Guillaume Cornet. Et de ce advertiz, lesdits Jehan et Mathurin Cornet, et que ledit Guilbaud et sesdits gens faisoit dommaige a la vigne de leurdit pere en passant et ainsi repassant par dessus icel, sur laquelle ne avoit aucun droit de paissaige, disent audit Gabriel Guilbaud que ce n'estoyt pas bien faict de ainsi passer dessus la vigne de leurdit pere et qu'il ne vouldroit pas que l'on luy feist en pareil et qu'il pouoit bien actendre a vendanger avec les autres sans se halter de vandeger plus tost¹⁴ et que ilz avoit touziours paine de assembler les (/) sur ledit villaige. A quoy leur respondit ledit Gabriel Guilbaud qu'il y avoyt autres qui y vendangeoint aussi bien que luy et qu'il ne leur vouldroit faire tort. Et sur tant se departit ledit Guilbaud d'avecques lesdits Cornetz sans autre oultraige ne exceix s'entre faire, print celuy Guilbaud chemyn pour s'en aller dudit village des Herbilletz a sa maison dudit lieu de molnier, tirant par le grant chemyns des "troys brousses", et se misdrent lesdits Cornetz en la maison de leurdit pere pour acoustrez et veueoir lesdits cires et vesseaulx et (?) ilz estoit a ce faire, ouyrent ou grant chemyn, a distance d'environ ung gect de pierre, ung nommé Lucas Bahau, estant comme sembloit enboyté et souprins de vin, lequel en jurant et blephémant le

¹⁴ Le 13 septembre est une date précoce pour vendanger, du fait de la conjoncture climatique favorable du début du XVI^e siècle. On voit qu'il n'y a pas de consensus sur la date de la vendange, ce qui témoigne de l'individualisme agraire de cette région de l'Ouest.

nom de Dieu, disoit par telles ou semblables parolles : " par le corps Dieu, vous avez faict crier a la force mon amy Guilbaud mes vous en comparez ! " et s'aprocha du lieu et maison ou estoit lesdits Cornetz. Et craignant ledit Jehan Cornet qu'il ne les voulseist outrager, il et sondit frere, s'aprocha de l'huys de ladite maison ou ilz estoit, il et sondit frere, et iceluy huys ferma, de sorte qu'il estimoit que ledit Bahuaud ny eust sceu y entrer. Et si tost que ledit Bahuaud fut arivé a l'huys de ladite maison, frapa deux ou troys grans coups d'une fourche, ne sceyvent lesdits Cornetz de quel bout, contre ledit huys, et s'efforcza y entrer, jurant et blaphémant le nom de Dieu que lesdits Jehan et Mathurin les Cornetz eussent esté en celle maison qu'il eust rompu l'huys et leur eust mis la vie hors du corps, a quoy lesdits Cornetz ne respondirent aucune chose, et s'en alla (/) ledit Bahuaud et départit hors de celuy lieu. Et dempui et environ demy heure apres, qu'estoyt presque jour couché, lesdits Cornetz ne estimans rencontrer ledit Bahuaud ne s'en aller a la maison de leurdit pere oudit bourg de Chateaubaud et estimans que iceluy ledit Bahuaud se feust retiré a sa maison, sortirent hors ladite maison ou ilz estoit, et eulx hors ladite maison, sans bastons ne ferreures quelzconques, aperceurent a distance d'environ ung grot de pallet ledit Lucas Bahuaud, lequel estoyt (surboat) entre la haye et ung clos de vigne apellé " le clos de la bacrie " appartenant au sr de Bresgue, ayant celuy Bahuaud avec luy une fourche de fer a deux doiz. Et sur ce que ledit Jehan Cornet demanda : " qui est la ? " Respondit ledit Bahuaud : " s'est moy la ! " Sur tant ledit Jehan Cornet dist que il ne vouloit point de debat, disant que il et sondit frere n'avoit point de baston. Et afin de mieulx le certiffier de ce, commanca ledit Jehan Cornet a hoster sa fermeture qu'il avoit sainte, disant : " regarder si j'ay aucun bast ! " Et en disant celles parolles, ledit Bahuaud donna ung coup de ladite fourche de fer du bout devers les doiz sur la teste dudit Jehan Cornet de telle force que ledit Jehan Cornet en tomba par terre, et sur tant s'escria ledit Mathurin Cornet disant par telles ou semblables parolles : " traître, larron, tu as tué mon frere ! " Et en se relevant, ledit Jehan Cornet trouva une pierre pres luy, quelle il gecta audit Bahuaud et l'actaignit par la teste, au moyen duquel coup de pierre ledit Bahuaud tomba par terre. Et il relevé, ayant ladite fourche avec luy, print chemyn a s'en retourner et s'en retourna a sa maison ou il demouroit, situee en la parroisse de Saint-Hylant du Coign apellé "le coustau roullair", pour aller a laquelle avoyt la riviere de (/) Maine a passer, laquelle il passa. Et le landemain qui fut le vendredi quart jour dudit moys, environ une heure avant soullail couché, ledit Lucas Bahuaud decebda. Dempui lequel decebeix ledit Jehan Cornet, craignant rigueur de justice, s'est absenté, nous remonstrans outre lesdits supplians que ledit Bahuaud estoyt homme querelleux et souvant s'enboictoit de vin par exceix, et Jehan Cornet estre bon vivant, doulx et paisible, de bon rest et gouvernement, sans jamays avoir esté acusé

ne actaint d'aucun mauveix cas digne de reproche, chargé de femme et enffans avec lesquelz il vy honnestement sellon son estat. Et doubte que par noz officiers de justice soit procedé vers luy a prinse et detempcion de sa personne et rigoureuse pugnicion a raison dudit mescheff et cas advenu inopinément, advenu comme dit est. Nous supplians iceulx parens et amys nostre bon plaisir estre octroyer audit Jehan Cornet noz grace, remission et pardon dudit cas tres humblement le nous requérant. Pourquoi etc, l'adreix aux juges de Nantes. Donné a Nantes ou moys de janvier l'an de grace mil cinq cens vignt-ung, et de nostre regne l'huictiesme. Ainsi signé par le roy et duc a la relacion du conseil C. Allaire et scellee en laz de soye et cire verd.

N° 4. (68) Nantes, février 1520.

Remission de meurtre pour Jehan Guillou, de Vitré, dont le teneur ensuist :

[27v] François, par la grace de Dieu roy de France duc de Bretagne, savoir faisons a touz presens et advenir nous avoir receu l'humble supplicacion et requeste des parens et amys et consanguins de Jehan Guillou, contenant que puis demy an encza ou environ, a ung jour de mercredi devoir le soir d'iceluy jour, ung nommé Olivier Morel et Jehan Myaulays le jeune, de la ville de Vitré, eulx estans au devant de la maison de Jehanne le Moynne, taverniere, demourante es forsbourgs de ladite ville de Vitré pres la porte du hault d'icelle, trouverent a sa demourance ladite Jehanne le Moynne a laquelle ilz demanderent si elle avoit que souper. A quoy ladite Jehanne respondit qu'elle n'avoit riens, et surtant lesdits Morel et Myaulays s'en partirent et allerent chés ung nommé Jehan Petiot, tavernier de cidre demourant es forsbourgs Saint-Martin dudit Vitré. Et apres eulx estre arivez en la maison dudit Petiot, ilz envoyerent Jehan Chevallier querir ung pot de vin chés ladite Jehanne le Moyenne ou illec estoit lors a soupper ledit Jehan Guillou. Lequel Guillou, adverti que ladite Jehanne avoit ung peu auparavant respondu qu'elle n'avoit que soupper et esperant leur faire plaisir s'il leur envoyt quelque chose, iceluy Guillou envoya ausdits Morel et Myaulays des costellectes de pourceau roties en se recommandant a eulx et leur faisant savoir que incontinant apres son soupper, (/) il les yroit veoir. Et bientost apres souppé, celuy Guillou et ung nommé François Chardon se partirent de la maison de ladite Jehanne le Moynne et en ensuyvant ladite promesse s'en allerent chés ledit Petiot en espoir de s'esbatre avec lesdits Morel et Myaulays, esperant qu'ilz en feussent contens a raison dudit don que leur avoyt envoyé ledit Guillou. En laquelle maison ilz trouverent lesdits Morel et Myaulays en une chambre haulte encores assis a table a parachever leur soupper et les saluerent et par apres se assidrent avecques eulx a leur table ou

ilz beurent et mangerent quelque peu par compaignie et deviserent entreulx de pluseurs choses et furent quelque esbat et joyseuté sans querelle ne question quelconque. Et ce faict, demanda l'un de la compaignie que l'on eust faict compte de leur escot, ce que fut faict et trouvé monter ledit escot quatre soulz ou environ. Et lors fut par aucun d'iceulx dit qu'il convenoit paier ledit escot, de quoy ledit Guillou dist que pour lors il n'avoit guerres d'argent et qu'il ne paieroit rien dudit escot mais que une aultre foiz il paieroit ung pot de vin a la compaignie. A quoy se consentit ledit Myolays et au regard dudit Morel il ne se y voullut consentir, ainsi dist par telles ou semblables parolles en les adressant audit Guillou : " Par le Sange Dieu, vous paierez votre escot ou autrement je vous feray arrester ! ". Sur quoy ledit Guillou dist audit Morel qu'il n'en paieroit rien, pourtant que auparavant qu'il feust illec venu il avoit souppé chés ladite Jehanne Le (/) Moyenne et qu'il n'estoyt venu a eulx si non pour leur faire compaignie. Et surtant ledit Morel dist audit Guillou telles ou semblables parolles : « vous avez esté ces jours derroins excommunié, vous estes ung vexateur et pilleur de peuple, despanseur et mangeur de vexelle d'estain lors que estres sergent de Vitré ! » A quoy ledit Guillou dist audit Morel qu'il n'estoit pas vroy, et ledit Morel luy dist qu'il avoit menti comme ung meschant luy reiterant lesdites injures et surtant ledit Morel qui estoyt assis sur le bancq se leva et s'en vint droit vers ledit Guillou. Lequel Guillou craignant ledit Morel qui estoyt homme rumoureux et noasif, saesit au corps ledit Morel et l'abatit soubz luy en la place, et tout esmeu et eschauffé desdites injures tira une petite dague ou poignart qu'il avoit a son costé et donna audit Morel ung seul coup d'estoc sur une espaulle par le derriere sans toutefuoyes voulloir ne penser le tuer. A l'occasion duquel coup ledit Morel deux heures apres alla de vie a decebeix, a raison de quoy ledit Guillou a esté prins et constitué prinsonnier par les officiers de ladite court de Vitré es prisons de laquelle il a esté detenu quatre moys ou environ et y est encores a present. Si nous remonstrent lesdits supplians que ledit Guillou est jeune homme soubz l'aage d'environ trante cinq ans, bien vivant et tel réputé, yssu et extroit de gens notables sellon leur estat sans avoir luy commis aucun (/) cas criminel pugnizables par justice. Et aussi que ledit Morel estoit ung citeur de court d'eglise, querelleur et debatif et par son mauveix gouvernement tres mal renommé, ce neantmoins doubtent lesdits supplians que les officiers dudit Vitré veullent a raison dudit cas proceder contre ledit Guillou a rigueur de justice, a leur grant deshonneur, scandal, desavantage et detrimet dudit Guillou si par nous n'est audit Guillou sur ce imparti noz lettres de grace, rémission et pardon dudit cas et crime dessusdits, nous suppliant qu'il nous plaise icelles nosdites lettres luy octroier et luy remectre, quicter et pardonner le faict et cas dessusdits tres humblement le nous requerant. Pourquoi ce... l'adreix aux juges de Rennes. Donné a Nantes ou moys de febvrier l'an de grace mil cinq cens vint

ung et de nostre regne l'huictiesme, ainsi signé par le roy et duc a la relacion du conseil Duval visa.

N° 5. (69) 2 avril 1521

[53r] François, par la grace de Dieu roy de France et duc de Bretagne, savoir faisons, a touz presens et advenir, nous avoir receue l'humble supplicacion et requeste nous faicte des parens et amys consanguins de Jacques Alix, natiff de la parroisse de Concoret et depuis le temps de neuff ans ou environ demourant en la parroisse de Pleumaugat, a present detenu prinsonnier es prinsons de Dinan, contenant comme pour raison de marchandie et mercerie qu'il a de coustume de mener et aussi pour le fouaige de ladicte parroisse de Pleumaugat dont par pluseurs foiz il a eu la charge d'en faire la levee et cueillecte, il alloit souventes foiz en nostre ville de Rennes pour icelluy fouaige, paier et porter au receveur [53v] tenant son tablier en nostredicte ville de Rennes, et que ou moys d'aougst derroiner, ung nommé Pierres Guergucel demourant en la parroisse de Bront, rencontra ledict Alix et luy dist qu'il avoit de l'argent cassé. Et pourtant qu'il congnoissoit ledict Alix estre marchand et mercier, pria ledict Alix de trouver moyen de le luy faire vendre et profilter, ce que ledict Lalix reffuza faire de prime face craignant que celuy Quergucel l'eust recouvert par quelque mauvaise voye. Et a certain temps apres, a ce que ledict Alix s'en fut allé audict Rennes pour le fait

de sadicte marchandie et desdictz fouaiges,
aiant lors entre autres choses quelque peu
d'argent cassé qu'il avoit eu et receu en
paiement de sadicte mercerie, bailla et vendit
ledict argent cassé a ung orfeuvre dudict Rennes
nommé Pierres Martin pour le pris
d'environ vint troys soulz. Et en faisant
son marché, iceluy Alix souvenant de la
priere que luy avoit faicte ledict Quergucel,
en tint celuy Alix propos audict orfeuvre
luy disant que quelq'un s'estoit adreczé
a luy pour faire vendre quelques bagues et
argent cassé qui estoit de longc temps
en quelque lieu, demandant audict Martin
orfevre, s'il y vouloit entendre. A quoy
ledict Martin luy donna bon actroit
et dist qu'il le vouloit, l'avertissant
que la chose feust tenue secrecte. Et
a certain temps par apres, ledict Quergucel
pria et pressa celuy Alix de porter vendre
[54r] celuy argent cassé audict Rennes, ce que finalement
ledict Lalex promist faire. Et deffaict, celuy
Quergucel et sa femme luy baillerent par deux
ou troys foiz de l'argent cassé envelopé en une
perche et luy disoit qu'il y avoit environ cinq
livres de crocq, quel argent cassé ledict Lalex
porta audict Rennes, ne sachant pour lors
que ce feust argent desrobé et le bailla
audict Martin qu'il le desploya et veyt ledict
Alix que c'estoient callices rompuz, quel aurnement
ne fut aucunement prisé en presence d'iceluy Alix
et le retint et bailla audict Martin qu'il le
desploya et vit ledict Alix que c'estoient galices
rompuz sans paier leur bailler aucun argent

audict Alix qui s'en retourna apres avoir faict
ses negoces et affaires audict Pleumaugat.
Et en allant par ladicte parrouesse pour
le faict desdictz fouaige et desdictes marchandie,
il trouva et rencontra ledict Quegucel et ung
nommé Jehan Macert, quelz luy demandoint
le paiement de l'argent cassé, et pour ce que
ledict Alix n'avoit apporté argent dudict Martin,
ilz le menaczoient abatre. Et
par apres, retourna ledict Alix audict Rennes
pour le faict desdictz fouaige et mercerie et dist
audict Martin que les compaignons qui luy
avoient baillé ledict argent cassé pour le
devoir vendre et qu'il fut reffuzcant ce faire
et craignoit avoir affaire avec eulx, ilz le
voullurent oultrager et luy donnerent menaces
de le tuer et brusller sa maison et son bien
et avec ce, luy osterent par forcze certaine
somme de l'argent de sa bource. Quoy voyant,
il fut contrainct de prandre et porter
encores ledict argent cassé audict Rennes pour ce que
[54v] ledict Macert alloit en sa compaignie. Et
en y allant, a l'interrogacion que luy
faisoit ledict Alix dont ilz avoient eu
ledict argent cassé, celuy Macert luy
dist et confessa qu'ilz l'avoient desrobé
a Henbont dont ledict Lalix fut de ce
courroucé en advertissant ledict Macert
qu'ilz estoient meschans gens et qu'ilz seroient
panduz et que il et ledict Quergucel avoient
mis et mectoint celuy Alix en danger d'estre
reprins de justice. Nous remonstrans
iceulx supplians que ledict Alix en tout a
receu comme il dit, par troys foiz argent

dudict Martin pour bailler au dessusdict, sçavoir
la premiere foiz dix phelipus, l'autre
foiz quinze livres et par l'autre foiz
vingt livres, quel argent il bailla ausdictz
Quergucel et Macert, fors huict livres qu'il
retint a faire son paiement dudict fouaige
qu'il leur rendit depuis. Et a certaine
autre foiz que ledict Lalix se trouva
audict Rennes pour lesdictz fouaiche et
marchandies, dist audict Martin que
ceulx qui luy avoint envoyé ledict argent
cassé luy demandoit argent que
encores leur restoit et que ledict Martin
leur respondit pour lors qui ne pourroit
en bailler, mays que debriefff il devoit
recepvoir et avoir argent et qu'il leur
l'en envoyroit. Et oncque puis, ledict Alix
ne voullut riens porter ne raporter
les ungs des autres. Nous remonstrant
oultre que a cause de ce que dessus, ledict
[55r] Alix a esté prins et constitué prisonnier esdictes
prinsons de Dinan, ou il a esté confronté avec
aucuns des delinquans et robbeurs dudict
argent cassé vers lesquelz il a son povoir,
ayde veritable pour avoyoer le cas en
maniere qu'ilz ont esté convaincuz et executez
par justice et qu'il ne reste plus a pugnir
des perpetrans desdictz laroucins que ledict
Quergucel sur lequel est la prinse comandee
et fait lesdictz supplians continuelle dilligence
de le faire prandre pour le rendre a justice.
Aussi nous remonstrent lesdictz supplians
que celuy Alix a esté toute sa vie tenu et
reputé bon et loyal marchand, bien regnommé,

hantant les foyres, marchez et gens de bien,
sans avoir esté blasmé ne reproché d'aucun
aultre mauveix cas et qu'il n'avoit jamays
sçeu que ledict argent qu'il porta audict orfeuvre
comme dit est, feust laroucin ne chose robee,
jusques a ce que ledict Macert le luy dist,
ains le penczoit vendre audict orfeuvre comme
marchandie licite entre marchans. Et
doubtent neantmoins iceulx officiers
de la court de Dinan veullent proceder vers
ledict Alix par rigueur, il qui est chargé de
femme et petiz enffans. Nous supplians
qu'il nous plaise avoir pitié et compasion de luy
et en ayant esgard qu'il y a desja deux
ou troys executez des auteurs et principaulx
perpetrans, par quoy la justice est exaltee,
octroier audict Alix de nostre benigne grace,
remission et pardon dudict cas, tres humblement
les nous requerant. Pour quoy nous,
lesdictes choses considerees, etc., la verifficacion
a Dinan. Donné a Rennes ou moys d'apvril,
l'an de grace mil cinq cens vint ung, et
de nostre regne l'huictiesme. Ainsi signé :
Par le roy et duc, a la relacion du conseil,
BEAUCOUCHE, *Visa* et saellee.

N° 6 (70) 11 avril 1521

Même affaire que la lettre n° 59.

[63v] Remission pour Vincent Lorans de la parouesse
de nostre ville de Vennes, dont la teneur ensuilt
cy apres:

Françoys, par la grace de Dieu roy de France et duc de Bretagne, savoir faisons, a touz presens et advenir, nous avoir receu l'humble supplicacion et requeste nous faicte des ~~pæ~~ pouvres parens et amys consanguins de nostre povre subject Vincent Lorans, de nostre ville de Vennes, contenant que le xxvii^{me} jour de juillet derroin, jour de sabmadi et de marché, ledict Lorans se transporta en nostre ville de Vennes pour aulcuns ses affaires, en laquelle il trouva Jehan de Lohan sieur de Trevyent¹⁵, Allain de Kerdaniel, François Guillemot et deux serviteurs dudict de Lohan [64r] estans ensamble, quel de Lohan pria audict Lorans le acompaigner pour deux ou troys jours de aller avecques luy aux champs pour aulcuns affaires qu'il avoit et que pour ce faire, il luy bailleroict ung cheval. A quoy ledict Lorans condescendit et incontinant apres, monterent a cheval ceulx nommez, fors lesdictz deux serviteurs dudict de Lohan, quelz venoient a pied apres leursdictz maistre et disoit ledict Guillemot les vouldoir conduyre jucques hors nostre ville. Et comme ilz passoint au devant de la maison de ung nommé Yvon Bertye, dit Poulzcre, sortit au devant d'eulx ung nommé maistre Yves Bino, estant en pourpoint et tenant en l'une de ses mains une espee esvagnee et en l'autre main ung bouclier et paroillement, ledict Bertie, quel bientost apres se mist a l'entree de l'huys de sadicte maison, ayant une arbalestre bandee pour assaillir les dessurdictz, comme estoit a presumer en demonstrent en couraige mary avoir haine preconceue contre eulx. Et ce voyant, ledict Lorans se jecta tout de cheval au devant desdictz Bino et Bertye et leur dist en arrogance que s'estoit tres mal faict a eulx

¹⁵ Suppliant n° 88.

de ainsi assaillir telle compaignie veu mesmes que
ledit Bino estoit beau frere dudict Lorans¹⁶, et que
s'il ne se retioint, qu'ilz s'en repentiroint [*blanc*]
et les rebouta ledict Lorans, quelque peu
viollement en la maison dudict Bertye sans
esvagner ne leur donner aucuns coups
de la part dudict Lorans ne de sesdictz compaignons.
Et sur tant deirent lesdictz de Lohan, Lorans
et aultres dessus nommez : « Allons boire ! » Ausquelz
ledict Bino demanda s'il pouvoit aller a surté boire
avecques eulx, a quoy respondirent ceulx Lorans
et Guillemot que ouil. Et incontinant s'en allerent
ceulx Lohan, Lorans et aultres dessus nommez
[64v] chés la veufve feu Guillaume Ruault, taverniere en
nostre ville de Vennes, pour y debvoir avoir
a boire et apres eulx y vint ledict Bino, tousjours
portant sesdictz espee et bouclier, et eulx arivez
au devant de l'huys d'icelle taverne firent
tirer une quarte de vin d'Anjou. Et ce
pendant souvint audict de Lohan de l'arballoistre
qu'elle ledict Bertye avoit bandee comme dit
est, et craignant que ledict Bertye ne fut revenu
avecques sadicte arballoistre, descendit de cheval
et banda une petite arballoistre qu'il portoit
a l'arson de sa selle, puis remonsta a cheval.
Et ledict Guillemot, quel estoit a pié, demanda
lors audict Lohan sadicte arballestre a garder,
a quoy ledict de Lohan se acorda et bailla sadicte
arballestre audict Guillemot sans y avoir aucun
trect sur icelle, puis s'aproucha ledict Guillemot
de l'uy de ladicte taverne et demanda a boire.
Et ledict Bino esvagina sadicte espee derechief
et en vint ruer ung grant coupt sur ladicte

¹⁶ Ce fait important est omis dans la lettre n° 59.

arbaloistre estre tellement que dudict coup ladicte
arbaloistre desbanda et cheut a terre hors
des mains dudict Guillemot. Quoy voyant, ledict
Guillemot esvagina son espee et soy commancerent
ceulx Bino et Guillemot a entre battre et jucter
l'un sur l'autre de grans coups de leursdictes
espee tant d'estocq que de taille. Et ce voyant,
ledict Lorans et que ledict Bino qui avoit sadicte
espee et boucler, assailloit et pressoit si fort
ledict Guillemot de coups et que ledict Guillemot
n'avoit que une seulle espee, se jecta ledict
Lorans tout a cheval en la presse des gens
que illecques estoit assemblez, et rua a l'aventure
ung coup ou deulx de son espee, quelle il
[65r] esvagina, dont l'un desdictz coups tomba sur le
derriere de la teste dudict Bino de plat sans
luy faire aulcune ploye, pansant que pour
ledict Bino se feust retiré de sa part, ce que ledict
Bino ne voulut faire avitz se tourna vers ledict
Lorans et luy rua ung coup de son espee et
l'ataingnit et luy blessa a sang une main,
quelle il eust coupee audict Lorans n'eust
coppé toute la main [sic] si n'eust esté que ledict Lorans
haulta sadicte espee et minst la poincte d'icelle
en forme d'estocq au devant dudict Bino pour
eviter la fureur dudict Bino, de laquelle poincte
d'espee ainsi que mieulx samble ausdictz suppliants,
ledict Bino fut actaint quelque peu en la poitrine
et dont il issit sang. Et a raison
que ledict Bino avoit ainsi blessé ledict Lorans
de ladicte main et que pour luy ledict Bino ne se
voulloit reculler dudict conflict, icelluy Lorans
sans aultre chose faire, se retira de ladicte plesse
et laissa derechieff ceulx Bino et Guillemot

s'entre baptre et donner de grans coups de leursdictes
espees. Au moyen desqueulx, iceluy Bino alla
demye heure apres ou environ [*blanc*]. Et ad ce que
ledict Lohan, Laurans et dessus nommez s'en
alloint parachever leur voaige et qu'ilz eurent
passé l'une des portes de nostredicte ville, celuy
Lorans regardant derriere luy vit ledict de Kerdaniel,
quel estoit encores en nostredicte ville et entour luy
y avoit une grant compaignie de gens, quelz par force
le voulloint dessendre de sur une mulle sur
laquelle il estoit, ledict Lorans se descendit
de sur son cheval et soy tira de vers ledict
de Kerdaniel pour le secourir et comme il
[65v] fut assez pres d'eulx et eust esvaginee sadicte
espee, il veit arriver une grant compaignie
de sergens avecques le greffiié d'office dudict
Vennes, qu'eulx venoient pour prandre lesdictz
nommez. Quoy voyant, ledict Lorans s'en
alla courant droict a son cheval pour
s'en debvoir aller et fuyr, ce qu'il ne peust
faire, a la raison qu'il fut lors prins,
frappé et mutilié de plusieurs coups et
constitué prisonnier en l'une de notz tours
et prinsons dudict Vennes, auquel lieu ledict
Lorans a esté par cinq ou six moys
enferré en grant misere et calamité,
a raison de l'absence de notz juges et procureur
dudict Vennes, quelz estoient touz absens pour
le dangier de la contagion de peste qui avoit
lors cours audict Vennes. Et soignant
ledict Laurans sadicte detention estre
encorres plus longue et qu'il aperceut et veit
au moys de decembre derroin, que l'un des
huys de ladicte tour n'estoit fermee de cleff,

yssit hors de ladicte tour sans faire fraction
ne rompture d'icelle, et d'illec s'en alla
mectre en franchise au couvent de Carmes
dudict Vennes, auquel lieu il est uncores
a present, de quoy et aussi que ledict deffunct
estoit ainsi que l'on dict. Nous remonstrans
oultre que ledict Lorans est pouvre jeune
homme, escollier de l'eaige de [*blanc*] ~~vingt~~
ans ou environ, quel a employé la pluspart
de son temps a suyvir les unniversitez de Paris,
Nantes, Angiers et plussieurs aultres a grans
fraictz, mise et sollicitude et tellement y a estudié
[66r] que a l'occasion de son savoir, il a esté cree advocat
tant de cour et laye que d'eglise dudict Vennes.
Esquelle a dempux le retour desdictes unniversitez jucques
audict amprisonnement, tousjours frequenté et appellé es
bonnes compaignies et collacions de plusieurs grosses
matieres, en vivant de sondict estat bien et honnestement
avec sadicte femme, sans jamais avoir commis aultre cas
digne de reprouche, et que lesdictz deux coups qu'il donna
audict feu Bino n'estoint pour aulcunement aller mal
faire ains estoit pour departir d'iceluy Bino et ledict
Guillemot qui se bastoient ainsi ensemble que ~~dist~~ dit
est. Et a l'occasion du cas et aussi que ledict feu Bino
qu'estoit advocat et noble personne estoit par aulcun temps
quelque peu carent de son bon sans et entendement,
lesdictz supplians doubtant que notz officiers dudict
Vennes veullent en ce proceder contre ledict
Laurans a rigueur de justice et pour son absence
et yssue de ladicte prinson, le meptre par contumaces
a forban de nostredict pays et duché, duquel ledict
Lorans est orginaire et natiff, qui seroict
sa totalle destruction et de sadicte femme, si par
nous ne luy estoit sur ce impartit audict [*blanc*] notz

lettres de grace, remission et pardon desdictz cas cy
dessus mencionné, tres humblement le nous requerant.
Pour quoy nous, lesdictes choses conciderées, voullans misericorde
preferer, etc., la verifficacion adreseé au juge
de Vennes ou moys d'apvril l'an de grace
mil cinq cens vignt ung, et de nostre regne
l'huictiesme. Ainsi signé : Par le roy et duc, a la relacion
du conseil, N. DUVAL, *Visa*, et sellee.

N° 7. (71) 16 avril 1521

[70r] Remission pour Mahé Bondic, filz de Jehan Bondic de la parrouesse de Ploebenic ou diocese de Leon, touchant certain murtre par luy commis en la personne de Jehan Kerguezance.

Françoys, par la grace de Dieu roy de France et duc de Bretagne, a touz presens et advenir savoir faisons l'humble supplicacion des parens et amys consanguins de Mahé Bondic, filz de Jehan Bondic de la parouesse de Ploebenic ou diocese de Leon, avons receue, contenant que ou moys de may derrunier, ledit Mahé quel estoit demourant et residant troys ans avoit ou environ ou pays de France, vint en ce pays et duché de Bretagne pour veoirs et visiter sondit pere. Et a ung jour d'iceluy moys de may, trouva au bourgc de Balazuant a distance d'un quart de lieue de la maison de sondit pere aucuns gentilzhommes et aultres du cartier qui le festierent. Et apres avoir fort beu, se trouverent entre il qui est gentilhomme et Jehan filz Jehan Kerguezance, homme partable, aulcunes parolles, et entre aultres ledict Kerguezance dist audit Mahé qu'il estoit son parent en despit de luy, ce que ledict Mahé print en desplaissir en appellant (/) ledict Kerguezance " villain " et luy disant qu'il avoyt menty et qu'il n'estoit point son parant. Sur quoy celuy Kerguezance s'aproucha dudit Mahé et le print aux cheveulx et aussi feist ledit Mahé iceluy Kerguezance, mais par les gens lors estans presens furent departir. Et apres allerent chancun a part boyre et ledict Bondic qui estoit demouré avecques Jehan de Beaudez sergentz, du rest gentilhomme, veit ledict Kerguezance qui passoit au devant d'eulx grondant et menassant comme en despitant ledict Bondic. Quel Bondic voyant l'arogance dudit Kerguezance, d'une espee qu'il avoyt au cousté luy donna ung coup de plat sur l'espaulle, sur quoy se retourna ledict Kerguezance s'efforzant approucher et

saesir ledict Mahé Bondic qui tenoit son espee royde vers ledit Kerguezance en sorte que de la poincte ledict Bondic percza soubz le nombril ledict Kerguezance. Et fut ledict Bondic dessaesi de sadite espee par ung pbreste nommé maistre Yves Martin qui illecques estoit, lequel print ledit Kerguezance par les cheveulx sans que ledit Mahé Bondic le luy feist faire et le trayna par les boullons et si mal le trecta que l'on dict que a l'occacion tant dudit coup que de maltreitement quel luy feist ledit pbreste, ensamble (/) par faulte de bon appareil, gouvernement ou aultrement celuy Kerguezance dedans quinze jours apres est allé de vie a trespas, a raison duquel cas, doubtant rigueur de justice, s'est ledit Mahé Bondic absenté et rendu fugitif. Nous remonstrans lesdits supplians que ledit Bondic a dempuix ledict cas advenu satisfait aux parties interessees et a tousjours esté homme de bien, de bonne et paisible vie, hantant et frequentant les bons personaiges et gens de bien, sans jamais avoir esté actaint ne convaincu d'aucun aultre cas et villain blasme ou reprouche, nous suppliant qu'il nous plaise a tout ce que dessus avoir esgart et sur ce impartir audit Mahé Bondic noz lettres de grace, remission et pardon tres humblement le nous requerant. Pourquoi nous etc, pourveu touteffoiz que ledit Mahé Bondic presente en personne cestes notz presentz grace, remission et pardon aux prouchains ou seconds generaulx plectz de nostre court et barre de () devant noz sennechal ou alloué qui les expedira nostre procureur dudit lieu et parties interessees sancunes sont a ces presentes ou deument appellees pour faire verifficacion dudit cas et jucques a icelle, bien et deument faicte et aussi ladite satisfacion, nous voullons ledit Mahé Bondic estre tenu prisonnier (/) et sur ce imposons sillance perpetuel a nostre procureur et a touz aultre si donnons en mandement par cesdites presentes a noz amez et feaulx conseillers les gens de nostre parlement en nosdits pays et duché, et a noz seneschal, alloué et lieutenant et procureur dudit () et a touz notz aultres justiciers et officiers de cestuy nostre pays et duché et chancun si comme a luy apartiendra de nosdits presentz grace, remission et pardon faire savffoir et lesser ledit Mahé Boudic, pour l'honneur et en faveur mesmes et contemplacion de la mort et passion que nostre Seigneur Jhesus-Christ souffrit en l'arbor de la croix pour rachacter toute nature humaine, plainement et paisiblement jouyr et user en mettant en son corps et ses biens a plaine delivrance sans pour ce luy faire mettre ou donner aucun destour et empeschement au contraire car tel est nostre plaisir sauff en aultre choses nostre droict et l'aultruy en toutes etc, adreser au juge de () ou moys d'apvril l'an de grace mil cinq cens vingt ung et de nostre regne l'huictiesme, ainsi signé par le roy et duc a la relacion du conseil Beaucouché visa et sellee en laps et soye et cire vert.

N° 8. (72) 16 avril 1521

Le jeune suppliant (le même que le n° 76), fils bâtard d'un petit noble, est contraint par des serviteurs à participer à deux expéditions de vengeance.

[82r] Remission pour Jehan de La Couldre,
avoué bastart de Raoul Louaisel
seigneur de La Couldre, touchant
certain murtre de par luy commis
en la personne de une femme.

DUVAL

Françoys, par la grace de Dieu roy de France, duc
de Bretagne, savoir faisons, a touz presens et advenir,
nous avons receu l'humble supplication des
parens et amys consanguins de Jehan
de La Couldre, jeune enffent eaigé de quinze
ou saize ans ou environ, advoué bastart
de Raoul ~~Louysel~~ Louaysel sieur de La Couldre¹⁷,
contenant que le derruner jour de mars derruner passé,
ledict jeune enffent, en s'en retournant du lieu
et manoir du sieur de Lousscere¹⁸, situé en la parouesse
de Chasteaubourg, auquel manoir il avoit esté
envoyé par ledict Louaisel son pere, porter aulcunes
pieczes de harnoy de guerre appartenant audict Louaisel,
ledict jeune enffent se rendit au bourg de
Dommaigné, auquel lieu il trouva ledict sieur
de Lousscere avecques Jacques Le Roy¹⁹ et le sieur

¹⁷ Raoul Loaysel seigneur de La Couldre, en Essé. En 1541, c'est lui ou un homonyme qui a comparu à la montre de l'arrière-ban de l'évêché de Rennes en déclarant un revenu de 30 livres de rente. (Sèvegrand, 1993-1994, p. 814 du manuscrit). Guillotin de Corson, « Petites seigneuries du comté de Rennes, Seigneurie du Plessis-Raffray en Domagné », *Bulletin et Mémoires de la Société archéologique du département d'Ille-et-Vilaine*, t. XXXI, 1902, p. 107-122.

¹⁸ Losseyère ou Louxéère, manoir en Châteaubourg, appartenant en 1541 à François de Guénouz qui déclara tenir 50 livres de rente lors de la montre de l'arrière-ban (Sèvegrand, 1993-1994, p. 825 du manuscrit).

¹⁹ Jacques Le Roy seigneur des Valtettes, pour qui, en 1541, allait comparaître à l'arrière-ban son fils Raoul Le Roy, seigneur du Plessis-Raffray en Domagné. Ils déclarèrent à cette occasion un fief de 8 à 900 livres de rente. Raoul Le Roy se presenta en homme d'armes et fut accompagné de deux archers, d'un coustilleux et d'un page.

du Cloz illec estans, et dist ledict jeune enffent
audict sieur de Lousscere qu'il venoit de sadicte maison
et y avoit laissé lesdictes pieczes de harnoyz
[72v] que ledict Louaisel son pere luy avoict pour
les faire nectoier et fourbir ainsi qu'il luy
avoict dit. Et apres avoir fait ledict jeune
enffent son messaige et prins congié dudict
sieur de Lousscere, trouva en s'en retournant
deux hommes a luy incongnuz que l'on dit
estre serviteurs desdictz Du Cloz et Jacques Le Roy,
qui le firent boire deux ou troys foiz
avecques eulx en une taverne dudict lieu,
quelle ledict de La Couldre ne sauroict nommer,
a raison que jamais il n'avoict esté audict
bourg de Dommainé, et apres avoir ainsi
beu, lesdictz incongnuz le menerent en une
maison dont pareillement il ne sçect le nom,
situee assez loing dudict bourg, en laquelle
maison violement et par force lesdictz incongneuz
outraiguerent le maistre de ladicte maison,
en presence dudict de La Couldre, a leur bailler
une arbalestre qu'il avoit avec certain
nombre de garotz estans en ladicte maison,
et pour ce faire, donnerent audict maistre
de ladicte maison et a sa femme aucuns coups,
et apres avoir recouvert ladicte arbalestre,
l'un desdictz incongnuz la banda audict jeune
enffent et luy dist qui luy convenoit
aller avec eulx en ung aultre villaige
illec pres estant coupper la perrucque
a ung chicaneur nommé en sournom Venisse
pour se vangier d'un desplaissir qu'ilz disoient

(Sèvegrand, 1993-1994, p. 793 du manuscrit ; AD Loire-Atlantique B 2152). Il était donc beaucoup plus riche que le père du suppliant. Ces familles avaient besoin de harnais de guerre.

[73r] ledict chicaneur leur avoit fait, sans autrement
le luy declarer. A quoy il s'acorda, et a celle
cause se transporterent les dessusdictz
assablement au devant de la maison dudict
chicaneur, jacoict que ledict jeune enffent
ne l'eust jamais congnu ne frequanté en ladicte
maison. Et pour ce que lesdictz incongnuz
et jeune enffent trouverent l'huys de ladicte
maison fermé, congneurent qu'il y avoict gens
en ladicte maison, frapperent a l'huys d'icelle
en demandant que l'on leur eust dict ou
estoit ledict chicaneur, ou qu'ilz eussent
rompu ledict huys. A quoy leur fut
respondu par aulcunes femmes y estantes
que ledict chicaneur n'estoit pas en ladicte
maison, et s'adressantes a ung desdictz
incongnuz, nommé Artur ainsi que l'on dict,
luy disdrent que on leur avoit fait
des rappors que ledict chicaneur devoict
avoir fait plusieurs choses qu'ilz n'estoinct
veritables, en les prians et supplians
qu'ilz eussent osté la malveillance qu'ilz
avoient contre ledict chicaneur et que
elles leur donneroient ung pot de vin
de cinq soulz ou plus pour s'en aller boire
sans faire aucun exceix en icelle
maison, ce que lesdictz incongnuz reffuserent
et disdrent ausdictes femmes plusieurs
[73v] parolles injurieuses tant d'elles que dudict
Chicaneur, et lors hurterent plusieurs
coups contre l'huys de ladicte maison, faisans
contenance de le vouller rompre. Et sur
tant, ledict Artur dist audict jeune enffent,
quel tenoit encores ladicte arbalestre

bandee en ses mains, qu'il eust laché
le tirant (?) qui estoict sur icelle arbalestre
et l'eust tiré a l'une desdictes femmes, quelle
s'apparut a la fenestre d'une chambre
haulte de ladicte maison, quelle femme l'on dit
estre seur dudict chicaneur. A quoy ledict
jeune enffent respondict que non feroit
et qu'il feroit bien retirer ladicte femme,
et sur ce s'escria ledict jeune enffent
et dist a icelle femme par une foiz ou deulx
qu'elle se retirast ou qu'il l'ascheroict ladicte
arbalestre, en faisant contenance de la lascher.
Et apres lesdictes parolles luy dictes,
ledict jeune enffent, quel tenoict ladicte
arbalestre bandee ledict traict dessus,
la couscha entre ses mains vers
la fenestre ou estoit ladicte femme, sans
avoir toutesvoyes aulcune intencion
de laischer ne desbander ladicte arbalestre.
Et pour la foiblesse dudict jeune enffent
et qu'il ne savoit pas la maniere de
gouverner telz bastons, ladicte arbalestre
se desbanda et alla le traict d'icelle
[74r] contre le boays de ladicte fenestre, l'esclat
duquel traict donna en la teste de ladicte
femme et la blessa tellement que le lendemain
ensuyvant elle alla sans parler, de vie
a deceix. Et pour cuyder par lesdictz
incongneuz couvrir leur malice et n'estre
reprins dudict cas, prindrent ledict jeune
enffent et le menerent prinsonnier
en la maison du Plessix Raffray²⁰, de laquelle
ilz sont servicteurs ou famulliers, en laquelle

²⁰ Seigneurie en Domagné appartenant aux Le Roy (note précédente).

detencion il est encores a present comme
l'on dict. Pendant laquelle detencion,
ledict jeune enffent trouva moyen de
se deslier des cordes dont il estoict
lié et saillir hors de ladicte maison,
pensant s'enfuyr et s'evader, ce qu'il ne peult
faire a raison qu'il fut poursuyvy et reprins
en l'eure et remené en ladicte detencion.
Si nous remonstrent lesdictz supplians
que ledict Jehan de La Couldre est ung
pouvre jeune enffent, non marié, ne
excedant l'aige de saize ans, et que
lors que lesdictz incongnuz le menerent
ausdictz maisons et villaiges sur declairez,
il n'y avoit jamais auparavant esté
ne ne congnoessoict les habitans d'icelle
ne pareillement lesdictz incongneuz
et jucques alors dudict cas ne les avoit
jamais veuz, et que lors que ladicte
[74v] arbalestre se desbanda, il ne pensoit
la lascher ne savoir la maniere
de la gouverner ainsi que dit est, et
aussi que avant qu'elle se desbandast,
il avoit dict a ladicte femme decebdee
par une ou deux foiz qu'elle se
feust retirer de ladicte fenestre, ne pensant
a luy faire aucun mal ne desplaisir.
Et actandu ce que dessus, et que ledict jeune
enffent a tousjours esté de bon rest
et gouvernement, sans jamais avoir esté
reprins d'aucun cas digne de reprehencion,
il nous plaise luy remectre, quicter
et pardonner le faict et cas dessusdict.
Et neantmoins ilz doubtent que l'on

veuille contre ledict jeune enffent
proceder a rigueur de justice qui
seroit sa totale destruction, si par
nous ne luy estoict sur ce imparty
noz lettres de grace, remission, quittance
et pardon des cas et crimes dessusdictz,
tres humblement requerant icelles.

Pour quoy nous, lesdictes choses considerees,
etc., la verifficacion a Rennes. Donné
a Nantes ou moys d'apvril l'an de
grace mil cinq cens vignt ung, et
de nostre regne l'huictiesme. Ainsi signé :
Par le roy et duc, a la relacion du conseil,
DUVAL, et sellee.

N° 9. (73)

[75r] François, par la grace de Dieu roy de France et duc de Bretagne, a touz presens et
advenir savoir faisons nous avoir receu l'humble supplicacion et requeste des parens et amys
consanguins de Olivier Le Hénaff, cleric marié et notaire de la court d'eglise du Foit, inferieure
de la court et de l'official de Cornouaille, a present et long temps a detenu prisonnier es
prisons de nostre court et juridicion de Chasteaulin en l'evesché dudit Cornouaille, contenant
que des le septiesme jour de juign l'an mil quatre cens quatre vignts saeze, Alicze Le Hénaff
mist en proceix et action par ladite court de Chasteaulin Erven Le Hénaff et vers luy allegua
que feu Hervé Le Hénaff frere dudit Erven estoit mort et decebdé saesy et possesseur de
plusieurs droictz, convenances, ediffices, reparations, stuz, tempre, engroys et biens meubles
ou lieu et convenant ou pour lors demouroict ledit feu Erven Le Hénaff ou villaige de
Keryouet en la parouesse de Plerben oudit evesché, ouquel lieu decebda ledit feu Erven Le
Hénaff saesi et possesseur desdites choses quequesoict en quotité comme convenancier du sr
du Quilian et que dudit feu Hervé estoict ladite Alicze (/) fille heritiere pour une moictié. Et
que le dict feu Erven Le Hénaff puix le deceix dudit feu Hervé Le Hénaff pere de ladite
Allicze s'estoict eslanzé comme se portant tuteur et garde de ladite Alicze et autrement sur la
detencion, possession et jouissance desdits droictz, convenanciers, ediffices, reparations, stuz,

tempre, engroys et biens meubles qui furent et apartindrent audit feu Hervé Le Hénaff oudit villaige de Keryouet. Et oultre pui le deceix dudit feu Hervé Le Hénaff, feu Alicze Riou mere desdits feuz Hervé et Erven Le Hénaff, ayeulle de ladite Alicze estoict aussi morte et decebdee, laquelle avoit plusieurs biens meubles, stuz, tempre et engroys oudit lieu et villaige de Keryouet et print ladite Alicze conclusion affin que desdits biens meubles, ledit Erven Le Hénaff luy eust tenu compte jucques a une moitié et payé le relicqua. Et anparassoit que division et departement desdits droictz, convenanciers, ediffices et reparations, stuz, tempre et engroys eust esté ajugé entreulx ausquelz libellé et conclusion eut ledit feu Erven Le Hénaff la dillacion de jour jugé. (/) Et que dempui apres le deceix dudit feu Erven Le Hénaff, ladite Alicze lors conioincte par mariaige o Charles Leseuen mist en proceix et action Thomas Le Hénaf et ledit Olivier Le Hénaff son frere et supposa et feust allegance des ffaictz de sa part alléguez vers ledit feu Erven Le Hénaff et que il estoit decédé et de luy estre enffens heritiers et fondez a quy succeder lesdits Thomas et Olivier Le Hénaff et print ladite Alicze conclusion affin d'estre procedé oudit libellé faict vers ledit feu Erven Le Hénaff. Auquel libellé des plectz eurent lesdits Thomas et Olivier Le Hénaff la dillacion de jour jugé et dempui, en respondant lesdits Thomas et Olivier Le Hénaff oudit libellé des plectz cougneurent lesdits deceix et (hoiries) et anperssus des faictz contesterent par desdict et non savance et desdits faictz furent prouvé et informacion jugees. Et a valloir a ladite Alicze ce que estre devoict elle produisict ledit proceix sur dabté ensuy entre elle et ledit feu Erven Le Hénaff lequel fut baillé pour passer et merché (/) a suffire. Et a terme subsegnant ledit Thomas Le Hénaff se desista dudit clen par informacion et n'eut a debatre que ladite Alicze n'eust obtenu en sadite demande et en procedant oudit clen vers ledit Olivier Le Hénaff fut desclairé que ladite Alicze trouvoit et informoit desdits esplectz a suffire dont ledit Olivier dist ne (grecz) que droict. Et a terme ensuyvant en procedant entreulx en principal, apres avoir esté confessans des import demande dudit Olivier Le Hénaff au libellé de ladite Alicze en principal et que il feust declairé que ladite Alicze avoit importé a suffire de Jehanne Le Hénaff sa seur, fut dudit Olivier Le Hénaff en empeschant response ausdits effaictz en principal propos que ledit feu Hervé Le Hénaff, pere de ladite Alicze, avoit en aultres enffens et heritiers, savoir Jehan et Mahé Le Hénaff qui avoinct sourvescu ledict feu Hervé leur pere, duquel Mahé y avoict enffens et heritiers qui estoinct encores en vie et mesmes ledit Jehan Le Hénaff (/) estre encores vivant. Vers lesqueulz ledit Olivier Le Hénaff disoit avoir mesmes prempatoire a mettre et demanda que ladite Alicze (?) portast deulx de laquelle Alicze fut nyé les faictz dudit Olivier Le Hénaff qui en print faire prouvé et en celuy clen produisit et feist enquerir a tesmoigns et mesmement en renffors luy adjudgé oudit clen entre autres Hervé Briant, Thomas

Paillart et Jehan Grignon lesqueulz et chacun a la priere et requeste dudit Olivier Le Hénaff qui les fabricqua, recorderent faulcement et contre vericté avoir veu a Morlaix une fille dudit Mahé Le Hénaff et aussi avoir veu a Keremper Corentin ledit Jehan Le Hénaff. Et que dempuix tout et apres la publicacion faicte desdites enquestes et que lesdites parties furent aplicquees a ouyr droict pourtant que les records desdits tesmoigns furent trouvez suspectz de faulx, fut a requeste et instance du procureur de nostre court de Chasteaulin ordonné que lesdits tesmoigns et chancun eussent esté d'office de court reuquis, ce que fut faict et en leurs records furent trouvez varians et lesdits Briant et Paillart confrontez ensemble par nostre (/) seneschal dudit Chasteaulin cougneurent avoir deposé faulx d'avoir recordé avoir veu la fille dudit Mahé Le Hénaff a Morlaix et ledit Jehan Le Hénaff a Keremperrereutin pour ce qu'ilz ne les y avoict point veuz et que ledit Olivier Le Hénaff le leur avoict ainsi faict deposer pour tant qu'ilz estoient ses debiteurs et n'osoient l'en reffuser. Et que fut ainsi confessé par ledit Olivier Le Hénaffz apres avoir esté confronté esdits Briant et Paillart, lesqueulz ont esté dudit cas de falcité, pugniz audict lieu de Chasteaulin et ledit Olivier Le Hénaff constitué prinsonnier es prinsons dudit lieu, esquelles desoncques puix il est detenu en grant misere et calmité et au regart dudit Grignon il s'est rendu a ladite cause fugitif. Si nous ont oultre remonstrer lesdits supplians que ledit Olivier Le Hénaff est chargé de femme et enffens et auparavant ledit cas avenu, a esté de bon rest et gouvernement sans avoir esté accusé, actaint ne convaincu d'aulcun aultre mauvais (/) ne villain cas, nous supplians lesdits expossant pour l'honneur de la mort et passion que nostre seigneur et redempteur souffric a tel jour qu'il est aujourduy pour la redemption de nous et toute nature humaine, qu'il nous plaise dudit cas de fabricacion de tesmoigns, impartir audit Olivier Le Hénaf notz lettres de grace, remission et pardon tres humblement le nous requerant. Pourquoi nous lesdites choses considerees voullans, pour l'honneur rendant et en remembrance de la mort et passion que nostre seigneur et redempteur Jésus-Crist souffric et endura en l'arbre de la croix a tel jour qu'il est aujourduy pour la redemption de nous et toute nature humaine, misericorde preferer rigueur de justice a nous aujourduy de notz auctorité grace espicial et plainiere puissance remis, quicté et pardonné, remetons, quictons et pardonnons par ces presentes audict Olivier Le Hénaff le cas et crime dessurdit avecques toutes et chancune les paines, faux, pugnitions et amandes tant corporelles, criminelles (/) en quoy a l'ocasion dudit cas il est et peut estre cheu et encouru envers nous et justice en le reduisant et restituant, reduisons et restituons par cesdites presentes a ses vie, femme, estat, bonne renommee, justes possessions saesies et biens queulxconques tout ainsi qu'il estoict auparavant ledit cas avenu et comme si jamais il ne l'eust commis ne perpetré. Pourveu tousfoiz qu'il en personne presentera cestes notz presentes

lettres de grace, remission et pardon aux prouchains ou seconds generaulx de nostre court et barre de () par davant nostre senneschal dudit lieu les expédiant le peuple y congrege et l'assemblé nostre procureur dudit lieu etc () la verifficacion a (). Donné a Nantes ou moys d'apvril l'an de grace mil cinq cens vingt ung et de nostre regne l'huictiesme, ainsi signé par le roy et duc a la relacion du conseil Mandart visa et sellee en lapz de soye et cire vert.

N° 10. (74)

[80v] François, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble supplicacion et requeste des parens, amys consanguins de Jullien de La Mocte, eaigé de dix-sept a dix-huict ans, contenant que le seixieme jour de juign derroin, ledit Jullien de Lamothe vint avecques son pere en la ville de La Chese pour aulcuns ses affaires et furent logez ches ung nommé Jehan Le Conute en une chambre haulte d'icelle maison, en laquelle chambre estoinct entre autres Jehan Haultoure l'esné et Jehan Haultoure son filz, lesquelz ovecques ledit pere dudit Jullien beurent ensamble et y furent par longtemps et jucques environ l'heure de vespres d'iceluy jour. Et cependant ceulx Jullien et Jehan Haultoure le jeune descendirent de ladite chambre haulte en la place basse d'icelle maison, jouant et densant ensamble comme jeunes gens qu'ilz estoient et entre lesquelx jamais n'avoient eu differant ne haigne preconceue amitz s'entre aymoins et souvent estoient ensamble pour raison que ledit Jehan Haultoure l'esné, pere dudit Jehan le jeune, estoit procureur de la court et juridicion du pere dudit Jullien de Lamothe, et aussi que une ante de la mere dudit Hautoure (/) le jeune fut marié au pere de la mere d'iceluy Jullien, et estoient partant allez²¹. Et ainsi qu'ilz estoient se jouant ainsi ensamble en la place basse, ledit Hautoure le jeune dist audit Jullien qui avoict une espee sainte a son cousté par telles parolles ou semblables : " a quoy portez vous ceste espee ? quoy en sauriez bien faire ? tirez la et que je aye une astelle de boays et je me batre a vous ! " et en l'endroit ledit Jullien luy respondict qu'il se ayderoict mieulx de son espee que ledit Hautoure n'eust faict de son astelle. Et surtant ledit Hautoure le jeune print chemyn de ladite place par une allee en la court et depart derriere celle maison pour aller querir ung baston et y en trouva ung petit. Et ainsi qu'il s'en retournoit, ayant ledit petit baston de boays en sa main, rencontra en ladite celle maison ledit Jullien qui esvagina son espee et illec par jeu s'entre ruerent deux ou troys coups, de l'un desqueulx ledit Jullien par fortune ataignit d'un estoc ledit Jehan Haultoure le jeune en la hanche gauche et pour ce que ledit Hautoure se dolut disant que ledit Jullien l'avoit blessé et

²¹ Alliés, et non pas consanguins : sans doute le père de la mère d'iceluy Julien eut-il sa fille d'un autre lit.

aussi que ledit Jullien aperceut tomber du (/) sang dudit Haultoure, ledit Jullien comme ce luy que tres desplaisant estoit d'avoir blessé ledit Jehan Haultoure, mist sadite espee en sa gaigne et print ledit Haultoure par soubz ses escelle et le conduysict hors ladite maison jucques soubz le porche au davant icelle, tendant le conduyre ches ung barbier nommé Jehan Porret qui demouroit assez pres de ladite maison. Et soubz ledit porche, ledit Haultoure tombé a terre sans ce que ledit Jullien le sceust plus conduyre et surtant survint y ariva ledit Jehan Haultoure pere dudit Jehan le jeune quel feist cry de force sur ledit Jullien. A l'occasion duquel cry, ledit Jullien craignant estre batu de son pere et aussi doubtant rigueur de justice, a raison que le landemain dudit jour ledit Jehan Haultoure ala de vie a deceix, s'en alla ledit Jullien en l'eglise de la Magdelaine en ladite ville ou il a esté par aulcun temps et dempuix s'en est yssu et allé ailleurs et est encores a present et fuitif. Si nous remonstrent lesdits supplians que ledit Jullien n'a d'aaige que dix-sept ou dix-huict ans au plus et que ledit cas est avenu (/) par fortune et que ledit deffunct et luy estoinct bons amys ensamble sans jamais avoir eu entreulx haigne preconceue, aussi que ledit Jullien a tousjours esté paisible, doux et bien vivant et n'avoir auparavant commis aulcun cas digne de reprouche et que ce neantmoins notz officiers de Ploermel soubz laquelle juridicion ledit cas a esté commis, veullent a raison dudit cas et mort dudit Haultoure proceder rigoreusement contre ledit Jullien et pour ce ne scaict plus ou se ne demourer audit pays, si par nous ne luy estoit sur ce pouvoir de nostre grace convenable, nous suppliant que actandu ce que dit est, il nous plaise luy quicter, remectre et pardonner ledit cas cy-dessus mencionné et sur ce luy impartir notz lettres et remission a ce convenables tres humblement le nous requerant. Pourquoi nous lesdites choses considerees etc, la verifficacion a Ploermel. Donné a Nantes ou moys d'apvril l'an de grace mil cinq cens vingt ung et de nostre regne l'huictiesmen, ainsi signé par le roy et duc a la relacion du conseil () visa et sellee en laz de soye et cire vert.

N° 11. (75)

[82v] François, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble supplicacion et requeste des parens et amys de Pierre Le Brandonnier, contenant que a ung jour de dimanche XXIII^{me} jour de mars derroin, ledit Pierres Le Brandonnier et François sa femme estans au bourc de Ploeuc-Ganczon

auquel il estoit pour vendre triacle²², basines et aultres remedes et oiguentz pour le bien publicque dont ledit Pierre est coustumier de user, ledit Pierre trouva le sr de la Rouxiere et la damme de Bayr de ladite parouesse auxqueulx il avoit auparavant congnoissance et pour s'entre faistoier et faire ensamble bonne chere, allerent ches Lorans Thebault oudit bourgc et en une chambre haulte d'icelle maison disnerent et y furent par l'espace d'environ troys ou quatre heures. Et durant celuy temps, ledit Pierre voullant parler a l'oste d'icelle maison, descendit de ladite chambre haulte en la place basse d'icelle maison en laquelle estoict ung nommé François Pelouesel dict " boaisau faucheurs " quel pour lors (/) estoict incougneu audict Pierre et se adresant ledit Pelouezel audit Prealin dist qu'il luy vouloit donner pinte et qu'il failloict qu'ilz eussent chengé de bastons et de bonnectz et avoinct chacun d'eulx son espee saintes a leurs coustes auquel Pelouzel, ledit Pierre respondit qu'il ne vouloinct point boyre et qu'il ne vouloit eschanger son espee ne son bonnet. Et surtant, ledit Pelouezel se monstrant estre encouraigé, mary se adressa droict audit Pierre ayant la main sur l'espee faisant contenance d'en vouloir donner audit Pierre et sur la resistance dudit Pierre que dist audit Pelouesel qu'il n'eust eu son baston. Ung nommé Olivier Thebault, filz dudit Lorans soy mist entre d'eulx et mist ledit Pelouzel hors ladite maison et ledit Pierres s'en retourna a ladite chambre haulte a son escot ou estoinct lesdits Rouxiere et Jehanne Visdelou fille de Bayr et y fut jucques environ troys ou quatre heures apres medi d'iceluy jour atendant que ledit Pelouezel s'en feust retiré pour obvier a son debat (/) pourtant que l'on dissoit ledit Pelouezel estre quereleux et debatiff. Et voyant ledit Pierre et sadite femme qu'il estoict environ quatre ou cinq heures apres medi se departirent de leur hoste et hostesse et prindrent chemyn s'en aller droict audict lieu de Bayr et demandans y aller coucher. Et ainsi qu'ilz s'estoient yssuz de ladite maison et tiroint ledit chemyn pour eulx en aller, ledit Pelouezel qui estoit sis sur une souche de boays et quequesoict estoict devant ladite maison tenant son espee esvaginee en sa main, guectant lesdits Pierre et sa femme comme est a presumer, print chemyn a aller apres lesdits Pierre et sa femme disant audict Pierre en s'adressant a luy telles parolles ensamble : " par le sangc Dieu, bragnart je te aie ! " . Et ce ceant ladite femme dudit Pierre, se retournant au devant dudit Pelouezel pour le garder de frapper sondit mary en luy dissant par telles parolles ou samblables : " mon amy que avez vous a mon mary, il ne veult point de debat a vous ! si vous avez envie de chose qu'il ayt, je le vous donnerez ! " . (/) A laquelle femme, ledit Pelouezel luy ruant des coups d'estoc dist qu'il ne vouloit que lame de son corps. Et tant

²² Le mot brandoleur, employé en 1697 dans la cour de Quimperlé, semble désigner un fabricant ou un marchand d'eau de vie (Gwennolé Le Menn, « Une chanson satirique du XVII^e siècle en dialecte de Haute-Cornouaille », *Annales de Bretagne*, 1968, vol. 75, p. 693-704 (p. 694).

feist ladite femme dudit Pierre et une nommee Jehanne Le Forestier quelz prindrent ledit pelouezel par belles parolles et le conduysirent juc a l'eglise dudit lieu tachant le divertir et estre de son mauvais vouloir en laquelle esglise ledit Pelouezel fut seullement par l'espace de temps de dire une patenoustre et incontinant apres sortit hors de ladite eglise et de sadite espee et par cource s'en vint droict audit Pierre qui atendoit sadite femme pres le cymetiere de ladite eglise. Auquel ledit Pelouezel de sadite espee tenoit evaginee en sa main d'icelle, donna de plat d'icelle audit Pierre ung grant coup sur la teste. Et ce neantmoins, ledict Pierre pour tousiours eviter debat s'en cuyda fuyr et a celle cause desmarcha devant ledit Pelouezel et ainsi qu'ilz desmarcha tomba encore. Et ce voyant ledict Pelouezel luy donna ung aultre grant coup de sadite espee et luy couppa presque tous le petit doy de la main dextre. (/) Et en l'endroit ladite femme dudit Pierre le voyant, sondit mary ainsi bleczé et sanglant, se adressa audit Pelouezel de paour qu'il eust tué sondit mary le print au cheveulx et ce pendant se releva ledit Pierre et veyt ledit Pelouezel que de sadite espee du plat frapoit sadite femme. Pour a quoy obvier et garda que ledit Pelouezel ne l'eust excedé, ladite femme ledit Pierre donna de son espee audit Pelouezel sur lequel estoict sadite femme ung coup de taille sur la teste au moyen duquel ledit Pelouezel et ladite femme dudit Pierre. Et ce voyant ledit Pierre, sadite femme ainsi cheuté et son sangc eppandu et son doy coupé, ainsi que dict est, craignant que ledit Pelouezel s'il se feust relevé l'eust assailly et excedé, donna audit Pelouezel ung aultre coup ou deux de taille de sadite espee sur la jambe gauche. A l'occasion desquelz coupz, alla ledit Pelonezel apres avoir esté confessé ledit jour de vie a deceix. Si nous (/) remonstrent lesdits supplians que lors que ledit feu Pelouezel vint assaillir et invader ledit Pierre et sadite femme ilz ne pensoient aulcunement a luy ne n'avoient auparavant ledit cas jamais cougnu ledit Pelouezel et partant n'y avoit haigne preconceue, que les coups qu'il bailla audit Pelouezel n'estoict que pour (?) iceluy Pelouezel de exceder sadite femme ainsi que dit est. Aussi que ledit Pelouezel estoict ung homme quereleux et debatiff gardant les champs comme brigant ainsi que l'on dict et que ledit Pierres Le Brandonnier a tousiours esté homme de bon rest et gouvernement, honnestement vivant entre toutes gens, sans jamais avoir esté en convaincu d'aulcun cas. Et que ce neantmoins notz officiers () soubz laquelle juridiscion ledit cas a esté commis veullent a raison dudit cas proceder rigoreusement contre ledit () si par nous ne luy estoict sur ce pourveoir de nostre grace convenable, nous suppliant actendu ce que dict est il nous plaise luy quicter, remectre et pardonner ledit cas cy-dessus mencionné et sur ce luy impartir, notz lettres et remission a ce (/) convenables tres humblement le nous requerant. Pourquoi nous lesdites choses considerees etc, la verifficacion a (). Donné a Nantes ou moys

d'apvril l'an de grace mil cinq cens vingt ung et de nostre regne l'huictiesme, ainsi signé par le roy et duc a la relacion du conseil (), visa et sellee en laz de soye et cire vert.

N° 12. (76) 26 avril 1521

[97r] François, par la grace de Dieu roy de France et duc de Bretagne, savoir faisons, a touz presens et advenir, nous avoir receu l'humble supplicacion et requeste des parens et amys consanguins de Jehan de La Couldre²³, jeune enfant aagé de quinze a saeze ans ou environ, advoué bastart de Raoul Loaysel, escuyer sieur de La Couldre, contenant que le derroin jour de mars derruner passé, ledict jeune enfant s'en alla du commandement de sondict pere au lieu et manoir de Lousscere situé en la parouesse de Chateaubourg, porter aulcunes pieczes de harnoys de guerre appartenant audict Loaysel, auquel Loaysel, François de Guenoux, seigneur dudict lieu de Lousscere avoit dit auparavant que les luy eust envoyés et qu'il les luy feroit fourbir, nestoier et acoustrer par Guillaume Le Maistre qui estoit de son quartier. Et pourtant que ledict jeune enfant ne trouva ledict sieur de Lousscere a sadicte maison et qu'il estoit lors au bourg de Dommainé, ledict jeune enfant se rendit audict bourg de Dommainé et illec trouva ledict sieur de Lousscere avecques Jacques Le Roy et ung autre que l'on dict estre le sieur Ducloux illecques estans. Et apres, ledict jeune enfant dist audict sieur de Lousscere qu'il venoit de sadicte maison et y avoit lessé lesdictes pieczes de harnoys que ledict Loaysel sondict pere luy envoyt pour les faire nectoier et fourbir ainsi qu'il

²³ Mention dans la marge : « Alibi cy devant au IIII^{XX}Ile IIII^{XX}III et IIII^{XX}IIII folios de ce registre.

luy avoit dit et s'en allerent peu de temps
apres, lesdictz Guenoux, Jacques Le Roy et le sieur
[97v] Ducloux disner assablement en une
taverne oudict bourg de Dommaigné
en laquelle ledict jeune enffent suyvict
ledict de Guenoux ~~qui luy eust~~ qui luy
avoit dit et s'en allerent peu temps
apres lesdictz de Guenoux, Jacques Le Roy
~~et ledictz Ducloux~~ disner assablement
en une taverne oudict bourg de Dommaigné
en laquelle ledict jeune enffent suyvict
ledict de Guenoux [*sic*] quel luy dist qu'il l'eust
actandu et l'eust servy a disner comme
l'un des serviteurs desdictz Jacques Le Roy
et le sieur Ducloux, ce que ledict jeune
enffent feist. Et apres s'en alla disner
avecques lesdictz serviteurs, quelz jamais
il ne avoit veuz auparavant ne avoir
eu aulcune congnoissance d'eulx.
Après lequel disner s'en allerent
dudict bourg les dessusdictz de Guenoux,
Le Roy et Ducloux et leursdictz serviteurs
a la maison du Plesseix ~~Roy~~ Raffray et
ledict jeune enffent avecques eulx. Auquel
lieu du Plesseix Raffray, iceluy jeune
enffent demanda audict Guenoux s'il
voulloit rien mander audict Louaisel
et qu'il s'en vouldoit aller et prendre
congié dudict de Guenoux, auquel ledict
de Guenoux dist qu'il s'en allast et
le recommandast audit Louaysel et qu'il
[98r] luy feroit acoustrer de brief lesdictes piecetes
de harnoys. Et sur tant, ledict jeune enffent
print congé dudict de Guenoux, et en passant

par la mestaerie dudict Plesseix Raffray,
l'un desdictz serviteurs nommé Artur et l'autre
serviteur dudict sieur Ducloux, duquel ledict
jeune enffent ne sçect le nom, se trouverent
en icelle mestaerie avecques ledict jeune
enffent et de la s'en vindrent en une
maison dont pareillement ne sçect ledict
jeune enffent le nom, situé assez loing
dudict bourg. Et en icelle, violement
et par force, lesdictz deux serviteurs dessus
nommez donnerent au maistre et sieur de ladicte
maison et a sa femme plusieurs coups sur
leur corps et membres, en faisans plusieurs
sermens et blaphemes que si ne leur
bailloint une arbaslestre et aucuns garotz
qu'ilz avoient en ladicte maison, il les feroient
plus couroucez qu'ilz furent onques, ou samblables
parolles. Et par forcent entrerent en
ladicte maison, en laquelle l'un desdictz
serviteurs audict jeune enffent incongneuz
print et aprehenda ledict maistre d'icelle
maison au collet et la bailla a garder
audict jeune enffent pendent qu'il chercheroit
[98v] quelque chose pour le lyer. Et de crainte
de ce, ledict maistre d'icelle maison
bailla lesdictz arballestre et garotz
audict incongnu, lequel juqueu apres
les avoir recouvertz, banda ladicte
arballestre et dist audit jeune
enffent qui luy convenoit aller avecq
luy et ledict Artur en une maison
situee en ung aultre villaige
illec pres estant, touzer la perrucque
a ung chicaneur nommé en sournom

Venisse, pour se vanger d'un desplaisir
que disoient lesdictz serviteurs dessus
nommez, ledict chicaneur leur avoict
faict, sans aultrement le luy desclerer.
A quoy se acorda ledict jeune enffent,
et a celle cause, se transporterent
les dessusdictz serviteurs et jeune
enffent assablement au devant de la maison
dudict chicaneur, quel ledict jeune enffent
jamais n'avoict congneu ne frequanté
en ladicte maison, l'huis de laquelle
ilz trouverent fermé. Et voyans
qu'il y avoit quelque gens en ladicte maison,
frapperent a l'huis d'icelle en demandant
que l'on leur eust dit ou estoict
le filz du sieur de ladicte maison, qu'ilz
[99r] appelloint « chicaneur », quelz eussent [*blanc*]
ledict huys, a quoy leur fut respondu
par aulcunes femmes y estantes que
ledict chicaneur n'estoit pas en ladicte
maison, et s'adressantes a l'un desdictz
incongneuz nommé Artur ainsi que l'on dit,
luy disdrent que l'on luy avoict faict
des rapports que ledict chicaneur devoit
avoir faictz plusieurs choses qui n'estoient
pas verictables, en le priant et suppliant
qu'il eust osté la malveillance qu'il
avoit contre ledict chicaneur et que elles
donnerent ung pot de vin de cinq soulz
ou plus pour s'en aller boire sans faire
aucun exceix en icelle maison, ce qu'ilz
refuserent et disdrent ausdictes femmes
plusieurs parolles injurieuses, tant d'elle
que dudict chicaneur, et lors hurterent

et donnerent plusieurs coups audict huys
de ladicte maison, faisans contenance de le
voulloir rompre avecques ung levier que
ledict jeune enffent alla querir a ung
pressouer par commandement de l'un desdictz
incongneuz qui pres de ladicte maison estoit.
Et en l'endroit s'aparut a la fenestre
d'une chambre haulte de ladicte maison
[99v] une femme audict jeune enffent ~~alla querir~~
~~a ung pressoir~~ incongneue, que l'on
dit estre seur dudict ~~ehin~~ chicaneur,
vers laquelle fenestre iceluy jeune enffent
qui avoit entre ses mains ladicte arbaslestre
bandee une vire dessus, sans avoir
touffoiz intencion de frapper ne
actaindre ladicte femme, mais pour
luy faire paour et la faire retirer
de ladicte fenestre, desbanda ladicte
arbalestre et tire contre le boys
de ladicte fenestre, l'esclat duquel
traict et vire donna en la teste
de ladicte femme et la percza et blecza
tellement que le lendemain ensuyvant,
elle alla de vie a deceix. Et ~~pour~~
pour myeulx par ledict servicteur incongneu
audit jeune enffent couvrir sa malice
et n'estre reprové et reprins
dudict cas comme est vroysemblable,
print ledict jeune enffent et le mena
prinonnier a la maison dudict Plessix
Raffray, ouquel lieu il a esté detenu
par quelque temps et depuis mené en
noz prinsons de Rennes, esquelles il est
a present. A l'occasion desquelz cas et

aussi que pendant que ledict jeune enffent
[100r] estoit detenu audict lieu du Plesseix Raffray,
iceluy jeune enffent se deslia des cordes
dont il estoit lié et saillit hors de ladicte
maison, se cuydant eschaper et fuyr dont
il fut en garde a raison qu'il fut en
l'heure poursuyvi et reprins et remené
audict Plesseix Raffray. Lesdictz supplians
doubtent que l'on veille contre luy proceder
a rigueur de justice si par nous ne luy
estoit sur ce pourveu. Nous supplians
lesdictz parens et amis dudict jeune enffent
qu'il nous plaise a ce avoir esgart, et
pour l'honneur du Saulveur et Redempteur
Jesu Crist auquel pa sa sainte grace il a pleu
souffrir mort et passion pour nous en
l'arbre de la croix a tel jour qu'il est
aujourduy, et en usant de pitié et
misericorde, impartir audict Jehan de La Couldre,
jeune enffent dessusdict, notz lettres de grace,
remission et pardon dudict cas, tres humblement
le nous requerant. Pour quoy nous, lesdictes
choses conciderees et mesmes en contemplacion
du benoist vendredi saint comme est que
nostre Saulveur et Redempteur Jesus Crist
voullut souffrir mort et passion en l'arbre
de la croix pour la redemption de l'humain
lignaige, et voullans misericorde
[100v] preferer a rigueur de justice, etc.,
la verifficacion adreesee au juge
de Rennes, etc. Pourveu touteffoiz
que ledict Jehan de La Couldre presentera en
sa personne cestes notz presentes grace,
remission et pardon aux prouchains

ou seconds plectz generaulx de nostre
court et barre de Rennes, devant noz
senneschal ou alloué d'icelle court, etc.

Donné a Nantes ou moys d'apvril
l'an de grace mil cinq cens vingt ung,
et de nostre regne l'huictiesme. Ainsi
signé : Par le roy et duc, a la relacion
du conseil, BEAUCOUCHE, *Visa*,
et sellee en laz de soye et cyre
vert.

N° 13. (77)

[100v] François, par la grace de Dieu roy de France duc de Bretagne, a touz presens et
advenir savoir faisons l'humble supplicacion des parens et amys consanguins de Pierre Martin
l'esné orfeuvre orginaire de nostre ville de Rennes et y demourant, avons receue, contenant
que environ demy an a et quequesoict puix dix moys derroins s'adressa (/) audit Martin a sa
maison et demourance ou pour lors il tenoit boutique d'orfeuvre en notredite ville, ung
nommé Jacques Alix luy demanda s'il voulloit achacter quelques petites bacques d'argent
cassé et fretin qu'il avoit, ce que voullut ledit Martin et les pecza en presence dudit Alix et
acorderent de pris a vingt troys soulz monnaie que luy bailla celuy Martin. Et dempuix oudit
mesmes jour apres quelque intervalle de temps, se drecza de rechieff celuy Alix audit Martin
et luy monstra ung calice cassé et bricéz qui estoit enveloppé en ung linge, quel celuy Martin
desveloppa ung peu pour regarder que c'estoit en sadite boutique. Et lors ledit Martin,
demanda audit Alix d'ou il estoict, quel Alix luy dist qu'il estoict tresorier et ellecteur d'une
parouesse nommee Pleumaugat, le mist en ung coffre et dempuix en sa chambre en absence
dudit Alix le trouva. Et a ceste cause, mist ledit Martin iceluy calice dedans ung coffre peczer
ung marc, deux onczes, ung gros, luy bailla ledit Martin dix phelipus d'or et convindrent
ensamble qui luy en porteroit (/) d'aultres. Et dempuix a temps ensuyvant, environ ung moys
apres, luy porta celuy Alix deux aultres calices cassez et briciez queulz furent trouvez peczer
par celuy Martin en absence dudit Alix deux marcs, troys onczes pour lesquelz bailla celuy
Martin audict Alix quinze livres monnaie. Et bailla celuy Martin audit Alix a quelqueffoiz par
apres dont n'est membre du jour quarente trezans et a dit et maintenu celuy Alix, que environ
seix sepmaines apres celuy voaige, il avoit baillé audict Martin quatre aultres calices quelz luy

porta en ung bissac et que celuy Martin ne les avoit peczez en sa presence mais que dempuix luy dist celuy Martin qu'ilz pesoient sept mars et qu'il ne luy avoit baillé argent pour lors. Mais dempuix, a quelque terme luy assigné, luy avoit baillé celuy Martin a valloir sur lesdits quatre calices vingt livres monnaie combien que ne les eut jamais celuy Martin et disant n'estre rememorant vroy, ainsi le a desluyé et y a tousjours persisté. Et a quelque jour apres (/) qui fut environ la nuyt de Noel derrener, retourna celuy Alix audit Martin et luy dist qu'il avoit apporté d'aultres calices et argent cassé et bricéz apres quoy, se trouva celuy Martin o ledit Alix ches ung nommé Robin Legonz tonnelier, demourant pres la porte des cordeliers dudit Rennes entrerent ceulx Alix et Martin en l'estable de la maison dudit Legonz. Et comme ilz estoint, demanda ledit Martin audit Alix qu'il luy eust monstré ce que luy avoit apporté, en l'endroit de quoy luy monstra celuy Alix troys aultres calices cassez et briczez, quelz regarda celuy Martin. Et se y trouva en l'endroit, ung homme quel dempuix celuy Martin a ouy nommer Jehan Maceet, en la presence duquel, ne tint celuy Martin propos desdits calices ains faignant de achacter ung cheval d'avecques celuy Alix. Et apres avoir visité ledit cheval estant en ladite estable appartenant audit Alix, dist celuy Martin audit Alix sortant (/) hors d'icelle estable que ce n'estoit pas son cas et qu'il luy en failloit ung aultre d'aultre sorte. Et sur ce, ceulx Alix et Martin alloint boyre ches ledit Legonz, demanda secrectement celuy Alix audit Martin s'il vouloit que celuy Maceet eust beu avecques eulx, a quoy luy respondit celuy Martin que non et qu'il ne leur failloyt pas de tesmoigns en leur affaires dissant qu'il ne vouloit que personne quelconque sceust que on luy aportast rien. Et bientost apres oudit mesmes jour, celuy Alix porta lesdits troys calices audit Martin a sadite boutique, quelz ne furent pour lors entreulx apreciez, les print celuy Martin dudit Alix et les porta en sa chambre disant audit Alix qu'il luy entendroit bon compte et que luy perdroit rien et ne luy feroict point de tort. Et sur ce, luy en bailla saeze livres, six soulz, huict deniers. Et les trouva peczer dempuix en absence dudit Alix troys mars, ung gros moins. Et dempuix tout ce, (/) iceulx Alix, Maceet et aultres ont esté prins et destenuz prinsonniers en notz prinsons de Dinan accusé d'avoir robbé des eglises faisant le proceix desquelz ont confessé avoir robbé lesdites choses des eglises et lieux saints et les avoir baillees audit Alix pour porter, vendre et distribuer. Lequel pareillement a confessé les avoir vandues et baillees audit Martin de la maniere cy-dessus recitee. A raison de quoy a esté celuy Martin prins et constitué prinsonnier par auctorité de nostre court de Rennes, dempuix conduyt et mené audit Dinan estre interrogé sur lesdits cas et affronté ausdits Alix et Maceet. Procedant a laquelle interrogacion et confrontation a confessé celuy Martin partie desdits ffaictz cy-dessus, savoir qu'il avoit eu lesdites pieczes d'argent cassé et fretin et six calices pas diverses ffoiz cassez et briczez de la

maniere cy-dessus et a nyé avoir eu lesdits quatre calices de la forme et maniere pretouchee et y a persité (/) et a affirmé celuy Martin avoir tousjours peczé lesdits seix calices cy-dessus, de luy confessez en presence dudit Alix et a la baillee d'iceulx. Et aussi a affermé celuy Martin ledit Alix luy avoir dit estre trezaurier ou collecteur de ladite paroasse qu'il nommoyt Pleumaugat. Nous remonstrant outre lesdits supplians, iceluy Martin estre jeune homme marié, bien famé et renommé et avoir esté tousjours de bon rest et gouvernement, hantant et frequantant gens de bien et d'honneur sans jamais avoir esté ataind ne convaincu d'aucun cas de malefice jucques a celuy de present et ledit Maceet a raison desdits malices avoir esté executé par justice. Et doubtent lesdits supplians que a raison desdits cas, on veille en rigueur de justice proceder vers celuy Martin qui leur reddevoyt a grant deshonneur, nous supplians qu'il nous plaise a tout ce que dessus avoir esgart en (/) contemplacion de la mort et passion que nostre sauveur Jesus-Christ souffrir en l'arbre de la croix mesmes que ledict Martin est ataignant mesmes de lignaige a plusieurs bons et notables personnaiges et qu'il entend et n'a a debapre de satiffaire aux parties conplaignentes interessees sanlcunes sont a esgart de justice et sur ce impartir a iceluy Martin, notz lettres de grace, remission et pardon tres humblement le nous requerant. Pourquoi nous lesdites choses considerees, voullans misericorde estre preferee a rigueur de justice, a nous donne grace espicial plaine puissance et auctorité souveraine pour l'honneur et en faveur mesmes et contemplacion de la mort et passion que nostre sauveur Jésus-Christ souffrict en l'arbre de la croix pour rachacter toute nature humaine, remis, quicté et pardonné etc, donné etc, la verifficacion a Rennes etc, pourveu touteffoiz que ledit Pierres presante en personne cestes notz presentz grace, remission et pardon aux prouchains ou seconds generaulx plectz de nostre court et barre de Rennes etc, (/) donné a Nantes ou moys d'apvril l'an de grace mil cinq cens vingt ung et de nostre regne l'huictiesme, ainsi signé par le roy et duc a la relacion du conseil () visa et sellee en laz de soye et cire vert.

N° 14. (78)

Remission de meurtre pour Jehan Croexelay commis en la personne de Phelipes Guerin dont la teneur ensuist :

[115r] François, etc, nous avoir receu l'humble suplication et requeste des femme, parens et amys consanguins de Jehan Croxelay²⁴ de la parroisse de Bleyn en la jurdiscion de Nantes, contenant que a ung jour de vendredi ou moys de decembre derrener, ledit Jehan Croxelay se trouva ou bourg dudit Blaign ches une femme nommee la Guerrine, demourante et tenante hostellerie oudit bourgc de Blain, en laquelle maison ledit Jehan Croxelay, François de Lenerac, Jehan Bebin, marchant (/) des parties de Guer, et ung jeune homme quel disoit estre serviteur d'un apoticaire de Nantes, quelz assemblement soupperent en ladite maison de ladite Guerine. Et comme ilz estoient ainsi (a) soupper, sourvindrent feu Phelipes Guerin, barbier, demourant audit bourgc de Blaign, et ung nommé Yvon Louigne dudit bourgc, entre lesquelz Croxelay, Guerin et Louigne sourvindrent aucunes parolles d'injures. Et sur ce faict, celuy Guerin s'en yssut hors ladite maison, portant touziours et disant parolles injurieuses ausdits nommez, les appellans villains angloys couez. Et apres que celuy Croxelay et autres eurent souppé, celuy Croxelay voullut aller a une sienne maison et mestairie nommee la Grassinaye, estante pres la forest du Gavre et assez pres dudit bourgc de Blain, pour aucuns ses affaires, et promist ausdits de Lenerac et serviteur dudit apoticaire, retourner celluy soir coucher avecques eulx en ladite maison d'icelle Guerine. Et ainsi que ledit Croxelay, lesdits de Lenerac et serviteur surdit sortirent hors ladite maison, tirans leur chemyn pour aller a la maison dudit Croxelay, estante oudit bourgc, pour avoir son cheval y estant, ledit Guerin se trouva au devant d'eulx en l'endroit de sa maison et demourance ayant une broche de fer en la main et s'efforcant aprocher desdits nommez pour les oultragez. Et ce voiant, lesdits nommez ruerent audit Guerin deux ou troys pierres qu'ilz trouverent illecques pres sur le pavé et contraignerent ledit Guerin de soy retourner a sa maison (/) de laquelle l'huys fut fermé. Et en continuant touziours lesdits nommez, leur propos allans et tenans leurdit chemyn pour aller a la maison dudit Croxelay prendre sondit cheval, pour icelluy Croxelay s'en aller audit lieu de la graffuaye ainsi qu'ilz furent arivez jucques au devant de la maison de Rolland Clouet demourant oudit bourgc. En l'endroit se rendit de recheff ledit Guerin au devant desdits nommez aiant touziours ladite broche en sa main et en sa compagnie estoit ledit Yvon Louigne qui avoit des pierres en ses mains et assemblement s'efforcèrent oultragez lesdits Croxelay et Leverac leurs disans pluseurs parolles injurieuses et leurs gectans pluseurs pierres a raison de quoy furent contrains, lesdits Croxelay et Leverac, s'enfuyr devers leurs maisons. Et incontinant, ledit Croxelay arivé a sadite maison, print sondit cheval et monta dessus et s'en

²⁴ Ce personnage était un gentilhomme de moyenne noblesse ; son père avait été un riche éleveur de bovins (Michel Nassiet, « L'inventaire d'un éleveur en Bretagne en 1516 », *Annales de Bretagne et des pays de l'Ouest*, 2007, t. 114, n° 2, p. 39-55).

alla a sadite mestairie de la graffuaye et vist que ledit suppliant s'en retournoit de sadite mestairie audit bourgc sans le soir d'icelluy jour environ neuf ou dix heures de nuyt, ayant son espee a son costé et une arbalaistre qu'il avoit prins en sadite mestairie, quelle bien souvent il avoit de coustume porter pour tirer au gibier et estoit lors ladite arbalaistre bandee. Et ainsi qu'il s'en retournoit ches ladite Guerine, comme il avoit promis ausdits Leverac et serviteur et passoit par ledit bourgc au devant de la maison dudit feu Phelipes Guerin, ledit Guerin quel pour lors estoit en sadite maison fort eschauffé de vin, (/) incontinant sortit hors ladite maison ayant en sa main une broche de fer et suyvit ledit Cropellay qui touzjours alloit son chemyn sans soy arrester dempuix la maison dudit Guerin jucques pres la maison mortier estante oudit bourg de Blaign distante de la maison dudit Guerin d'environ ung gect de pierre. Et illecques pour ce que ledit cheval estoit meschant et meigre et ne pouoit courir, et ledit Guerin qui estoit jeune, fort et deliberé courut et acoureur ledit Cropellay, et de ladite broche le frapa de plusieurs coups. Et voyant ledit Cropellay estre ainsi actaint et assayly par ledit Guerin, soudainement mist ung materaz barré de fer duquel il tiroit au gibier et destourna sondit cheval devers ledit Guerin et lascha ledit troict duquel il ataignit ledit Guerin, ainsi qu'il a ouy dire dempuix, au costé gausche de la teste dudit Guerin ne saichant lors ledit Croxelay ou il l'avoict actaint pour ce qu'il estoit nuyt. Et incontinant ledit Cropellay print chemyn a s'en aller a sa maison de la viollaye en ladite parroisse et le landemain dudit jour ouyt, ledit Cropellay, dire que a raison dudit coup celuy Guerin avoit perdu la parolle apres avoir esté confessé et que le dimanche ensuyvant ledit conflict, ledit Guerin a raison dudit coup de trect et bleceure, deffault de pencemens ou autrement estoit allé de vie a trespas. Et craignant rigueur de justice, s'est ledit Cropellay absenté dudit quartier de Blain et par icelle court de Blain ainsi qu'il luy est venu a cougnoissance (/) a esté aiourné et y a deffailly et la prise de corps commandee sur luy. Remonstrans lesdits supplians, que environ quinze jours auparavant ledit conflict, ledit Guerin estant en la maison de Rolland Clouet et avoit un baston de bois en sa main sortit de la maison dudit Clouet sur frere Guillaume de Leverce s'efforcant iceluy oultraigez disant par telles parolles : " ha ! par le sancg dieu ! villain moyne, je vous ay ! " et sur ce ledit Croxelay qui estoit present pour faire cesser ledit debat, tira son espee disant audit Guerin qu'il ne l'auroy pas encores et qu'il se retirast et qu'il ne luy souffriroit batre ledit mouenne qui estoit son cousin germain. Et lors ledit Guerin rentra en ladite maison dudit Clouet auquel ceulx mouenne et Cropellay dirent qu'il feust hors ladite maison sorti et bientost apres, se retirerent lesdits Leverac et Croxelay devers le cymetiere et l'eglise dudit lieu. Aussi remonstrent lesdits supplians, que ledit Guerin estoit yvroign continuel jureur et blaphemateur du nom de Dieu tan en vin, que hors vin, querelleux et

debatiff avecques toutes gens qu'il trouvoit sans cause ne raison bateur et de gens et entre autres avoit baptu sa mere plusieurs foiz, luy faict plusieurs exceix et forces et par sa paillarde et mauveix gouvernement, estoit devenu povre et avoit delaissé son mestier de barbier. Aussi remonstrent lesdits (/) supplians que ledit Croxelay est jeune gentilhomme appartenant de lignage a plusieurs bons personnaiges de ce pays et duché, de l'eage de environ vingt ans nouvellement et ung peu avant ledit conflict marié, se gouvernant et s'estoit auparavant touzjours troicté et gouverné honnestement sans jamais avoir esté reprints d'aucun mauveix cas disgne de reproche, nous supplians qu'il nous plaise a tout ce que dessus avoir regard et sur ce, impartir audit Cropellay, noz lettres de grace, remission et pardon tres humblement le nous requerant. Pourquoi, nous lesdites choses considérées etc, l'adrecx a Nantes. Donné a Nantes ou moys de may l'an de grace mil cinq cens vingt et deux et de nostre regne l'huictiesme, ainsi signé par le roy, duc a la relacion du conseil P. Texier et selle visa.

N° 15. (79)

Autre remission pour Thomas Moulmier dont pareil terme la teneur ensuist :

[117r] François, etc, presentes les verront, salut. Savoir faisons l'humble supplicacion des parens et amys consanguins de Thomas Moulmier, a present detenu prisonnier es prinsons du sieur d'Uzel estant soubz nostre barre et juridiscion de Ploermel, avons receue, contenant que le lundi de Pasques derroin, environ deux heures de nuyt, se trouverent ledit Moulmier et Jehanne Rolland sa femme ou bourgc d'Uzel en la maison ou lors exposoit vin en vente par mynu et detaill Mathurin Flocheau, et avecques eulx estoit a boaire en icelle maison ledit Flocheau et Mathurin Duboscq, et comme ilz beurent ensemble et devisans de leurs affaires et negoces survint illecques et ariva ung nommé Bernard Roudel, quel leur dist par telles parolles : " Messieurs, vous fetes bonne chere sur la baillee de la coustume de monseigneur ! ", en disant qu'il la mectoyt a doze livres. A quoy respondit ledit Moulmier qu'il n'estoyt pas receveur et qu'il n'avoit nulle puissance d'en faire aucune baillee, avizois que icelle coustume avoit esté baillé par le recepveur d'Uzel, nommé Mathurin Dieulangart sauff droit de bout audit Mathurin Duboscq. Et ledit Thomas Moulmier, ayant de ce cougnoissance, voullant avoir part et estre associé audit droit de coustume par aultant qu'elle demeureroit audit Duboscq, le pria qu'ilz feussent sur ce aller boaire pinte de vin ches ledit Flocheau, ce qu'ilz furent. Et ainsi troictant et devisant d'iceluy (/) affaire, sur ce survint iceluy Bernard Roudel comme dit est, qui s'efforczoit de cuyder avoir du vin sur ledit bout de doze livres que voullait faire de

ladite coustume comme dit est. Auquel Roudel fut dit qu'il n'auroit point sur ce de vin ne autrement s'il ne poyoit argent contant et sur ce eurent, lesdits Thomas Moulmier et Roudel parolles de rumeur rigoureusement ensemble et lors se leverent lesdits Moulmier et sadite femme de la table et aussi feist ledit Bernard qui print une chandellier ouquel y avoit une chandelle alumee qui leur faisoit clarté, et ledit Moulmier print ung petit couteau qu'il avoit a sa sainture, dont il avoit a coustume couper son pain, laquelle chandelle tout incontinant fut estaincte par ledit Bernard. Et ce faict, ledit Bernard Roudel s'aprocha desdits Moulmier et sadite femme ausquelz donna plusieurs coups et collees et dursement a ladite femme dudit Moulmier, tant et de telle sorte quelle fut quasi deux jours que l'on esperoit en elle que la mort et cryoit moult hault, lequel Thomas Moulmier oyant la clameur de sadite femme, ne voyant nulle clarté a l'occacion de l'estaincte de ladite chandelle se craygnant, voyant ce que dessus, et comme est a estimer que celuy Bernard Roudel leur vouloyt faire grant oultrance, se tira en la part d'icelle maison la ouyt le cry de sadite (/) femme et lors dudit cousteau frapa tout droit devant luy ne savant, ne cougnoissant a qui il donnoit, pour ce que n'y voyoit nullement et aussi qu'il estoit esmeu et eschauffé de l'oultraige que l'on faisoit a sadite femme. Et incontinant la chandelle alumee fut trouvé ledit Bernard Roudel en ung endroit de ladite place d'icelle maison pres de l'huys et ladite Jehanne femme dudit Moulmier en ung aultre endroit d'icelle place, qu'elle estoit tombee a terre. Et veit ledit Bernard lors qu'il saignoit a raison d'une playe quelle il avoit en l'endroit de la gorge et cryoit force sur ledit Moulmier. Et peu apres, ledit Bernard a raison d'iceluy coup de cousteau que celuy Thomas luy donna, alla de vie a deceix, lequel Bernard avoit le jour precedent qu'estoit le dimanche de Pasques comme bon catholicque esté confessé et receu le saint sacrement de l'autel. Et fut ledit Moulmier trouvé saesy par les gens illecques estans, quelz ne peult cougnoistre a raison qu'il estoit fort enbeu de vin, de deux coutteaulx quelz il avoit a sa sainture d'on l'un avoit ung pié blanc et estoit sanglant. Et furent gardez celle nuyctee et sa femme par plusieurs personnes en icelle maison jucques au landemain au matin, que les officiers dudit sr D'Uzel constituerent ledit Moulmier prinsonnier esdites prinsons et ne fut aucunement ladite Jehanne constituee en prinson a raison de la malladie et judisposcion de sa personne. Si nous remonstrent lesdits exposans que ledit Moulmier est povre homme vivant et gagnant sa vie seullement de son labour et marchandie honnestement entre les gens de bien, chargé de femme (/) et de troys ou quatre petiz enffans, sa mere, seurs et freres et aultre famille qu'il a. Aussi qu'il ne fut jamais reproché ne actussé d'aucun maulveix cas ains avoir touziours esté de bon rest et gouvernement tel tenu, dit, censé et réputé notoirement et publiquement jucques audit cas anczois qu'il a esté et est doulx, paisible et non querelleur, contencieux et entrepreneur de

noaises et debatz. Et que lors que ledit Moulmier fist ledit coup, il estoit tellement enbeu de vin qu'il avoit perdu le sens et entendement de raison et doubtent lesdits supplians que a raison dudit cas on veille en rigueur de justice proceder vers celuy Moulmier qu'il leur ceddrait a grant honte et deshonneur, nous suppliant qu'il nous plaise sur ce impartir audit Moulmier, noz lettres de grace, remission et pardon tres humblement le nous requerant. Pourquoi etc, l'adrece aux juges de Ploermel. Donné a Nantes ou moys de may l'an de grace mil cinq cens vingt deux et de nostre regne l'huictiesme ainsi signé par le roy, duc a la relacion du conseil Beaucouché et scellé visa.

N° 16. (80) 22 mai 1521

Le suppliant (le même que celui d'une lettre ultérieure, B 28, n° 17), a contraint une femme qu'il dit paillarde à avoir avec lui une relation sexuelle. Il a fait aussi de la fausse monnaie.

[121v] François, par la grace de Dieu roy de France, duc de Bretagne, a touz presens et advenir, savoir faisons, l'humble supplicacion des parens et amys consanguins de Guillaume Patin, de la parroisse de Saint George de Restenbault soubz nostre jurdiscion de Foulgeres, avons receue, contenant comme a ung jour des feriers de la feste de Pasques derroine a eu ung an, ledict Patin feust allé a l'eglise d'icelle parroisse pour estre au divin service et pour aucuns ses autres affaires qu'il avoit oudict bourg d'icelle eglise et parroisse. Et apres qu'il eut esté quelque peu de temps oudict bourg, se feust transporté en une piece de terre situee assez pres de la maison de Guillaume Rocher asyse oudict bourg, en laquelle piece de terre il trouva une nommee Gillecte Mignot, des parties de Normandie et ung nommé Bastien Gaudin, pour lors servicteur dudict Rocher, avec lesquelz ledict Patin devisa de pluseurs choses, apres quoy voullut et se offrit baiser ladicte Gillecte, ce que ladicte Gillecte reffuza.

Et a la resistance qu'elle fist en faisant ledict reffus, qu'elle pour lors ledict Patin tenoit au corps, cheurent ledict Patin et elle assemblent contre terre. Et apres qu'ilz furent ainsi cheuz, parlerent et deviserent ensemble de parolles persuasives procedantes dudict Patin d'avoir la compaignie charnelle de ladicte Gillecte, en devisant desquelles parolles sur quelques atouchemens impudiques que luy fist ledict Patin avecques [122r] les mains es lieux secrectz, s'escria celle Gillecte, disante qu'il la vouloit forcer, ce que n'entendoit ne vouloit faire ledict Patin ne avoir sadicte compaignie sans le consentement volontaire d'elle, quelle estoit lors et auparavant notoirement repputee paillarde. Et voiant ledict Patin ladicte clameur et resistance de ladicte Gillecte, regarda en la bourse de ladicte Gillecte et y print dix ou doze soulz, estimant la assubjecter et abstraindre a avoir sadicte compaignie charnelle et qu'il ne faisoit icelle prinse sur intencion de retenir lesdictz dix ou doze soulz, mais seulement a ladicte fin et de les rendre a ladicte Gillecte, ce que dempuis il a fait. Et que dempuis celle prinse et auparavant ladicte restitution, sur la complainte et dolliance que par ladicte Guillemecte fut faite aux officiers de nostredicte jurdiscion de Foulgeres d'icelle prinse que ledict Patin luy avoit faite desdictz dix soulz, quelle prinse elle dist et remonstra avoir esté oultre son gré et voulloir, enqueste fut par nostre court dudict Foulgeres apoinctee et dempuis, sur ledict cas, avoir esté ledict Patin ajourné a instance de nostre procureur de ladicte court, auquel ajournement il n'y avoit comparu ains y avoit deffailly, craignant et doubtant estre enprinsonné

~~dudict Patin~~, et sur ladicte defaille, avoir esté
la prinse de corps decrectee sur la personne dudict
Patin, lequel a present pour ledict cas est detenu
prinonnier es prinsons dudict Foulgeres a instance
de nostredict procureur d'icelle court, et ledict
[122v] Patin ainsi detenu, sur le demuncy et desadvou
qu'il faisoit dudict cas cy devant remonstré,
fut procedé vers luy a torture luy adjugee,
laquelle luy fut baillee estroictement et
par force de tourment et affliction que
souffrit ledict Patin en icelle torture, ledict Patin,
a la fin d'en estre osté et mis hors comme
est a presumer et vroysemblable, a l'interrogacion
qui luy fut faicte par nostre seneschal dudict Foulgeres,
present ledict procureur d'icelle, des cas cy apres,
confessa qu'il avoit aucunes foiz mis et employé
de la faulce monnaie et qu'il y avoit en ung petiz
coffre estant a sa maison deux ou troys cens
pieczes d'icelle faulce monnaie frappee en coign,
quelle il dist avoir eu et achaptee d'un
nommé Georges Poussart de la parroisse de
Ducze oudict pays de Normandie, dont il
poioit pour trante soulz de ladicte monnaie faulce, dix
soulz de bonne. Et que oultre, il confessa
que ou jour precedant l'execucion de ladicte torture,
luy et ung nommé dom Guillaume Chaudon de ladicte
parroisse, avoint faict conspiracion ensemble
de se transporter oudict bourgc de Saint George
pour parler avecques ung nommé Mellin, demourant
oudict bourgc, avecques lequel ledict Patin disoit
avoir quelque differant, et que ilz mectroint paine
d'apoincter ledict differant et que ledict Chaudon,
quel estoit notaire de court d'eglise, passeroit
ledict apointe. Et sollitairement luy et ledict Chaudon,

environ une heure de nuict, ledict Patin estant en pourpoint et chausses longues, une espee nue a son [123r] costé et enbastonné d'une picque, ariverent ou cymetiere de ladicte eglise et apres qu'ilz y furent arivez, que celuy Chaudon avecques des crochetz quelz il avoit avec soy, savoit crocheté la claveure de l'huy du chapitereau de ladicte eglise et avecques iceulx crochetz, ouvrit la claveure dudict huys, et que apres ladicte oupverture faicte, ilz avoint entré assemblement en icelle eglise, et lors qu'ilz y furent entrez, de crainte qu'ilz ne y feussent aperceuez qu'ilz avoint reffermé ledict huys et apres ce fait, ledit Patin et iceluy Chaudon, quelz facilement se voyoint conduyre par icelle eglise a raison de la clarté que la lune qui pour lors reluysoit, rendoit en icelle eglise, allerent au hault d'icelle eglise ou avoit une huge, la claveure de laquelle ledict Chaudon avoit oupverte et crocheteé avecques lesdictz crochectz et qu'ilz l'avoint trouvee plaine de laine, de laquelle laine ilz prindrent chacun une pochee et la departirent par entreulx le plus egalement qu'ilz peurent. Et que apres s'en estoit sortiz d'icelle eglise par ung huysset estant ou hault de ladice eglise, quelz ilz oupvirent et que ledict Patin s'en estoit allé a sa maison ou il demouroit, ou village de la Ramee en icelle parroisse, en laquelle sur ung plancher y estant, il avoit mis icelle laine et en toute dilligence s'en estoit retourné audict bourgc de Saint George ou ledict Chaudon l'actendoit oudict cymetiere. Et apres qu'il fut retourné oudict bourg que il et ledict [123v] Chaudon avoint avisé qu'il estoit convenable qu'ilz allassent boayre chés ung prestre oudict bourgc

demourant, nommé dom Yves Michon, quel avoit de bon cildre et dont volontairement et de bon courage il en donnoit a ceulx qui le alloint veoirs, et que deffaict ilz y estoit allez et avoit ledict Chaudon crocheté la claveure de l'huys de la maison dudict dom Yves, quelz ilz trouverent en sadicte maison, le quel leur y donna a boaire dudict cildre. Aussi qu'il avoit confessé que par force et oultre le gré d'une nommee Robine Lorez demourant en icelle parroisse de Saint George et neantmoins la resistance qu'elle avoit faict contre luy, il avoit eu sa compaignie charnelle. Aussi avoit confessé que quatre ou cinq ans a ou environ auparavant la feste du Sacre, se voyant souffreteux et nectessiteux d'argent, s'estoit promeu et deliberé en luy mesme de desrober la custode d'icelle eglise et parroisse, quelle estoit d'argent, laquelle il avoit veu mettre ou sacraire d'icelle eglise, et que deffait il s'estoit transporté en icelle eglise et par force avoit oupvert l'huysset dudict sacraire ouquel il avoit trouvé ladicte custode, quelle il avoit prinse et oupverte et d'icelle avoit lessé tomber et cheoirs la sainte hostie sacree estante en ladicte custode envelopee en des corporaulx estans en icelle custode, quelle custode il avoit [124r] emportee en la latitant et cachant a ce que elle ne luy feust aperceue et qu'il ne s'estoit depuis descouvert de ladicte prinse d'icelle custode fors a ung nommé Hellouyn auquel il avoit decleré avoir faict la prinse d'icelle custode qu'il convenoyt que celuy Hellouyn la eust porté, vendre ou changer, ce que celuy Hellouyn luy

acorda et luy avoit baillé celuy Hellouyn celle
custode. Et que deux ou troys moys apres,
ledict Hellouyn luy paia la somme de quarante
livres pour sa porcion de la vente d'icelle
custode, quelle custode il avoit depuis despencee.
Aussi que il avoit confessé que de nuict
il s'estoit transporté oudict villaige de la
Ramee, au devant de la maison de Jehan Patin
son oncle, et lors qu'il fut, appella sondict
oncle, luy demandant oupvrir sondict huys,
quel alors estoit fermé et que il luy eust païé
de l'argent, quel il disoit sondict oncle luy
devoir, quelle ouverture sondict oncle avoit
refusé faire, et voyant que sondict oncle avoit
esté reffussant de luy oupvrir ladicte maison,
quel avoit mis le feu en la coupverture d'icelle
maison quelle estoit couverte de paille, quel
feu deux femmes qui illec survindrent avoient
estainct sans ce que y eust endommaigement en
icelle coupverture. Aussi qu'il avoit confessé
qu'il s'estoit transporté oudict pays de Normandie
en la maison d'une nommee Jehanne Rouczin en
la parroisse de la Chapelle Hamelin et que
aupres du feu estant en icelle maison, il
[124v] il [*sic*] avoit trouvé une petite potee de chair a cuyre,
quelle il avoit jectee contre terre et que depuis
il en avoit fait composition avecques ladicte Jehanne
a la somme de huict deniers. Et aussi qu'il avoit
pris par aucunes foiz des poullaies en passant
par les villages dont depuis il n'avoit
fait restitution. Si nous remonstrent
oultre lesdictz exposans, combien que ledict Patin
ayt confessé avoir iceulx cas commis, que telle
quelle confession qu'il a faite a esté forcee

par craction, afflection et torment de torture,
et que icelle telle quelle confession, comme est
vroysemblable, ne a esté seullement fors pour
estre reiecté et mis hors d'icelle ~~torture~~
tourment et torture, davantaige que ledict Patin
ne commist jamais iceulx cas, ains que il en
est pur innocent, et en bien demonstrant
que icelle telle quelle confession ne luy doit en
riens prejudicer et ne doit estre troitable
a consequence contre luy. Est il que auparavant
la judicacion et execucion de ladicte torture,
quelle luy a esté donnee et executee par deux
foiz, et aussi ladicte confession de luy faicte,
il ne y avoit eu enqueste faicte, presumptions
ne indices notoritez ne commune renommee contre
ledict Patin d'avoir iceulx cas commis, ne iceluy
prins a faict present, combien que dempuix icelle
confession il soit s'aparvenu quelque indices
et presumptions touchant lesdictz cas contre
ledict Patin, quelle indices, par droit et raison
[125r] ne doyyent vallidez et coroborez les precedentes
confessions et tortures. Aussi nous remonstrent
que dempuix ce, a l'interrogacion qui fut faicte audict
Patin au lieu ou est assyse ladicte torture, il
avoit par treneur et crainte de ladicte torture,
combien qu'il ne luy eust esté faict presentacion
d'icelle, insisté esdictes confessions, craignant,
comme est a presumer ou deffault de insistez
en celle estre remis en ladicte torture et
tourment, fors que il avoit par icelle derreniere
confession, dit et confessé que le paiement qu'il
avoit receu dudict Hellouyn de ladicte custode
avoit esté par pluseurs et reiterees foyz et
que ledict paiement avoit esté en partie faict

par iceluy Hellouyn en despences, quelle luy et ledict Hellouyn avoint faict en tavernes. Quelle confession n'est conforme es precedantes, ainsi par ce moyen est veu estre et vroysemblable que lesdictes confessions avoint esté par force, tourment et par la dolleur qu'il souffrit en icelle torture. Et aussi en bien demonstrant que ledict Patin jamais ne feist le desrobement de ladicte custode, il avoit confessé par sadicte confession que ladicte hostie estante en ladicte custode estoit envelopee en corporaulx, quel il disoit estre en icelle custode, ce que n'estoit avec reverance vroy, pourtant que ladicte custode n'estoit si grande que en icelle il eust peu corporaulx. Et auparavant, ne dempuix ladicte [125v] detempcion dudict Patin, n'avoir esté aucunement dudict cas suspectzonné par notorité, presumptions ne autres indices, et en veult croire la notorité et commun dit des parroissiens d'icelle parroisse et en soustenir proceix ordinaire et s'en deffendre contre ledict procureur et parroissiens ou cas que acusacion ordinaire ilz en voudroint faire contre luy. Si nous remonstrent lesdictz exposans que ledict Patin ne commist jamais cas, fors ledict cas cy devant exposé touchant ladicte Gillecte Mignot et la prinse desdictz dix ou doze soulz en la bource d'icelle Gillecte, quelz dempuix il luy a restituez et dont elle ne luy faict aucune demande, jaczait lesdictes confessions qu'il ayt faictes cy dessus des autres cas de quoy il estoit interrogé en ladicte torture et tourment d'icelle, quelz ne furent avec reverances jamais vroitz, ains n'estoit que pour touzjours obvier a souffrir l'angoisse et doullueur de ladicte

torture. Nous suppliant lesdictz supplians
qu'il nous plaise, actendu que ledict Patin qui
est de bonne extraction, n'avoit jamais esté
auparavant actainct ne convaincu d'aucun cas
criminel ains s'estoyt bien regy et gouverné, vivant
et s'entretenant honnestement, luy, sa femme et grant
nombre de petiz enffans dont il est chargé,
impartir audict Patin d'iceluy cas, noz lettres de grace,
remission et pardon, tres humblement le nous
requerant. Pour quoy, etc, l'adrecze aux juges
[126r] de [blanc]. Donné a Nantes ou moys de
de [sic] may l'an de grace mil cinq cens vingt deux,
et de nostre regne l'huictiesme. Ainsi signé :
Par le roy, duc, a la relacion du conseil, MANDART,
et seellee en laz de soye et cire verd, *Visa*.

N° 17. (81)

Remission de lareucins pour Olivier Le Marchadour dont la teneur ensuyst :

François, par la grace de Dieu roy de France duc de Bretagne, savoir faisons a touz presens et
advenir nous avoir receu l'humble supplicacion et requeste nous faicte de la partie des parens
et amys consanguins de Olivier Le Marchadour, povre homme de labour natiff de la
parroisse de Ploeunez-Quintin soubz nostre juridiscion du ressort de Gouelle, a present
detenu prinsonnier es chartres de la court de Rostienen a Ploeunez-Quintin, inferieure barre (/)
dudit ressort, contenant que ledit Marchadour fut en premieres nopces marié puix vingt ans
derroins a Jehanne Pasquiou, fille de feuz Jehan Pasquiou et sa femme, demourantz en la
parroisse de Ploelan soubz nostre court de Ploermel, laquelle Jehanne Pasquiou decebda
environ cinq ans a, en relessant deux povres enffans myneurs et orphelins, savoir filz et fille
de sondit mary procreez en elle. Et apres le decebeix d'icelle femme, pour ce que ledit detenu
sondit mary n'avoit eu ne recouvert la porcion qui apartenoit a icelle sa feue femme et a
sesdits povres enffans, de la succession desdits Jehan Pasquiou et sa femme, pere et mere de
ladite Jehanne Pasquiou, mere d'iceulx enffans, ledit Marchadour, leur pere et garde naturel,

par pluseurffoiz fist requeste a Guillaume Pasquiou, frere de ladite feue, et quel Guillaume estoit demouré sur la possession des biens desdites successions, de luy bailler et fournir la part et porcion que apartenoit a sesdits enffans en icelles, ce que differa et refussa faire ledit Guillaume Pasquiou. Est-il aussi que puix le decebeix de sadite femme, comme ledit Marchadour eust fiancé une aultre femme de nostre ville de Redon nommee Jehanne Jehan, avec eust eu aucun proceix vers elle en cause de mariage et promis l'espouser, advint pour iceluy Marchadour se veoit en sentence d'excommune, a instance de Olivier Queré et Yvon Daniel pour quelque doibte et ne l'eust peu licitement espouzer, combien qu'il et elle eussent dit et fainct estre espouzez, l'eust celle Jehanne suyvy jucq et en (/) ladite parroisse de Ploeunez-Quintin. Et que environ dix ou quinze jours prochains ensuyvantz la foaire de Noyal derreniere, ledit detenu, considerant estre en nectessité telle qu'il ne se pouoit liberer de ses doibtes et se faire absouldre avecque ledit Guillaume Pasquiou, ne luy bailloit ce que a luy et a ses enffans apartenoit a cause desdites successions, fut meu et provocqué de prendre aucunes jumens que tenoit ledit Pasquiou, pour valloir sur et en ce que a il et sesdits enffans pouoit et devoit compecter et appartenir esdites successions, et pria ung nommé Rolland Rogean pres de Peuret, et ung autre qui est du terrouer de Rieux, de prendre et saesir une jument qui estoit entre et parmy les jumans dudit Pasquiou, et la luy mener, et deffaict la luy amena, indesceu et sans le congé d'icelluy Pasquiou, vallant icelle jument environ cent soulz monnaie. Et depuis ledit Pasquiou fist pourchatz et fuylte apres ledit detenu pour le recouvrement de ladite jument en maniere que le detenu la luy randit. Mesmes que ou moys d'aougst derroin, ung nommé Jouan Lanvaux bailla et livra audit detenu deux jumens qu'il avoit enblees sur ung nommé Guillaume Le Tallec, de ladite parroisse de Ploeunez-Quintin, quel detenu combien qu'il doubtast que celles jumens estoient enblees, pour ce que ledit (/) Lanvaux estoit renommé larron notairement, print icelles jumens et les amena es parties dudit Reddon ou il en vandit une pour la somme de quatre livres a ung homme a eulx incougneu, en la poterie de Rieux, et l'autre jument mena et conduysit juc audit Redon ou il alloit veoir ladite Jehanne Jehan, fiancee en secondes nopces comme dit est, qui lors y estoit, et illec ouyt par aucuns que on le poursuyvoit a cause de la prinse desdites jumantz. Sur quoy il print chemyn a s'en retourner es parties de sadite demourance en intencion de randre ladite aultre jument et en composer o ledit Tallec. Et comme il feust arivé ou bourgc de Serent, y trouva ung nommé Guillaume Jegou et Guillaume Le Bartz quelz luy dirent que ledit Tallec avoit esté illec suyvant lesdites jumens quelz disoient ledit Marchadour avoir enblees, et sur ce en une maison oudit bourgc s'ourdirent entreulx parolles de noaise et tel bruyt et scandal que les officiers de justice du sr de Moullac oudit Serent firent savoir arrest sur ladite jument en la maison d'un nommé

Chefeant. Et sur ce ariva o eulx ledit Guillaume Tallec, qui absent ledit detenu, recouvra ladite jument. Et dempuix ledit detenu et Tallec ont composé et apointé ensemble sur et touchant (/) ledit fait. Toutesvoyes est-il que a l'occasion desdits cas, les officiers de la court de Rostienen a Ploeunez-Quintin ont sur et a cause d'iceulx constitué ledit Marchadour prisonnier comme dit est. Remonstrans outre lesdits parens et amys qu'il est assez jeune homme, eagé d'environ quinze ans, qui auparavant lesdits faitz par luy commis, avoit vesqucz s'estoit gouverné en homme de bien sellon son estat et condicion, hantant et frequentant les eglises, foaires, marcyez et aultres bonnes compaignies, mais qu'ilz doubtent que ce neantmoins, on veille proceder vers luy a rigueur de justice et pugnicion corporelle a cause desdits cas si par nous ne luy en sont imparties noz grace, remission et pardon tres humblement ce nous requerans lesdits parens et amys. Pourquoi etc, l'adrecze aux juges du ressort de Gouelle. Donné a Nantes ou de may l'an grace mil cinq cens vingt deux et de nostre regne l'huictiesme, ainsi signé par le roy, duc a la relacion du conseil Derien et scellee visa.

N° 18. (82), f° 133 v°-136

Remission de meudre pour Jehan Gleyan dont la teneur ensuyst :

François, etc, a touz presens et advenir, savoir faisons l'humble supplicacion des parens consanguins et amys de nostre povvre subject Jehan Glevian²⁵, bon marinier et pescheur, de la parroisse de Pihiriac²⁶, en l'evesché de Nantes, que feu dom Pierres Oustin, prebre de ladite parroisse, et ledit suppliant estoit demourans ou bourg de ladite parroisse et leurs maisons s'entre habitantes, fors ung mur de pierre qui est entre deux, quel dom Pierres estoit suspect de hanter et avoir habitacion d'une femme marié de ladite parroisse nommee [blanc]. Pour savoir la verité de quoy, ledit Jehan Glevian, quel estoit son voysin comme dit est, se print garde s'il verroit point ladite femme ches ledit dom Pierres. Est il que puis ung moys derrenier, a ung jour de dimanche, ledit Glevian estant en sadite maison, sortit hors icelle maison et regarda par dessus la muraille estante entre sadite maison et celle dudit dom Pierres et ou jardin derriere d'icelle, et ledit dom Pierres a terre l'un avecque l'autre. Et sur ce, ledit

²⁵ Sans doute Jean Glévyou ou Glévyo, qui apparaît vers 1540 dans une déclaration, faite au seigneur de Campsillon, de biens soumis à 18 sols 3 deniers de rentes, payés en partie avec d'autres débirentiers, dont une maison à Kerguynio (Alain Gallicé, « Le meurtre du prêtre Pierre Oustin, à Piriac, en mai 1522 », *Les cahiers du pays de Guérande*, n° 42, 2002, p. 57-60).

²⁶ Piriac (Alain Gallicé, *Guérande et le pays guérandais du milieu du XIV^e au milieu du XVI^e siècle*, thèse, dactyl., univ. Brest, 2000).

Glevian gecta deux petites pierres audit prebre tandant le faire cesser et evader son peché²⁷ : « Ha ! maistre prebre, fault il que vous facez cella ! » En hayne de quoy, oudit mesmes jour, sur le soir d'icelluy, environ nuyt clouante, ledit dom Pierres ayant une espee en (/) sa main, guecta et garda ledit Glevian qu'il venoyt a sa maison et qui passoit par devant l'huys dudit dom Pierres et luy rua pluseurs coups de ladite espee. Et ce voyant, ledit Glevian print son bonnet en sa main, et d'iceluy receut ung coup duquel fut tranché ledit bonnet. Et ce craignant d'estre en plus large oultragé, celuy Glevian se mist en fuylte et ledit dom Pierres le suyvant, tellement que celuy Glevian fut contrainct, pour evader a la fureur dudit dom Pierres, monter en ung arbre qu'il trouva. Et le landemain dudit jour a plus matin, ledit suppliant s'en alla a la mer pour pescher ainsi qu'il avoit de coustume. Et ainsi qu'il estoit a pescher avecques pluseurs pescheurs, ses voysins et autres de ladite parroisse, sur quelques divises et parolles qui entreulx sourdit, ledit suppliant dist et racompta a sesdits compaignons comme il avoit trouvé ledit dom Pierres Oustin ayant habitacion avecque ladite femme, et comme en hayne de ce, ledit dom Pierres s'estoit efforcé l'oultragez. Et nous remonstrent lesdits suppliants que le dimanche de [blanc], jour de may derroin, ledit Glevian et autres estans retourner de pescher et estans oudit bourg dudit Pihiriac, aucuns des autres pescheurs et mariniers en tenoint propos a leurs voysins, de sorte que en vint a la congnoissance et a reprouche audit dom Pierres de ce que ledit Glevian l'avoit trouvé avecque ladite femme et qu'il n'estoit pas desent que il ainsi le feist. En hayne de ce, ledit dom Pierres donna pluseurs menaces audit Glevian et dist a la mere dudit Glevian qu'il s'en repentiroit. Et apres que ledit Glevian et autres eurent ouy la messe oudit (/) oudit (sic) bourgc, s'en allerent a la taverne disgner et faire quelques comptes qu'ilz avoint entreulx a faire²⁸, ou ledit Glevian se eschauffa fort de vin. Et apres qu'il s'en fut retourné a sadite maison, trouva sa mere quel luy dist que ledit dom Pierres luy feroit quelque malvese tour, a raison et en hayne qu'il avoit parlé de luy et de ladite femme, et le tencza fort d'en avoir parlé. Et ce voyant ledit Glevian qui avoit fort beu, esmeu et eschauffé tant a raison des blames de sadite mere que de l'oultrance que luy avoit fait ledit Oustin, sortit hors de ladite maison, et ainsi qu'il fut hors d'icelle, il vyt ledit dom Pierres et autres gens en sa compaignie. Et ledit Glevian, voyant que ledit dom Pierres le guectoit pour l'oultrager a raison desdites menaces comme est a presumer et qu'il luy eust faict quelque

²⁷ Ce mot est employé deux fois dans cette lettre, mais c'est la seule lettre de rémission de ce registre où il apparaît. Avec l'interjection qui suit, il exprime la demande selon laquelle les membres du clergé devaient mener une vie conforme à leur engagement religieux. Cette demande était conforme aux statuts synodaux du diocèse de Nantes en 1479 qui interdisait aux clercs la fréquentation des femmes « suspectes » (Travers, *Histoire civile, politique et religieuse de la ville et du comté de Nantes*, t. 2, 1837, p. 171).

²⁸ Sans doute une sorte de partage du produit de la pêche.

desplaisir et donné le premier coup comme il avoict faict le dimanche auparavant, print ung baston de boays de la longueur d'environ deux ou troys piez pour resister audit dom Pierres. Et il reduisant a son memoire qu'il avoit esté outragé, le dimanche paravant dudit dom Pierres, lequel estoit plus puissant que luy, et craignant que aultant luy en eust faict, estant enboyté et eschauffé de vin, marchant devers ledit dom Pierres, et luy donna ung coup dudit baston sur l'un des costez de sa teste, duquel coup tomba ledit dom Pierres a terre. Et incontinant fut ledit Glevian, par les autres gens estans avecque ledit dom Pierres, (/) prins, et luy osté ledit baston. Et incontinant s'en retourna ledit Glevian a sadite maison et se coucha en son lict sans songer audit coup ne que pensast luy acoir faict guerres de mal. Et ledit dom Pierres par lesdits assistans fut relevé et s'en alla pareillement a sadite maison, pluseurs autres avecque luy, et envoya querrir ung barbier pour le pancer, lequel venu, veyt l'endroit dudit coup ou il ne paroissoit que bien peu de fracture de cuyr comme faict d'une ongle et esgraigneure d'espille, treny et murdry a l'environ, et n'y feist celuy barbier aucune chose ne pansement qui voulseist riens. Et celuy soir se trouva fort mallade ledit dom Pierres. Et le landemain fut iceluy Glevian qui ne pansoit avoir mal faict, constitué prinsonnier et mené en noz prinsons de Guerrande. Et dempuis a ouy dire que dedans vingt quatre heures apres ledit coup, ledit dom Pierres, par deffault de pancement ou autrement, alla de vie a trespas. Aussi nous remonstrent que ledit feu dom Pierres Outin estoit par aucuneffoiz subject a une maladie que on appelle expileucie ou le mal Saint-Jehan, dont il tomboit, et peult estre que ladite maladie luy seroit cause de sa mort. Ou aussi presument lesdits supplians que se auroit esté par le deffault du pancement dudit barbier a raison que la femme que ledit Glevian dit avoir veue o ledit dom Pierres et qu'il la gouvernoit est sœur germaine dudit bar[bier]. Pourquoy il eust peu avoir, et est a presumer qu'il avoit vouldoir et eust esté plus content de la fin dudit dom Pierres que de la continuacion (/) du peché, scandal et diffame de sa seur qu'il luy redondoit, et a ses enffans grant deshonneur. Et ainsi que on dit, si ledit deffunct eust esté bien pancé, jamais a raison dudit coup ne fut mort. Et estoit ledit dom Pierres grand scandaleux, putacier, et par sa mauveise paillardise et obtinée luxure, avoit substroit filles et femmes de bien et de gens de bien de ladite parroisse, et leur faict et engendré enffans. Et a raison de ce, lesdites filles et femmes ont perdu leurs mariages et avantaiges, et notoirement diffamées et par luy subornées, sans avoir blames que de luy, et a cause de ce, il a mys de gens de bien en danger de faire quelques meurtres sur luy, lesdites femmes ou leurs parans. Davantaige nous remonstrent lesdits supplians que ledit Glevian est jeune homme fort et puissant, de l'eage de vignt quatre ans ou environ, bon et savant marinier qu'est pour seans a la chose publique, doux et paisible, sans jamais auparavant avoir eu debat, question ne querelle

avecque ledit prestre ne autres, et n'avoir eu jamais mauveix nom, reprins ne actusé d'aucun mauveix cas de reproche, bien vivant de sondit mestier et nourrissant sadite mere qui est veuffve de longc temps et pouvre femme, et ses freres et sœurs. Et doubtent lesdits exposans que, a l'occasion dudit cas, on veille vers ledit Glevian, qu'est encore a present detenu prinsonnier en nosdites prinsons dudit Guerande, en breff temps, (/) a proceder a toute rigueur de justice, nous suppliant qu'il nous plaise a tout ce que dessus avoir esgard et sur ce impartir audit Glevian noz lettres de grace, remission et pardon et tres humblement le nous requerrant. Pourquoi etc, l'adrece aux juges de [blanc].

Donné a Nantes ou moys de juing l'an de grace mil cinq cens vingt deux et de nostre regne huictiesme, ainsi signé par le roy, duc, a la relacion du conseil, Beaucouche, *visa*, et seellée en laz de soye et cire verd.

N° 19. (83)

Une frèrèche composée de deux frères ayant épousé deux sœurs exploite un domaine congéable.

Remission de meurtre pour Jacob Le Fresne et Jehanne Drouallen sa femme dont la teneur ensuyst :

François, par la grace de Dieu roy de France et duc de Bretagne, a touz presens et advenir savoir faisons l'humble supplicacion des parens et amys consanguins de Jacob Le Fresne et Jehanne Drouallen sa femme du village de Quenquisthuellen en la parroisse de Ploekerel soubz nostre barre et juridiscion de Henbond, avons receue, contenant que le lundi septiesme jour d'octobre derroin, environ quatre ou cinq heures apres medi dudit jour, sur ce que ladite Jehanne Daouallen, quelle estoit grosse et ensaincte, voullut mettre deux beuffz et troys ou quatre aultres bestes a corne en ung parc nommé le parc du vieulx four des appartenant ou demeuroint et que tenoient lesdits Jacob Le Fresne et sadite femme et Jehan Le Fresne frere germain dudit Jacob et feue Marie Drouallen femme espouze dudit Jehan Du Fresne, qu'elle estoit sœur germaine de ladite Jehanne es appartenant (/) dudit village comme coulons et convenanciers de Marc Kerle et damoiselle Katherine Torueunne sa femme et compaigne sr et damme de Taousilit et de Coetbuzoul en leur sry dudit Coetbuzoual, ladite feue Marie impescha ladite Jehanne de y mettre lesdites bestes oudit parc, et de oupvrir la claye d'iceluy. Et ce voyant, ladite Jehanne print et tira d'une haye qui estoit sur ledit parc ung peu d'espine blanche et dudit pau s'efforcza de desmolir partie du fossé dudit parc pour y cuyder mettre lesdites bestes. En l'endroit et ou debat de ce, lesdites Jehanne Drouallen et ladite Marie

Drouallen s'entre enpoignerent l'un l'autre criant a haulte voix, auquel cry ledit Jacob Le Fresne qui estoit a son labour es appartenant dudit village alla tout courrant et les trouva escheffvellés s'entre baptans. Et a son arivee, trouva ledit pau d'espine et comme esmeu voyant oultrager sadite femme, quelle estoit grosse d'enffant comme dit est, frapa ung seul coup dudit pau ladite feue Marie sur le coul et en la tepte en forme que elle cheut a terre et incontinant ariva ledit Jehan Le Fresne, quel et ledit Jacob et sadite femme eurent parolles noaisseuses et iceluy Jehan voyant sadite femme a terre, quelle fut relevee par Jehanne Toz mere desdites Jehanne et feue (sic) Marie Drouallen, commanca a crier et il et ladite Jehanne Drouallen s'entre noaysant durant que l'on conduisoit ladite feue Marie (/) Drouallen a la maison, allerent au manoir dudit Coetbuzoual faire complaincte et remonstrance de leur debatz a ladite damoiselle Katherine de Torueunne quelle et partie de ses gens y estoit lors nouvellement aripvez du quartier de Leon. Et apres ladite Marie avoir esté menee a la maison ou elle et sondit feu mary demouroit oudit village, aperceut ledit Jacob que celle Marie estoit en danger de mort a raison dudit coup. Et a ceste cause s'en absentit et fist a ladite Jehanne Drouallen sa femme aussi se absentir dudit village, doubtant que les officiers de justice de Coetbuzoual ne les eussent faict prandre et saesir de corps. Et quelle feue Marie fut mallade des celuy jour sans pouoir gueres parler jucques au mercredi lors prochain ensuyvant qui estoit le jour et feste de Sainct-Denis, auquel jour par deffault de bon gouvernement, pancement ou autrement alla de vie a trespas. Au moyen duquel cas, lesdits Jacob Le Fresne et sadite femme quelz estoit et sont pouvres gens vivans de leur labour et travail comme coulons et convenanciers se sont oncques puis renduz fuytiffz. Si nous remonstrent lesdits supplians que lesdits Jacob et sa femme sont jeunes gens de l'eage (/) d'environ quarante ans, aiant a present charge de cinq enffans myneurs de leurs parens quelz leur est requis nourrir et entretenir a cause delaquelle, leursdites absences a esté vers eulx obtenu sur ledit cas, pluseurs deffailles tant a instance du procureur de ladite court dudit Coetbuzoual que dudit Jehan Le Fresne en son nom et garde naturel de ses enffans tandant par deffault de les pouoir les mectre a forban. Et quelz Jacob Le Fresne et sadite femme auparavant le cas advenu, estoit tenuz, censez et reputez gens de honneste vie, de bonne conversacion, bons mesnagiers et vivantz eulx et leurs enffans honnestement, payans les rentes et fouaiges comme les aultres (?) de ladite parroisse, sans jamais avoir esté actusez, actains ne convaincuiz d'aucun villain cas, blasme ne reproche, nous suppliant qu'il nous plaise a tout ce que dessus avoir esgard et a la pouvreté desdits myneurs, actendu que lesdits Jacob et sa femme avoient auparavant preconseu hayne contre ladite feue Marie et sur ce impartir ausdits Jacob et sadite femme noz grace, remission et pardon dudit cas tres humblement le nous requerant. Pourquoi etc,

l'adreix aux juges de Henbond. Donné a Nantes ou moys de juing l'an de grace mil cinq cens vingt deux et de nostre regne l'huictiesme, ainsi signé par le roy a la relacion du conseil Beaucouché et sellé.

N° 20. (84)

François, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble supplicacion des parens et amys consanguins de nostre pouvre subject Henry Houyete, de la parroisse de Marcillé-Roul en nostre juridiscion de Basoges, contenant comme ou moys d'aougst derrener, ledit Houyete se feust transporté en une piece de pré nommé le Pré (/) dessus les isles, a luy appartenant, situé en ladite parroisse, assez pres du moustier dudit Marcillé, esperant ayder a François et Georges Houyete ses enffans et une nommee Guillemecte Fouellez de ladite parroisse qui estoit lors a fannez l'herbe dudit pré. Et apres avoir esté ledit Henry, en icelle piece de pré quelque espacze de temps, se départit d'icelle et print chemin a s'en retourner au lieu du Plessix appartenant a Guillaume Du Chastellier, duquel ledit Henry Houyete estoit methaier en iceluy lieu, estant en icelle paroesse de Marceille-Roul. Et ainsi s'en allant, et luy estant en ung grant chemyn par lequel l'on va dudit Marceille en nostre ville de Rennes qui estoit le droit chemyn pour s'en retourner dudit pré audit lieu du Plessix, rencontra en icelluy grant chemyn assez pres dudit pré ung nommé dom Guillaume Barbeurre, pbreste, lequel souventeffoiz hantoit et frequantoit en ladite paroesse de Marceillé, venant et marchant vers Hery Houyete. Quel dom Guillaume Barbeurre auparavant avoit consceu hayne et donné pluseurs menaces audit Henry Houyete de le oultrager et mettre a mort lors qui trouveroit opportunité. Tant a raison que ledit Henry Houyete comme l'un des amys et bien voullans dudit Barbeurre luy avoit par pluseurffoiz remonstré qu'il estoit entaché et macullé de pluseurs vices, savoir de paillardies, yvroingneries, blapheme et d'aultre mauveix gouvernement de sa personne, (/) affin qu'il eust a s'en corriger, a cause que ledit Barbeurre estoit l'un des pbrestes et chappellains frequentans en ladite parroisse de Marceille dont ledit Henry Houyete estoit parroessien. Et apres que ledit Henry eut oudit chemyn ainsi rencontré ledit Barbeurre et soy voyant estre seul de compaignie et que ledit Barbeurre estoit pareillement seul, celui Henry soy craignant et doubtant que ledit Barbeurre qui estoit jeune homme puissant de corps et disposé et d'environ l'eage de trante ans, plus fort et plus puissant que ledit Henry qui est viel et ancien homme de l'eage d'environ soixante ans, iceluy Henry qui n'avoit aucun baston n'ayant cougnoissance

que ledit Barbeurre feust sans baston soubz sa robbe et qu'il n'eust aucun espee ou poignart soubz sa robbe ou autre ferrement pourtant qu'il avoit de coustume d'en porter et en faire plusieurs exceix. Aussi qu'il n'eust oultrage ainsi que par avant il s'estoit venté et que celuy Henry pour ce eviter s'il pouoit facilement se desvoyer dudit chemyn et aussi que si ledit Barbeurre l'eust aperceu fouyr, espoir luy eust donné plus grant hardement et courraige de l'oultrager et mectre a mort, celuy Henry Houyete print et saesit en l'une de ses mains une pierre quelle il trouva oudit chemyn, en intencion de soy preserver et garder de l'invasion et oppression que luy eust (/) voullu ou peu faire ledit Barbeurre et non esperant de luy en faire aucun mal, oultrage ne desplaisir. Et ainsi que lesdits Henry et Barbeurre chemynoint s'aprocherent l'un de l'autre, ledit Barbeurre dist audit Henry telles parolles ou semblables : " par le corps Dieu ! C'est a ceste foiz que je me vangeroy de toy ! " Faisant gestes et contenance de voulloir oultrager ledit Henry. Quoy voiant iceluy Henry, voullant y obvier et esperant evader la fureur et mauveix voulloir dudit Barbeurre et impescher qu'il n'aprochast de luy fist contenance de ruer icelle pierre audit Barbeurre. Et sur ce que ledit Barbeurre ne laissoit et s'avanczoit touziours d'aprocher dudit Henry luy donnant menaces de le baptre, iceluy Henry rua ladite pierre contre ledit Barbeurre et d'icelle par cas de fortune l'ataignit au devant de la tepte sur l'une des sourcilles tellement que a l'occasion dudit coup, il sortit de la tepte dudit Barbeurre effuzion de sangc, et apres ledit coup ainsi donné, ledit Henry s'en alla d'illec sans avoir fait autre exceix ne donné autres coups ne collees audit Barbeurre. Et ledit Barbeurre s'en alla au village de Lourmir en ladite paroesse de Basoges ou il estoit demourant a distance d'environ une lieue du lieu ou fut donné ledit coup, le Barbeurre six jours apres a raison dudit coup par deffault de bon pancement, gouvernement ou aultrement aller de vie a trespas. (/) Nous remonstrent lesdits parens et amys supplians que ledit Henry est viel homme et ancien aagé de soixante ans ou environ comme dict est, marié et chargé de grant nombre d'enffans, lesquelz il nourist de son labour, bien famé et nommé sans jamais avoir esté actainct, accusé ne reproché, aussi qu'il n'avoit auparavant aucune hayne preconseue allencontre dudit Barbeurre et que ledit cas est advenu par cas non prepancé et non oppiné et que a raison dudit cas ledit Henry a esté par ladite court dudit Basoges, soubz la jurdiscion de laquelle ledit cas a esté commis et perpetré, pluseurffoiz aiourné a instance de nostre procureur dudit lieu, ausquelz aiournemens doubtant rigueur de justice, il a deffailly. Sur lesquelles defailles, la prinse de sa personne a esté decrectee et ses biens prins et saesiz de l'auctorité de ladite court et a celle cause s'est absenté et rendu fuytiff de ce pais auquel il n'oseroit se repatrier ne converser, si par nous ne luy estoit dudit cas imparty noz lettres de grace, remission et pardon ce que tres humblement nous ont lesdits parens et amys supplié et requis luy impartir et

octroier. Pourquoi etc, () l'adrecx a () donné a Nantes ou moys de juing l'an de grace mil cinq cens vingt deux et de nostre regne l'huictiesme, visa Le Fourbeur.

N° 21. (85)

Remission de falsité pour Raoul Lescorre du diocese de Triguer dont la teneur ensuit :

François, par la grace de Dieu roy de France et duc de Bretagne, savoir faisons a touz presens et advenir nous avoir receu l'humble supplicacion et requeste de nous faicte de la part des parens et amys consanguins de Raoul Lescorre, pouvre gentilhomme du diocese de Triguer a present detenu en noz prisons de Lannyon aagé d'environ trante ans, contenant que a ung jour de juedi, environ troys ou quatre moys a ou plus, comme ledit Raoul feust allé ledit jour qu'estoit jour de marché audit Lannyon pour aucuns ses affaires, rencontra illecques en la rue en l'endroit de la maison ou pour lors demourroit (Bouquilbu) ung nommé Yvon advoué Lahaye de la parroisse de Toncquedec, quel ledit Raoul cougnoissoit vint ans a ou plus auparavant. (/) Et illecques ledit Lahaye monstra audit Lescorre ung registre escript sur papier contenant estre fait par les cours des official et archidiaicie de Triguer, dabté le vigntesme jour de juillet l'an mil cinq cens dix-huict, contenant que Nycollas Jacob de Buhulien s'estoit obligé paier audit Lahaye soixante-dix soulz monnaie a cause de vendicion d'une vache. Et estoit ledit registre passé de Jehan de Rosmar disant et dist ledit Lahaye audit Raoul que il avoit aultrefois prins la charge de passer ledit registre sur ledit Jacob. Auquel respondit ledit Raoul qu'il n'en avoit lors souvenance et que si ainsi estoit, ce avoit voluntiers esté par la court de Toncquedec dont il estoit notaire et non desdites cours de l'officialté et archidiaconé dudit Triguer et qu'il ne l'eust point passee par icelles cours, et alors se retira ledit Lahaye avec sondit registre. Et le juedi prochain ensuyvant, s'adrecza de rechef ledit Lahaye audit Raoul en ladite ville de Lannyon environ deux heures apres medi, en la rue et au devant de la maison ou demoure Guillaume Symon pintier ou lors estoit ledit Raoul yvre et enboicté et luy monstra ledit registre, ouquel registre avoit depuis emis ladite court de Tronquedec. Sur quoy ledit Lescorre qui estoit comme dit est yvre et carant de bon sens et entendement, print ledit registre et sans aucun sallaire fors qu'ilz beurent ensemble, le passa illecques sur l'escal ou fenestre dudit Symon combien qu'il n'en eust esté auparavant prié par ledit Jacob duquel (/) il n'avoit eu jamais cougnoissance. Au moyen duquel registre et en usant d'iceluy, ledit Lahaye quel puix quinze jours dernners a esté par la court dudit Lannyon jugé d'avoir le poign couppé, fist depuis excommunier ledit Jacob par la court dudit official de Triguer. Et pourtant

que iceluy Jacob divulgua que oncques n'avoit prié homme de passer obligacion audit Lahaye sur luy fut a requeste de nostre procureur dudit Lannyon par nostre lieutenant ordinaire dudit lieu procedé a faire interrogacions audit Raoul, quel cougneu spontanement les choses et chacunes sur recitees. Sur quoy fut a instance de notredit procureur constitué prisonnier sur ledit cas, remonstrans lesdits parens et amys que ledit Raoul est pouvre jeune gentilhomme, simple carans de bon sens et le cas avoir esté ainsi commis par la persuasion dudit Lahaye lors que ledit Raoul estoit yvre comme dit est, lequel Raoul en touz ses autres affaires estoit bien vivant, de bonne et honneste conversacion, rest et gouvernement sur le quartier sans jamais auparavant avoir esté d'aucun aultre mauveix ne villain cas, blasme et reproche, nous suppliant qu'il nous plaise dudit cas impartir audit Raoul Lescorre noz grace, remission et pardon tres humblement le nous requerant. Pourquoi etc, et pourveu que jamais il ne s'en entremectra du faict de notairerie en quelque maniere que ce soyt et qu'il en personne presentera etc, l'adreix a Lannyon. Donné a Nantes ou moys de juillet l'an de grace mil v^{ct} xxii et de nostre regne l'huict^{me}, ainsi signé par le roy et duc a la relacion du conseil Texier visa et sellé.

N° 22. (86)

Remission pour Gervoy Bernier dont la teneur ensuult cy-apres :

François, par la grace de Dieu roy de France et duc de Bretagne, savoir faisons a touz presans et advenir nous avoir receue l'humble supplication des femme, parens et amys consanguins de nostre poure (/) subject Gervoy Bernier, executeur de justice de ceste nostre ville de Nantes, contenant que comme le jour de la Panthecouste derroine passee, apres que ledit Gervoy eust souppé et fait bonne chere en sa maison en la compagnie de sa femme et aucuns ses voysins, sortit hors icelle maison pour deviser avec lesdits voysins et commencerent a eulx esbatre a qui myeulx toucheroit une pelote de mouton qu'ilz s'entre gectoint en maniere de jeu de paulme. Et apres soy estre esbatuz, ledit Gervoy se asseist illec contre terre et appuya sa teste sur le giron d'une sienne voysine, femme de Macé Hubert, et ainsi que ledit Gervoy et ladite femme dudit Hubert devisoint ensamble, fut par la femme dudit Gervoy dit a iceluy Gervoy que le mary de ladite femme estoit courroucé de ce que ledit Gervoy estoit assis pres icelle femme. Et sur ce, ledict Gervoy se leva tout courroucé en disant a sadite femme : " veille puante, es tu geleuse de ceste femme la ! " et surtant s'en alla ledit Gervoy en sadite maison querir son espee et son poignart et il retourné, s'efforcza de battre sadite femme, ce qu'il eut faict s'il n'en eust esté impesché par ung nommé Denis Camart qui se mist entre deux et emmena ledit Gervoy en la maison d'un nommé Jehan

Briend qui tenoit taverne illec pres. En laquelle il firent tirer pinte de vin nantoys et se assirent a la table pour boyre ledit vin et bientost apres y arriverent lesdites femmes desdits Gervoyz et Camart et comme ilz estoit ainsi a boyre en ladite maison y survint ung nommé Jullien Bardis qui sembloit estre courroucé, lequel se assist a ladite table pres et a cousté dudit Gervoyz et fist tirer choppine de vin et en bevant sondit vin en adreczant ses parolles audit Denys dist celles parolles ou samblables : " Denys, vous n'avez point de plus gens de bien en votre compaignie que le boureau pour me venir baptre ? ". A quoy luy respondit ledit Denys doulent : " Bardis, mon amy, nous ne songion point en vous quant nous suysmes venuz ycy et ne vous voullons nul mal ! bevez botre vin et nous laissez en paix ! ". Et sur ce ledit Bardis s'efforcza de plus en plus a injurier ledit Gervoyz l'appelant " villain boureau ! " par pluseurffoiz (/) en luy disant : " ne te souvien il point que je te baty bien une foiz et suys encore aussi prest de te bien baptre ! " faisant la moc sur ledit Gervoyz et sadite femme en gourmonant et parlant entre ses des motz chargeans et injurians ledit Gervoyz et jurant et blaphemant le nom de Dieu par division de son humanité qu'il ne le craignoit riens. Quoy voyant, ledit Gervoyz qui estoit ja eschauffé de vin, esmeu et courroucé des parolles et injures que luy disoit ledit Bardis et qu'il ne s'en vouloit aller ne se taire pour priere que l'on luy feist, dist rudement audit Bardis que s'en feust allé de la et qu'il ne luy demandoit riens et que s'il l'encunyoit mesthuy qu'il le chasteroit bien, mais ce neantmoins ledit Bardis persistoit tousjours esdites injures tant en icelle maison que hors icelle. Et bientost apres, ledit Gervoyz sortit hors ladite maison, pour aller querir de l'argent ches ung nommé Guillaume Nogues qui luy en devoit et lequel luy avoit assigné de luy en bailler celuy soir, tendant icelluy Gervoyz et sadite femme aller le landemain au matin parties de Couairon et ainsi qu'il alloit sur ledit pavé droit a la maison dudit Nogues, ledit Bardis estant sur le chemyn se print de rechief a injurier ledit Gervoyz. Lequel Gervoyz passa oultre et s'en alla en la maison dudit Nogues lequel luy bailla dix soulz et en s'en retournant trouva de rechief ledit Bardis oudit chemin lequel se print de rechief a le injurier. Et ce voyant ledit Gervoyz et que ledit Bardis perseveroit et continuoit esdites injures, de ce desplaisant et courroucé, en chaulde colle evagina sadite espee et d'icelle d'un coup d'estoc frappa ung seul coup ledit Bardis en la cuisse. A raison duquel coup, par deffault de pensement, bon troictement ou aultrement, ala le landemain de vie a deces. Au moyen de quoy ledit Gervoyz doulant rigueur de justicze s'est rendu fuitif en franchise en l'eglise des Jacobins de ceste nostre ville de Nantes

ou il est encores a presant, nous remonstrant oultre lesdits supplians que ledit Bardis estoit grant yvroigne et plaphamateur (sic) du nom de Dieu, noaiseur, querelleur et debatiff et a coustume de baptre les gens et que il et ledit Gervoyz n'avoit jamais eu noyse ne debat

ensemble et que celuy Gervoyz a tousjours bien vescu selon son estat et soy estre bien porté et acquicté ou fait de sondit office d'executeur sans avoir commis ne perpetré aucun aultre mauvais cas digne de pugnition et reprehention jucques a l'heure de presant reserve qu'il fut par auctorité de justice fustigné et esorillé et avant estre mis oudit office d'executeur sur le cas d'avoir esté present et consentant lors que ung nommé Symon Sautet couppa une bource sur le pavé de ceste notredite ville de Nantes trante ans a ou environ et emporta l'argent qui estoit dedans montant environ ouict soulz tournois qui estoit a ung goullier dont ne sceit le nom et nous ont lesdits supplians requis et supplié a tout ce que dessus avoir esgard et dudit cas impartir audit Gervoyz noz grace, remission et pardon tres humblement le nous requerant iceulx. Pourquoi nous lesdites choses considerees, la veriffication a Nantes ou moys de juillet l'an mil cinq cent vingt deux et de nostre regne l'huyctiesme.

N° 23. (87)

[187r] François, par la grace de Dieu roy de France duc de Bretagne, savoir faisons a touz presens et advenir nous avoir receue l'humble supplicacion des femme, parens et amis consanguins de nostre povre subgect Pierres Jouannolles l'un de noz sergens de nostre court de Rennes, detenu prinsonnier ou chasteau de Montauban par icelle court, que le tiers jour d'aougst derroin, qu'estoit le jour et feste Monseigneur Saint-Estienne, ledit Pierres Jouannolles s'en alla de nostre ville de Rennes au bourgc Saint-Ignac distant de icelle ville d'environ sept lieues, auquel lieu y avoit asemblee et congregacion de peuple celuy jour, pour y faire quelques espliz et recevoir et cuillir des deniers de noz financiers pour le recepveur ordinaire des fouaiges en l'evesché de Saint-Malo. Ouquel bourgc ledit Jouannolles aperceut environ troys heures apres medi dudit jour, ung homme qu'il a dempuix ouy nommer Phellipes Mahé des parties de Saint-Vignac estant au devant de la maison d'un nommé Jehan Toucays y exposant vin en vente et ung nommé Martin Rosier, mercier de () et aultres merceries, demourant audit Rennes ou mesmes logis ouquel demouroit (/) celuy Jouannolles, qu'eulx Mahé et Rosier avoint parolles et debat ensemble. Et sur ledit debat vid que celuy Martin Rosier avoit esté debastonné d'une espee que il avoit a son costé et voyant celuy Jouannolles, que ledit Martin Rosier auquel il avoit grosse familiarité a raison qu'ilz estoit tous deulx logez en ung mesme logis et grans amys, evagina et tira une espee que il avoit a son costé, de laquelle frapa une collee de plat celuy Mahé sur le derriere de la teste et lors que celuy Mahé se retourna vers celuy sergent, cuydant le prandre et que celuy sergent l'aperceut venir, remist sadite espee au foureau et evagina une courte dague de laquelle il frappa celuy

Mahé en la gorge ung coup a raison duquel coup, celui Mahé cheut a terre. Et voyant, ung nommé Jehan Jarnigon dit Begandaye aux desdites parties, aperceut celui Mahé ainsy bleccé, dist celui Jarnigon a sa femme que pour lors le tenoit au corps qu'elle l'eust laché en disant lesquelles parolles, se escouyt d'elle et alla cuyder prendre ledit Jouannolles (/) au collet pour l'oultrager. Et a ce que ledit Jouannolles aperceut que le vouloit prendre et saesir, mist ung de ses braz par sur le coul dudit Jarnigon le fist par force cacher soubz luy et de ladite courte dague, en maniere de poignart, donna celui Jouannolles audit Jarnigon deux coups, savoir l'un en la souroiz du bratz et l'autre soubz le palleion de l'espaulle, tellement que celui Jarnigon cheut a terre. Et apres que celui Jarnigon fut ainsi cheu a terre, celui sergent de rechief frapa d'icelle courte dague, estant en maniere de poignart, celui Jarnigon ung coup environ le flanc. A raison duquel coup et aultres precedentement donnez, y eut grande effusion de sang et cry de force tellement que a l'ocasion desdits coups et collees, celui Jarnigon alla ou jour de landemain dudit conflict et debat de vie a deceix. (/) Auxi remonstrent nosdits supplians celui Jouannolles estre jeune homme de l'asge d'environ vingt-seix ans, marié avecque une jeune femme ayant grant nombre de petitz enffans et a present ensaincte et grosse d'enfant, pouvres gens ne ayant, ne possedant auchuns biens que a bien peu de valleur, bien vivant, famé et renommé et honnestement s'estre troicté par avant cestz heures sans jamais avoir esté aculé, actaint ne convaincu d'aucun maulveix cas de mallefice, doulx et paisible, non rumoureux, querelleux ne debatif...

N° 24. (88) 30 septembre 1522

Même affaire que les lettres n° 59, 70 et 89.

[195v] François, par la grace de Dieu roy de France, duc de Bretaigne, a touz presentz et avenir, savoir faisons nous avoir receue l'humble supplicacion et requeste nous faicte des parens et amys consanguins de Jehan de Lohan, sieur de Treirent, a present detenu prinsonnier par et de l'auctorité de noz officiers de nostre court et jurdiscion de Venues ou chasteau dudict Venues, contenant que a ung

jour de ~~sabmedi~~ XXVII^e jour de juillet
l'an mil cinq cens XXI et quequesoit
a ung jour de sabmedi, qu'estoit jour de
marché a nostre ville de Vennes, ledict Jehan
de Lohan alla a ladicte ville de Vennes
espoirant faire quelque diligente qu'il avoit
affaire pour le service de feu Loys
de Lohan, son pere, lors nagueres
decebdé, et avec luy avoi estoit deux
siens serviteurs, l'un nommé Michel de
Remungol²⁹ et l'autre Yvon Fretou. Auquel
jour de sabmedi, se trouva en la maison
ou demouroit Katherine, veuffve de feu
Guillaume, au carefour et rue de Saint Pierre
dudict Vennes, en laquelle maison y avoit
lors taverne, et y digna ledict Jehan
de Lohan en la compaignie de maistre
Vincent Laurens³⁰, François Guillemot,
sieur de Brenerault et de Allain de Kerdaniel
[196r] et firent bonne chere ensemble et y feist
oultre ledict Jehan de Lohan marché avec ung
paintre dudict Vennes de faire les escuzons de
d'armoyries pour servir au service de sondict feu
pere. Et durant ledict disner, ledit Jehan de Lohan
pria ledict maistre Vincent Laurens et de Kerdaniel
d'aller avec luy aux champs pour inviter et
convoyer de ses parens gentilzhommes
et amys pour estre au service de sondict pere et
que il leur bailleroit chevaulx et monture,
ce qu'ilz luy acorderent. Et apres ledict disner
s'en allerent dudict lieu, boyre et festoyer
la femme dudict Kerdaniel, qui lors estoit en

²⁹ Suppliant n° 89.

³⁰ Suppliant n° 59.

gesne et couschee ou nagueres en relevee
d'enffent, en la maison ou ilz demeurent
en ladicte ville de Vennes et tant a ladicte
disnee que en ladicte maison dudict de Kerdaniel
et ailleurs burent et firent bonne chere
tellement qu'ilz estoit fort enboitez de vin.
Et de ladicte maison dudict Kerdaniel monterent
ceulx sieur de Lohan, Laurens et Kerdaniel
a cheval et ledict Kerdaniel sur ung petit
mullet ou mulle et ledict Guillemot en
crouppe et lesdictz deux serviteurs dudict
de Lohan de pié, s'en allerent et
transporterent au devant de la maison
de Jehanne Salmon en ladicte ville, en la rue
pres la porte Saint Salmon en ladicte
[196v] ou pour lors y avoit taverne. Et eulx
allans par les rues estans ainsin emboytez,
boutoint et hurtoint le peuple et gens qui
estoit esdictes rues venuz au marché a ladicte ville,
et ledict Guillemot estant en ladicte rue Saint
Salmon, descendit dessus la crouppe dudict
mullet ou mulle, ayant l'un de ses soliers en
la main duquel donna quelques soufflectz
a quelques gens qu'il rencontres estans venuz
audict marché. Et en chemyn, faisant comme
dit est, en passant par devant la maison
ou demoure Yvon Bertié dit Poulze, barbier
en ladite ville, demanderent que l'on leur baillast
du vin a boire, a quoy leur feust dit qu'il n'y
avoit point de taverne ceans et que le vin
que on y bevoit estoit pres de la maison de
François Rolland illecques pres. Et ce
voyans, fut par l'un d'eulx, que ne scauroyt
ledict de Lohan declerer, appellé ledict Bino

pour aller boyre avec eulx et tost apres
passerent et allerent derechieff davant la
maison de ladicte Jehanne Salmon pres ladicte
porte de Sainct Salmon. Auquel lieu ledict
Bino se y rendit et trouva et se myst en
la maison de ladicte Jehanne, et lesdictz aultres
demeurerent en ladicte rue estans a cheval
et demanderent a boyre. En l'endroit de
quoy ung nommé Pierres Tudreguel qui
[197r] qui [sic] estoit en ladicte maison de Jehanne Salmon,
s'adrecza audict maistre Vincent Laurens qui estoit
a cheval au dehors, demandant ledict Pierres audict
maistre Vincent qu'il vouloit faire. A quoy ledict
Laurens respondit : « Riens ». Et lors ledict maistre
Vincent demanda si ledict Bino estoit en
ladicte maison et ledict Pierres respondit
que nagueres y avoit esté, demandant
audict maistre Vincent pourquoi il faisoit
celle demande. A quoy ledict maistre Vincent
dist que ledict Bino se gandisoit de luy,
et que ledict maistre Vincent avoit prins
la seur dudict Bino a femme en sa chemise.
Et en l'endroit ledict Bino se trouva
sur le pavé disant aux aultres: « Dieu
vous garde messieurs ! Que dictez vous ? »
A quoy fut respondu : « Rien ! » Et lors ledict
Jehan de Lohan se doubta que ledict maistre Vincent,
qui estoit de la compaignie dudict Jehan
de Lohan et s'en debvoit aller ensemble
~~veu leursdictes parolles que ledict de Lohan~~
aux champs pour le service dudict pere dudict
de Lohan, et ledict Bino eussent quelque different
ensemble veu leursdictes parolles que ledict
de Lohan n'estimoyt estre amyables entre

freres et luy en desplaisoit. Apres ce,
ledict Trudegueil s'adrecza audict Jehan de
[197v] luy demanda qu'il vouloit faire et ledict ~~Bino~~
Jehan de Lohan luy respondi : « Riens » Et se
deffiant dudict Bino qui leur estoit venu dire :
« Que dictez vous ? » Dist aussi ledict de Lohan,
Tudregueil que ung foul les vouloit
tuer. Et incontinent se departit du lieu
ledict de Lohan pour aller donner ung pot
de vin audict Tudregueil que estoit illec
adreczé audict de Lohan comme son amy, et pour
donner ledict pot de vin, ledict Jehan de Lohan
print chemyn pour aller a la maison dudict
Françoys Rolland et fut suyvy des aultres
davant nommez. Et apres, ledict Bino se trouva
et se myst en une chere qui estoit contre l'uys
de la maison d'un nommé Bertié et lors ledict
Jehan de Lohan qui avoit entendu des aultres
devant nommez que ledict Bino fust sorty ~~surty~~
sur le pavé, l'espee evaginee et son boucler
levee, s'adrecza ledict de Lohan audict Bino luy
disant par telles parolles ou semblables:
« Ha ! Monsieur le lesteur ! Vous avez evasigné
une espee sur nous, vous en pourez bien
repentir ! » N'entendit ledict de Lohan quelle responce
luy fist ne dyst ledict Bino. Aussi de partie des
aultres, luy furent ditz pluseurs parolles
de menasses et defieiment, l'un a l'autre,
que ne sauroit declerer ledict de Lohan
ne par lesqueulx lesdictes ~~de Lohan~~ parolles estoient
proferees. Lesdictz Guillemot, Laurans et Lohan
[198r] voullant entrer en ladicte maison dudict Bertié
et ledict Bertié, cuidant que c'eust esté pour mal
faire, se print a crier forcze au roy, sur quoy lesdictz

nommez se recullerent ou dehors. Et sur celuy
different fut parlé qu'il ne failloit point avoir
de noise ensemble et qu'ilz estoient touz enffens
de la ville et qu'ilz allassent boire ensembles
a seurté que demanda ledict Bino et aussi a seurté
d'illecques, ensembles s'en allerent au davant
de la maison de feu Guillaume Riault en la
grant rue et carefour de Saint Pierre et
firent tirer du vin et beurent et ledict Bino
comme croyt ledict Jehan de Lohan, estoit entré
en ladicte maison. Et ce temps pendant, ledict
Michel de Remungol, l'un des serviteurs
dudict de Lohan, quel n'avoit aucun baston, demanda
a celuy de Lohan qu'il eust fait a Yvon Fretou
son aultre serviteur, luy bailler son baston, ce qu'il
fist. Et pour cuyder que celuy Fretou eust
baillé son espee audict de Remingol, ledict de
Lohan evagina son espee qu'il portoit disant
audict de Remungol Fretou sondict serviteur qu'il
baillast sondict baston audict de Remungol
et qu'il luy bailleroit le sien, ce que ledict
Fretou ne voulleut faire ne se acorder.

Et sur tant, ledict de Lohan bailla audict de
Remungol une petite arbaloistre que sondict feu
[198v] pere avoit mis a reffendre en ladicte ville
ou fourbourgs de Vennes qu'il avoit celuy jour
recouverte, laquelle ledict de Lohan portoit
a sa sainture. Et pourtant que ledict de Remingol
ne bandoit celle arbaloistre, ledict de Lohan voyant
le gros debat qui avoit esté entre ledict Bino et
aultres davant nommez, que celuy de Lohan
menoyt aux champs pour le service dudict pere
dudit de Lohan et se doubtant que ledict Bino
luy voulseist espoir a ladicte cause quelque mal,

ledict de Lohan descendit de cheval et banda
ladicte arbalestre et puis remonta sur son cheval
et asseist sur icelle ung trect de butte qu'il
avoyt, pour veoir s'il estoit bon et bien actinte.
Et ledict Guillemot qui estoit descendu de pié
s'aprocha dudict de Lohan et print celle arbalestre
dudict de Lohan et s'aproucha de l'huys de la
maison de ladicte veuffve Riault et ledict Bino,
quel ledict suppliant ne savoyt qu'il estoit devenu,
se trouva illecques ayant une espee et bouclier
et de sadicte espee couppa la corde de ladicte arbalestre
de sorte que ladicte arbalestre desserra. Et
sur tant, celuy Bino et ledict Guillemot qui
aussi evagina son espee commencerent s'entre
batre et s'entre ruer et bailler pluseurs coups
d'estoctz et de taille, et sur leurdict combat ledict
maistre Vincent Laurens qui estoit a cheval
[199r] evagina son espee et se approcha d'eulx et comme
semble audict de Lohan, rua ung coup ou deulx
audict Bino de plat de sadicte espee sur la teste
et ledict Fretou aussi chargea par derriere
sur ledict Bino comme semble audict de Lohan. Et
fut celuy Bino oudict debat par l'un desdictz aultres,
quel ne sceyt aultrement declerez, comme depuis a
sçeu ledict de Lohan, bleczé d'un coup d'estoc soubz la
memelle dextre et en la main destre. Et ledict
Bino ce voyant ainssin chargé, se retira en ladicte
maison de ladicte veuffve et fut tourjours
poursceu par ledict Guillemot et Fretou et fut l'huys
fermé d'icelle maison. Et bien tost apres,
a celle occasion ~~lesdictz B~~ ledict Bino alla de vie
a deceix. Et apres lesdictz coustz et debatz,
ledict Guillemot remonta a cheval et touz ensemble
fors ledict de Kerdaniel et de Remingol qui se

departirent d'illecques et devallerent
au costé de l'eglise Sainct Pierres de Vennes,
et de la se destournerent par davant la
maison ou demeure Jehan Couturet et de la
s'en allerent aulx lices de Vennes et
firent tirer du vin de la maison de Jacques
de Callac que tient Jacques Corps, drapier,
qui tenoit taverne et y beurent. Et dudict
lieu lesdictz de Lohan et Guillemot et Laurens
estans a cheval, ledict Fretou de pié
[199v] desplacerent et s'en yssirent hors la porte
de Calmont pour s'en debvoir aller et
entendirent que la justice les vouloit
prendre, et pour savoir s'ilz seroient suyviz,
se arresterent au dehors de ladicte porte tout
de cheval et aperceurent gens au hault
des liczes, quel leur sembla bien qu'ilz les
suyvoient et ledict Laurens qui est hardy homme,
descendit de cheval et rentra en ladicte ville
au davant de celle gens. Nous remonstrant
que a ladicte cause il a esté long temps fuitiff,
aussi que ses parens s'estoint vers nous retirez
et non savans de la fourme et maniere dudict
cas nous avoint donné entendre le faict ~~espoir~~
~~non par lequel iceulx procureur misdrent ledict Lohan~~
~~suppliant~~ espoir non durit commune
dessus est veritablement recité.

Et des le dixiesme jour de mars derroin, sur le cas
donné a entendre, fut par nous octroyé noz lettres
de abolicion et pardon dudict cas qui estoit et
est ~~homme~~ jeune homme et ne se congnoessant
en pratique, lequel soy presenta aux derroins
plectz de nostre court dudict Vennes avec ladicte lettre
d'abolicion et demanda vers le procureur

d'icelle, ~~que~~ publicacion et entherinance d'icelle,
pensant annullé s'est en suffizante somme pour
en devoir jouir. Et de la part dudict procureur
fut dit le faict avoir esté d'aultre maniere qu'il
n'estoyt remonstré par l'aloué de ladicte abolucion
et aultrement qu'il n'avoit proposé et
[200r] et [sic] congneu avoit donné du respons partiment
et par celle voye sont appointez approuvés ne levés
ausdits derrenier terme et pour obvier a la
longueur du pledoyé et ennuuy que ce touchant
pourroit avoir ledict de Lohan. Nous remonstre
ledict cas avoir esté de la maniere qu'il est cy
devant recité touchant le faict du deceix
dudict Bino, quel estoit jeune gentilhomme et
avocat d'assise et avoyt femme et enffens
myneurs, toutes foiz estoyt celuy Bino foible
et debilité de scens et entendement, et
que dudict cas il a appointé et satisfait
ladicte veuffve dudict deffunct, en son nom et
tutrix de ses enffens, et luy a cousté vers
elle seullement troys cens trante troys livres
six soulz ouict deniers. Et a celle cause
et aussi et aussi [sic] pour aultres mises, luy a
~~eong~~ convenu vendre de son heritaige, lequel
dempuis noz derroins plectz de Vennes qui
furent ou moys de juign derroin, il est
detenu prinsonnier a grant misere et ennuy
es prinsons dudict Vennes. Nous suppliant
qu'il nous plaise ayant esgard que james
il ne fut apprehandé par justice a l'occasion
d'aultres mauvays cas, et que le
faict advint par cas de fortune et inopiné
auparavant par ledict suppliant car jamais
n'avoit eu debat ne different vers

[200v] ledict Bino et jamais ne l'avoit auparavant
congneu, dudict cas impartir audict de Lohan
noz grace et pardon, tres humblement le nous
requerant. Pour quoy nous, lesdictes choses considerees,
etc., l'adrecez a la court de Vennes aux prochains
ou seconds generaux plectz dudict Vennes, ~~ete de~~
Si donnons en mandement, etc. Donné a Vennes
ou moys de septembre l'an de grace mil cinq
cens vingt deux, et de nostre regne le huit^{me}.
Ainsi signé, sur le replet : *Visa*, Par le roy
et duc, a la relacion du conseil, P. TEXIER, et
scellé en laz de soye et cyre vert.

N° 25. (89) 4 octobre 1522

Même affaire que les lettres n° 59, 70 et 88.

[203r] François, par la grace de Dieu roy de France, duc
de Bretagne, a touz presens et avenir, savoir faisons,
nous avoir receue l'humble supplicacion et requeste
nous faicte des parens et amys consanguins de
Michel de Remungol³¹ vint avec ung nommé
Jehan de Lohan, sieur de Treinent³² avec lequel pour lors
il demouroit en nostredicte ville de Vennes, quel
de Lohan disoit avoir affaire quelque dilligence
pour le service de feu Loys de Lohan son père,
et aussi avoit ledict de Lohan aultre serviteur
nommé Yvon Fretou. Et celuy jour de
samedi, se trouva ledict de Remungol avec ledict
de Lohan en la maison Katherine vefve de
feu Guillaume Ruault au carrefour de Saint Pierre
dudict Vennes, en laquelle maison y avoit

³¹ Plus loin il se dit « jeune gentilhomme de l'aige d'environ vingt troys ans, jovigneur, ne possedant aucuns biens pour subvenir a sa delivrance ».

³² Suppliant n° 88.

lors taverne et y disna ledict Jehan de
Lohan en la compagnie de maistre Vincent
Laurens³³, François Guillemot, sieur de Breneranault
et Allain de Kerdaniel, et aussi y disnerent
lesdictz de Remungol et Fretou. Et illecques
ledict de Lohan fist marché avec ung
paintre dudict Vennes de faire les escuzons
d'armoiries pour le service de sondict feu
pere et pria ledict de Lohan, lesdictz maistre
Vincent Laurens et Kerdaniel d'aller avec
luy aux champs pour convier et inviter
de ses parens gentilzhommes et amys
[230v] pour estre au service de sondict feu pere
et que il leur bailleroit chevaulx et
monture, ce qu'ilz luy accorderent. Et apres
disner et qu'ilz eurent illec fait bonne chere
et qu'ilz estoit assez esjouyz, s'en allerent derechief
boyre et festoyer la femme dudict Kerdaniel
qui lors estoit en gesne et couche d'enfant
ou nagueres relevee en la maison ou ilz
demeurent en nostredicte ville de Vennes. Et tant
en ladicte maison de ladicte veuffve dudict Ruault,
que en la maison dudict de Kerdaniel, firent bonne
chere et beurent tellement qu'ilz estoit
fort emboictez de vin et de ladicte maison de
Kerdaniel monterent lesdictz de Lohan, Laurens
et Kerdaniel a cheval et ledict de Kerdaniel
sur ung petit mullet ou mulle et lesdictz de
~~Kerdaniel~~ Remingol et Fretou a pié, et
s'en allerent et transporterent au devant de
la maison de Jehanne Salmon ou pour lors
y avoit taverne. Et chemyn faisant, ledict de
Remungol qui estoit aussi prins de vin, pousoit

³³ Supplint n° 59.

et heurtoit assez rudement contre aucunes
gens qu'il trouvoit en la rue qu'il estimoit
qui luy nuysoint a passer et esmouvoit les
aultres a leur faire de la maniere. Et ledict
Guillemot estant descendu dessus la croupe
[204r] dudict mullet ou mulle en ladicte rue de Saint Salmon
ayant l'un de ses soulliers en sa main, en donna
quelzques souflectz a quelzques gens qu'il rencontra estans
venuz audict marché. Et passans par davant
Yvon Berthié dit Poulze, barbier en ladicte ville,
qui avoint de coustume de tenir taverne et vin
a vandre, fut demandé par aucuns d'eulx que
on leur baillast a boire du vin, a quoy leur
fut respondu qu'il n'y avoit vin ne taverne
ceans et que le vin que l'on y bevoit estoit
prins en la maison François Rolland illecques
pres. Et par l'un d'eulx, que ne sauroit ledict
de Remungol declerer, fut ung nommé Yvon Bino
appellé pour aller boyre ~~et illecques ung~~
~~nommé Pierres Tudregueil qui yssit hors de ladicte~~
~~maison s'adrecza audict maistre Vincent Laurens~~
~~qui estoit a cheval au dehors, demandant~~
avec eulx. Et sur tant, passerent et allerent
davant la maison Jehanne Salmon pres la porte
de Saint Salmon et ledict Bino se trouva en ladicte
maison de ladicte Jehanne et les aultres demeurèrent
en ladicte rue et demanderent a boyre. Et illecques
ung nommé Pierres Tudregueil qui yssut de ladicte
maison s'adrecza audict maistre Vincent Laurens
qui estoit a cheval au dehors, demandant
ledict Pierre audict maistre Vincent qu'il vouloit faire,
a quoy ledict Laurens respondit : « Riens ». Apres
[204v] ce, ledict Trudegueil s'adrecza audict de Lohan
et demanda qu'il vouloit faire et ledict de

Lohan respondit : « Riens ». Mais que s'estoit
ung foul qui les vouloit tuer. Par raison
de quoy et aussi que ledict de Remingol
avoit auparavant ouy dire audict maistre Vincent,
lequel estoit de la compagnie dudict de
Lohan avec lequel estoit celuy de Remingol
et s'en devoit aller avecq eulx aux champs
luy ayder au faict dudict service que ledict
Bino se gaudissoit dudict maistre Vincent son
beau frere et que aussi avoit ouy dire par
quelzques gens, ne sauroit declerer par
quelz, que celuy Bino estoit sorty en pourpoint,
une espee nue en la main et ung bouclier,
en l'autre et sembloit estre courroucé
hors la maison dudict Berthié et faisoit une
levee de boucler, presuma ledict de Remungol
que ledict Bino n'estoit amy dudict maistre Vincent.
Lequel maistre Vincent, celuy de Remungol voyoit
par ce que dit est estre amy dudict de Lohan
avecques lequel ledict de Remungol estoit
comme serviteur, toutes foiz vindrent
pour debvoir boire ailleurs en icelle
ville et eulx estans sur le pavé
entre les maisons desdictz Rolland et
Berthié comme les aucuns de la compagnie
dudict de Lohan, et entre aultres ledict Guillemot
[205r] dist audict Bino estant en ladicte maison dudict
Berthié: « Vous avez tiré une espee, je la vous
feray bien estuyer ! » Ce voyant, ledict de Remingol
qui estoit du party dudict Guillemot, dist
aussi audict Bino: « J'en bateroys deux comme
toy ! Sors dehors ! » Voullant celuy de Remingol
qu'ilz eussent debat entreulx. Et illec,
ceulx du party contraire dudict Bino

demandèrent du vin a boire, a quoy leur fut
respondu par ledict Bertié qu'il ne tenoit point
de vin a vendre, et ledict Laurens estant a cheval
s'efforcza entrer en ladicte maison, evagina
une espee et rua ung coup d'estoc contre ledict
Berthié, combien qu'il ne le blecza point. Et
ledict de Remingol estant emboicté de vin
comme dit est, n'ayant aucun baton, en demanda
ung et entra en ladicte maison dudict Berthié
sans aucun baton comme par force, lequel
fut rebouté par ledict Berthié et mis hors.
Après ce, se departirent et s'en allerent
boire chés ladicte vefve Ruault, ung pot
de vin que ~~demanda~~ donna ledict de Lohan et y
estoint lesdictz nommez de ladicte compaignie
dudict de Lohan et aussi ledict Bino, quel estoit
venu a seurté avec ledict Laurens son beau frere
en la compaignie desdictz nommez entre
lesquelz Bino, Guillemot et Laurens respectivement
furent pluseurs parolles de rigueur dont
ne sauroit ledict de Remingol faire decleracion
[205v] pour ce qu'il n'y poevoit regard. Et tout
incontinent et apres qu'ilz eurent beu du
vin, au davant de ladicte maison d'icelle vefve
Ruault, vid et aperceut ledict de Remingol,
lesdictz Bino et Guillemot ayans espees
evaginees l'un contre l'autre et deschargeans
coups l'un sur l'autre. Et ce voyant, celui
de Remingol estant sans baton comme dit
est, demanda audict de Lohan qu'il eust faict
a sondict aultre serviteur luy bailler son baton,
ce que reffusa faire ledict aultre serviteur
dudict de Lohan, et sur ledict reffuz, ledict de Lohan
bailla audict de Remungol une arbaloistre

que celui de Remungol assaya a bander,
ce que ne peult faire, mais fut bandee
par lesdictz de Lohan ou Guillemot, quequesoit
il vid ledict Guillemot ayant ladicte arbalestre
bandee et ung trect de bute dessus, et fut
par ledict Bino ayant une espee en sa main
et ung bouclier en l'autre, de sadicte espee
coupee la corde de ladicte arbalestre de
sorte que celle arbalestre ~~band~~ dessera.
Et sur tant, lesdictz Guillemot et Bino s'entre donnerent
pluseurs coups et ledict Laurens de son espee
rua aucuns coups contre ledict
Bino tellement que oudit conflict fut
bleczé et eut playes comme a ouy depuis
dire ledict de Remungol. A l'occasion de
quoy, peu de temps apres, ledict Bino qui
[206r] estoit jeune gentilhomme ayant femme et enfans
myneurs, estoit avocat d'assise, combien
qu'il feust debilité de scens et entendement,
deceda ainsi que a esté raporté audict de Remungol.
Duquel deceix, celui de Lohan avecques
lequel estoit celui de Remingol a pour
satisfacion dudict meurtre poyé la somme
de troys cens trante troys livres seix soulz
huict deniers monnaie. Et tost apres, ledict
conflict, a raison dudict tumulte, cuyda ledict
de Remungol estre oultraigé du peuple
en tourbe, pensant que ce fust luy qui eust
faict ledict cas, combien qu'il ne fust cause
ne y eust esté present fors ainsi que dit est,
et neantmoins fut constitué prisonnier es
prinsons de nostre court de Vennes et
depuis randu comme clerc es prinsons
de l'evesque dudict Vennes, esquelles prinsons

il a esté et est respectivement detenu
l'espace d'environ quatorze moys, combien
qu'il n'eust jamais esté de mauveix rest,
actainct ne convaincu d'aucun aultre mauvais
cas, il qui est jeune gentilhomme de l'aige
d'environ vingt troys ans, jovigneur, ne
possedant aucuns biens pour subvenir
a sa delivrance desdictes prinsons. Nous
suppliant qu'il nous plaise dudict cas impartir
audict Michel de Remingol noz grace, remission
et pardon, tres humblement le nous requerant.

N° 26. (90)

François, par la grace de Dieu roy de France duc de Bretaigne, savoir faisons a touz presens et advenir nous avoir receu l'humble supplicacion des pouvres femme, enffans, parens et amys consanguins de Jehan Picon, povre homme de labour de la paroesse de Prisac soubz nostre barre de Henbont, contenant que puix deux ans derroins, ledit Picon a ung jour de lundi ou moys de novembre, estoit allé a la ville du Faouet, a la foire qui tenoit celuy jour oudit Faouet soubz la jurisdiction de Gourren, auquel lieu environ nuyt clouante il ala pour debvoir boire et manger en la maison Guillaume Legal qui pour lors tenoit taverne oudit lieu du Faouet. En laquelle, il rencontra en montant au degré d'icelle maison ung nommé Jehan Le Cleuzier de la Treffie de Laneuegean en la paroesse de Guyscoiff, quel descendoit dudict degré et pour la presse qui y estoit s'entre bouterent. Sur quoy, ledit Cleuzier demonstrent estre courrousé et mary et avoir mal allant contre ledit Picon, sans que ledit Picon luy eust dict ne faict aucun mal ne desplaisir, menasser ledit Picon disant telles parolles ou semblables : « Je te trouveré avant partir de ceste ville ! » A quoy respondit : " je n'é que faire a vous et ne vieulx avoir que en bien ! Mais si vous venez a moy, vous me trouverés ! » Sur quoy se departirent et vers la nuyt clouante s'en alla ledit Picon a la maison de Jehan Lohemier, sercher quelques gens ausquelz il avoit a besoigner, a l'entree de laquelle maison rencontra ledit Cluzier, lequel Cluzier continuant en ses premieres menasses tachant tousjours (/) avoit debat et question avecques ledit Picon en t'engressant de parolles iniurieuses. A quoy ledit Picon de tout son pouoir s'esforçoit et vouloit resister, et voyant ledit Cleuzier que ledit Picon ne faisoit cas de sesdites menasses s'aprocha en haussant () le cuyder fraper (). A quoy ledit Picon () ledit Cleuzier estoit oultraigeux, noisiff et debatiff tira ung petit couteau qu'il avoit a sa sainture,

duquel il avoit a coustumé de trancher son pain, et d'icelluy donna ung seul coup au ventre d'icelluy Cleuzier, lequel commanca incontinent a crier et dire: " tu m'as tué ! je suys mort ! " et incontinent celuy Picon se rectira et s'en fuit d'illecques et dempouis a ouy dire que a l'occasion d'icelluy coup ledit Cleuzier bientost apres ala de vie a deceix. A l'occasion duquel cas, craignant la rigueur de justice, s'est oncque puis tenu fuitiff et delaisé sadite femme et deux enffantz migneurs et orphellins, si est que ledit Picon tout auparavant ledit cas advenu estoit homme de bien, censé et réputé notoirement de bonne vie et conversacion sans avoir jamais esté reproché d'aulcun villain ne mauveix cas et sont lesdits femme (/) et pouvres enffans demourez inpourvez pour l'absence dudit Picon n'ayant faculté ne pouoir de s'entretenir. Duquel cas, les officiers dudit lieu du Faouet soubz la jurisdiction de Gourren ont procedé a faire informacions et enquestes et doubtent lesdits supplians que l'on veille oultre proceder vers ledit Picon a toute rigueur de justice tant par forban que aultrement, nous suppliant qu'il nous plaise luy impartir noz lettre de grace, remission et pardon touchant ledit cas et crime dessusdits tres humblement le nous requerant. Pourquoi etc, et la vérificacion a

N° 27. (91)

François, par la grace de Dieu roy de France duc de Bretagne, a touz presens et advenir savoir faisons l'humble supplicacion des parens et amis consanguins de Thomas Moulnier, a presant detenu prinsonnier en noz prinsons de Ploermel, avons receue, contenant que le lundi de Pasques derroin, environ deux heures de nuict, se trouva ledit Moulnier et Jehanne Rolland sa femme au bourge d'Uzel a la maison ou lors exposit vin en vente par mynu et detail Mathelin Flocheau. Et avecques eulx estoit a boire en icelle maison ledit Flocheau et Mathurin Dubostin et comme ilz bevoit ensemble et divisans de leurs affaires et negoces arriva ung nommé Bernard Rondel quel leur dist par telles parolles : (/) " Messeigneurs vous faictes bonne chere sur la baillee de la coustume de Monseigneur en disant qu'il la meptroit a douze livres ! " a quoy respondit ledit Moulnier qu'il n'estoit pas recepveur et qu'il n'avoit nulle puissance d'en faire aucune baillee. Enczois que icelle coustume avoit esté baillee par le recepveur d'Uzel nommé Mathurin Dieulangart sauff droit debout audit Mathurin Dubostin et ledit Thomas Moulnier ayant de ce cougnoessance voullant avoir part et estre associé audit escot de coustume par aultant quelle demoureroit audit Dubouscq le part qu'ilz feussent sur ce allez ensemble boire pinte de vin ches ledit Flocheau, ce qu'ilz firent. Et ainsi troictant et devisoint d'icelluy affaire, sur ce sourvint celluy Bernard Rondel comme dit est qui s'efforczoit de cuider avoir du vin sur ledit bout de douze livres qui vouloit faire pour avoir la

ferme de ladite coustume. Auquel Bernard sut qu'il n'auroit vin sur ce ne aultrement s'il ne poyoit argent comptent et sur ce, eurent lesdits Thomas Moulmier et Bernard Rondel parolles de rumeurs rigoureusement ensemble et lors se leva ledit Moulmier de la table tendant eviter le lieu et le debat dudit Bernard Rondel qu'il voyoit ainsi eschauffé en vin et print ledit Moulmier (/) ung petit couteau tranche-pain ayant ung pié blanc que il avoit de coustume porter a saint (sic) sainture, soy approchant dudit Rondel, faisant contenance de l'en voulloir fraper, jaczait que a la verité du faict il n'en avoit aucune volonté mais seulement cuydoit que par celle maniere de faire, ledit Rondel se feust retiré. En l'endroit de quoy, ledit Rondel decedé qui s'estoit aussi levé et en se levant avoit prins le chandelier ouquel estoit la chandelle allumee qui leur faisoit clarté tua ladite chandelle et s'approchit desdits Moulmier et sadite femme. Et doubtant celuy Moulmier que pendant qu'ilz estoient sans clarté, ledit Bernart qui estoit emboité de vin, querelleux, rumoreux, noisiff et entrepreneur de debatz, l'eust en celle fureur et chaleur blecé ou tué par traison ou aultrement se tira devers l'huys de ladite maison et sadite femme paroillement, qu'elle pretendoit eviter et faire cesser ledit debat. Eulx estans ainsi sans clarté, oyant ledit Moulmier sadite femme cryez des coups que ledit Bernart luy avoit donné tellement, que elle fut deux jours que l'on n'espoyroit en elle que la mort, gecta au davant de luy de sa main en laquelle il tenoit sondit couteau tranche-pain, quelz coups qui arriverent tant en la gorge que au visaige dudit Rondel. Et (/) et (sic) apres que ladite chandelle fut alumee, fut trouvé ledit Bernart Rondel en ung endroit de ladite place d'icelle maison pres de l'huys et ladite Jehanne femme dudit Moulmier en ung aultre endroit d'icelle place qu'elle estoit tombee a terre et veit ledit Bernard lors qui saignoit a raison d'une playe quelle il avoit en l'endroit de la gorge et crioit force sur ledit Moulmier et peu apres ledit Bernard a raison d'iceluy coup de couteau que celuy Thomas luy donna alla de vie a deceix. Lequel Bernard avoit le jour precedant, qu'estoit le dimanche de Pasques, comme bon catholicque esté confessé et receu le saint-sacrement de l'austel et fut ledit Moulmier trouvé saesy, par les gens illec estans qu'eulx ne peult cougnoestre (/) a raison qu'il estoit fort enboité de vin, de deux couteaux qu'eulx il avoit a sa sainture dont l'un avoit ung pié blanc et estoit sanglant et furent gardez celle nuytee celuy Moulmier et sa femme par pluseurs personnes en icelle maison jucques au landemain au matin que les officiers dudit sr D'Uzel constituerent ledit Moulmier prinsonnier esdites prinsons et ne fut aucunement ladite Jehanne constituée en prinson a raison de la malladie et indisposition de sa personne. Si nous remonstrent lesdits exposans que ledit Moulmier est pouvre homme vivant et gagnant sa vie seulement de son labour et marchandie honnestement entre les gens de bien, chargé (/) de femme et de troys ou quatre petiz enffens, sa mere, seurs et freres et aultres famille qu'il a aussi et qu'il ne fut james

reproché ne accusé d'aulcun mauvaix cas, ains avoit touriours esté de bon rest et gouvernement, tel tenu, dit, censé et réputé notoirement et publicquement jucques audit cas enczois qu'il a esté et est doulx, paisible et non contencieux, querelleur ne debatiff et james n'avoit eu querelle, parolle rigoureuse ne debat avecques ledit Rondel jucques a icelluy jour. Quel Rondel estoit querelleur, contencieux et entrepreneur de noises et débatz et que lors que ledit Moulmier fist le coup il estoit tellement enbeu de vin qu'il avoit perdu le scens et entendement de raison et doubtent lesdits supplians (/) que a raison dudit cas en veille en rigueur de justice proceder vers celuy Moulmier qui leur ceddrait a grant honte et deshonneur, nous suppliant qu'il nous plaise sur ce impartir audit Moulmier noz lettres de grace, remission et pardon tres humblement le nous requerant. Pourquoi nous etc, et la verificacion a Ploermel. Donné a Nantes ou moys de

N° 28. (92)

Remission pour Françoyse Dutnou, myneure, de la paroesse de Ploeder, dont la teneur ensuit cy-apres :

François, par la grace de Dieu roy de France duc de Bretagne, savoir faisons a touz presens et advenir nous avoir receue l'humble supplicacion et requeste nous faicte de la partie des parens et amys consanguins de Françoyse Dutnou, myneure de l'aige de quinze a seze ans, fille de Guyon Dutnou en la parroesse de Ploeder [lez ?] la ville de Landerneau, ou diocese et soubz nostre senneschauce de Leon, contenant que ladite Françoyse, environ deux ans a, se feust de son voulloir et sans consentement de ses pere et mere, gree et fiancee par mariaige a Yvon, filz Guillaume Person qui estoit de son voisine, de l'aige d'environ vingt ans, dont Marie Gal mere d'icelle Françoyse se mal contenta (/) et se tenoit a celle occasion plus rude a icelle sa fille. Laquelle ce voyant et considerante que sesdits pere et mere ne luy eussent baillé gueres de quoy avec sondit mary pour entrer en mesnaige, provocquee et seduicte de mauveix esprit, entreprint et s'amusa de prandre et sansacsiner de leur bien, saichante le lieu ou sondit pere gardoit l'or et l'argent qu'il avoit, et duquel lieu ou ilz estoient en garde il laissoit la cleff sur une chynaise de la chemynee de la chambre en laquelle ceulx ses pere et mere avoient a costumé coucher, print ladite cleff et d'icelle ouvrit l'armoire ou buffet ouquel estoit le petit de bien que sondit pere avoit en garde tant a luy appartenant que aux enfens myneurs d'ung sien frere decédé. Duquel buffet, ladite Françoyse, par reiterees foiz print, au nonsceu de sesdits pere et mere, or et argent, comme par une foiz quinze ou seze livres en monnaie, et par aultreffoiz cinq pieces d'or, par aultres foiz (treze ?) doubles ducatz et dix ducatz et environ cent soulz en monnaie, que celle Françoyse avoit baillez en garde a Azeuree Cocrien. Aussi

avoit celle Françoise receu argent (/) pour sesdits pere et mere et tenoint en detail dont elle bailla a ladite Azeure cinq blancs soulail, laquelle Azeure luy en bailla ung couvrecheff que elle disoit avoir achapté d'un nommé Phelipes Tourbault et plusieurs aultres petit sommaires de deniers a diverses foiz print ladite Françoise de ladite armoire et des deniers du vin que sesdits pere et mere tenoint en detail et les bailla a ladite Azeure et a Anne et Jehanne, ses sœurs comme a ladite Anne par une foiz ung teston, par aultre foiz treze soulz quatre deniers, par aultre ung angelot, par aultre quatre soulz deux deniers et par aultre foiz quatre soulz quatre deniers, par aultrefois quarante soulz et par aultre vingt blancz souleil et a une femme nommee Marie Le Breton vingt blanc souleil et en deux foiz quinze deniers. Et aultrement ne sçauroit ladite Françoise dire, declairez ne speciffier a present le nombre de foiz ne la montance de ce que elle a prins, employé ne faict perdre de biens a sesdits pere et mere (/) sans leur sceu ne consentement pour ce qu'elle en prenoit et faisoit comme du sien, dont iceulx ses pere et mere estiment leur perte au montement d'environ six-vingtz livres tant en or, en monnaie que aultrement, sauff qu'ilz en ont recouvert dix doubles ducatz, dix ducatz et dix testons, et le parssus se trenne en differant et non appuré entre ladite Françoise et lesdits Anne, Azure Cocrien et aultres dessusdits, combien que de la perpetracion desdits cas ladite Françoise estoit quant a ce seduite et solicee par ladite Anne Cocrien jaçoit que elle n'en sçauroit faire prouve, pourtant que ce se faisoit et conduisoit en ferret entre elles. Et doubtent lesdits supplians que au moyen de ce que dessus, les officiers et gens de justice de la court dudit Landerneau, es prisons de laquelle est ladite Françoise detenue, veillent vers elle esdites occasions proceder a rigueur de justice, pourtant mesmes que par le dire et raport d'icelle Françoise joint certainnes informacions, avaremens (/) et garentz, lesdits officiers ont procedé en faire pugnition a Katherine Rigoal, mere desdites Azeure et Anne Cocrien, et a mettre a question Yvon Keriou, mary d'icelle Azeure, mesmes ladite Azeure qu'elle est encore esdites prisons. Et laquelle, avant que ladite Françoise auroit confessé avoir commis lesdits cas comme dit est, disoit et persistoit, tant en jugement que en la question, avoir eu lesdits biens de ladite Françoise, ce que celle Françoise desdisoit et en donnoit la charge du desrobement d'iceulx ausdites Azeure et ses seurs, et en cest faict tant aux interrogatoires secrectes qui en ont esté faictes, confrontacions des personnes et en jugement, se sont trouvez plusieurs diversitez et contrarietez entre lesdites Françoise et Azeure. En maniere que finalement avoit esté ladite Françoise jugee a question, procedant a laquelle et avant la souffrir, a ladite Françoise auroit cougneu et confessé des environ ung mois a avoir commis lesdits cas de la forme cy-devant declairee, jaczoit que en touz ses aultres faiz elle ait esté de bon rest et gouvernement sans avoir jamais esté actaincte ne convaincue d'aucun aultre mauvaix (/) ne

villain cas, blasme ou reproche, nous supplians sesdits parens et amys en ayans a tout ce esgard et a sa jeunesse a icelle, impartir noz grace, remission et pardon desdits cas tres humblement le nous requerans. Pourquoi nous lesdites choses etc, et la verification par davant le senneschal de Leon au siege de Lesneven. Donné a Nantes ou moys d'octobre l'an de grace mil cinq cens vingt et deux.

N° 29. (93)

Remission pour Jehanne Oultrequin et Michel Revel dont la teneur ensult :

François, par la grace de Dieu roy de France duc de Bretagne, a touz presens et a venir salut. Savoir faisons nous avoir receue l'humble supplicacion et requeste des parens et amys consanguins de Jehanne Oultrequin et Michel Revel, contenant que aultrefois et des le temps d'environ quinze ou saize ans a, (/) Jullien Revel, frere dudit Michel et ladite Jehanne Oultrequin furent contractez ensemble en mariaige ou ilz ont esté par le temps de quatorze ou quinze ans, durant le temps duquel mariaige, ont lesdits Jullien Renel et Jehanne Oultrequin exposé leurs biens et facultez a tenir taverne et exposer vin en vente par mynu et detail en nostre ville de Lamballe, et estoit iceluy Jullien Roupel (Rouxel ??) costumier de prendre lesdits vins a creance et de se obliger poier aux marchans dont il achetoit lesdits vins que il et sadite femme tenoint en leurdite taverne. de laquelle taverne et biens de la communauté d'entreulx avoit ladite Jehanne l'admystration et gouvernement, recepvoit ladite Jehanne Oultrequin l'argent des personnes faisantz escotz et despances en icelle taverne et s'en faisoit poyer sans ce que ledit Jullien Renel s'en immysçuast. Durant lequel mariaige fut par ledit Jullien Renel procroïé en ladite Jehanne Oultrequin François Renel leur filz, lequel Jullien Renel des le temps d'environ deux ans a fut souprins de malladie de ydroppisie naturelle mortelle, dont il fut detenu jucques au temps d'environ la feste Monseigneur Sainct-Jehan-Baptiste derroin passé et ung en, qu'il decebda d'icelle maladie. Durant le temps de laquelle maladie et environ ouict ou quinze jours paravent icelluy son deceix et voyant et considerant, (/) ladite Jehanne Oultrequin que celuy Jullien Renel estoit doibteur, tenu et obligé a pluseurs personnes tant a cause de vente et baillee de vins que aultres legitimes et raisonnables causes en pluseurs grans sommes de monnaie, moult plus vallentes que le cout du bien desdits Jullien Renel et sadite femme, et que elle craignoit et doubtoit que les crediteurs dudit Jullien Renel apres son deceix eussent prins ou faict prendre en ce poyant de leur deu, le tout des biens d'iceluy Jullien Renel, et que par ce moyen lesdits Jehanne Oultrequin sa femme et ledit François Renel son filz feussent demourez desnuez et desvestuez de tous biens, icelle Jehanne Oultrequin de nuict secrectement fist tirer, au nonsceu dudit Jullien Renel son mary

et de ses crediteurs, quasi le tout des biens dudit Jullien Renel de la communauté d'entreulx de la maison ou estoit demeurant icelluy Jullien et emporter en la maison Allain Oultrequin pere de ladite Jehanne pour les garder et preserver a elle et a son filz si le cas dudit Jullien Renel advenoit par avant le deceix d'elle et de son filz. Et apres ce, ledit Jullien Renel decebda environ le (/) temps devant dict et relaisa ladite Jehanne et ledit François leur filz myneur en bas aige, et incontinent apres le deceix et enterrement d'iceluy Jullien, se retirerent lesdits Jehanne Oultrequin et sondit filz en la maison dudit Allain Oultrequin, pere de ladite Jehanne en notredite ville de Lamballe. Et quelque peu de temps apres ledit deceix dudit Jullien Renel, fut ladite Jehanne Oultrequin ajoinee par notredite court de Lamballe a respondre a nostre procureur d'icelle cour pour prandre la tutelle dudit François Renel son filz myneur ou la reffuser, en laquelle court ladite Jehanne comparut et reffusa de prandre icelle tutelle avecques (rendiza) aux biens de la communauté d'entre elle et ledit feu Jullien Renel son mary. Et apres iceluy reffus fut ledit Michel Renel par notredite court de Lamballe croyé tuteur dudit François son nepveu ou il promist et jura par son serment se porter leaument. Et apres ce, ledit Michel Renel, inadverty qu'estoint devenuz lesdits biens dudit feu Jullien Renel, voyant que en la maison ou estoit decebdé ledit Jullien et en laquelle ledit Michel (/) s'estoit transporté pour garder et preserver les biens dudit myneur ou il avoit trouvé bien peu de biens et considerant que ledit Jullien Renel estoit doibteur, tenu et obligé a pluseurs personnes en pluseurs grandes sommes de monnaie et que ladite Jehanne Oultrequin qui cougnoissoit le grant des biens, facultez et debtes dudit Jullien Renel avoit remizé aux biens d'icelle communauté, doubtant ledit Michel Renel tuteur prandre l'acceptacion de la sucession dudit feu Jullien Renel estre plus oneureuse que lucraticque audit François Renel. Quel (?) consentement et (?) de ladite Jehanne Oultrequin et aultres proches parens et amys dudit François Renel, fut par notredite court de Lamballe decrecté et auctorizé et prins lesquelz (?) partie des crediteurs dudit feu Jullien Renel ont impetré monitoires et excommuniés, de l'official de nostre amé et feal conseiller et orateur l'evesque de Saint-Brieuc, de l'evesché duquel estoit ledit feu Jullien Renel et aussi sont lesdits Jehanne et Michel diocesans d'iceluy evesché, contre ceulx ou celles qui avoint et detenoint des biens dudit feu Jullien Renel, ou eans, voyans, savans et cougnoessans quelz monitoires et excommuniés ilz ont faict fulmynez, publier et (?) pluseurffoiz a jours de dimanches a prosne de la grant messe (/) parochial Notre-Dame de Lamballe dont sont parroissiens lesdits Jehanne et Michelle, sans ce que pourtant ce ladite Jehanne, qui cougnoissoit avoir la pluspart desdits biens, le dist et declerast. Oultre nous ont lesdits supplians remonstré que puix demy an encza, ledit Allain Oultrequin, pere de ladite Jehanne Oultrequin, est allé de vie a deceix, apres lequel deceix, cougnoissant ladite Jehanne

Oultrequin que ses freres et seur et coheritiers dudit Allain Oultrequin en brieff temps demanderoient avoir partaige des biens dudit feu Allain Oultrequin, craignant que si sesdits freres et seur ses cohéritiers trouveroient en ladite maison lesdits biens que ladite Jehanne avoit mis en garde en icelle maison, ilz voulzeissent dire et inferer que lesdits biens feussent des biens de la succession et haerie dudit feu Allain Oultrequin que ilz y demandassent part, s'adrecza ladite Jehanne audit Michel Renel son beau-frere, qui est pintier, luy dist et declera qu'elle avoit grant nombre de vexelle d'estain qui fut audit feu Jullien Renel son feu mary, frere dudit Michel, escripte ou nom dudit feu Jullien Renel et merchee de la merche dudit Jullien qui portoit en ses merches demyes fleurs de lies et demyes ermines et que ladite vexelle ainsi escripte et merchee ne luy pouoit riens valloir ne servir ne a son filz sans ce que clairement et evidement on veist et apperceust que ladite vexelle estoit des biens dudit feu Jullien Renel, et que si les crediteurs d'icelluy Jullien Renel estoient de ce advertiz, qu'ilz voudroient avoir et recouprez ladite vexelle et que par ce, elle et sondit filz perdrait icelle vexelle d'estain que elle avoit (/) de intencion de garder et preserver a sondit filz et qu'il luy estoit advenu du bien de la succession dudit feu Allain Oultrequin son pere, dont elle payeroit les crediteurs dudit Jullien Renel et acquiteroit sa conscience et l'ame et l'ame (sic) dudit feu Jullien son mary, mais qu'il estoit question de trouver faczon et moyen de faire descougnestre ladite vexelle, raya ledit Michel Renel de rages les noms et merches dudit Jullien en vint-et-seix escuelles d'estain, traeze platz d'estain, doze pintes et une choppine d'estain, et sur icelles rayeures de noms, meptre et escripve le nom de ladite Jehanne Oultrequin et merchee de crouez Saint-André, avecques ouict chandeliers de cuyvre, une mallier d'aren, une coupverture de pot d'arain, ung bacin d'aren, ung tapy verd de berlinge, quatre roigliers, une poche de linge et ung petit coffre fermant a cleff ou il y a dedans quelque douzaines d'estouictes, quatre touailles, quatre layes d'oreillier, deux chemises et deux de manteaulx de drap vert et une cleff a vin et ung coutruer de boys en maniere de table qui estoit et tout des biens que ladite Jehanne fist emporter et meptre hors ladite maison dudit Jullien Renel, envoya ladite Jehanne Oultrequin le tout desdits biens fors ledit coutrier en la maison Pierres Moisan et Jehanne Grosseteste sa femme, de craincte de ce que dessus. Duquel envoy, aucunes des crediteurs dudit feu Jullien Renel furent advertiz qui en firent remonstrance aux officiers de notredite (/) court de Lamballe, et a requeste desdits crediteurs, se transporterent aucuns desdits officiers de justice de notredite court en la maison desdits Moisan et sadite femme ou ilz trouverent lesdits biens qui a presant sont entre les mains de la justice dudit Lamballe, fors ledit coutruer qui encore a presant est ladite maison dudit feu Allain Oultrequin. Et de ce, ont esté lesdits Moisan et sadite femme par nostre procureur

dudit Lamballe accusez, qui ont appellé a garant ladite Jehanne Oultrequin qui plusseurffoiz a reffusé prandre icelluy garant, et desdits (lactutement transmuvement) et prinse de biens ont esté par vertu du (?) faict aucunes desdits crediteurs faictes requestes d'office, par laquelle court de Lamballe ont esté lesdits Jehanne Oultrequin et Michel Renel respectivement par le procureur d'icelle court accusez de robbement, larrouczin, abus et falcité et interrogez touchant ce. A laquelle interrogation, a ledit Michel Renel franchement et liberallement confessé avoir rayé lesdits noms et merches dudit Jullien Renel et sur icelles rayures de noms mis et escript les noms de ladite Jehanne Oultrequin et (/) aultres crouez Saint-André sur icelles rayures et merches, et icelle Jehanne Oultrequin par foys a nyé avoir prins et eu lesdits biens disant et confessant que ledit Jullien Renel son mary durant son vivant les avoit donnez audit François Renel son filz qui des le vivant dudit Jullien Renel son pere les avoit faict emportez de la maison d'icelluy Jullien Renel, et par aultreffoiz a confessé que ledit François Renel son filz avoit faict rayer audit Michel Renel lesdits noms et merches dudit Jullien Renel en ladite vexelle d'estain et y apposer les noms de ladite Jehanne Oultrequin qui sur la difficulté que ledit Michel Renel faisoit de ce faire qu'elle avoit donné hardement audit Michel Renel de le faire. Et par aultreffoiz a nyé avoir esté consentante de sesdites rayures et escripcions de noms et aussi parfoyz a confessé avoir baillé et mis en garde lesdits biens en ladite maison desdits Moisan et sa femme disant que ledit Allain Oultrequin son pere les luy avoit bailliez et donné en payement de trante livres monnaie qu'il avoit ordonné et legué luy estre poyez. Par aultreffoiz a confessé que lors qu'elle remicza aux biens d'icelle communauté, qu'elle jura par son serment ny avoir toucher, aussi a nyé avoir envoyé avoir envoyé (sic) lesdits biens a luy garder en ladite maison desdits Moisan et sa femme. Et par aultreffoiz a confessé qu'elle et sondit filz les y avoint envoyez, et par lesdits moyens et aultres pluseurffoiz en justice a ladite Jehanne, comme est fraigille femme, varié en ses denyz et confessions. A raison desquelz cas ont esté et sont lesdits Jehanne et Michel constituez prisonniers et ferrez aux prisons de notredite court de Lamballe ou ilz sont encore a present detenez en grant misere et calamité, vers lesquelz notredit procureur dudit Lamballe a demandé, devant notredit alloué d'icelle court, decret de proces, que luy a esté ajugé, dont lesdits Jehanne et Michel, craignans que on voulzest vers eulx proceder a pugnicion corporelle, ont d'icelluy decret faict ressort par appel qui a esté cuydé et décidé par nostre senneschal dudit (/) dudit (sic) Lamballe au proufilt et intencion dudit procureur, et outre a ajugee a ladite Jehanne question et torture, dont lesdits Jehanne et Michel ont faict ressort contredict a nostre court de Rennes qui est indecis, et pendant plus nous ont lesdits supplians remonstré que lesdits Jehanne Oultrequin et Michel Renel sont jeunes gens simples et de petit

entendement, bien famez et renommez, vivans honnestement, parens affins et allyez de pluseur gens de bien, qui james n'ont esté notez suspectz ne acusez d'avoir commis aucun mauveix cas que celuy dont sont a presant accusez qui parvurté et nectessité a contraint ladite Jehanne Oultrequin, durant la malladie dudit Jullien Renel son mary qu'elle cougnoissoit estre mortelle, de prandre et faire rapporter lesdits biens pour luy subvenir a ses nectessitez et de sondit filz qui estoit pouvres et n'avoit aultre chose ne industrie de quoy vivre sans quester et mandicquer fors desdits biens, de doubte que lesdits crediteurs eussent demander iceulx biens. Et que pitié et compacion a meu ledit Michel Renel de rayer lesdits noms dudit Jullien Renel en ladite vexelle d'estain et y escripre le nom de ladite Jehanne Oultrequin tendant si possible luy eust esté preserver et garder ladite vexelle d'estain a ladite Jehanne Oultrequin et audit François Renel son nepveu, le tout desquelz biens que a eu ladite Jehanne sont par especes trouvez et ne sont en riens deteriorez que vers lesdits crediteurs eurent demander avoir et recouvrer pour le poyement de leurs doibtes par aultant qu'ilz y peult suffaire, nous supplians etc, et la verificacion au senneschal de Lamballe.

N° 30. (94)

François, par la grace de Dieu roy de France duc de Bretagne, a touz presens et advenir savoir faisons l'humble supplicacion des mere, parens et amys consanguins de Marie Poust, fille de Jehan Poust, femme de Jullien Lemarie marchant demeurant en ceste ville de Nantes en la rue de la barrillerie de l'eaige de vingt cinq ans, a nous receue, contenant que ouict ans a ou environ, icelle Marie feust conjointe par mariaige avecques ledit Jullien Lemarie ouquel mariaige icelle Marie s'estoit bien honorablement troictee jusques a puix quelque peu de temps encza ainsi que cy-apres sera declairé. Et en icelluy leurdit mariaige ont eu pluseurs enffens et entre aultres ung nommé Guillaume, quel estoit de l'eaige de sept ou ouict ans, quel Guillaume, elle et sondit mary avoint en grand amour et dillection aultant ou plus que nul de leur aultres enffens, a raison qu'il estoit le premier nasan de leursdits enffens. Et des environs karesme prenant deroennes pour ce que ledit Marie avoit ung proces avecques maistre Laurens Villecte, (/) notaire et homme de praticque, pour raison d'une piece de terre entreulx contencieuse et que aucuns disoient que ledit Villecte feroit faire cession a sondit mary et le destouyroit par force de proces. Aussi a raison que precedentement ledit Lemarie avoit et prins ou esté associé en la ferme de la troicte de la ferronnerie de cestedite ville de Nantes, quelle ferme encore duroit en laquelle il estoit perdant tout entendement de grosse somme et mesmes que ledit jour de karesme prenant derrener ou le jour precedent, aucun des clers et

serviteurs des casseurs d'acier de cestedite ville voullurent et s'efforcerent par pluseurs foiz faire prandre et executer quelques barres de fer ou acier estantes en l'ouvrouer dudit Jullien Lemarie disans le faire pour deffault de leur baillee quelques deniers qu'ilz demandoit avoir pour leur disnner qu'ilz avoint a coustume avoir ainsi qu'ilz disoient des fermiers de ladite troicte de la ferronerie. Ce que (/) ladite Marie ne vouloit leur bailler disant que sondit mary perdoyt assez en icelle ferme sans luy faire faire (sic) mise ne perte par ailleurs et que eussent a eulx en aller et que d'elle et sondit mary n'auroint aucune chose ce que lesdits clers et serviteurs ne voulloint faire, et par diverses foiz s'efforcerent par ung sergent qu'ilz avoint illecques amené, faire prandre de la marchandie dudit Lemarie. Icelle Marie soy eschauffa et esmeut de telle sorte que des celuy temps, elle qui estoit de nature subgete a fureur a cause que elle avoit et a de ses parens et entre aultres son pere qu'ilz avoint esté et sont par intervalle de temps furieux ou par aultre cause, et a raison que ne peult entendre sesdits pouvres parens et amys eut le cerveau et esprit troublé et souventeffoiz ne scauroit que elle faisoit et disoit et estoit furieuse et hors de sens (/) et propos naturel. Et pour bien le demonstrer, environ le moys de may derrenier, elle estante seule en sadite maison doubla une corde de ficelle de laquelle sondit mary ployoit et lyoit les pemcers d'acier et d'icelle ficelle ainsi doublé feist une forme de cordeau duquel elle s'efforcza et feist son pouoir de soy estrangler tellement que les cicatrices luy en apparoissoient au coul. Et que troys sepmaines apres environ, ainsi que ladite Marie estoit seulz coussez en une mesme chambre en deux divers lictz, ledit Guillaume demanda a sadite mere si elle vouloyt bien qu'il allast coucher avec elle, a quoy luy respondit " venez " et eulx estans oudit lict, entra en fureur et en icelle fureur print ledit Guillaume avec l'une de ses mains a la gorge et la luy estraignit quelque peu voullant l'estrangler. Et sur ce que ledit Guillaume s'escria a haulte voix disant : " ma mere lessez moy ! vous me vouller tuer ou estrangler ! " icelle Marie qui fort aymoist ledit Guillaume le lessa sans aultre mal luy faire. (/) Si est il que ouict jours apres, qui estoit le dimanche penultieme jour de juign derrenier, icelle Marie environ l'heure de ouict heures du matin, elle estante seule en sa maison, pres le cail de la ripviere d'Erdre ou les jeunes enffans d'icelle rue ont a coustume soy aller esbatre, entra en fureur et en icelle fureur sortit hors de sadite maison sur ledit cail et de la s'en alla vers l'eglise Saint-Sourmin de cestedite ville de Nantes. Et ainsi qu'elle estoit pres et en l'entree d'icelle eglise rencontra ledit Guillaume son filz qui ysoit de ladite eglise allant avecques aultres enffens au devant de la procession, auquel Guillaume elle estante en sadite fureur dist : " Guillaume allon a l'hostel votre pere est encore ou lict, il vous demande ! ". Et en l'endroit elle print ledit Guillaume par l'une de ses mains le menant tout droict par la rue, sans aucune rigueur luy faire, jucques a sadite maison et elle et ledit Guillaume entrez en

ladite maison, ladite Marie ferma l'huys de devant d'icelle maison sans touteffoiz le fermer de clef (/) ne couroil par dedans en somme que l'on le pouayt ouvrir de le dehors et mena et conduisit ledit Guillaume au hault de ladite maison et ainsi qu'ilz alloint audict hault de maison pres l'entree de l'huys de la chambre devant, icelluy Guillaume appella ledit Jullien son pere disant par telles parolles : " mon pere levez vous ! va estes vous encores au lict ! ". A quoy ladite Marie respondit que son dit pere n'y estoit point et lors ledit Guillaume dist : " Ha ! ma mere vous me vouller donc tuer ! " et lors celle Marie encore estante en sadite fureur et hors du sens mena ledit Guillaume en la chambre haulte du devant de ladite maison et d'illec le mena en la chambre du derriere d'icelle maison. Et eulx entrez en icelle, print ung couteau moce que illec pres elle trouva sur le relaix de levier de ladite maison duquel couteau elle, plus eschauffee que devant en sadite fureur, coppa la gorge audit Guillaume son filz, qui pour cuider ce empescher print ledit cousteau avecques l'une de ses mains tellement qu'il coppa l'un de ses doiz mais ce neantmoins elle luy couppa la gorge tellement que ledit Guillaume incontinent alla de vie a trespas et en l'instant elle estante en ceste fureur soy presenta aux fenestres du devant de ladite maison ayant ledit couteau en ses mains qui estoit en toute sanglantes. Et pareillement (/) ledit couteau son vissage et aussi sa collerecte et couvrechieff, quelle collerecte ledit Guillaume avoit fangé voullant soy deffendre et empescher que ladite Marie ne l'eust tué, disante et disoit celle Marie a haulte voix a ung nommé Gouppil et ung sergent nommé Belangier et aultres estans sur le pavé pres icelle maison par telles parolles : " j'ay tué mon enffant, je seray pendue ou mise en cartiers ! je le vieulx estre car c'est raison ! venez moy prandre et mener au Bouffay que je soy pendue et mise en cartiers ! " . Et a ce qu'ilz disdrent a ladite Marie que non avoit, leur respondit que si avoit et qu'elle l'avoit tué et coppé la gorge o ledit cousteau que encores elle tenoit en sa main qui apparissoit estre tout sanglant et qu'ilz le veuseissent hors et qu'il estoit tout mort. Et a ce ledit Gouppil et aultres illecques pres estans disdrent a icelle Marie que si elle vouloit qu'ilz allassent veoir ledit enffant qu'il failloit ouvrir l'huys, a quoy ladite Marie respondit qu'il n'estoit pas fermé et a la verité ne l'estoit fors seulement courroigle et incontinent celle Marie descendit et ouvrit ledit huys. Et icelluy ouvert entra ledit Gouppil, ung nommé Jacques Serczier, ledit Belangier sergent et pluseurs aultres en ladite maison en laquelle ilz trouverent ladite Marie tenant en sa main ledit cousteau sanglant comme dit est et ledit Guillaume en ladite chambre mort ayant la gorge coupee et fort sanglant. A l'occasion duquel murtre (/) icelle Marie fut incontinent prinse et constitué prisonnier es prissons dudit Nantes ou encore elle est detenue. Si nous remonstrent lesdits supplians que ledit meurtre a esté commis d'icelle Marie par furiosité, en laquelle fureur ladite Marie a esté et est encores a presant subiecte par intervalle de temps

aussi mesmes que les medecins apres l'avoit visitee esdites prisons par ordonnance de justices de puis ledit meurtre perpetré, ont dit et raporté par leurs sermens. Et neantmoins veullent vers elle noz officiers dudit Nantes proceder en toute rigueur, si nous remonstrent lesdits supplians que icelle Marie est de bonne parenté, appartenante de ligaiges a plusieurs bons et notables personnages ayante plusieurs enffans tant filz que filles et que si vers elle, estoit procedé a rigueur de justice, lesdits enffans, mere, parans et amys d'elle et aussi de sondit mary qui bon marchand et honneste personnaige est, en seroient a james scandallisez et pourroint estre contre de empescher l'avancement desdits enffans et signamment lesdites filles dont a celle cause pourroit ensuyvre inconveniens, si de nostre grace n'est sur ce pourveu, nous suppliant qu'il nous plaise a tout ce que dessus avoir esgard et en contemplacion de la mort et passion nostre sauveur et redempteur (/) Jhesu-Crist avoir compacion et pitié de ladite Marie, sesdits enffans, mere et parent et a icelle Marie impartir noz lettres de grace, remission et pardon dudit cas et crime dessusdit, ensemble toutes les amendes et paines tant corporelles, criminelles que civiles, en quoy a l'occasion d'iceluy cas elle pourroit estre encourue tant envers nous que justice en la reduisant a ses honneurs, vie, estat et bonne renomée tout ainsi que si le dis cas et crime n'eust esté par elle perpetré ne commis, tres humblement le nous requerant. Pourquoi nous, cestz choses considerees, voullans misericorde estre preferee a rigueur de justice, avons de noz grace especial pleine puissance et auctorité souveraine, remys, quicté et pardonné, remettons, quictons et pardonnons par cestz presentes a ladite Marie Poust le cas et crime dessusdit avecques toutes et chacunes les peines tant pugnitions, amandes (/) corporelles, criminelles et civiles. En quoy a l'ocasion dudit cas et crime dessusdit, elle pouroit estre encourue envers nous et justice en la reduisant et restituant, reduisons et restituons par cestz presentes a ses vie et estat, fame et renomée au pays et a ses biens quelzconques non confisque, tout qu'elle estoit auparavant ledit cas advenu et crime s'il jamais ne l'eust commis et perpetré. Pourveu que lesdits mere, parens et amis consanguins prandront ladite Marie en leur garde et detiendront en sorte que aucun inconvenient n'en adviendra cy-apres sur paine de s'en prandre a celuy ou ceul desdits parens qui l'auroit en leur garde, et que ladite Marie presentera en personne cestes noz presentes grace et remission et pardon aux prochains ou secondz plectz generaulx de nostre court et barre de Nantes davant noz senneschal ou alloué qui les expedira nostre procureur dudit lieu a ce present ou deument appellé pour faire veriffication dudit cas et jucques a icelle (/) bien et deument faicte, nous voullons ladite Marie estre detenue prisoniere. Et sur ce imposons sillence perpetuel a nostre procureur et a touz aultres, si donnons en mandement par cesdites presentes a noz amez et feaulx conseillers les gens de nostre parlement en nosdits pays et duché, et a nosdits

senneschal, alloué, lieutenant et procureur dudit Nantes et a chacun si comme a luy appartiendra de cestz noz presentes, grace, remission et pardon faire souffrir et lassade ladite Marie plainement et paisiblement joyr et user, en commectans son corps et ses biens a plaine delivrance mais pour ce luy faire mectre ou donner aucun (?) au contraire si tel est nostre plaisir, sauff en aultres choses nostre droit et l'autruy en tesmoign de quoy et affin que ce soit chose ferme et estable a tosiours, nous avons faict meptre nostre scel a cestedites presentes en laz de soye et cire vert. Donné a Nantes ou moys de novembre l'an de grace mil v^{ct} xxii et de nostre regne l'huictiesme.

N° 31. (95)

François, par la grace de Dieu roy de France duc de Bretagne, savoir faisons a touz present et advenir nous avoir receu l'umble supplicacion et requeste nous faicte des parens et amys consanguins de René Macé, filz de François Macé, de la parroisse de la Chappelle-Hulin ou diocese de Nantes, contenant que auparavant la fin du moys d'aougst derrener, different et debat fut et entremis entre ledit René Macé et ung nommé Gilles Maillart nostre sergent, a raison de ce que ledit Macé reprochoit celuy Maillart d'avoir dit en compagnie grosse que celuy René Macé avoit demandé a son pere pour aller pour luy a la guerre la somme de cinquante escuz, eulx estans pres l'eglise parochial de ladite Chappelle-Hullin le dimanche precedant le jour Saint-Fiacre derrener passé, sur ce que ledit René Macé demanda audit Maillart qui luy avoit dit celles parolles, celuy Maillart luy respondit lors qui ne luy en souvenoit. Sur quoy ledit Macé dist audit Maillart : " vous avez eu plus de quinze jours pour le songer ! " et lors ledit Maillart luy respondit que le pere dudit René Macé le luy avoit dit et sur ce que ledit Macé adverty que ledit Maillart en son absence alloit mal disant de luy oudit bourgc et parroesse (/) dont il estoit natif, en le iniuriant, luy dist par telles ou semblables parolles : " tu dis de moy tout plain de meschantes parolles et me voys iniuriant par les tavernes en ce bourgc de la Chapelle, mais si tu continues et que y hantes guerres je te monsterey qu'il m'en desplaira ! " et evaginerent chacun d'eulx leurs espees qu'ilz avoint a leur costé pour s'entre frapper, ce qu'ilz ne firent pour ce qu'ilz en furent empeschez et departiz sans aultre oultraige ne meschef s'entre faire, dist outre ledit Macé audit Maillart par telles parolles : " si vous hantez plus a la Chapelle, vous prandroy mort ! " A quoy ledit Maillart luy respondit qu'il ne le craignoit riens, et a ledit Maillart par pluseurs foiz dit audit Macé, en parlant de luy et en son absence par telles ou semblables parolles : " par le sang-Dieu, ce taigneux pelle La Ville ne me fera rien mais que je le voye venir, et s'il desgaine jamais espee

sur moy, nous mourons luy ou moy ! Il se faict appeler monseigneur de la Ville la ou il n'a riens ! » Si est-il que depuis tout ce savoir, le second jour de septembre derrenier, ledit René Macé et ledit Gilles Maillart s'entre rencontrerent environ une heure apres medi dudit jour pres le carrefour de la lecterye en ceste ville de Nantes (/) et ledit René Macé venant devers ledit pillory audit lieu de la lecterie, en l'endroit et au devant de la maison Olivier Heart vis-a-vis la maison Estienne Mauleon, se aprocha de luy ledit Gilles Maillart qui luy dist par telles ou semblables parolles : " Monseigneur de La Ville ! L'on m'a dit que vous me menasiez ! » A quoy ledit Macé dist que non faisoit. Sur quoy ledit Maillart luy dist par telles ou semblables : « Par Dieu l'on m'a dict que si faictes ! » A quoy ledit Macé luy dist par parolles semblables : « Par Dieu, ceulx qui le vous ont dit ont menty ! » Et sur ce ledit Maillart dit par parolles de pareil effect : « par Dieu vous avez menty, ne me poignardez point ! » Et en l'endroit ledit Macé dist a plusieurs assistans qui luy feussent tesmoigns des injures que ledit Maillart luy faisoit et qu'il leur souvenesist comme il l'avoit desmenty, et en repectant celuy desmenty par pluseurffoiz dist audit Maillart qu'il s'en allast et qu'il ne le serchoit point en le poussant avec la main, et sur tout ce, ledit Maillart dist audit Macé par telles ou semblables parolles : " quel aller par Dieu, je ne vous crains riens ne mort ne vif ! » A quoy ledit Macé dist audit Maillart que non faisoit il luy et sur celles parolles, (/) ledit Maillart dist audit Macé que il avoit dit que celuy Maillart alloit faire les esplectz a la Chapelle et qu'il luy en poigneroit mais que il ne le craignoit riens. A quoy celuy Macé luy dist par telles ou semblables parolles : " allons ! allons ches le procureur de Nantes, toy et moy et ce villain illec me vient iniuriez ! Viens t'en sur les fossez, je te bapteray en villain ! " Et en l'endroit ledit Maillart dist audit Macé qu'il n'oseroit et qu'il estoit aussi homme de bien que luy et qu'il avoit non Gilles Maillart et que ledit Macé avoit non René Macé, se aprochant ledit Maillart dudit Macé quel faisoit contenance de voulloir aller ches le procureur, disant oultre ledit Maillart audit Macé par telles ou semblables parolles : " par Dieu je ne daigneroys ! Je suys aussi homme de bien que vous ! " Et surtant ledit Macé dit qu'il n'estoit pas vroy et sur ce, ledit Maillart s'aprochant dudit Macé luy dist : " par Dieu vous avez menti ! " Ledit Macé tira ung poignart qu'il avoit desoubz son manteau et marcha ung pas en avant et en donna ung coup d'estoc audit Maillart en la poytrine et surtant ledit Maillart s'escrya disant : " il m'a frappé ! " criant : " a la force du roy ! " Et print ledit Macé au collet, lequel escoup de luy s'en alla en l'eglise des Carmes de Nantes en (/) franchise et a raison dudit coup ledit Maillart moureut et decebda environ demye heure apres et quequessoit en celuy jour. Et doubtent lesdits supplians que vers ledit Macé, quel est fugitif a raison dudit cas, soit procedé par rigueur de justice par nos officiers de Nantes jucques a exterminacion de vie, remonstrant oultre que ledit René Macé estoit et est

gentilhomme et de bonne extraction, bien famé et renommé, pacifique et bon vivant, marié avec damoiselle de bonne extraction, ayant nombre d'enfans, sans jamais avoir esté reproché d'autre mauveix cas digne de reproche, et ledit Gilles Maillart avoir esté en son vivant querelleux, hault parleur et entrepreneur de (*noaise*) et remply d'injures et menasses a ceulx avecques lesquelz il prenoit question, nous suppliant etc. Pourquoi etc, et la verificacion a Nantes. Donné a Nantes ou moys de novembre v^{ctz} xxii.

N° 32. (96)

François, par la grace de Dieu roy de France duc de Bretagne, savoir faisons a touz presens et advenir nous avoir receu l'humble supplicacion et requeste des parens et amys consanguins de Pierres de Kerguiguin, gentilhomme de l'aisge de xxx ans ou environ et de la parroesse de Brech en l'evesché de Vennes, contenant que des environ le temps de dix ou vingt ans dempuis, il y eut pardon et indulgence en la chappelle Notre-Dame de Pitié situé ou bourge parochial de Mendon, auquel lieu estoit assenblez pluseurs gentizhommes et damoiselles et aultres communs peuples de plusseurs parroesses circumvoisines pour gaigner ledit pardon, et ainsi que aucunes damoiselles amprés disgner et environ heure de vespres, elles et aultres gens en leurs compaignies se voullurent retirez et s'en aller, recontrerent ledit Pierres de Kerguiguin au dehors de la maison ou pour lors Jehan Letoux tenoit taverne. Lequel de Kerguiguin, amprés les avoir saluer lesdites damoiselles, les pria d'aller boire en la maison dudit Letoux avecques luy, ce que ne firent a raison de la presse qui estoit en icelle maison. Quoy voyant ledit Kerguiguin fist apporter ung pot de vin pour les festoyer, et apres qu'ilz eurent beu et que ledit de Kerguiguin eut quelque peu convoyé esdites damoiselles et gens de leursdites compaignie (?) prins congé les ungs des autres, s'en retourna ledit de Kerguiguin audit bourge de Mendon, auquel lieu, au devant de la maison dudit Letoux se trouva Jehan Lebleiz de Cretime, de ladite paroesse de Brech, lequel de prime faqt (?) et sans aucun propos ne parolles precedentes pour lors demanda audit Kerguiguin quel reborcement s'estoit qu'il faisoit ausdites damoiselles, a quoy ledit de Kerguiguin luy respondit gracieusement qu'il leur avoit présenté ung pot de vin qu'il avoit poyé et que l'oste ne l'otesse ne luy en demandoit riens, et surtant sans avoir sans avoir (sic) entreulx aultres parolles ne propos, ledit Lebleiz commanza a injurier ledit (/) de Kerguiguin en l'appellant « yvroigne, meschant » et pluseurs aultres rudes parolles, se aprochant de luy en levant la main, et du poign clos frappa ledit de Kerguiguin deux ou troys coups. Quoy voyant, celui de Kerguiguin se mist en deffence et s'entre donnerent l'un a l'autre ung coup ou deux seullement et voyant ledit de Kerguiguin qui pour lors n'estoit que ung jeune enfent de l'aige d'environ saize ou dix-

sept ans et que ledit Lebleiz estoit fort homme et beaucoup plus puissant que luy sans comparson evagina ledit de kerguiguin une espee qu'il avoit au costé et du plact d'icelle espee frapa ledit Lebleiz deux ou troys coups sans aucunement luy donnez coup d'estoc ne de taille et lors se separerent l'un d'avecques l'autre. Et surtant Mathias Bicher qui pour lors estoit soubz cure d'icelle (?) envoya ung nommé Yvon Ylaec dire audit de Kerguiguin qu'il luy eust envoyé son espee de peur qu'il n'eust faict desplaisir audit Bleiz, ce que fist ledit de Kerguiguin en disant qu'il ne demandoit riens audit Bleiz si non qu'il l'eust laissé et incontinant apres, ledit Lebleiz cougnoissant que ledit de Kerguiguin n'avoit point d'espee et qu'il avoit envoyé audit dom Mathias, retourna ledit Lebleiz de recheff audit de Kerguiguin ayant et tenant ledit Lebleiz en sa main, une pierre de laquelle il frappa ledit de Kerguiguin par quatre ou cinq coups ensuyvant l'un l'autre tellement que ledit Kerguiguin fut contrainct se recullez jucques au mur du cimetiere de ladite chappelle et voyant qu'il ne pouoit plus reculer et que ledit Lebleiz le suyvoit touzjours de pres pour le frapper et oultraiger, s'avisa qu'il avoit au foureau de sadite espee estant a sadite espee a sondit costé ung petit cousteau pointu et tranche-pain quel il tira, le levant droict la poincte contre mont tendant constituer en crainte ledit Lebleiz affin de l'empesscher de plus luy faire oultraige et ainsi que ledit Lebleiz s'efforczoit encores frapper d'icelle pierre ledit de Kerguiguin. Iceluy (/) de Kerguiguin, tenant ledit couteau en sa main, donna ung coup de la pointe dudit couteau au bras dudit Lebleiz entre le coude et la main tellement que la pointe dudit couteau fut rompue sans touteffois sçavoir si la pointe dudit couteau luy demourez au bras ou non, et surtant se separerent l'un de l'autre. Et environ ouict jours apres ledit conflict, fut celuy de Kerguiguin prins et constitué prisonier en noz prinsons d'Auray pourtant que celuy Lebleiz estoit allé de vie a deceix. D'esquelles prinsons d'Auray fut ledit de Kerguiguin retiré et comme clerc rendu es prinsons de l'official de Vennes ou il fut par long temps detenu sans avoir mis fin ne yssue ains ung aultre prisonnier trouverent moyen durant ung cours de peste qui estoit audit Vennes de yssur et s'en aller desdites prinsons et s'en alla ledit de Kerguiguin a Rome ou il s'est tenu quelque temps. Et il y estant, obtint de nostre saint-pere le pape quelques lettres de grace affin d'avoir et obtenir benefice ecclesiasticque, sans en avoir depuix voulu ayder ne jouyr jucques a present. (Oultre nous ont remonstré lesdits supplians que ou moys d'aougst derroin, ung nommé Olivier de Trevegat et Richart de Louenan qui avoint une barque equippee pour debvoir aller en guerre contre noz ennemys demanderent audit de Kerguiguin s'il vouloit aller ovecques eulx a la guerre et sur ce qu'il leur respondict qu'il estoit povre compaignon et qu'il n'avoit point de harnois pour lors pour y servir, celuy de Trevegat luy fist promesse de luy fournir de ce qu'il eust eu a besoigner et surtout luy promist ledit de Kerguiguin de y aller. Et

depuis oudit moys d'aougst se trouva ledit de Kerguigin avecques ledit de Trevegat pour ayder a apparer ladite barque et aussi se y trouva ledit Richart de Louenan. Et apres qu'ilz eurent mis icelle barque en ordre et preste a voyager, se trouverent le landemain de la feste de my-aougst derroin audit bourgc de Baden ceulx de Trevegal (/) et Richart de Louenan acompaignés de seix aultres compaignons de Carnac. Et quant il fut pres de nuict, ledit Richart appella troys desdits compaignons et leur dist qu'il failloit aller (?) avecques le basteau, ce que deffaict ilz firent. Et apres qu'ilz furent sur mer, celluy Richart leur commanda y mener ledit basteau droict a Saint-Goustan pres la ville d'Auray leur disant qu'il failloit aller querir une piece d'artielerie qu'il avoit audit lieu de Saint-Goustan, ce que deffaict ilz firent et eulx arivez audit lieu de Saint-Goustan fist iceluy Richart conduire ladite barque jucques au bort du navire de Jehan Lelmer disant audit de Kerguigin et aultres compaignons que on leur avoit presté une piece d'artielerie qui y estoit et commanda ledit de Louenan ausdits compaignons qu'ilz eussent prins ladite piece d'artielerie et icelle mis en sondit bateau et qu'il les en eust garantiz, ce que deffaict ledit de Kerguigin et aultres compaignons firent, pensant que ledit Richart disoit verité et menerent ladite piece d'artielerie avecques eulx et print lesdits de Trevegat et Louenan ung basteau dudit lieu de Saint-Goustan (/) pour aller apres ledit de Kerguigin et aultres compaignons qui emenoit (*ladite*) piece d'artielerie et menerent ung garson avecques eulx pour ranger ledit bateau. Et lesdits compaignons arivez pres du manoir de Toulenguern situé en ladite paroesse pres ledit bourgc de Baden, ledit Richart de Louenan fist gecter ladite piece d'artielerie en la mer et dedans deux ou troys jours apres, ledit de Kerguigin et partie des aultres compaignons de ladite barque furent a raison de la prinse de ladite piece d'artielerie, prins et constituez prisonniers en noz prisons dudit lieu d'Auray par noz officiers dudit lieu, fut interrogé touchant ladite prinse de piece d'artielerie ledit de Kerguigin, lequel incontinant dist et confessa liberallement avoir esté presant a icelle prinse, leur monstra le lieu ou avoit esté gectee ladite piece d'artielerie et illecques deffaict fut trouvee et rendue audit Lelmer). Mesmes nous ont lesdits supplians remonstré que lors comme noz officiers dudit lieu d'Auray ont voullu proceder vers icelluy de Kerguigin et luy remectre sur les cas cy-devant declerez, ledit de Kerguigin (/) craignant rigueur de justice dist qu'il estoit clerc et se voullut ayder d'une lectre de courronne et ung sien frere jovigneur pareillement nommé Pierres de Kerguigin avoit obtenue pansant que ce feust la sienne, touteffoys apres que il eut bien regardé le dabte d'icelle lectre cougnoessant par ce n'estoit la sienne, ne s'en voullut ayder et dist a nosdits officiers d'Auray, lesqueulx neantmoins tant a raison desdits cas sur declairez que de la precedente ladite lectre de courronne qui n'estoit la sienne voullant proceder a rigueur de justice vers luy et pugnicion

corporelle. Oultre nous ont lesdits supplians remonstré que auparavant lesdits cas advenuz, ledit de Kerguiguin qui est povre jeune gentilhomme, fort et puissant pour servir a la chose publique, de lignage a plusieurs gentizhommes de cedit pays et duché et n'avoit faict commis ne esté actainct ne convaincu d'aucun aultre mauveix ne villain cas digne de reproche ains dempuix son jeune aige s'est toujours bien et honnestement trecté et gouverné sellon son estat, nous supplians lesdits exposans qu'il nous plaise sur ce que dessus avoir esgart desdits cas et crime dessusdits, luy impartir noz grace, remission et pardon tres humblement le nous requerans lesdits parens et amys. Pourquoi etc, et la verificacion au senneschal d'Auray. Donné au moys de Novembre.

N° 33. (97)

François, par la grace de Dieu roy de France duc de Bretagne, a touz presens et advenir savoir faisons nous avoir receu l'humble supplicacion des parens et amys consanguins de Jehan Portier laboureur de la paroesse de Corseul ou diocese de Saint-Malo a presant detenu prisonnier es prinsons de nostre court et jurisdiction de Dinan, contenant que le lundi vingt ouictiesme jour d'octobre mil v^{ctz} xxi, ledit Portier, ung nommé Yvon Leroy et Jehan Thomas s'en allerent en ladite ville de Dinan en la maison d'un nommé Jehan Lohuer ou ilz beurent assemblement et tellement qu'ilz estoit fort surprins de vin. Et apres avoir ainsi beu, sortirent de ladite maison et prindrent chemin a s'en aller chaicun d'eulx a sa maison hors ladite ville de Dinan, et eulx yssuz hors ladite ville et estans hors la porte de l'hostellerie, trouverent ung nommé Pierres Lange acouché sur la terre au dehors de ladite porte, lequel estoit fort yvre et emboité de vin qui dist audict audit (sic) Portier qu'il luy eust ayde a s'en aller et qu'il estoit bien yvre. A quoy dist et respondit ledit Portier par telles parolles : " mon amy ! allons nous en ensemble ! " et sur ce le print ledit Portier par soubz le coude pour le conduire et emmener a sa maison qui estoit distante dudit Dinan d'environ demye lieue et celle dudit Portier d'environ une lieue et comme lesdits Portier et Lange (/) furent esloignez de ladite porte, ledit Portier ayant soubz son coude ung pain, lequel il avoit achapté en ladite ville de Dinan, ledit Lange demanda audit Portier qu'il luy eust baillé ledit pain disant qu'il estoit a luy, ce que differa faire ledit Portier et neantmoins ne laissa ledit Portier de mener et conduire ledit Lange le droict chemyn et jucques en l'endroit d'une piece de terre nommee le clos senestre distante de ladite ville de Dinan d'environ deux troictz d'arc. Auquel lieu, rencontrerent ung nommé Gilles Cochart avecques lequel ledit Lange se arresta quelque espace de temps, et voyant ledit Portier qu'il estoit presque nuict et apres soulail recoust et qu'ilz estoit encores loign de leurs maisons, et considerant l'estat en quoy estoit ledit Lange,

qui estoit yvre comme devant est dict, de peurs quiz eussent esté retardez par ledit Cochart fist signe ledit Portier audict Lange qu'il s'en feust allé, ce que fist ledit Lange et se retira ledit Acochart pour s'en aller a sa volonté. Et apres que ledit Acochart se fut retiré, incontinent et bientost apres, ledit Jehan Thomas lequel les suyvoit de pres, les acoustent en l'endroit de la barriere du lieu nommé le coulombier et marcherent ensemble tenans et continuans leur chemyn jucques adce qu'ilz furent sur la chaussee de l'estangt et vivier (/) dudit lieu du coulombier distant de ladite barriere ung grot de pierre et de ladite ville de Dinan et demy quart de lieue. Et eulx estans sur ladite chaussee, de recheff ledit Lange, comme tout esmeu et couroucé, demanda audit Portier qu'il luy eust baillé ledit pain qu'il luy avoit auparavant demandé, ce que reffuza faire ledit Portier, tant pour raison que ledit pain estoit a luy aussi qu'il craignoit que ledit Lange n'eust sceu le porter et qu'il luy feust tombé a raison qu'il estoit ainsi emboité. Et lors s'efforza ledit Lange prendre par force ledit pain et le oster audit Portier disant qu'il auroit icelluy pain et qu'il estoit a luy et non audit Portier, a quoy resista ledit Portier et empescha que ledit Lange ne luy eust osté audit Portier, disant que ledit pain luy appartenoit et non audict Lange. Et sur ce que ledit Lange s'efforza encorre de recheff prendre et oster iceluy pain audit Portier, ledit Portier cuydant ruser de luy ledit Lange et sans avoir aucune intencion de luy mal faire poussa celuy Lange, lequel ainsi emboité, a celle occasion beraula et tomba oudit estang et vivier de coulombier et incontinent cheut au fons de l'eau. Et apres y avoir esté quelque momant et sans ce que ledit Portier le peust veoir, retourna sur l'eau loign de la rive et bort de la chaulsee dudit estang et vivier d'environ cinq ou six piedz et lors que ledit Portier le aperceut retourné sur ladite eau, voyant que ledit (/) Lange estoit en dangier d'estre noyé, se print celuy Portier a cryer a haulte voix: " a l'ayde ! " et despouilla sa robe et la gecta audit Lange en l'eau, cuydant qu'il eust prinse pour luy donner secours et le tirer hors ledit vivier, ce que ne peult faire ledit Portier pour la distance qui estoit entre luy et ledit Lange et la profondeur de l'eau qui estoit en icelluy endroict. Auquel cry que fist ledit Portier, ne se trouva personne pour luy donner ayde et mectre ledit Lange hors ledit estang et vivier fors ledit Jehan Thomas qui estoit avecque eulx. Lequel Thomas voyant ledit Lange estre soubz l'eau et noyé sans y pouoir donner aucun remede, s'en alla apres ledit Thomas quel le acousuyvit bientost apres et s'en allerent assemblemens. Nous remonstrans lesdits supplians que entre lesdits Portier et Lange decebdé, n'y avoit eu james auparavant ledit cas advenu aulcun debat, hayne ne innimité ains grande conversation et amitié. A raison duquel cas tend le procureur de notredite court et juridicion de Dinan, par ses conclusions, a pugnicion corporelle vers ledit Portier, lequel est povre homme de labour, non rumoureux ne debatiff, chargé de femme et enffens qu'eulx luy convient nourrir par sondit labour jaczoit que

auparavant il aict esté de bon rest et gouvernement sans jamais avoir esté actainct ne convaincu d'aucun aultre villain cas, blasme ou reprouve, nous supplians qu'il nous plaise sur ce luy impartir noz lettres de grace, remission et pardon tres humblement le nous requerant. Pourquoy etc, et la verificacion a Dinan. Donné ou moys de decembre, signee.

N° 34. (98)

Remission pour Guillaume Le Mareschal dont la teneur ensuist :

François, par la grace de Dieu roy de France duc de Bretagne, a touz presens et a venir nous avoir receue l'humble supplicacion et requeste des parens et amys consanguins de Guillaume Le Marechal a present prisonier, detenu en noz prisons de Kerahes, exposantz que le quart jour de novembre derroin, auquel jour y avoit foire en nostre ville (/) dudit Kerahes, ledit suppliant estoit en la rue au devant de la maison de ses feu pere et mere, environ deux heures de nuyt, il aperceut ung nommé Yvon Penguilly, nepveu dudit exposant, filz de sa cousine germaine ayant en ses mains une espee a deux mains, de laquelle il avoit batu et excédé aucuns en celle heure en la cohue dudit Kerahes. Et voyant ledit exposant, que ledit Penguilly s'efforczoit marcher vers luy et craignant qu'il l'eust oultraiger, a raison qu'il estoit fort esmeu tant de vin qu'il avoit excessivement beu que de la baterie qu'il avoit faicte en celle cohue, et aussi qu'il estoit moult querelleux et debatiff et que auparavant celluy jour avoir menassé ledit Le Marechal et icelluy deffyé de se combatre avecques luy, trouva illecques celuy Le Marechal une petite pierre et icelle rua droit a sondit nepveu sans intencion de le fraper ny blecer ains le faire riser et destourber de plus baptre et exceder les passantz et rapassantz de ladite espee a deux mains qu'il tenoit mesmes ne l'eust sceu veoir ne choisir a raison qu'il estoit nuyt. Toutefois de mauvaise fortune fut ledit Penguilly actainct d'icelle pierre en la teste et sur le front ainsi que ledit Marechal a dempuis ouy dire. Et bientost apres survindrent en sa maison aucuns des officiers de la justice dudit Kerahes qui firent audit Le Marechal jurer et cautionner de se trouver a ses jours (?). Quel dempuis s'en alla a ses affaires par aucuns jours et a son retour il, averty qu'il avoit esté appellé en jugement et jugé defaillant, se rendit de luy mesmes en notredite court de Kerahes devant nostre sennéschal d'icelle qui le constitua prisonier en nosdites prisons de Kerahes. (/) Et ouict ou neuff jours d'illecques ensuyvans ledit coup, par faulte de bon appareil, gouvernement ou aultrement ledit Penguilly alla de vie a deceix a l'ocasion dudit coup. Sur lequel cas a esté ledit Le Marechal actusé par nostre procureur dudit Kerhaes et sur l'alegance qu'il fist d'estre cleric privilegié et la pencion de sa lettre de tonsure, fut constitué prisonier et encore y est. Si vous remonstre lesdits suppliants que ledit deffunct Penguilly, nepveu dudit Marechal, estoit mal condicionné,

yvroign, esclandiff et querelleux, jeune homme a marier, avoit auparavant par environ le temps d'un moys dessus, environ la nuyt clouante ledit Le Marechal son oncle qui estoit en une fenestre d'une chambre haulte d'icelle maison luy disant qu'il feust descendu pour se combatre o ledit Penguilly quel avoit une espee nue en sa main proferant parolles de tel effect les adresant audit Marechal son oncle : "descens si tu es homme de bien et sortz dehors avecque ton espee ! » A quoy ledit Marechal respondi audit Pengilly que s'il feust homme de bien il ne feust a celle heure a rubler le pavé et jecta lors ledit Le Marechal une petite portion d'une tuyle rompue qu'il trouva parmy le pavé d'icelle chambre sur ung ballet d'ardoise ataché a ladite cohue soubz laquelle estoit ledit Penguilly l'advertissant de soy retirer a la maison sans toutesvoyes luy toucher. Si vous remonstrent lesdits supplians que ledit Marechal est povvre marchand, vivant de traffic de sa marchandie, justement (/) et loyaulment sans jamais avoir esté reproché d'aucun mauvais cas auparavant celui cy-dessus, nous supplians lesdits exposantz qu'il nous plaise a tout ce que dessus avoir esgard et impetrer et octroyer audit Le Marechal d'iceluy cas, noz lettres de grace, remission et pardon tres humblement le nous requerant. Pourquoi etc, et la vérificacion a (). Donné a Nantes ou moys de decembre V^{ctz} XXII, signé de Beaucouché, et scellee en cire vert en laz de soye.